

Yaubada wasana: Buka Hauhauna tupwana

Saliba

sbe

The Message about God: Half of the New Testament

Saliba Language



Wycliffe Bible Translators International, Inc.

Half of the New Testament in the Saliba Language

Milne Bay Province, Papua New Guinea

ISO 639-3 language code: sbe

Illustration on front cover by Darwin Dunham © United Bible Societies, 1989
Nairobi, Kenya. Used with permission

© 2017 Wycliffe Bible Translators, Inc.

ISBN: 9980 0 4129 3

Printed in Ukarumpa, Papua New Guinea, 150 copies

Buka ta luwana ne unai kulikulina

| | |
|--|------------|
| Hedehedede bagubagunadi | V |
| Buka ta kaniyona | V |
| Hedehedehaisagusagu ka kulidi wa Buka ta unai..... | V |
| Idohagina kalina Saliba ta hasili..... | V |
| Preface..... | VII |
| Buka Tabuna: Buka Hauhauna bukadiyao teina buka ta unai meta teina: | |
| Yesu wasana Mataiyo ye kuli wa (Mataiyo) | 1 |
| Yesu wasana Maleko ye kuli wa (Maleko)..... | 41 |
| Yesu wasana Yowane ye kuli wa (Yowane) | 65 |
| Apostolo yodi paisowa bukana (Apostolo)..... | 95 |
| Paulo yona leta ekalesiya Galatiya unai taumiya udiyedi (Galatiya) | 133 |
| Paulo yona leta ekalesiya Kolose unai taumiya udiyedi (Kolose)..... | 140 |
| Paulo yona leta ye lau Taitasi unai (Taitasi) | 145 |
| Paulo yona leta ye lau Pilemona unai (Pilemona) | 148 |
| Kulikuli ye lau Hebelu tamowaidi udiyedi (Hebelu)..... | 150 |
| Yamesi yona leta (Yamesi)..... | 163 |
| Yuda yona leta (Yuda)..... | 168 |
| Buka Tabuna hedehededenah hekadiyo hedehededenahem salahadi..... | 170 |
| Tano tautaudiyao | 176 |
| Isalaela tanona Yesu Keliso yona huyaena | 176 |
| Paulo yona kadau bagubagunana..... | 177 |
| Paulo yona kadau helabuina | 177 |
| Paulo yona kadau hehaiyonana..... | 178 |
| Paulo yona kadau ye lau Loma | 178 |

Hedehedede bagubagunadi

Buka ta kaniyona

Teina buka ta unai Buka Hauhauna unai buka hisa ta kulibuidiko wa meta ka kulidi, siya ede: Mataiyo, Maleko, Yowane, Apostolo, Galatiya, Kolose, Taitasi, Pilemona, Hebelu, yo Yamesi.

Buka ta ka ginauli Saliba dubudiyao yodi, bena tapwalolo yo dubu koikoigogodiyao hekadiyo udiyedi se hepaisowa.

Taba teina buka ta ye saguida na Yaubada kabina ta katanamwanamwa yo ta gadosisikaliliyei! Lautoki maudoina ta mosei Yaubada Tama, Natu yo Yaluwa Tabuna!

Hedehaisagusagu ka kulidi wa Buka ta unai

Teina buka ta unau kulikuli hekadiyo ka kulidi, bena se saguigo buka ta yom nuwatulobaina unai.

- Buka hekadiyo kabahetubudi ne udiyedi meta “Buka hedehedehemasalahana” ka kulidi.
- Pepwa se bado na gunidi ne unai hedehedehemasala ka kulidi. Udiyedi meta hedehedede pilipilidi yo ginauli hekadiyo tamowai se bado nige kabidi se kata ne ka hedehedehemasalahadi. Yo hinage, ena tausibasiba nige se nuwakesega lausoisoi hesau kaniyona mamohoina unai, kabo hinage gunikuli ne unai ka kulihemasalahaha. Lausoisoi udiyedi hekihekinoidi kadi kao doha teina: *
- Buka ta kabagehena ne unai kabo kulikuli hesau ka tole, iya ede *Buka Tabuna hedehededenah* hekadiyo hedehedehemasalahadi. Tenem tupwa ne meta sola nige ka kitasipwahegehe, na buka ta unai ka kulinonogi. Kwa hasili, na ena kwa henuwa, kabo hinage ka tole huyana Buka Hauhauna maudoidoina ka ginauli.
- Hinage buka ta kabagehena ne unai tano tautaudi hekadiyo ka kulidi: Isalaela tanona Keliso yona huyamiya tanoubu ta unai wa, yo Paulo yona kadau.

Na teina buka ta unai, tautau meta nige ka kulidi, na Buka Hauhauna maudoidoina unai kabo ka toledi.

Idohagina kalina Saliba ta hasili

Leta kalina Saliba unai, yo idohagina ta hasilidi

Ena ku hasili ku laoma teina, kabo Saliba hasihasilina kabina ku katako. Na inai kabo leta hekadiyo mo yoda katakataidi ne ya hedehedehemasalahadi.

Bagubagunaena bena ta kitalau “vowels” udiyedi (Saliba unai hesadi sola nige ta hineli): A, a doha *labalaba*; E, e doha *lelehi*; I, i doha *lisilisi*; O, o doha *lologe*; U, u doha *luluhi*.

Ena “vowels” labui ta kulilabulabuiyedi, doha *lau* yo *baela* yo *niu* yo *suisui* yo *koi*, meta kabo ta katailabulabuiyedi, na tabu hesau ta hasilikamposi doha Dimdim hasihasilidi.

Na ena “vowel” ta kuliheaboloidi, doha *aa*, *ee*, *ii*, *oo*, *uu*, kabo ta hasiliniulidi. Kulikuli ta meta ma kaniyodi, doha “*Aa!*” meta leta *a* ne ta niuli, na kaniyona ede ta talam. “*Uu!*” kaniyona ede kedaloja, yo ta wane “*Oo!*” huyana ta siliyata. Bena ta kaikewanamwanama, matauwuna “*Aa!*” yo “*a'a*” meta udoi: “*a'a*” kaniyona ede nige ye bida.

Kabo ta kitalau “consonants” udiyedi. Siya katakataidi meta gonogonowana doha Dimdim unai: *b*, *d*, *g*, *h*, *k*, *l*, *m*, *n*, *p*, *s*, *t*, *w*, *y*. Saliba unai ta kataidi ede: *ba*, *da*, *ga*, *ha*, *ka*, *la*, *ma*, *na*, *pa*, *sa*, *ta*, *wa*, *ya*.

Iyamo leta hekadi nige ta lobaidi Dimdim unai: *mw doha mwata, pw doha pwalawa, bw doha bwanaluwa, kw doha kuateya, gw doha gwali*, yo hesau'uyo ta lobai ta kuli ' na ta katai doha teina hedehedede ta udiyedi: *po'opo'o yo he'a'a*. Leta ta hinage ta kuli hedehedede hekadiyo udiyedi, doha *hai'uyoi yo ka kulokulolo'usi yo se hai'iya'iyala'uyoidi yo tau'iyala*. Na hedehedede kabahetubudi udiyedi taba nige ta kuli.

Kalina Saliba unai leta leleina doha teina: *a, b, d, e, g, h, i, k, l, m, n, o, p, s, t, u, w, y*.

Hedehedede hisahisadi mo meta kulikulidi yo katakataidi udoi

Buka ta yom huyahasilina hedehedede hekadi nuwana bena huya badobado yom katakataidi ne udoi, nige doha kulikuli ne. Teina unai ta hedede ta wane: Ye namwa mo taba yoda bukahasili unai mayadai badobado yoda hedehedede daguguna ta hasiliwatani.

- Hedehedede hesau katakataina udoi'udoi meta "ku". Hekada ta wane, "ku", hekada ta wane, "ko", hekada ta hekubwa na ta wane, "u", na hekada'uyo ta wane "o". Taba ku bom yom gadosisi unai ku kataei.
- Hinage kulikuli ta unai Yaubada Natuna hesana ta kulikuli Yesu. Iyamo hekada ta katai ede "Yesu", na hakada ta wane, "Yeisu", meta gonowana, nige laugagayona.
- Yo huyana hedehedede doha hai'uyoi ta hasilidi meta gonowana ta katai ta wane, "haiyoi".
- Yo ena kulikuli unai ku hasili kagu kaha na huya badobado yom katakataina bena "kaukwaha", meta hinage gonowana.

Hedehedede lohalohadi

Kalina Saliba unai hedehedede se bado se kubwa, na hekadiyo katulohadi. Matauwuna ede hedehedede kubwakubwadiyo ta tubeidi na udiyedi kabo yoda nuwatu ta hedehedemasalanamwanamwaei. Doha teina:

- ye hedehedemasalanamwanamwaedi
- kwa kitasipwainamwanamwaei'uyoigomiu
- ku tolehedudulaimwamwayauyei

Preface

This book contains Matthew, Mark, John, Acts, Galatians, Colossians, Titus, Philemon, Hebrews, James, and Jude.

The Saliba language is spoken by about 2600 to 2900 people who mostly live on the Islands of Sariba and Rogea and the surrounding area, in Milne Bay Province, Papua New Guinea.

May it become a blessing to all who read it and who hear it read, and may it lead many people to a deep love for Jesus Christ. To God be the glory!

Yesu wasana Mataiyo ye kuli wa

Yesu Keliso kana kulutubuwao
(Luka 3:23-38)

- 1** Teina ta Yesu Keliso kana kulutubuwao.
Abelahama unai ye hetubu ye dobi Dawida iya wasawasa, na kabo ye dobi ede Yesu unai.
- 2** Abelahama natuna Isako,
Isako natuna Yakobo,
Yakobo natuna Yuda ma kana kahao.
- 3** Yuda natunao Pelesi yo Sela, sinadi ede Tamala.
Pelesi natuna Heselona,
Heselona natuna Lama.
- 4** Lama natuna Aminadaba,
Aminadaba natuna Nasona,
Nasona natuna Salamona.
- 5** Salamona natuna Bowasi, na sinana ede Lahaba.
Bowasi natuna Obedi, sinana ede Luti.
Obedi natuna Yese,
- 6** Yese natuna Dawida, iya ede wasawasa.
Dawida natuna Solomona, sinana ede Bateseba, iya meta Ulaiya kwabulina.*
- 7** Solomona natuna Lehobowama,
Lehobowama natuna Abiya,
Abiya natuna Asa.
- 8** Asa natuna Yehosapata,
Yehosapata natuna Yeholama,
Yeholama natuna Usiya.
- 9** Usiya natuna Yotama,
Yotama natuna Ahasa,
Ahasa natuna Hesekiya.
- 10** Hesekiya natuna Manase,
Manase natuna Amona,
Amona natuna Yosiya.
- 11** Yosiya natuna Yekoniya* ma kana kahao. Siya yodi huya unai Babeloniya yona tau'iyala se laoma Yudeya tanona tamowaidiyao se haidi se laedi Babeloniya.
- 12** Na muliyena kabo Yekoniya natuna Salatiyela,
Salatiyela natuna Selubabela.
- 13** Selubabela natuna Abiuda,
Abiuda natuna Eliyakima,
Eliyakima natuna Asowa.
- 14** Asowa natuna Sadoka,
Sadoka natuna Akima,
Akima natuna Eliuda,

15 Eliuda natuna Eleyasala,
Eleyasala natuna Matana,
Matana natuna Yakobo,
16 Yakobo natuna Yosepa.

Yosepa mwanena Maliya. Maliya natuna ede Yesu, iya hesana ta katai ede Keliso.

17 Unai, Abelahama kana isimilitao ye dobi Dawida unai meta isi saudoudoi-hasi (14), yo Dawida unai ye dobi huyana se laedi Babeloniya, isidiyao meta saudoudoi-hasi (14), na kabo ye dobi Keliso unai meta hinage isi saudoudoi-hasi (14).

Yesu Keliso huyalabasina
(Luka 2:1-7)

18 Yesu Keliso huyalabasina wasana ede doha teina: Maliya Yesu sinana se hededehepatulaei Yosepa unai, na sola nige se miyakesega, na ye masalaha na kabina se kata meta Maliya ye diyaka Yaluwa Tabuna logulogunaena.

19 Na Yosepa meta tamowai namwanamwana, na nige ye henuwa Maliya ye hemwadine tamowai matadiyena. Unai yona nuwatu bena wadawadamyena ye inawasei.* **20** Sola ye nuwanuwatu, na Guiyau yona anelu ye laoma kenosuwaiyena ye hededelau unai ye wane, "Yosepa Dawida natuna,* tabu ku matausi na Maliya ku tawasolai. Iya natuna meta Yaluwa Tabuna unai ye tubuma. **21** Iya kabo natuna loheya ye labasi, na hesana kabo ku tole Yesu,* matawuwuna iya boda Isalaela yodi yababa udiyedi kabo ye gilihaidi."

22 Ginauli maudoidi ta se tubu bena Guiyau yona hedehedepeloweta kawanaena ye hededenonohaiyako wa ye hemamohoiei:

23 "Hasala nuwanuwaspuna kabo ye diyaka, na kabo natuna loheya ye labasi. Iya kabo hesana ede Emanuwela" (Aisaiya 7:14)

Emanuwela kaniyona ede "Yaubada maiyada".

24 Yosepa ye kenotolo ede Guiyau yona anelu yona hedehedede wa ye lauwatani na Maliya ye woyaiyama yona magaiyena ye kitahetete. **25** Na sola Maliya ma nuwanuwaspuna ye lau ee kana siga natuna ye labasi. Na Yosepa hesana ye tole ede Yesu.

1:6 Dawida yo Bateseba wasadi ku hasili 2 Samuwela 11-12 unai.

1:11 Yekoniya hesana hesau ede Yehoyakina.

1:19 Unai yona nuwatu bena wadawadamyena ye inawasei: Dius yodi kabikabi unai waihiu se hededehepatulaei tau hesau unai se kita doha se tawasola, unai tamowai matadiyena Maliya meta ye ganawali. Na Yosepa meta laulau dudulaidi tamowaina, ede nige gonowana Maliya ye tawasolai, matawuwuna ye ganawaliko. Na iyamo nige ye henuwa bena Maliya ye hemwadinekaliliyei tamowai matadiyena, unai ye nuwatu bena kabo wadawadamyena ye laugabaei.

1:20 Dawida meta Yosepa kana mumuga, na Dius yodi hedehedede ede Dawida natuna.

1:21 Yosepa kaniyona meta Yaubada tauhemaulida.

Tamowai sibasibadiyao teha kaluwabu unai se laoma

2 Yudeya magaina gagilina hesau hesana

Betelehema unai Yesu se labasi, Heloda* yona huyawasawasa unai. Na tamowai sibasibadiyao kipwala taukitahekasadi teha kaluwabu unai se laoma ee Yelusalema unai se lage,² na se henahenamai se wane, "Yudeya yomi wasawasa hauhauna se labasiyako wa, iya ede haedi? Yona huyalabasi kipwalana teha kaluwabu unai ye sae ka kita, ede ka laoma ta bena iya ka taba'ohui."

³ Heloda wasawasa hedehedede ta ye lapui meta ye siliyata, unai nuwana ye modekalili, yo Yelusalema tamowaidi maudoidi hinage. ⁴ Na taukitalasam tauwoyaidi yo laugagayo taulauhekataedi ye yogagogoidima na ye henamaiyedi, "Haedi kabo Keliso se labasi? Na peloweta beyabeyadi yodi kulikuli udiyedi meta saha se kuli?" ⁵ Na se wane, "Betelehema unai, matauwuwuna ede peloweta ye kulinonohaiyako ye wane,

⁶ 'Na kowa, Betelehema Yudeya tanona* unai, kowa nige ku dobikalili Yudeya magaidiyao udiyedi, matauwuwuna kowa kalimyena kabo tauwoyawoya ye laoma na yogu tamowai Isalaela ye kitahetetedi.'"

(Maika 5:2)

⁷ Na kabo Heloda tamowai sibasibadiyao wa ye yogahesuwaladi na ye henamaiyedi kipwala wa yona huyamasalaha mayadaina mamohoina bena kabina ye kata. ⁸ Na kabo ye hetamalidi se lau Betelehema yo ye wane, "Kwa lau wawaya ta kwa loyanamwanamwaei. Ena kwa lobai kabo kwa uyoma yogu kwa hedehedenamwanamwa, na kabo yau hinage ya laowa unai ya taba'ohu."

⁹⁻¹⁰ Wasawasa wa kalinana se lapui na kabo se lau, na kipwala wa ye woya'useidima wa se kita'uyoi meta se gwauyalakalili. Na ye kedabagunaidi ye lau wawaya wa yona kabamiya wa unai. ¹¹ Se mwalaesae numa kalona wa unai na wawaya wa ma sinana Maliya se kitadi, se tulibono yo wawaya wa unai se taba'ohu. Yodi kainauya se haidi na se kainauyaidi, gole yo mulamula panepanedi labui meta inisenisi yo mulo.*

¹² Na kabo kenosuwayiyena Yaubada ye hedehedelau udiyedi tabu se uyo Heloda unai. Ede keda hesau se hai na se uyo yodi magai.

Yosepa ma mwanena yo natudi se wasabu se lau Aikupito

¹³ Tamowai sibasibadiyao wa se dahalaiko, na kabo Guiyau yona anelu kenosuwayiyena ye taumasalaha Yosepa unai ye wane, "Ku tolo wawaya ta ma sinana ku woyaidi kwa wasabu kwa lau Aikupito. Menai kabo kwa miya ye lau ee kana siga ya hededelaowa'uyo. Matauwuwuna Heloda wawaya ta ye wasewasenei bena ye unui." ¹⁴ Ede boniyaiyena Yosepa ye tolo na wawaya wa ma sinana ye wasabuyedi se lau Aikupito. ¹⁵ Unai se miya ye lau ee Heloda ye boita. Teina unai Guiyau yona hedehededepeeloweta saha ye hededenonohaiyako wa ye laoma ye mamohoi:

"Aikupito unai natugu tau ya yoganei'uyoiyama."

(Hoseya 11:1)

Heloda yona tau'iyala wawayao se unuidi

¹⁶ Heloda wasa ye lapui meta tamowai sibasibadiyao wa iya se lupoi, unai ye kouyalayalakalili. Ede yona tau'iyala ye hetamalidi se lau Betelehema maudoina unai wawayao tatao yodi bolimai labui sola nige se haidi maudoidi se unuidi. Matauwuwuna ede tausibasiba wa ye henamaiyedi na kipwala yodi huyakitana wa unai ye laoma meta sola nige bolimai labui ye lobai. ¹⁷ Teina unai peloweta Yelemayia saha ye hededyako wa ye laoma ye mamohoi, ye wane:

¹⁸ "Kalina lakilakina Lama* unai ye laoma:

nuwayababa yo doulakilaki daguguna.

Lahela* natunao sabidi ye dou na nige ye henuwa nuwana se hededehtalu, matauwuwuna ede natunao se boitako."

(Yelemayia 31:15)

Aikupito unai se uyoma Isalaela

¹⁹ Heloda yona boita mulinaena, Aikupito unai Guiyau yona anelu kenosuwayiyena ye taumasalaha Yosepa unai ²⁰ ye wane, "Ku tolo wawaya ta ma sinana ku woyaidi kwa uyo Isalaela tanona unai, matauwuwuna wawaya ta bena tau'unuina wa se boitako." ²¹ Unai Yosepa ye tolo wawaya wa ma sinana ye woyaidi na se uyo Isalaela. ²² Na wasa ye lapui meta Heloda natuna Alekelau iya tamana lauhedamaina Yudeya yodi wasawasa, unai ye matausikalili na nige ye henuwa ye lau Yudeya. Na kenosuwayiyena hedehededehebasiba ye haidi unai ye lau Galili ²³ na magai hesau hesana Nasaleta unai se miya. Unai peloweta yodi hedehedede hesau hinage ye laoma ye mamohoi:

"Iya kabo hesana se katai Nasaleta tauna."

2:1 Heloda wasawasa ye hetahetalusei ta meta iya Heloda bagubagunana, hesana se katai ede Heloda Lakilakina. Iya mulina ne unai Heloda hekadiyo se hemala wasawasa meta iya kana isimilitao.

2:6 Yudeya hesana beyabeyana meta Yuda, iya ede kadi mumuga hesana.

2:11 Yodi kainauya wa kaniyodi ede teina: Gole unai se hemasalaha meta Yesu se kita iya wasawasa. Taukitalasam tamowaidi *inisenisi* se gabugabu na kasuna ye sae Yaubada unai, unai *inisenisi* kainauyana wa ye hemasalaha meta tausonoga wa Yesu se kita iya Yaubada. *Mulo* meta kamkamna tauhekaiyawasidi yo hinage tauboiboita sinaledi kabaheyausidi, unai ye hemasalaha meta Yesu kabo ye kamkamna yo ye boita.

2:18 Lama meta magai hesau Yelusalema dedekanaena. Hedehedede ta unai Mataiyo ye hai Betelehema unai ye heyaheyasoniyei.

2:18 Lahela: Sina bagubagunana ye hai ye heyaheyasoniyei sina maudoidi Betelehema unai natudiyo se boitako wa udiyedi.

Yowane Babatiso yona lauguguya balabalaena
(Maleko 1:1-12; Luka 4:1-13; Yowane 1:19-28)

3 Bolimai hisa se lau mulidi ne unai Yowane Babatiso Yudeya balabalanaena ye hetubu ye lauguguya ye wane,² “Kwa nuwabui! Galewa basileiyana* ye hanahanauma!”³ Yowane meta iya tamowaina ede Aisaiya peloweta ye hededehemasalahalaha'usei wa ye wane, “Tamowai hesau balabala unai ye yogayoga ye wane, ‘Guiyau yona keda kwa kabinonohai, yo yona kabala kwa hedudulai!’” (Aisaiya 40:3)

4 Yowane kana kaleko meta kamela wiyanan unai se ginauli, na kana dagilolo meta suisui hesau dahina,* na kana kai ede mwadimwadi yo kamwakamwa.

5 Yelusalema, Yudeya yo Yolidani tehana maudoina tamowaidiyao se laoma iya kalinawai⁶ na yodi yababa se hededehemasalahadi, ede Yowane ye hebabatisoidi Yolidani sagasagana unai.

7 Kabo Paliseya yo Sadusiya tamowaidiyao gwaudi se laoma Yowane unai babatiso hesabana. Ye kitadi ede ye dilaidi ye wane, “Komiu mwata natunao! Kaiteya ye hededelaowa bena kabo Yaubada yona hekamkamna kwa yabubugabaei?⁸ Bena nuwabui kaniyona kwa miyahemasalahadi!⁹ Na tabu kwa nuwatui meta kabo kwa bom kwa hemauli'uyoigomiu na kwa wane, ‘Kai Abelahama kana isimulitao!* Ya hededelaowa, Yaubada gonowana weku ta udiyedi Abelahama kana isimulitao ye ginaulidi.¹⁰ Kilam se tolenonohaiyako. Na ena kaiwa hesau nige ye kaniyonamwanamwa, meta kabo se koigabaei yo se gabalaei kaiwa kalakalasina luwanaena.

11 Kaiteyadi se nuwabui kabo waila unai ya hebabatisoidi. Na tamowai hesau ede sola kabo ye laoma. Iya yona gigibwali meta ye saekalili na kabo yau. Yau nige ya namwakalili taba iya kana sendolo ya baheidi.* Iya kabo Yaluwa Tabuna yo kaiwa kalakalasina udiyedi ye hebabatisogomiu.¹² Yona kabahesuhesuluisini kaikaiwana iya nimanaena, na kabo witi ye hesuluisinidi yo ye hinelidi. Na kabo kaniyodi ye toledi sanalaena, na mosomosodiyao ye tolehesuwaladi kabo ye gabudi kaiwa kalakalasina nige yona kababoso unai.”

Yesu yona babatiso

(Maleko 1:9-11; Luka 3:21-22; Yowane 1:32-34)

13 Kabo Yesu Galili unai ye laoma Yolidani sagasagana unai, bena Yowane unai babatiso ye hai.

14 Na Yowane ye kaipate bena Yesu ye hededehekaiyawasi ye wane, “Idohagi to kowa ku

laoma yau kaliguyena? Ye namwa mo taba kowa ku hebabatisoigau!”¹⁵ Na Yesu ye hededebebui ye wane, “Nige, teina mahana ta unai meta kowa bena ku hebabatisoigau. Taba Yaubada yona nuwatu mo ta lauwatani.” Ede Yowane ye talam na Yesu ye hebabatisoi.

16 Ye hebabatisoi ye gehe kabo Yesu waila ne unai ye gayo ye saesae, na mahanagan ne unai galewa ye tasoke, na Yesu Yaubada Yaluwana* ye kita ye dobima doha bunebune na ye talu iya unai.¹⁷ Na kalina hesau galewa ne unai ye wane, “Teina yau natugu. Iya ya gadosisiyei, yo ya gwauyalakalili iya unai.”

Diyabolo Yesu ye nohoi

(Maleko 1:12-13; Luka 4:1-13)

4 Na kabo Yaluwa Tabuna Yesu ye laei balabalaena bena diyabolo iya ye nohoi.² Menai ye kaihudi ye lau mayadai 40 yo boniyai 40, ede ye hasali.³ Na taunohonoho wa ye laoma kalinaena ye wane, “Ena kowa Yaubada natuna, kabo ku hededelau weku ne udiyedi se hemala pwalawa.”⁴ Na Yesu ye wane, “Yaubada kalinana unai ta hasili ye wane,

‘Tamowai nige pwalawa mo unai se maumauli, na Yaubada yona hedechedede maudoidi udiyedi hinage se maumauli.’” (Dutelonomi 8:3)

5 Na kabo diyabolo wa Yesu ye laei Yelusalema, na se sae numa tabuna kewana saesaena unai se tolo,⁶ na ye hededelau unai ye wane, “Ena kowa Yaubada Natuna, kabo ku kamposidobi. Matauwuna buka tabuna unai se kuli se wane,

‘Kabo ye hededelau yona anelu udiyedi bena se kitahetetego, kabo nimadiyena se kabisinigo, na taba nige kaem ne ku hetupanei weku hesau unai.’”
(Same 91:11-12)

7 Na Yesu ye hededebebui ye wane, “Na hinage buka tabuna unai ta hasili meta ye wane, ‘Tabu Guiyau yom Yaubada ku lautonogi.’” (Dutelonomi 6:16)

8 Na kabo diyabolo wa Yesu ye laei kuduli saesaekalilina unai, na tanoubu ta basileiyana maudoidi yodi namwanamwa saesaedi ye hekita⁹ na ye wane, “Ena ku tulibono yo ku taba'ohu kaliguwai, kabo ginauli maudoidi ta ya haidiwa.”

10 Na Yesu ye wane, “Satani, ku tausuwala! Matauwuna buka tabuna unai ye wane, ‘Guiyau yom Yaubada mo unai ku taba'ohu, yo iya ye bom mo ku hedebasae.’” (Dutelonomi 6:13)

11 Ede diyabolo wa Yesu ye laugabaei, na anelu se laoma Yesu se kitahetete.

3:2 Galewa basileiyana meta Yaubada yona kabatanuwaga o Yaubada yona basileiya. Mataiyo Dius yodi hedehedede yo yodi laulau ye lauwatani ede Yaubada hesana nige ye katakataikaliliyei, na galewa mo ye hepaisowa.

3:4 Yowane kana kaleko meta gonogonowan doha peloweta llaisa kana kaleko (Wasawasa bukadi helabuina 1:8).

3:9 Kai Abelahama kana isimulitao: Paliseya yo Sadusiya tamowaidiyao wa se bom se kita'uyoidi meta siya Yaubada kana bodao.

3:11 Kana sendolo ye baheidi: Teina ta meta heyayai tauhaina kana paisowa hesau, meta tamowai se saguidi kadi sendolo bikibikidi ne mainadi se yailidi na sendolo ne se haigabaei.

3:16 Yaubada Yaluwana meta Yaluwa Tabuna.

Yesu ye hetubu ye lauguguya*(Maleko 1:14-15; Luka 4:14-15)*

¹² Huya hesau Yesu wasa ye lapui meta Yowane se haiyako na numatutugudu unai se tole. Ede Yudeya ye laugabaei na ye uyo Galili. ¹³ Nige ye uyo yona magai Nasaleta, na ye lau Kapelenuma, Galili Gabwana* dedekanaena, meta Sebuluna yo Napatali tehadiyena. ¹⁴ Unai saha Aisaiya peloweta ye hededeyako wa ye hemamohoiei:

¹⁵ "Sebuluna tanona yo Napatali tanona, tanodiyao udiyedi keda ye dobi gabwa, tano Galili Gabwana dedekanaena, Yolidani sagasagana hali tanakawasina, Galili tanona dagela tamowaidiyao yodi kabamiya; tano ta tamowaidiyao yodi wasa ya hedehededei ede teina:*

¹⁶ Masigili unai taumiya wa mala lakilakina se kita, yo mwaloj logulogunaena taumiya kalidiyena mala ye sina." (*Aisaiya 9:1-2*)

¹⁷ Tenem huyana ne unai Yesu ye hetubu ye lauguguya ye wane, "Nuwamiu kwa buidi, matauwuna ede galewa basileiyana wa ye hanahanaumako."

Yesu yona hekahekatao bagubagunadi ye yoganeidi*(Maleko 1:16-20; Luka 5:1-11; Yowane 1:35-51)*

¹⁸ Huya hesau Yesu ye yona ye laulau Galili Gabwana dedekanaena ede tauyamayama labui ye kitadi yodi hinaya udiyedi se yamayama. Tamowaidiyao ede Simona—hesana hesau ede Petelo—ma kana kaha Andeleya. ¹⁹ Na ye yogadobi udiyedi ye wane, "Kwa saema kwa hemuliwatanigau, na kabo ya hekatagomiu kwa hemala tamowai tauyamayamaidi."

²⁰ Ede yodi hinaya wa se laugabaedi na se saema se hemuliwatan.

²¹ Se tausigilau, na kabo Sebedaiyo ma natunao Yamesi yo Yowane ye kitadi yodi waga unai, yodi hinaya se polopolaidi. Na Yamesi ma kana kaha Yowane ye yoganeidi. ²² Mahanana ne unai tamadi yo yodi waga wa se laugabaedi, na Yesu se hemuliwatan.

Yesu taukasiyebwa ye henamwanamwadi*(Maleko 1:39 yo 3:7-12; Luka 4:44 yo 6:17-19)*

²³ Yesu Galili maudoina ye tauhetakikili na yodi sunago udiyedi ye lauhekata. Yaubada yona basileiya wasana namwanamwana ye hededehehemasalaha, yo hinage tamowai kadi kasiyebwa udoi'udoi ye henamwanamwadi. ²⁴ Yesu wasana Galili tehana maudoina ye hemwayau, yo hinage ye lau Siliya tanona maudoina unai. Na tamowai kadi kasiyebwa udoi'udoi se laedima Yesu unai, kasiyebwa doha taukamkamna, yo yaluwa yababayababadi tamowai se luwuidi, yo taukikikikiwas, yo hinage taubunibuni, na

ye henamwanamwadi. ²⁵ Na teha Galili, Dekapolis, Yelusalema, Yudeya, yo Yolidani hali tanakawasina udiyedi bodalakilaki se laoma Yesu se hemuliwatan.

Yesu ye lauguguya kuduliyena*Mataiyo 5:1-7:29***Tamowai yodi kabagwauyala mamohoidi***(Luka 6:20-23)*

5 Na Yesu boda wa ye kitadi se laolaoma, ede maiyanao hekahekatao se sae kuduli hesau unai. Kabo ye tuli² na ye hetubu ye hekatadi ye wane,

³ "Kaiteyadi nige gonowana se bom se sagu'uyoidi, na se kitalau Yaubada yona sagu unai,* siya gonowana se gwauyala, matauwuna galewa basileiyana meta siya yodi.

⁴ Kaiteyadi se doudou yo se nuwanuwayababa, siya gonowana se gwauyala, matauwuna ede Yaubada kabo ye hededehtetaludi.

⁵ Kaiteyadi se nuwatalu, siya gonowana se gwauyala, matauwuna ede tanoubu maudoina ta kabo siya yodi.

⁶ Kaiteyadi laulau namwanamwadiyo se henuwakaliliyeidi, siya gonowana se gwauyala, matauwuna saha se henuwa wa kabo se lobai.

⁷ Kaiteyadi tamowai hekadiyo se katekamkamnaedi, siya gonowana se gwauyala, matauwuna Yaubada kabo ye katekamkamnaedi.

⁸ Kaiteyadi nuwadi udiyedi se a'a, siya gonowana se gwauyala, matauwuna ede Yaubada kabo se kita.

⁹ Kaiteyadi siya tamowai tauhenuhenuwadaumwalidi, siya gonowana se gwauyala, matauwuna ede Yaubada kabo ye kawanatuyeidi.

¹⁰ Kaiteyadi siya laulau namwanamwadi debadiyena se hekamkamnadi, siya gonowana se gwauyala, matauwuna ede galewa basileiyana meta siya yodi.

¹¹ Ena tamowai se dilamataigomiu yo se hekamkamnagomiu yo hededehepolupo yababayababadi udoi'udoi udiyedi se hededeheyababagomiu yau debaguyena, meta gonowana kwa gwauyala.

¹² Nuwamiu bena se namwa matauwuna ede yomi kainauya ye lakikalili galewa ne unai. Na peloweta bagubagunadiyao wa se hekamkamnadi gonogonowana doha se hekamkamnagomiu ta."

4:13 Galili Gabwana meta waila lakilakina Galili tanona unai. Ye lakikalili doha gabwa, unai se kawagabwaei.

4:15 Lausoisoi ta hedehededenia maudoidi kaniyodi ede Galili tanona, meta peloweta wa Galili tanona hesana udoi'udoi ye kataidi.

5:3 Lausoisoi ta unai Yesu yona hedehedede wa kaniyona ku hasili. Hedehedede wa ede, Kaiteyadi se deha yaluwadiyao udiyedi.

Kalita yo mala

(Maleko 9:50; Luka 14:34-35)

13 “Komiu tanoubu ta kalitana ede. Taba kalita ne kamnana ye gehe, meta nige gonowana ta hekalita'uyoi, yo nige kana paisowa hesau. Unai kabo se inigabae na tamowai se sae se dobi na se utu'utui.

14 Komiu tanoubu ta malana ede. Magai lakilakina hesau kuduli kewanaena malana nige gonowana se tolewadam. **15** Yo hinage taba lampa ta hekalasi, meta nige gonowana gulewa unai ta hebilikoi. Na ta tolesaei masalahaena na numakalo ne unai tamowai maudoidi dawayana ne se kita. **16** Unai bena tamowai yomi laulau namwanamwadi se kitadi doha mala wa, yo tamamiu galewa ne unai se hedebasaei.”

Yesu laugagayo kaniyodi mamohoidi ye hededehemasalahadi

17 “Tabu yomi nuwatu ya laoma ta laugagayo yo peloweta yodi hedehedede wa bena ya hekaiyawasidi. Nige, na ya laoma ta bena ya hemamohoiyedi. **18** Ya hededemamohoi kalimiuyen: Galewa yo tanoubu kabo se gehe, na Yaubada yona laugagayo se kulidiko wa nige gonowana kulikulina gagilina hesau ye taukwadalele, kana siga laugagayo hedehededenmaudoidi se laoma se mamohoi.

19 Ena tamowai hesau laugagayo ta gagilina hesau ye utusi yo tamowai hekadi ye hekatadi bena laugagayo ta se utusi, Yaubada kabo iya ye tolehemulita galewa basileiyana unai. Na ena kaiteya laugagayo ta ye miyamiyaei yo tamowai hekadi ye hekatadi na se miyawatani, Yaubada kabo iya ye tolehebaguna galewa basileiyana unai. **20** Ya hededelaowa kalimiuyen: Yomi laulau bena se dudulai yo se namwakalili na kabo siya Paliseya yo laugagayo taulauhekataedi. Ena nige, meta nige gonowana kwa lusae galewa basileiyana unai.”

Kouyalayala lauhekatan

21 “Kwa lapuiyako meta Mose ye hededelau kada mumugao udiyedi ye wane, ‘Tabu ku kaiunu’,* yo hinage, ‘Ena tamowai hesau ye kaiunu meta iya kabo se laei tautolehedudulai tamowaidiyao udiyedi na se hekamkamna.’ **22** Na yau ya hededelaowa, ena hesau kana kaha ye kouyalayalaei meta iya taba se helauhetala. Na ena tamowai hesau kana kaha ye kawayauyaulei ye wane, ‘Kulum ne nige kaniyon!', meta iya taba se laei Sunedeli* unai na se hekilaino. Na taba hesau kana kaha ye hededeheyababa ye wane, ‘Kowa tamowai yauyaulekalilina, yo Yaubada kana waiunu mamohoi!', meta iya kabahekilainona ede kaiwa kalakalasina unai.

23 Unai, ena kowa yom kainauya ku baheiymamako bena ku kaitalasamyei na nuwam yena ye saema meta kowa yom yababa hesau kam kaha hesau unai na ye kouyalayalaego, **24** yom kainauya wa ku laugabaei kaitalasam kabagabuna dedekanaena, na ku lau kam kaha wa unai yom teha ku tolehedudulai na kabo ku uyoma yom kainauya wa ku kaitalasamyei.

25 Ena saha hesau ku ginauli na kam waiunu ye koipiliyeigo na ye laego bena ku lauhetala, meta maidam kwa tolehedudulaimwamwayauyei. Ena nige, kabo ye laego tautolehedudulai udiyedi. Yo tautolehedudulai kabo se moselaego polisi udiyedi na se tolego numatutuguduyena. **26** Ya hededemamohoi: Taba nige se hepesago ye lau ee kana siga kam hagahaga maudoidi ku hemaisahegehedi.”

Ganawali lauhekatan

27 “Kwa lapuiyako meta beyabeyana Mose yona laugagayo unai ye wane, ‘Tabu ku ganaganawali.’* **28** Na ya hededelaowa kalimiuwai: Ena kaiteya waihiu hesau ye kita na nuwanaena ye gadosisiyei bena taba maidana se keno, meta iya nuwana ne unai ye ganawaliko. **29** Ena matakhatum ye woyalaeo yababa unai, ku lamohai na ku gabaei. Ye namwa mo taba yaum hesau nigele na kabo taum maudoudoina ye lau kaiwa kalakalasina unai. **30** Yo hinage ena nima kahatum ye woyalaeo yababa unai meta ku bolihai ku gabaei. Ye namwa mo taba yaum hesau nigele na kabo taum maudoudoina ye lau kaiwa kalakalasina unai.”

Inawase lauhekatan

(Mataiyo 19:9; Maleko 10:11; Luka 16:18)

31 “Mose ye wane, ‘Ena tamowai hesau mwanena bena ye inawasei meta kabo inawase pepwana ye kuli na ye mosei.’* **32** Na yau ya hededelaowa: Ena tamowai hesau mwanena nige ye ganaganawali na ye inawasegaibui, meta iya waihiu ne ye heganawali. Na ena tamowai hesau waihiu ina'inawasena ye tawasolai, meta iya hinage ye ganawali.”*

Kaigwala lauhekatan

33 “Doha hinage kwa lapuiyako meta Mose ye hededelau kada mumugao udiyedi ye wane, ‘Tabu yom hededeikaigwala hesau ku utusi, na yom kaigwala ku hededediko Yaubada unai meta bena ku ginauliwatanidi.’* **34** Na yau ya hededelaowa: Tabu ku kaigwala! Tabu galewa hesanaena ku kaikaigwala, matauwuwuna galewa meta Yaubada yona kabatuli. **35** Yo tabu ku kaikaigwala tanoubu hesanaena, matauwuwuna tanoubu ta iya Yaubada kaena kabatolena. Yo tabu ku kaikaigwala Yelusalema

5:21 Tabu ku kaiunu: Esodo 20:13

5:22 Sunedeli meta Dius tamowaidiyao yodi kabalauhetala saesaekalilina. Maleko 14:55 hededehemasalahana ku hasili.

5:27 Tabu ku ganaganawali: Esodo 20:14

5:31 Dutelonomi 24:1

5:32 Maleko 10:11-12 yo Luka 16:18 hinage ku hasili.

5:33 Numela 30:2; Lewitikasi 19:12; Dutelonomi 23:21

hesanaena, matauwuwuna Yelusalema meta wasawasa saesaena yona magai.³⁶ Tabu ku kaikaigwala kulum ne unai,* matauwuwuna nige gonowana kulum ne maiyawana hesau ku heposiposi o ku hedubaduba.³⁷ Ye namwa mo taba ku talam ku wane ‘Aa’, o ku uhala ku wane ‘Nige’. Ena saha hesau ku hededehagahagai’uyoi meta tauyababa unai ye laoma.”

Haigum lauhekatanā

(Luka 6:29-30)

³⁸ “Yo hinage kwa lapuiyako yomi taulauhekata se wane, ‘Ena matam kesega se koihegibu, kabo hinage taukoihegibuna ne matana kesega ku koihegibu, yo ena mwakam kesega se koiuhuhai hinage taukoiuhuhuna ne mwakana kesega ku koiuhuhai.’* ³⁹ Na yau ya hededelaowa: Tabu yababa tauginaulina ku laukwatakawataei. Ena tamowai hesau papalikahatum ne unai ye koi meta tabu ku hemaisa, hinage ku tolobui na papalim hesauna ne unai ye koi. ⁴⁰ Ena tamowai hesau ye laego ku lauhetala na kam luwuluwu nimakubwakubwana ne ye hai meta hinage kam luwuluwu nimalohalohana* ku mosei. ⁴¹ Ena iyala tamowaina hesau ye lauheliligo bena yona gogo ku baheidi keda kubwakubwana mo, meta bena ku baheidi ku lau kedaloaloha.* ⁴² Ena tamowai hesau saha ye kaibwadai kalimyena meta bena ku mosei. Na ena tamowai hesau saha kalimyena ye sagenahagahagai meta tabu ku nuwahi, na bena ku mosei.”

Waiunu gadosisiyeina lauhekatanā

(Luka 6:27-28 yo 32-36)

⁴³ “Yo hinage kwa lapuiyako yomi taulauhekata se wane, ‘Keham ku gadosisiyei* na kam waiunu ku hewaiunu.’⁴⁴ Na yau ya hededelaowa kalimiuyena: Kami waiunu kwa gadosisiyedi yo hinage tauhekamkamnagomiu yodi kwa tapwalolo. ⁴⁵ Teina laulau ta unai kabo komiu kwa hemala tamamiu galewa ne unai natunao mamohoidi, matauwuwuna ede mahana ye hesina tamowai yababayabadi yo tamowai namwanamwadi udiyedi; yo hinage nabu ye hetalu tamowai namwanamwadi yo tamowai yababayabadi udiyedi. ⁴⁶ Ena taugadosisiyeigomiu se bom mo kwa gadosisiyeidi, kabo kaniyona ede saha? Takisi tautanotano* hinage se gadogadosisihineli. ⁴⁷ Ena kehamiyo mo se bom kwa lautokihinelidi meta kabo idohagi yomi laulau ne se namwa na kabo tamowai hekadiyo yodi laulau? Matauwuwuna dagela

5:36 Ena tamowai hesau *kulunaena ye kaigwala*, kaniyona meta yona mauli kabo ye mosegabaei, ena yona hedehedede ne nige ye mamohoi.

5:38 Esodo 21:24; Lewitikasi 24:20; Dutelonomi 19:21

5:40 Yesu yona huyaena kwama labui se likwalikwadi. *Lulu nima kubwakubwana* se likwabagunai, na *luwuluwu nima lohalohana* kewanaena se likwa wa hinage se hepaisowa yodi kabobo.

5:41 *Keda kubwakubwana mo ... keda lohaloha*: Loma yodi tau’iyala yodi dudulai meta tamowai se lauhelilidi bena yodi gogo se baheidi keda kubwakubwa. Keda ne lohana ede Dimdim unai ta hedede ta wane “one mile”.

5:43 Lewitikasi 19:18

5:46 *Takisi tautanotano* meta Dius tamowaidiyo, na Loma babadadiyo yodi se paisowa. Kadi paisowa ede yodi hali Dius tamowaidiyo udiyedi moni se tanotano na se moseidi Loma yodi gabemani udiyedi. Unai yodi hali Dius tamowaidi siya se kitaheyababadi.

tamowaidiyo teina miya ta hinage se miyamiyaei.

⁴⁸ Yomi miyamiya ne udiyedi bena kwa namwa yo kwa dudulaikalili, doha tamamiu galewa ne unai iya ye namwa yo ye dudulaikalili.”

Kaikainauya lauhekatanā

6 “Bena kwa kitinanwanamwa, tabu tamowai matadiyena yomi laulau namwanamwadi kwa ginaginaulidi bena kabo se kitahenamwagomiu. Ena yomi laulau doha teina, meta tamamiu galewa ne unai taba nige kainauya ye haiyawa.

² Unai ena yomi kainauya kwa moseidi deha tamowaidiyo udiyedi meta tabu bwagigina kwa yuhi doha taukailupolupo yodi laulau sunago yo keda udiyedi, yodi kainauya se moseidi tamowai matadiyena bena kabo se kitadi yo se nokoedi. Ya hededemamohoi kalimiuyena: Siya yodi kainauya maisana ede se haiyako. ³ Ena yom kainauya ku mosei deha tamowaina hesau unai meta tabu ku hedede’uyoigo kam kaha hesau unai na bena kabim ye kata. ⁴ Na yom kainauya meta bena ku mosewadam. Na Tamam ginauli wadawadamdi taukitadi, iya kabo ye kainauyaego.”

Tapwalolo lauhekatanā

(Luka 11:2-4)

⁵ “Na ena kwa tapwalolo, tabu yomi laulau doha taukailupolupo. Se henuwa bena kabo tamowai se kitadi, unai sunago kalodiyena yo hinage keda dedekadiyena se tolo na se tapwatapwalolo. Ya hededemamohoi kalimiuyena: Siya yodi tapwalolo maisana ede se haiyako. ⁶ Na ena ku tapwalolo, meta ku mwalee yom numa kalonaena, kedana ku gudu na ku tapwalolo Tamam unai, iya ede teha wadawadamnaena yo teha maudoidi udiyedi taumiya. Na Tamam ginauli wadawadamdi taukitadi, iya kabo ye kainauyaego.

⁷ Na ena kwa tapwalolo, tabu yomi hedehedede kwa laulaubodai’uyoidi, doha Yaubada nige kabina taukata yodi tapwalolo. Siya yodi nuwatu meta bena tapwalolo se heloha, na kabo yodi yaubada ye lapuidi. ⁸ Unai komiu yomi tapwatapwalolo tabu doha siya, matauwuwuna ede ginauli sahasahadi udiyedi kwa deha ne Tamamiu kabidi ye katako na kabo kwa kaibwadai.

⁹ Unai taba komiu kwa tapwalolo doha teina: ‘Tamamai galewa ne unai! Kowa hesam ka hededetausaei.

¹⁰ Yom basileiya bena ye laoma. Yom nuwatu bena ka ginauliwatanidi tanoubu ta unai, doha galewa ne unai yom nuwatu se ginauliwatanidi.

¹¹ Mayadai ta kaina ku leyama.

¹² Yoma yababa ku nuwatugabaedi, doha hinage kai tauheyababagai yodi yababa ka nuwatugabaedi.

¹³ Bena ku kitahetetegai na taba nige ka lulau noho luwanaena, na tauyababa yona nuwatu udiyedi ku gilihaigai.’ * *

¹⁴ Tapwalolo wa ye hekatadi ye gehe kabo ye hedehedede'uyo ye wane, “Tauheyababagomiu yodi yababa bena kwa nuwatugabaedi, kabo Tamamiu galewa ne unai hinage yomi yababa ye nuwatugabaedi. ¹⁵ Na ena yodi yababa nige kwa nuwatugabaedi meta hinage Tamamiu galewa ne unai taba nige yomi yababa ye nuwatugabaedi.”

Kaihudi lauhekatanā

¹⁶ “Ena kwa kaihudi, tabu kami kao doha taukailupolupo yodi laulau. Siya kadi kao se heyababadi bena tamowai se kitadi meta se kaihudi. Ya hededemamohoi kalimiuyena: Siya yodi kainauya ede se haidiko. ¹⁷ Na kowa huyana ku kaihudi meta bena ku matakabi, kulum ne ku heyausi yo ku suwali. ¹⁸ Unai kabo tamowai hekadi nige gonowana se kitalobaigo meta ku kaihudi, na Tamam teha wadawadamyena taumiya, iya ye bom mo kabim ye kata. Na Tamam ginauli wadawadamdi taukitadi, iya kabo ye kainauyaego.”

Gogo lauhekatanā

(Luka 12:22-36 yo 16:13)

¹⁹ “Tanoubu ta unai tabu kwa kaipate bena taba kwa gogokalili. Gogo ne kabo se pwasa yo se tatagwaligwali, yo hinage taukaiwahali kabo se kaiwahalidi. ²⁰ Na taba kwa kaipate bena galewa ne unai kwa gogokalili. Temenai nige gonowana se pwasa yo se tatagwaligwali, yo hinage taukaiwahali taba nige se kaiwahalidi. ²¹ Matauwuna ede kaiteya teha unai yom gogo se miyamiya, meta yom nuwanuwatu ede temenai.

²² Matada meta siya tauda ta malana ede. Ena matada se dawayo meta kabo tauda maudoina ta ye dawayo. ²³ Ena matada se yababa meta tauda maudoina ta kabo ye masigili.* Na ena ku nuwatu meta mala ede nuwam yena, na mala ne meta ye masigili, masigilina ne meta ye lakikalili.

²⁴ Nige gonowana tamowai hesau tanuwaga labui yodi ye paisowa. Hesau kabo ye subu na hesauna wa kabo ye henuwa. O nuwana bagubagunana wa yona nuwatu ye ginauliwatanidi ma nuwakohihaina, na

hesauna wa ye kitadobidobiyei. Unai nige gonowana Yaubada yo moni yodi kwa paisowa.

²⁵ Unai ya hededelaowa kalimiuyena: Tabu kwa nuwanuwatukalili yomi mauli hesabana, bena saha kabo kwa kai yo kwa numa; yo taumiu ta hesabana, saha kabo kwa likwa. Mauli ye saekalili na kabo kai, yo taumiu ta ye saekalili na kabo kaleko! ²⁶ Hage manuwa ne sola kwa kitadi, siya nige kadi se paipaisowa, nige yodi koya yo hinage nige yodi sanala, na tamamiu galewa ne unai, iya ye hekahekaidi. Na komiu meta kwa saekalili na kabo manuwa ne.

²⁷ Kaiteyamu kwa nuwanuwatukalili meta nige gonowana kwa bom yomi mauli ne kwa heloha'uyoi.

²⁸ Na idohagi to kaleko kwa nuwanuwatukaliliyedi? Sola koya pasadiyao ne kwa kitadi. Nige se paipaisowa yo nige kaleko se laulauginauli. ²⁹ Ya hededelaowa kalimiuyena: Solomona yona wasawasa kalekodiyo nige hesau kana kao ye namwa doha tenem pasa ne.

³⁰ Yaubada pasa ne kadi kao ye henamwadi, wau se lala na malaitom meta kabo se wowoya na se gabudi se kalasi. Na komiu meta ye nuwatukaliliyegomiu, unai kami kaleko iya kabo ye haidiwa. Komiu sunuma gagilidi tamowaidiyao!

³¹ Unai tabu nuwamu se mode kwa wane, ‘Malaitom kabo saha ka kai? O saha ka numa? Yo saha ka likwa?’ ³² Matauwuna nige Yaubada tausunumaena siya meta kai yo gogo se henuwakaliliyedi, na kami henuhenuwa maudoidi ta tamamiu galewa ne unai kabidi ye katako. ³³ Na komiu bena Yaubada yona basileiya kwa tolebagunai yo hinage miyamiya dudulaidi kwa miyamiyaidi, na kabo ginauli maudoidi ta hinage ye haidiwa. ³⁴ Unai tabu malaitom modena unai kwa nuwanuwatukalili, matauwuna malaitom kabo ye bom modena ye mode'uyo. Mayadai kesega kesega ye bom mo polohena.”

Kitahineli lauhekatanā

(Luka 6:37-38 yo 41-42)

⁷ “Tabu tamowai hesau yona laulau unai ku hineli na ku hededeheyababa. Ena ku hineli na ku hededeheyababa, meta hinage Yaubada kabo ye hineligo na ye hededeheyababago. ² Matauwuna Yaubada kabo ye hineligo doha tamowai hekadi ku hinelidi, na laugagayo saha ku hepaisowa kalidiyena wa kabo hinage Yaubada ye hepaisowa kalimwai.

³ Ye saha to kam kaha matana mukalina ku kaikaikewai na kowa matam ne unai kaiwa mwayana ne nige ku modei? ⁴ Idohagi to ku hededelau kam kaha unai bena matana mukalina ku haigabaei, na matam ne unai kaiwa mwayana ede sola ma miyana? ⁵ Kowa taukailupolupo mamohoi, matam ne unai

6:13 Kulikuli beyabeyadi hekadiyo lausoisoi 13 se tubei se wane, *Matauwuna ede basileiya kowa yom, yo gigibwali kowa yom, yo namanamali kowa yom. Amen.* Na kulikuli bagubagunadi udiyedi hedehedede ta nige se kulidi.

6:23 *Matada se yababa:* Ena tamowai hesau ye bom mo ye nuwatu'uyoi, meta Dius tamowaidiyao se wane *matana se yababa.* Tamowai doha tenem nuwana ne unai meta ye masigilidui, nige mala hesau.

kaiwa mwayana ne ku haigabaeibagunai, na matam ne ye nega, kabo kam kaha matana mukalina ku kitanamwanamwaei na ku haigabaei.

⁶ Ginauli tabudi tabu kwa moselaedi kedewa udiyedi, yo yomi giniuba tabu kwa gabalaedi puwaka udiyedi. Ena ku gabalaedi, kabo puwaka wa giniuba ne se utukalakalateidi bwatano ne unai, yo kedewa wa kabo se gelobui na se kalasigomiu.” *

Kaibwada Yaubada unai (Luka 11:9-13)

⁷ “Kwa kaibwada Yaubada unai, kabo saha kwa kaibwadai wa ye leyawa. Kwa wase, na kabo saha kwa wasewasenei wa Yaubada ye saguigomiu na kwa lobai. Yo hinage keda guduna unai kwa koikoi, kabo keda ye sokeyawa. ⁸ Matauwuna ede taukaikaibwada saha se kaibwadai wa kabo se hai, yo tauwasewase saha se wasenei wa kabo se lobai, yo keda kabo ye soke kaiteyadi taukoikoi wa udiyedi.

⁹ Komiu sina yo tama, ena natumiye kai, kabo weku kwa mosei? ¹⁰ O ena ye kaibwada yama, kabo mwata kwa mosei? ¹¹ Komiu yomi miyamiya se yababa na iyamo gonowana kabo kainauya namwanamwadiyao kwa moseidi natumiyo udiyedi; na tamamiu galewa ne unai yona laulau se namwakalili, na ye nonohakalilik kabo kainauya namwanamwadi ye moseidi kaiteyadi se kaibwada iya unai.

Mose yona laugagayo maudoina kaniyona

¹² Unai, laulau sahasahadi kwa henuwa bena tamowai se ginaulidi kalimiuyena meta komiu hinage kwa ginaulidi siya kalidiwai. Teina ta Mose yo Peloweta yodi lauhekata maudoina kaniyona ede.”

Keda labui hedeheddedi (Luka 13:24)

¹³ “Kawakeda gagilina unai kwa lusae. Matauwuna keda ye lau kabakamkamna magaina unai meta ye masalah yo kawakedana ye laki, unai tamowai se bado keda ne se hemuliwatani. ¹⁴ Na mauli kedana meta ye giligili yo kawakedana ye gagili, unai tamowai hisa mo se lobai na unai se lau.”

Peloweta bwalabwala kadi kao (Luka 6:43-44)

¹⁵ “Kwa kitanamwanamwakalili peloweta bwalabwala udiyedi. Mamoe kadi kaoyena se laoma kalimiuyena, na iyamo kadi kao mamohoina meta siya doha kedewanukula kaikaikalasidiyao. ¹⁶ Siya laulau saha se miyamiyedi ne udiyedi kabo kwa kitalobaidi. Nige gonowana tamowai hesau kamokuku unai wine kaniyona ye gigi, yo hinage nige gonowana kaiwa gwaliwalidu udiyedi bosibosi* kaniyona ye gigi. ¹⁷ Yo

hinage kaiwa yababana kaniyonao meta kaikailewa, na kaiwa namwanamwana kaniyona meta kaikaina.

¹⁸ Kaiwa namwanamwana unai taba nige kaiwa yababana kaniyona ta lobai, yo hinage kaiwa yababana unai taba nige kaiwa namwanamwana kaniyona ta lobai. ¹⁹ Ena taba kaiwa hesau kaniyona nige se namwa meta kabo se koigabaei na se tulaei kaiwa kalakalasina unai. ²⁰ Unai kaiwa kabakitalobaina ede kaniyona udiyedi.

²¹ Tamowai se bado se hedehedelaoma kaliguwai se wane, ‘Guiau, Guiau!’, na iyamo nige gonowana maudoidi se lusae galewa basileiyana, na tamagu galewa ne unai yona nuwatu kaiteyadi se ginauliwatanidi, siya se bom mo kabo se lusae.

²² Huyakitahekasa yo hineli mayadaina ne unai meta boda kabo se wane, ‘Guiau, Guiau, hesam yena demoni ka hededehepesadi, yo hinage hesam yena laulau gigigibwalidi ka ginaulidi.’ ²³ Kabo ya hedehedelau kalidiyena ya wane, ‘Nige kabimiu ya kata, kwa tausuwala, komiu yomi laulau se yababakalili.’ ”

Kabakabinuma labui hedeheddedi (Luka 6:47-49)

²⁴ “Unai, kaiteya yogu hedehedede ta ye lapuidi na ye miyawatanidi meta iya doha tamowai sibasibana weku kewanaena ye kabinuma. ²⁵ Na kabo nabu ye talu, kabaita ye didi, yo hinage yaumai ye towa na numa wa ye nukunuku, na nige ye guli, matauwuna ede numa wa weku kewanaena ye hetolo. ²⁶ Na kaiteya yogu hedehedede ta ye lapuidi na nige ye miyawatanidi meta iya doha tamowai yauyaulena, malanganagaliyena yona numa ye hetolo. ²⁷ Na kabo nabu ye talu, kabaita ye didi yo yaumai ye towa ede numa wa ye nukuhuguli yo ye tatagwaligwali.”

²⁸ Yesu yona lauhekata maudoidi wa gehediyena meta boda wa se noko, ²⁹ matauwuna ede yona lauhekata wa meta ma gigibwalina, nige doha laugagayo taulauhekataena tamowaidiyao.

Yesu taulepela ye henamwanamwa (Maleko 1:40-45; Luka 5:12-16)

8 Yesu kuduli wa unai ye lauhekatagehe ede maiyana hekahekatao se lidi se dobi. Na boda se laoma se hemuliwatani. ² Na kabo taulepela hesau ye laoma ye tulibono na ye hedehedelau Yesu unai ye wane, “Guiau, gigibwali ede kalimwai, na ena ku henuwa kabo ku henamwanamwagau na ya a'a'uyu.” ³ Na Yesu ye kabilau tamowai wa unai na ye wane, “Ya henuwa, teina mahana te unai ku a'a!” Mahanana ne unai tamowai wa ye namwanamwa. ⁴ Kabo Yesu ye hedehedelau unai ye wane, “Tabu tamowai hesau yona ku hedehedede! Na ku lau, yom kainauya ku hai doha

7:6 *Ginauli tabudi:* yo giniuba meta Yaubada yona hedehedede namwanamwadi, na kedewa yo puwaka, siya ede tamowai nige gonowana Yaubada yona hedehedede ne se kawanamwanamwaei.

7:16 Isalaela unai nige *bosibosi*, na kaiwa hesau Dimdim unai hesana ede *fig*. Ka bui *bosibosi* matauwuna kaniyodi se kamna.

Mose yona laugagayo unai ye hededeyako wa, ku bahelaei taukaitalasam unai ku mosei yo hinage ye kitago,* unai kabo tamowai maudoidi kabina se kata meta ku namwanamwako.”

Iyala taubagunaena tamowaina yona sunuma
(Luka 7:1-10)

⁵ Huyana Yesu ye lage Kapelenuma unai meta iyala taubagunaena tamowaina hesau* ye laoma Yesu unai ye kaibwadasagu ⁶ ye wane, “Guiau, yogu taupaisowa hesau meta ye kasiyebwa na tauna meta se kamkamnakalili nige gonowana tauna ye hetetelidi, iya ede numaena ye kenokeno.” ⁷ Ede Yesu ye wane, “Kabo ya laowa ya henamwanamwa.” ⁸ Na iyala taubagunaena tamowaina wa ye wane, “Guiau, kowa ku saekalili na kabo yau, unai nige gonowana ku laoma yogu numaena. Na taba ku hedehedede mo na yogu taupaisowa ne ye namwanamwa.

⁹ Matauwuna yau hinage meta kagu tanuwaga lakilakidiyo se kitahetetegau, yo yau hinage tau'iyala taukitahetetedi. Ena ya hededelau hesau unai ya wane, ‘Ku lau’, meta ye lau. Ena ya wane, ‘Ku laoma’, meta kabo ye laoma. Yo ena ya hededelau yogu taupaisowa unai ya wane, ‘Paisowa ne ku ginauli’, meta ye ginauliwatani.”

¹⁰ Yesu hedehedede wa ye lapuidi meta ye nokokalili. Na ye hededelau boda wa udiyedi ye wane, “Ya hededemamohoi kalimiuyena: Isalaela unai nige tamowai hesau ya kita yona sunuma doha teina! ¹¹ Na ya hededelaowa kalimiuyena, teha maudoina tanoubu ta unai boda* kabo se laoma Abelahaha, Isako yo Yakobo maidadiyo se hekoikesega yo se gwaualagogoi galewa basileiyana unai. ¹² Na galewa basileiyana Yaubada ye kabinonohai meta Isalaela tamowaidiyo hesabadi, na iyamo nige yodi sunuma. Unai kabo ye hepesadi na ye toletaedi masigili magaina unai. Temenai kabo se doudou yo kawadi se kapuyahisidi.” ¹³ Na Yesu kabo ye hededelau iyala taubagunaena wa unai ye wane, “Yom sunuma ne unai yom taupaisowa ne kabo ye namwanamwa, na ku lau yom magai.” Mahanana ne unai yona taupaisowa wa ye namwanamwa.

Yesu taukasiyebwa ye henamwanamwadi
(Maleko 1:29-34; Luka 4:38-41)

¹⁴ Na kabo Yesu ye lau Petelo yona numa unai, na Petelo bwasiyana sinebada ye kita meta tauna se gwagwama yo ye kasiyebwakalili na ye kenokeno.

¹⁵ Ye kabilau sinebada wa nimana unai meta kasiyebwa wa ye gehe, na sinebada wa ye namwanamwa, ede ye kabinonoha na Yesu ye haitalai.

¹⁶ Meimeilahina ne unai mahana ye dui* na kabo tamowai yaluwa yababayababadi se tanuwagaidi wa se woyaidima na yaluwa yababayababadi wa ye hededehepesadi. Yo taukasiyebwa maudoidi ye henamwanamwadi. ¹⁷ Teina laulau gigigigibwalidi ye ginaulidi ta unai meta Yaubada kalinana peloweta Aisaiya ye hededediko wa ye hemamohoiyedi doha ye wane,

“Iya meta yoda basabasa maudoidi ye haigabaedi, na kada kasiyebwa ye henamwanamwadi.”

(Aisaiya 53:4)

Tamowai labui bena Yesu se hemuliwatani
(Luka 9:57-62)

¹⁸ Yesu boda wa ye kita meta ye laki ye laulau, unai ye hededelau yona hekahekatao wa udiyedi meta bena se kawasilau Galili Gabwana hali tanakawasi ne unai.

¹⁹ Na kabo laugagayo taulauhekataena hesau ye laoma Yesu unai na ye wane, “Tanusaga, yom kabalau maudoidi udiyedi yau kabo ya hemuliwatanigo.” ²⁰ Na Yesu ye hededelau unai ye wane, “Kedewa nukula yodi duha se paganidi, yo hinage manuwa yodi noi se paganidi, na Tau Natuna* nige yona numa yo yona kabakaiyawasi mamohoina hesau.”

²¹ Na tauhemuliwatanina hesau ye hededelau Yesu unai ye wane, “Guiau, taba gonowana ya uyo magai na tamagu toletoletauna ya kita, na kabo ya uyoma ya hemuliwatanigo.” * ²² Na Yesu ye hededelau unai ye wane, “Kowa ku hemuliwatanigau, na kaiteyadi se boitako meta siya bena kehadi tauboita ne se lae bwayabwaya unai se tole.” *

Yesu wowoli ye hededehedaumwali

(Maleko 4:35-41; Luka 8:22-25)

²³ Na kabo Yesu maiyana hekahekatao se dobi wagaena se gelu na Galili Gabwana wa unai se kawasi.

²⁴ Yesu waga wa unai ye kenoko na makesega kabo wowoli ye lage na waga wa bagodu se ini'inipuluhi.

²⁵ Unai yona hekahekatao wa iya se hanai na se wane, “Guiau, ku hesaguhaida! Nige bayaona kabo ta yoli!”

²⁶ Na Yesu ye hededelau udiyedi ye wane, “Idohagi to kwa matausi? Yomi sunuma taki se gagili!” Ede ye tolo na yaumai yo bagodu wa ye kawamananaidi, meta

8:4 Laugagayo ta ta hasili Lewitikasi 14:2-4 unai.

8:5 Iyala taubagunaena tamowaina meta hedehedede mamohoina ede sentuliyo. Sentuliyo meta Loma yodi tau'iyala badodi 100 tauwoyaidi. Apostolo 10:1 unai hinage hededehemasalahana ku hasili.

8:11 Boda ta, siya meta dagela tamowaidiyo, nige Dius tamowaidiyo.

8:16 Dius yodi laugagayo meta Sabati unai mahana ye dui kabo Sabati ye gehe na gonowana se hetubu se paisowa'uyo.

8:20 Yesu ye bom hesana ye katai Tau Natuna.

8:21 Dius yodi miyamiya unai, ena tamowai hesau tamana yo sinana se tautaubada yo se sinesinebadakalilik, meta iya kana paisowa bena ye kitahetetedi ye lau ee kana siga se boita. Yodi boita unai kabo natudi ta iya kana paisowa bena ye kita meta tamana yo sinana ta se kabinamwanamwaedi yo se laedi kabatoledi namwanamwana unai se toledi.

8:22 Kaiteyadi se boitako siya ede yaluwadiyena se boitako, kaniyona ede nige se modelau Yaubada unai yo Yesu nige se sunumai. Kehadi tauboita ne meta bulumaena tauboita.

yaumai wa ye kaiyawasi na gabwa ye daumwali.
27 Unai yona hekahekatao wa meta se nokokalili na se wane, “Teina meta tamowai sahasahana? To yaumai yo bagodu hinage kalinana se kawakabiyei na se daumwali?”

Tamowai labui udiyedi yaluwa yababayabadi Yesu ye hededehepesadi

(Maleko 5:1-20; Luka 8:26-39)

28 Kabo Yesu ye dunasae Gadala tamowaidiyao yodi teha unai. Tenem teha ne unai meta tamowai labui, yaluwa yababayabadi siya se luwuidi. Yodi laulau se yababakalili to nige tamowai hesau gonowana ye lau temenai. Yodi kabamiya meta bwayabwaya, unai se pesa se laoma Yesu se hailobai. **29** Se yogalau unai se wane, “Yaubada natuna, ku laoma kabo saha ku ginauli kalimaiyena? Yaubada yona kaisunuwa mayadaina meta sola nige ye lage, na ku laoma ta bena ku hekamkamnanonohaigai?”

30 Na tehalaudi wa unai meta puwaka yawolina se dumudumuli. **31** Ede demoni wa se wane, “Ena ku hededehepesagai, taba gonowana ku hetamaligai na ka lau puwaka ne udiyedi ka luwu.” **32** Unai Yesu ye hededelau demoni wa udiyedi ye wane, “Kwa lau!” Ede tamowai wa se pesagabaedi na puwaka wa udiyedi se luwu. Kabo puwaka wa padipadi wa unai se heloigogoi se dobi waila wa unai se mwaloigogoi. **33** Na puwaka taukitahetetedi wa se heloi se lau yodi magai na saha ye tubu wa yo hinage tamowai labui wa wasadi se hedeheddedi. **34** Ede magai wa tamowaidiyao maudoidi se laoma Yesu unai se kaibwada bena taba yodi magai tanona ye laugabaei.

Yesu taubunibunina ye henamwanamwa

(Maleko 2:1-12; Luka 5:17-26)

9 Yesu waga hesau unai ye gelu na ye kawasi'uyo yona magai Kapelenuma. **2** Menai tamowai hekadiyo tau hesau bunibunina diyadiyali unai se baheyama iya unai. Yesu yodi sunuma ye kita na ye hededelau taubunibunina wa unai ye wane, “Natugu! Ku nuwabayao, yom yababa ya nuwatugabaedi.”

3 Na laugagayo taulauhekataedi hekadiyo se bom se gadigadigugu se wane, “Teina tamowai ta meta Yaubada ye hededeheyeheyababa.”

4 Yodi nuwanuwatu wa Yesu kabidi ye kata ede ye hededelau udiyedi ye wane, “Idohagi to nuwatu yababadi kwa nuwanuwatuidi. **5** Saha hedehededenye biga ede: ‘Yom yababa wa ya nuwatugabaedi’, o, ‘Ku tolo na ku laulau.’ **6** Ya henuwa bena kabina kwa kata meta Tau Natuna* iya kaiyaulina ta unai yona gigibwali gonowana yababa ye nuwatugabaedi.” Ede ye hededelau taubunibuni wa unai ye wane, “Ku tolo, yom diyadiyali ne ku bahei na ku lau yom magai.”

9:6 Yesu ye bom hesana ye katai *Tau Natuna*.

9:17 Dius yodi waina kaba'inina meta suisui dahidi udiyedi se bodidi. Hauhaudi wa se biga, na beyabeyadi se kwailolo na nige gonowana se sese.

7 Ede tamowai wa ye tolo na ye lau yona magai.

8 Laulau saha ye tubu wa boda se kita meta se siliyata na Yaubada se hedebasaei, matauwuwuna gigibwali wa ye mosei tamowai udiyedi.

Yesu Mataiyo ye yoganei

(Maleko 2:13-17; Luka 5:27-32)

9 Yesu magai wa ye laugabaei ye laulau, na takisi tautanotano hesau hesana Mataiyo ye kita yona kabapaisowa numana unai ye tutuli. Ye hededelau unai ye wane, “Ku hemuliwatanigau.” Ede Mataiyo ye tolo na ye hemuliwatani.

10 Kaboutaki se lau Mataiyo yona numa unai. Na takisi tautanotano bodadi yo hinage yababa tamowaidi hekadiyo se laoma Yesu yo yona hekahekatao wa maiyadiyao se kaikaigogoi. **11** Paliseya tamowaidiyao se kitadi ede yona hekahekatao wa se henamaiyedi, “Idohagi to kami tanuwaga ne takisi tautanotano yo yababa tamowaidi maidanao se kaikaigogoi?” **12** Yodi hedehedede wa Yesu ye lapui, na ye hededebeui ye wane, “Taukasikasiyebwa mo se henuwa doketa, na tamowai namwanamwadi meta nige. **13** Na kwa lau teina hedehedede ta kaniyona kwa wasenei:

‘Katekamkamma mo ya henuwa,
 na nige kaitalasam.’ (Hoseya 6:6)

Yogu laoma ta meta nige tamowai se bom se kitahedudulai'uyoidi hesabadi, na yababa tamowaidiyao hesabadi.”

Kaihudi henamaina

(Maleko 2:18-22; Luka 5:33-39)

14 Na kabo Yowane Babatiso yona hekahekatao se laoma Yesu se henamaiyedi, “Idohagi to kai yo Paliseya tamowaidiyao ka kaikaihudi, na tauhemuliwatanigo nige se kaikaihudi?” **15** Yesu ye hededebeui ye wane, “Idohagi to tautawasola kana taumana yona tawasola kaikaigogona unai bena se nuwadubu? Sola mahanana kabo ye laoma tautawasola kabo kalidiyena se haigabaei na siya kabo se kaihudi.

16 Nige gonowana tamowai hesau luwuluwu wodubona ye polai kaleko hauhauna unai, matauwuwuna kaleko hauhauna ne luwuluwu kabo ye tabepulisi'uyoi, na tapulisina ne kabo ye lakikalili luwuluwu ne unai.

17 Yo hinage waina hauhauna nige ta ini kaba'inina* beyabeyana unai. Taba waina kaba'inina beyabeyana ta hepaisowa, kabo ye tapulisi, na waina wa kabo ye bwalili. Unai waina hauhauna ta ini waina kaba'inina hauhaudi udiyedi, kabo se namwalabulabui.”

Yesu sinebada yo sinekuku ye henamwanamwadi
(Maleko 5:21-43; Luka 8:40-56)

18 Yesu sola ma hedehededen, na magai wa yodi sunago badana hesau ye laoma Yesu matanaena ye tulibono na ye wane, "Natugu waihiu kaboina ta ye boita, na ku laoma nimam ku tolesae iya kewanaena, kabo ye mauli." **19** Ede Yesu yo yona hekahekatao wa se tolo na mayadi se lau.

20 Se laulau, na kabo sinebada hesau kwasina ye miyamiyagabae bolimai saudoudoi-labui, iya Yesu dagelana unai ye laoma na kana kwama sinosinona ye kabitonogi. **21** Yona nuwanuwatu unai ye wane, "Taba Yesu kana kwama mo ya kabitonogi, kabo ya namwanamwa." **22** Na Yesu ye kitabui sinebada wa ye kita ede ye hededelau unai ye wane, "Natugu, nuwan ye bayao! Yom sunuma ta ye henamwanamwago." Na mahanagan ne unai waihiu wa ye namwanamwa.

23 Sunago badana wa yona numa unai se lage ede tauhigohigo* yo taudoudou bodadi se kitadi, **24** na Yesu ye hededelau udiyedi ye wane, "Kwa pesa! Sinekuku me nige ye boita, na ye keno mo meta." Na se talawasiyei.

25 Boda wa ye hetamalidi se pesagehe kabo Yesu ye mwalaes sinekuku wa yona kabakeno wa unai, na ye kabilau nimana wa unai, ede ye tolo. **26** Na wasana wa ye lau tenem teha ne maudoina unai.

Yesu taumatagibugibu labui ye henamwanamwadi

27 Yesu sunago badana yona numa wa ye laugabaei ye laulau na taumatagibugibu labui se tolo na se hemuliwatani na se yogayoga se wane, "Dawida natuna! Ku katekamkamnaegai!" **28** Na ye mwalaesae yona kabamiya numana hesau unai, na taumatagibugibu wa se laoma iya unai. Na ye henamaiyedi ye wane, "Kwa kawamamohoi meta gonowagu ya henamwanamwagomiu?" Se wane, "Guiau, ka kawamamohoi!" **29** Kabo matadi ye kabitonogidi na ye wane, "Saha kwa kawamamhoiyei wa kabo ye tubu kalimiuyena."

30 Ede matadi wa se lala. Na Yesu ye laugagayoidi ye wane, "Tabu tamowai hesau yona kwa hedehedede!"

31 Na iyamo muliyena yodi lau ne unai meta Yesu wasana wa se helaki tenem teha maudoina ne unai.

Yesu tamowai una'unana ye henamwanamwa

32 Taudi labui wa se hetubu se dahalai, na tatao hekadi kadi kaha hesau se woyaiyama Yesu unai. Yaluwa yababayabana meta ye luwu tamowai wa unai, ede ye una'unana. **33** Na Yesu yaluwa yababayabana wa ye hededehepesa, ede tamowai una'unana wa ye hedehedede. Na boda se noko se wane, "Nige sola laulau hesau doha teina ka kita Isalaela unai!"

34 Na Paliseya tamowaidiyo se wane, "Yaluwa yababayabadi yodi wasawasa Belesebulu yona gigibwaliyena yaluwa yababayabadi ye hededehepesadi."

Yesu tamowai ye katekamkamnaedi

35 Kabo Yesu ye lau magai lakilakidi yo gagilidi ye tauhetakikilidi. Na ye lauhekata yodi sunago udiyedi yo Yaubada yona basileiya wasana namwanamwana ye wasaduwaiyei, yo hinage tamowai kadi kasiyebwa udoi'udoi ye henamwanamwadi. **36** Na boda wa ye kitadi ede ye katekamkamnaedi, matauwuwuna pilipili udoi'udoi se hekalodi na nige tausaguidi, kadi kao doha mamoe nige taukitahetetedi. **37** Na ye hededelau yona hekahekatao wa udiyedi ye wane, "Koya ye masuli, na taupaisowa meta nige se bado. **38** Unai kwa kaibwadalau koya tanuwagana unai kabo taupaisowa ye hetamalidima."

Yesu yona hekahekatao saudoudoi-labui ye hetamalidi se lau se lauwasi

(Maleko 3:13-19 yo 6:7-13; Luka 6:12-16 yo 9:1-6)

10 Yesu yona hekahekatao saudoudoi-labui wa ye yoganedi na gigibwali ye mosedi bena yaluwa yababayabadi se hededehepesadi yo tamowai kadi kasiyebwa udoi'udoi se henamwanamwadi.

2 Taupaisowa ye hetamalidi wa hesadiyo ede teina:

Bagubagunana ede Simona, hesana hesau meta Petelo, yo kana kaha Andeleya.

Yamesi Sebedaiyo natuna, yo kana kaha Yowane.

3 Pilipo yo Batolomaiyo,

Tomasi yo Mataiyo, iya takisi tautanotano,

Yamesi Alepaiya natuna, yo Tadaiyo,

4 Simona Tauhaikabi, yo Yudas Isakaliyota, Yesu kana tauwalohai.

5 Tatao saudoudoi-labui wa Yesu ye guguyaidi na ye hetamalidi ye wane, "Tabu kwa laulau dagela tamowaidiyo yo Samaliya tamowaidi yodi magai udiyedi, **6** na kwa lau Isalaela tamowaidiyo mo udiyedi, siya doha mamoe gegegegediyao.* **7** Kwa lau na kwa wasaduwai kwa wane, 'Galewa basileiyana ye hanahanaumako.' **8** Taukasikasiyebwa kwa henamwanamwadi, tauboiboita kwa hemauli'uyoidi, taulepelepela kwa he'a'adi,* yo yaluwa yababayabadi kwa hededehepesadi. Kainauya ta kwa haimoei nige maisana, unai kwa kainauyaei, tabu maisana. **9-10** Tabu moni, tobwa, kwama, buti, yo tuke kwa laulaubaheidi yomi lau ne unai. Matauwuwuna ede tamowai bena taupaisowa se saguidi.

11 Ena magai hesau unai kwa lage meta tamowai namwanamwana hesau kwa wasenei na yona numaena kwa miya kana siga kwa dahalai. **12** Huyana kwa mwalaesae numa ne unai meta yomi lautoki kwa

9:23 Dius yodi kabikabiyena higo se yuhidi meta huyagwauyalu yo huyanuwadubu udiyedi.

10:6 Yesu Isalaela tamowaidiyo ye heyaheyasoniyedi mamoe gegegegediyao udiyedi, matauwuwuna siya Yaubada taumiyasuwalaena.

10:8 Yaubada taulepelepela ye laugagayoidi tabu se laulau numa tabuna, yo tabu se lulau tamowai hekadiyo udiyedi, na ye hedede ye wane siya se bida. Unai huyana Yesu taulepelepela ye henamwanamwadi meta se hedede se wane ye he'a'adi.

mosei kwa wane, ‘Nuwadaumwali kwa hai!’¹³ Ena numa ne tamowaidiyao se namwa, meta yomi nuwadaumwali ne kwa tole kalidiyena. Ena nige se namwa, meta yomi nuwadaumwali ne kwa hai’uyoi.¹⁴ Ena magai hesau nige se yogaisinigomiu o se lapulaowa kalimiuyena, meta kaemiu mukalidi kwa koinihinihiyedi* na magai ne kwa laugabae.¹⁵ Ya hedededudulai kalimiuyena: Yaubada yona hineli mayadaina ne unai meta kadi hekamkamna se lakikalili, na kabo Sodoma yo Gomola.

¹⁶ Ya hetamaligomiu ta kami kao doha mamoe se lulau kedewa kaikaikalsidiyo udiyedi. Unai bena kwa sonoga doha mwata, yo tabu yababa hesau kalimiuyena, doha bunebune.¹⁷ Bena kwa kitakitanamwanamwa, tamowai kabo se haigomiu yo se laegomiu magai yona laugagayo taukitahetetena udiyedi na se helauhetalagomiu, yo hinage sunago udiyedi kabo se pidilicomiu.¹⁸ Yau debagu ena kabo se haigomiu na se laegomiu wasawasa yo gabana matadiyena, bena kwa hemala galewa basileiyana wasana tauhededehemasalahana siya yo dagela tamowaidiyao udiyedi.¹⁹ Na huyana se haigomiu meta tabu kwa mode bena saha yo idohagi kabo yomi hedehedede. Huyana ne unai kabo hedehedede se masalah.²⁰ Matauwuna hedehedede kwa heddededi ne meta nige komiu, na Tamamiu Yaluwana ye hemasalahadi kalimiuyena na kwa hedededi.

²¹ Tatao kadi kahao kabo kadi se walohaj, yo tama kabo natudiyo se kabidi doha tenem hinage. Natu kabo se tolo na sinadiyo yo tamadiyo se hewaiunudi na se mosegabaedi tau'unuhemwaloidi udiyedi.²² Tatao maudoidi kabo se subugomiu yau debaguyena. Na kaiteya ye miyatahitahi kana siga gehena unai, kabo mauli ye lobai.²³ Ena magai hesau unai se hewaiunugomiu meta kwa yabubu kwa lau magai hesau. Hedehedede ta meta mamohoi, yo hinage ya hedehedelaowa meta nige gonowana Isalaela magaidiyo kwa lauhegehedi na kabo Tau Natuna ye uyoma.²⁴ Nige gonowana wawaya hesau ye saekalili na kabo tauhekatana. Yo hinage nige gonowana taupaisowa ye saekalili na kabo kana tanuwaga.²⁵ Ena wawaya ye sonoga doha tauhekatana meta ye namwa, yo ena taupaisowa se kabi doha kana tanuwaga, meta ye namwa. Ena numa tanuwagana* se hedede meta iya yaluwa yababayababadi kadi tanuwaga Belesebulu, kabo numa ne tanuwagana kana boda* hinage se hededeheyababakaliliyedi.

²⁶ Unai, tabu kwa matausiyedi! Ginauli yo nuwatu wadawadamdi maudoidi kabo se masalah.

²⁷ Boniyaiyena saha ya hedededi wa kabo kwa

hedede'uyoidi mayadaiyena, yo saha beyamiuyedi ya hededegadigadiguguyedyi wa kabo numa kewadi udiyedi kwa hededehehelakidi.

²⁸ Tabu buluma tauhemwaloina kwa matausiyedi, na siya nige gonowadi yaluwa se hemwaloi. Na Yaubada mo bena kwa matausiyei, matauwuwuna iya gonowana buluma yo yaluwa ye unuhemwaloidi kaiwa kalakalasina unai.

²⁹ Pene kesega unai gonowana pekopeko labui ta hemaisadi. Na Tamamiu galewa ne unai ye nuwatukaliliyedi. Taba hesau ye beku, meta kabina ye kata.³⁰ Yo hinage kulumiu maiyawadi meta ye hasilidiko.³¹ Unai tabu kwa matausi. Komiu kwa saekalili na kabo pekopeko yawolina. Yaubada meta ye kitahetetenamwanamwaegomiu.

³² Kaiteyadi se kawanamwanamwaegau boda udiyedi meta yau yogu tehaena kabo hinage ya kawanamwanamwaedi Tamagu galewa ne unai matanaena.³³ Na kaiteyadi se uhalaegau boda udiyedi, kabo hinage ya uhalaedi Tamagu galewa ne unai matanaena.

³⁴ Tabu yomi nuwatu bena ya laoma ta na nuwadaumwali ya mosei kaiaulina ta unai. Nige! Na ya laoma ta meta kelepa ya mosei.*³⁵ Ya laoma ta bena

‘tau ma tamana,
sine kabo ma sinana,
yo sinehelam ma lawana kabo se
haihewahewaiunu’uyoidi.

³⁶ Tamowai kana waiunu ede kabo yona numakalo tamowaidiyao.’ (*Maika 7:6*)

³⁷ Kaiteyana tamana yo sinana ye gadosisikaliliyedi na kabo yau, iya nige gonowana yau yogu. Yo ena kaiteya natuna tau o sine ye gadosisikaliliyedi na kabo yau, iya nige gonowana yau yogu.³⁸ Yo kaiteya nige ye henuwa yona sataulo ye bahei yo ye hemuliwatanigau* meta iya nige gonowana yau yogu.³⁹ Kaiteya yona mauli ye nuwatukaliliyedi meta nige gonowana mauli ye lobai. Na kaiteya yona mauli ye mosegabaei yau debaguyena, iya kabo mauli ye lobai.

⁴⁰ Kaiteya ye yogaisinigomiu, yau hinage ye yogaisinigau. Yo kaiteya ye yogaisinigau meta tauhetamaligau hinage ye yogaisini.⁴¹ Kaiteya peloweta hesau ye yogaisini matauwuwuna iya peloweta, yona kainauya kabo gonogonowana doha peloweta. Yo kaiteya tamowai dudulaina hesau ye yogaisini matauwuwuna iya tamowai dudulaina, iya yona kainauya kabo gonogonowana doha tamowai dudulaina yona kainauya.⁴² Yo hinage ena tamowai hesau yona sagu gagilina doha waila kaputina ye mosei tausunumaegau tamowaina hesau unai

10:14 Laulau ta hededehemasalahana ku lobai Maleko 6:11 unai.

10:25 Numa tanuwagana meta Yesu ye bom ye hedehedede'uyoi.

10:25 Numa ne tanuwagana kana boda*, siya ede Yesu yona hekahekatao yo tauhemuhemuliwatanina hekadiyo.

10:34 Kelepa meta heyahayasoni hesau, kaniyona ede Yesu debanaena tamowai kabo se hewahewaiunu’uyoidi.

10:38 Huyana Loma tamowai hesau se woyai bena kabo se hesataulo meta kabo kana sataulo se hebahei. Unai lausoisoitai kaniyona ede teina: “Kaiteya nige ye henuwa bena tamowai hekadiyo (siya Yesu nige tausunumaena) iya se hekamkamna, nige gonowana iya yau yogu tamowai.”

matawuwuna iya tauhemuliwatanigau, mamohoi iya maisana kabo ye hai."

Yowane Babatiso yona henamai

(Luka 7:18-35)

11 Yesu yona hekahekatao saudoudoi-labui wa ye hededehasahasaidi ye gehe, na kabo ye dahalai ye lau Galili magaidi udiyedi ye lauhekata yo ye lauguguya.

² Na Yowane Babatiso meta numatutugudu unai, na Keliso yona paisowa wa wasana ye lapui na ye nuwalabulabui, ede yona hekahekatao ye hetamalidi se lau Yesu unai ³ bera se henamaiyei se wane, "Mamohoina kowa Kelisona ede ka nayanayai wa, o sola tamowai hesau ka nayanayai kabo ye laoma?" ⁴ Yesu ye hededebugi ye wane, "Kwa uyo na saha kwa lapuidi yo kwa kitadi wa Yowane yona kwa hedehedede, ⁵ meta taumatagibugibu matadi se lala, taubunibuni se laulau, taubonubonu se namwanamwa'uyo, beya kolakoladi se lapulapui'uyo, tauboiboa se tolo'uyo, yo taudehadeha wasa namwanamwana se lapulapui. ⁶ Na kaiteya tamowai nige ye nuwalabulabuiyeigau, Yaubada iya ye kitahenamwa."

Yesu Yowane ye hededeheemasalah

⁷ Yowane yona hekahekatao se dahalai se lau, na kabo Yesu Yowane wasana ye hedehededei boda wa udiyedi, ye wane, "Ginauli saha hesabana kwa lau balabala ne unai bera kwa kita? Nuwana lagau yaumai ye yuhisaei yo ye yuhidobiyei?* ⁸ O yomi nuwatu bera tamowai hesau yona kaleko wasawasadi kwa kita? Tamowai kaleko wasawasadi se likwalikwadi, siya wasawasa yodi numa udiyedi se miyamiya. ⁹ O nuwana kwa lau bera peloweta hesau kwa kita? Mamohoi, Yowane iya peloweta. Na iyamo ye saekalili na kabo peloweta hekadi. ¹⁰ Iya tamowaina ede wasana peloweta Malakai ye kulinonohaiyako buka tabuna unai:

'Yogu tauwasaduwai kabo ya
hetamalibagunaiyawa,
iya yom kamwasa taukabinonohaina.' (Malakai 3:1)

¹¹ Ya hededemamohoi kalimiuyena: Tanoubu ta unai tamowai maudoidi udiyedi nige hesau Yowane Babatiso ye saedikwai. Na iyamo tamowai gaibu galewa basileiyana unai taumiya, iya ye saekalili na kabo Yowane. ¹² Yowane yona huyaena ye hetubu ye laoma teina huya ta meta galewa basileiyana wa ye laki ye lau ma bayaona, na tamowai se bado se kaipate ma gigibwalidi bera se lusae basileiya wa unai. ¹³ Mose yo peloweta maudoidi ye lau ee Yowane yona huyaena, siya Galewa basileiyana wasana se hedehededei. ¹⁴ Na ena taba yodi hedehedede wa

kwa kawamamohoiyedi, kabo kwa nuwatulobai meta Yowane iya ede Eliya se hededenonohaiyako meta kabo ye laoma. ¹⁵ Kaiteyadi gonowana se lapulapui bera se lapulapuinamwanamwa!"

¹⁶ Na Yesu yona hedehedede ye tubei ye wane, "Teina isi ta tamowaidiyo,* saha unai kabo ya hekaigonogonowaidi? Siya doha wawayao bakubakuyena se tuli na kadi kahao se yogayoganedi se wane, ¹⁷ 'Higo ka yuhidi, na nige kwa sobu. Siyau wanadi ka wanaidi, na nige kwa dou.' ¹⁸ Yowane ye laoma na ye kaihudi, na numanuma bayabayaodi nige ye numa, na iyamo se wane, 'Yaluwa yababana hesau ye luwu iya unai.' ¹⁹ Tau Natuna ye laoma ye kaikai yo ye numanuma, na se wane, 'Iya tamowai botabotaina yo numanumana, takisi tautanotano yo yababa tamowaidi kadi kaha.' Na iyamo sibasiba kabahemamohoina ede tamowai yona laulau unai."

Yesu tamowai nige se nuwabui ye guguyaidi

(Luka 10:13-15)

²⁰ Na Yesu Isalaela magaidiyo hekadiyo ye dilaidi, matawuwuna ede laulau gigigigibwalidi se bado udiyedi ye ginaulidi, na nige se nuwabui. Ye wane, ²¹ "Ahani mo komiu, Kolasin yo Betesaida tamowaidiyo, yababa lakilakina kabo kwa hekalo. Laulau gigigigibwalidi ya ginaulidi kalimiuyena wa, taba ya ginaulidi magai yabababadi Taiya yo Sidona udiyedi, meta tamowaidiyo kabo se nuwabuiko, na yodi nuwabui ta unai meta kabo kaleko kadi kao doha baiki se luwuidi yo taudi maudoidi se hekahusadi.

²² Unai ya hededelaowa kalimiuyena: Yaubada yona hineli mayadaina ne unai kamkamna lakilakina kabo kwa lobai, na kabo Taiya yo Sidona tamowaidiyo.

²³ Na komiu Kapelenuma tamowaidiyo, bera kabo Yaubada ye lausinigomiu kwa sae galewa ne? Taba nige! Kabo kwa dobi kamkamna magaina unai! Laulau gigigigibwalidi ya ginaulidi kalimiuyena wa, taba ya ginaulidi Sodoma* unai, meta teina mayadai ta unai kabo Sodoma sola ma miyana. ²⁴ Unai ya hededelaowa kalimiuyena: Yaubada yona hineli mayadaina ne unai kamkamna lakilakina kabo kwa lobai, na kabo Sodoma tamowaidiyo."

Kaiteya gonowana Yaubada kabina ye kata

(Luka 10:21-22)

²⁵ Mahanana ne unai Yesu ye gwauyala na ye tapwalolo ye wane, "Tamagu, kowa tanoubu yo galewa yodi Guiyau. Ya hedebasaego matawuwuna ginauli maudoidi ta ku tolewadampi na tausonoga yo tausibasiba nige gonowana se nuwatulobaidi. Na tamowai gaibu udiyedi ginauli ta ku tolehemasalahadi na se nuwatulobaidi. ²⁶ Tamagu, teina ta yom nuwatu mamohoina ede."

11:7 Lagau meta tamowai nuwanuwalabulabuina hekihekinoina.

11:16 Teina isi ta tamowaidiyo ta, siya ede Paliseya yo Sadusiya kadi bodao. Siya meta se henuwa bera Yesu yo Yowane Dius yodi kabikabi se lauwatanidi.

11:23 Sodoma meta magai yabababakalilina Yaubada ye heyababa wa. Wasana ku hasili Genese 19 unai.

²⁷ Na kabo ye hededelau boda wa udiyedi ye wane, "Nuwatu maudoidi tamagu ye ledima bena ya ginaulidi. Iya ye bom mo kabigu ye kata, na yau* ya bom mo tamagu kabina ya kata, yo hinage yogu kaisunuwa tamowaidi udiyedi tamagu ya hedehedemasalaha na kabina se kata."

Kabakaiyawasi ede Yesu

²⁸ Kabo Yesu ye hededelau udiyedi ye wane, "Yomi taulauhekata laugagayo bayabayaodi se hektagomiu, na laugagayo ne miyawatanidi meta doha bahebahe polopolohedi. Ena kwa kaikaipatekalili bena laugagayo wa kwa miyawatanidi na unai kamnamiu se yababa, meta kwa laoma kaliguwai, kabo kabakaiyawasi kwa lobai. ²⁹ Yau ya nuwabiga yo ya nuwadobidobi, unai yogu lauhekata kwa haidi na kwa miyawatanidi, kabo nuwamiu se talu, ³⁰ matauwuna yogu lauhekata ne ye biga, yo kabo bahebahe malamalahena ya leyawa kwa bahei." *

Ma labui Yesu ye hekitada meta iya Sabati guuyauna

Sabatiyena Yesu yona hekahekatao witi kaniyodi se gigidi
(Maleko 2:23-28, Luka 6:1-5)

12 Sabati hesau unai Yesu maiyana hekahekatao se laulau kabo witi koyana hesau se tauduaduwali se lau. Na se hasali ede witi kaniyodiyo se gigidi na se kaidi.² Na Paliseya tamowaidi hekadi se kitadi ede se hededelau Yesu unai se wane, "Ku kita ne! Yom hekahekatao meta Sabati laugagayona se utusi!" ³ Na Yesu ye hededelau udiyedi ye wane, "Huyana Dawida ma kana hewahewaliyo se hasali na saha ye ginauli wa wasana kwa hasili o nige?" ⁴ Ye lusae Yaubada yona numa unai na pwalawa hetahetabuna ye hai ede se kai. Unai laugagayo se utusi matauwuna ede pwalawa tabuna ta meta taukitalasam mo gonowana se kai. ⁵ Yo Mose yona laugagayo kwa hasili o nige? Ye wane meta taukitalasam numa tabuna unai Sabati maudoina yodi paisowa se ginaginalui na unai Sabati laugagayona se utusi, na iyamo nige kadi gilu. ⁶ Unai ya hedehedelaowa kalimiuyena: Tamowai hesau iya ede inai meta ye saekalili na kabo numa tabuna laugagayona. ⁷ Yaubada yona hedehedede ye wane, 'Katekamkamna mo ya henuwa, na nige kaitalasam.' (Hoseya 6:6)

Taba hedehedede ta kaniyona kabina kwa kata, meta nige gonowana tamowai ta kwa hegilugaibuidi.

⁸ Matauwuna ede Tau Natuna iya Sabati guuyauna ede."

Yesu tamowai nimana basabasana ye henamwanamwa Sabati unai
(Maleko 3:1-6, Luka 6:6-11)

⁹ Tenem teha ne ye laugabae kabo ye lau na ye mwalaesae yodi sunago unai. ¹⁰ Menai meta tamowai hesau nimana ye gagili yo ye basabasa. Na Paliseya tamowaidiyo wa se kaipate bena Yesu se hegili, unai iya se henamaiyei se wane, "Taba Sabatiyena tamowai hesau ta kabihenamwanamwa, kabo laugagayo ta utusi o nigele?" ¹¹ Yesu ye hededelau udiyedi ye wane, "Ena taba Sabatiyena hesau yom mamoe ye bekudobi duhaena, kabo ku lau ku tabeisini'uyoi o nige?" ¹² Na tamowai meta ye saekalili na kabo mamoe! Unai ye namwa mo taba Sabatiyena laulau namwanamwana ta ginauli."

¹³ Na kabo ye hededelau tamowai wa unai ye wane, "Nimam ku tuuhedudulai!" Ede nimana wa ye tuuhedudulai, na ye namwanamwa doha nimana hesauna wa. ¹⁴ Ede Paliseya tamowaidiyo wa se pesa na se koitalaliu taba idohagi na Yesu bena se unuhemwaloi.

Yesu Yaubada yona kaisunuwa tamowaina ede

¹⁵ Yesu yodi nuwatu wa kabina ye kata, unai magai wa ye laugabaei. Bodalakilaki iya se hemuliwatani, na yodi taukasikasiyebwa maudoidi ye henamwanamwadi. ¹⁶ Na ye guguyaidi bena tabu se hedehedehedemasalaha meta iya kaiteya. ¹⁷ Teina unai Yaubada kalinana peloweta Aisaiya ye hedehededi wa se laoma se mamohoi, doha ye wane:

¹⁸ "Teina ta yogu kaisunuwa tamowaina, yo iya yogu heyayai tauhaina tamowaina ede.
Iya ya gadosisiyei, yo ya gwauyalakalili kalinawai.
Yaluwagu kabo ya mosei iya unai
na yogu kabihemauli wasana kabo ye
hedehedehemasalaha dagela tamowaidiyo
udiyedi.

¹⁹ Iya taba nige ye haikawayagala, yo taba nige ye kalinalakilaki.
Hinage tamowai keda udiyedi nige gonowana kalinana se lapuidi.

²⁰ Tamowai basabasadi taba nige ye heyababadi,
yo yodi sunuma gagilidi taba nige ye haigabaedi*
kana siga yodi dudulai ye moseidi.

²¹ Kabo tamowai maudoidi yodi sunuma se tole iya hesanaena." (Aisaiya 42:1-4)

11:27 Hedechedede mamohoina ede *natuna*, na unai Yesu ye bom ye hetala'uyoi.

11:28-30 Lausoiso ta udiyedi Yesu yona hedehedede wa kaniyona mamohoina ku hasili. Ena Yesu yona hedehedede wa ta kulibui

hedehedede kesega kesega unai, kabo doha teina: ²⁸*Kaiteyadi kamnamiu se yababa yo yomi bahebahe se polohe, meta kwa laoma kaliguwai, kabo kaiyawasi ya leyawa.* ²⁹*Yogu bulumakau kabakaulabulabuiyeidi yo yogu lauhekata kwa haidi, matauwuna yau meta ya nuwabiga yo ya nuwadobidobi, na nuwamiu kabo se talu yo se kaiyawasi.* ³⁰*Matauwuna yogu bulumakau kabakaulabulabuiyeidi ne meta ye biga, yo bahebahe kabo ya leyawa ne ye malamalah.*

12:20 Peloweta Aisaiya yona buka unai hedehedede ta meta heyaheyasoni unai ye kuli, iya ede doha teina: "Didiyali welawelaina taba nige ye kabigodu, na lampu wikina nige ye kalasinamwanamwa taba nige ye kabi heboso."

Kaiteya yona gigibwaliyena Yesu ye paipaisowa
(Maleko 3:20-30; Luka 11:14-23)

²² Na kabo tamowai hesau se woyaiyama Yesu unai. Tamowai wa matagibugibuna yo una'unana, matauwuwna yaluwa yabababana iya ye luwui. Na Yesu ye henamwanamwa, kabo ye hedehedede yo matana se lala. ²³ Na boda wa se siliyata na se henahenamai'uyoidi se wane, "Teina ta nuwana Keliso, Dawida Natuna?"

²⁴ Na huyana Paliseya boda yodi hedehedede wa se lapui ede se wane, "Teina tamowai ta meta nige yona gigibwali, na yaluwa yabababadi kadi tanuwaga Belesebulu yona gigibwaliyena yaluwa yabababadi ye hededehepesadi."

²⁵ Na Yesu yodi nuwanuwatu wa kabina ye kata ede ye hededelau udiyedi ye wane, "Taba basileiya hesau ye bom ye lulululu'uyoi, meta taba nige yona namwa hesau ye lobai. Yo taba magai hesau o numa hesau tamowaidiyao se bom se haitoledagela'uyoidi, kabo se bom se hetatagwaligwali'uyoidi. ²⁶ Taba Satani ye bom ye hededehepesa'uyoi, meta iya ye bom ye hewaiunu'uyoi, na yona basileiya kabo idohagi na ye tolobayao?

²⁷ Kwa wane sera Belesebulu yona gigibwaliyena yaluwa yabababadi ya hepesadi. Yo kami kahao hinage yaluwa yabababadi se hededehepesadi. Na yomi nuwatu saha, kaiteya yona gigibwaliyena se paipaisowa? Unai siya kabo se lauhelugomiu meta kwa laupwano. ²⁸ Na ena yau Yaubada Yaluwana yona gigibwaliyena yaluwa yabababadi ya hededehepesadi, meta Yaubada yona basileiya ye laomako.

²⁹ Yo hinage nige gonowana taukaiwahali hesau ye mwalaes tamowai yasiyasiyalana yona numa unai na yona gogo ye haigaibuidi. Yasiyala wa sera ye paibagunai, na kabo gonowana yona gogo wa ye kaiwahalidi.

³⁰ Kaiteya nige ye hemuhemuliwatanigau, iya meta tauhewaiunugau. Yo kaiteya nige ye sagusaguigau yogu paisowa ta unai meta iya paisowa ta tauhetatagwaligwalina. ³¹ Unai ya hededelao, Yaubada kabo yababa maudoidi yo hinage Yaubada hededeheyababana maudoidi ye nuwatugabaedi, na ena tamowai hesau Yalua Tabuna ye hededeheyababa, taba nige yababa ne nuwatugabaena. ³² Hinage ena kaiteya Tau Natuna ye hededeheyababa, Yaubada kabo yababa ne ye nuwatugabaeni. Na ena kaiteya Yalua Tabuna ye hededeheyababa, taba nige yababana ne nuwatugabaena mayadai ta unai yo huya se laolaoma matadaena.

³³ Kaiwa namwanamwana meta kaniyona namwanamwadi, yo kaiwa yababana meta kaniyona yababadi. Kaiwa kabakitalobaidi ede kaniyodi udiyedi.

³⁴ Komiu meta doha mwata yabababadi! Idohagi to sera hedehedede namwanamwadi kwa hedehedede? Nuwanuwatu saha nuwada ne unai ye mwayau meta kabo kawadaena ta hedegabaedi. ³⁵ Tamowai namwanamwana nuwana meta nuwanuwatu namwanamwadi udiyedi ye mwayau, unai iya yona hedehedede kabo se namwa. Yo tamowai yababana nuwana meta nuwanuwatu yababadi udiyedi ye mwayau, unai iya yona hedehedede kabo se yababa.

³⁶ Na ya hededelaowa, Yaubada yona huyahineli mayadaina ne unai kabo tamowai maudoidi se tolo Yaubada matanaena na hedehedede yababadi saha se hededelao wa maudoidi kabo se hededehepesa'uyoi, yo yomi hedehedede ne udiyedi kabo yailihai kwa lobai."

Peloweta lyona hekihekinoina
(Maleko 8:11-12; Luka 11:29-32)

³⁸ Na kabo Paliseya tamowaidiyao yo laugagayo taulauhekataena hekadiyo se laoma Yesu unai se wane, "Taulauhekata, ka henuwa sera laulau gigigigibwalina hesau ku ginauli na ka kita." ³⁹ Na Yesu ye hededebui ye wane, "Teina isi ta tamowaidiyao se yababa na Yaubada nige se sunumaei,* na iyamo se henuwa sera laulau gigigigibwalidi ya hekitadi. Na taba nige laulau gigigigibwalina hesau kwa kita, na hekihekinoi kesega mo kabo unai kwa kitalau ede beloweta lyona hekihekinoina. ⁴⁰ Iya meta mayadai haiyona yo boniyai haiyona yama lakilakina boganaena ye miyamiya. Gonogonowana doha hinage Tau Natuna kabo mayadai haiyona yo boniyai haiyona bwayabwayaena ye miya.

⁴¹ Yaubada yona huyahineli mayadaina ne unai Nineva tamowaidiyao kabo se tolo na teina isi ta tamowaidiyao se hegiludi, matauwuwna ede lyona yona lauguguyaena Nineva tamowaidiyao wa se nuwabui. Na mayadai ta unai tamowai hesau ye saekalili na kabo lyona, iya ede maidamu.

⁴² Huyahineli mayadaina ne unai magai Siba* yodi wasawasa waihiuna kabo hinage ye tolo na teina isi ta tamowaidiyao ye hegiludi, matauwuwna kedalohalohaena ye laoma sera Solomon yona hedehededesonoga ye lapuidi. Na tamowai hesau iya ede inai, ye sonogakalili na kabo Solomon."

Yalua yabababadi yodi kabikabi
(Luka 11:24-26)

⁴³ Kabo Yesu ye hedede'uyo ye wane, "Huyana yaluwa yabababana tamowai hesau ye pesagabaei meta ye lau balabalagaibuyena na yona kabakaiyawasi ye wase, na nige hesau ye lobai. ⁴⁴ Kabo ye wane, 'Hage, ya uyo numa ya laugabaei wa unai.' Ye lage'uyo numa wa ye kita meta se kuya he'a'a yo se

12:39 Yaubada nige se sunumaei Yesu ye heyaheyasoniyei tauganaganawali unai.

12:42 1 Kings 10; 2 Chronicles 9

gwaugogonamwanamwaei, na nige taumiyaina.
45 Kabo ye lau yaluwa yababayabakalilidi haligigi-labui ye woyaidima numa wa unai se lusae na se miya. Ede tamowai wa yona mauli ye yababakalili na kabo yona mauli bagubagunana wa. Teina isi yababana ta yodi mauli kabo hinage gonogonowana doha tenem."

Yesu kehanao

(Maleko 3:31-35; Luka 8:19-21)

46 Numakaloyena, Yesu sola ma hedehededeni boda wa udiyedi, na sinana yo kana kahao se laoma ede dagela wa unai se nayanayai, bena kabo iya maiyadi se hedehedede. **47** Na tamowai hesau ye hedehedelau Yesu unai ye wane, "Sinam yo kam kahao ede dagela ne unai, se henuwa bena se kitago." **48** Kabo Yesu ye hedehedelau tauhededede wa unai ye wane, "Kaiteya iya sinagu, yo kaiteyadi kagu kahao ede?" **49** Ye nimuhelelau yona hekahekatao udiyedi na ye wane, "Ku kitadi, teina sinagu yo kagu kahao ede."

50 Matauwuna kaiteya Tamagu galewa ne unai yona nuwatu ye lauwatani meta iya kagu kaha, lougu, yo sinagu ede."

Bwatano udoi'udoi heyahayasonidi

Yesu bwatano pilipildaina ye hasili

(Maleko 4:1-9; Luka 8:4-8)

13 Mayadai kesekesegana ne unai Yesu numa wa unai ye pesa ye dobi Galili Gabwana dedekanaena ye tuli. **2** Kabo bodalakilaki se tupagogoima iya unai, ede ye gelu waga hesau unai na ye tuli, na boda maudoidi se totolo nagali wa unai. **3** Na kabo ginauli gwaudi heyahayasoniyena ye hedehedi. Ye wane, "Tamowai hesau ye lau yona witi koyana unai na witi likena tumadiyao ye hesulu. **4** Ye hesuhesulu ede like wa hekadi se bekudobi kedaena. Na manuwa se laoma ede se kaidi. **5** Like wa hekadi se beku tano maladebadebana unai. Tano wa nige ye buluma, unai like wa se kinimwamwayau. **6** Na mahana ye dalasae na gigibwalina wa unai ede like wa se wowoya, matauwuna like wa lamdi nige se dobi. **7** Hekadi se beku lagau gwligwalidi luwadiyena. Lagau wa se kini ede like wa se yahaidi. **8** Yo hinage hekadi se beku bwatano namwanamwana unai, ede like wa se kini yo se kaniyo, hekadi kaniyodi badodi 30, hekadi 60, yo hinage hekadi 100. **9** Kaiteyadi gonowana se lapulapui bena se lapulapuinamwanamwa!"

Matauwuna saha to Yesu heyahayasoni mo udiyedi ye laulauhekata
(Maleko 4:10-12; Luka 8:9-10)

10 Muliyena kabo Yesu yona hekahekatao se laoma iya se henamaiyei se wane, "Idohagi to heyahayasoni ku hepaisowadi na ku hedehedelau tamowai udiyedi?" **11** Unai Yesu ye hedehedelau udiyedi ye wane, "Galewa basileiyana hedehededeni wadawadamdi* ya hedehedemasalahadi komiu kalimiuyena, na siya meta nige ya hedehedeli udiyedi. **12** Kaiteyadi yogu lauhekata ta se lapulobaidi, siya galewa basileiyana nuwatulobaina kalidiwai kabo ye lakikalili. Na kaiteyadi yogu lauhekata nige se lapulobaidi meta saha se lapui wa kabo se nuwaluluhiyei yo ye gehe kalidiyena.* **13** Heyahayasoni yogu hepaisowadi kalidiyena kaniyona ede bena

'se lapulapui, na nige se lapulobai,
 se kaikaikewa, na nige saha se kitalobai.'
(Yelemaya 5:21)

14 Yodi laulau ta udiyedi meta peloweta Aisaiya yona hedehededeni wa ye laoma ye mamohoi, doha ye wane,

'Beyamiu udiyedi hedehedede kwa lapulapuidi na iyamo nige gonowana saha hesau kwa lapulobai.

Yo hinage matamiu udiyedi kwa kaikaikewa, na iyamo taba nige saha hesau kwa kitalobai.

15 Matauwuna teina tamowaidiyo ta se nuwakwailolokalili, na beyadi se tupigudui, yo matadiyao se hegibudi. Ena taba nige doha tenem se ginauli, kabo se kitalobai yo se lapulobai yo se nuwatulobai, kabo se nuwabui na ya henamwanamwadi.' "

(Aisaiya 6:9-10)

16 Kabo Yesu yona hedehedede wa ye tubei ye wane, "Na komiu meta gonowana kwa gwauyala matauwuna matamiyao udiyedi kwa kaikaikewa na beyamiyao udiyedi kwa lapulapui. **17** Ya hedehedemamohoi kalimiuyena: Peloweta yo laulaududulai tamowaidi se henuwakalili saha kwa kitadi ta bena se kitadi, yo saha kwa lapuidi ta bena se lapuidi, na iyamo nige se kitadi yo nige se lapuidi."

Yesu bwatano heyahayasonina kaniyona ye hedehedemasalahi
(Maleko 4:13-20; Luka 8:11-15)

18 "Kwa lapulapui, teina ta like tauhesuhesulu heyahayasonina wa kaniyona ede: **19** Kaiteyadi galewa hedehededeni ta se lapui na nige se nuwatulobai, kabo tauyababa ye laoma na saha namwanamwana nuwadiyena wa ye haigabaedi; siya meta doha like se

13:11 Galewa basileiyana hedehededeni wadawadamdi meta beyabeyana tamowai nige kabina se kata, na Yesu ye hedehedemasalahadi yona hekahekatao maudoidi udiyedi.

13:12 Hedehedede ta Yesu heyahayasoni unai ye hedehedebaei, iya ede teina: "Kaiteya ginauli saha gagilina kalinawai meta Yaubada kabo ye helaki yo kalinawai kabo ye badokalili. Na kaiteya nige saha hesau gagilina kalinawai meta gagilina ne kalinawai kabo se haigabaedi."

hesuhesulu na hekadi se beku kedaena na manuwa se laoma ede se kaidi. ²⁰ Tamowai hedehedede wa ye lapui na ye haimoei ma gwauyalana, iya doha like se hesulu maladebadeba unai. ²¹ Nige lamna, unai yona miya nige ye loha. Na huyana pilipili yo hewahawaiunu ye hekalodi yogu hedehedede ta debanaena meta ye nuwagwagwama na ye lausuwala.

²² Like se beku lagau gwaligwalidi luwadiyena meta doha tamowai hesau hedehedede wa ye lapui, na kaiyaulina nuwamodemodena udoi'udoi yo gogo gadosisidi nuwana se hemwayau, ede hedehedede wa kalinawai nige kaniyona. ²³ Na like se beku bwatano namwanamwana unai na kabo hekadi kaniyodi tumadiyao 100 se toledi, hekadi 60, yo hekadi 30, siya meta doha tamowai hesau hedehedede wa ye lapui yo ye nuwatulobai, ede kaniyona se masalahi."

Witi yo lagau heyahayasonidi

²⁴ Yesu heyahayasoni hesau ye hedede'uyoi ye wane, "Galewa basileiyana meta doha tamowai hesau yona koya unai like namwanamwadi ye kuma. ²⁵ Na boniyaiyena tamowai maudoidi se kenoko, na kana waiunu ye laoma ede lagau likedi ye hesulu like namwanamwadi wa luwadiyena, na koya wa ye laugabaei. ²⁶ Huyana like namwanamwadi wa se kini na se hetubu se kaniyo meta lagau wa hinage se kini.

²⁷ Koya tanuwagana yona taupaisowa se laoma unai na se wane, 'Tanusaga, like namwanamwadi ku kumaidi yom koya ne unai, na lagau ne haedi se laoma ede se kini ne?' ²⁸ Ede koya tanuwagana wa ye wane, 'Waiunu lagau me ye hesulu, ede se kini.' Yona taupaisowa wa se wane, 'Gonowana ka lau lagau ne ka upadi?' ²⁹ Na koya tanuwagana wa ye wane, 'Taba nige, matauwuna ena lagau ne kwa upadi, kabo witi ne kwa upahaikesegaidi. ³⁰ Kwa toledi na se kinigogoi kana siga kelikeli kana huya, kabo ya hedede na witi tautanogogoidi lagau ne se tanobagunaedi se kuinidi na se gabudi, na kabo witi ne se tanogogoidi na se baheidima yogu sanalaena se toledi.'

Tuma gagilidi yo yisti heyahayasonidi

(Maleko 4:30-32; Luka 13:18-19)

³¹ Yesu heyahayasoni hesau ye hedede'uyoi tamowai wa udiyedi ye wane, "Galewa basileiyana meta doha kaiwa tumana gagigagilina* tamowai hesau ye hai na yona koyaena ye kumai. ³² Like maudoidi ne udiyedi iya meta tuma gagilikalilina, na ena ye kini koyaena meta iya kabo ye hemala kaiwa lakilakina, kabo manuwa se laoma lagana ne udiyedi se kabinoi."

³³ Hinage Yesu heyahayasoni hesau ye hedede'uyoi ye wane, "Galewa basileiyana meta doha yisti gagilina. Waihiu hesau yisti ne ye hai na pwalawa disina lakilakina unai ye yebwali kabo yisti ne pwalawa maudoina wa ye hesese."

Yesu heyahayasoni ye hasilidi meta peloweta yodi hedehedede wa ye hemamohoiyedi

(Luka 13:20-21)

³⁴ Yesu ginauli maudoidi ta ye hedededi boda wa udiyedi meta heyahayasoni udiyedi ye hedehedede. Na nige hedehedede dudulaidiyao udiyedi ye hedehedede. ³⁵ Kaniyona ede peloweta hesau* yona hedehedede wa ye hemamohoiyedi,

"Kabo kawaguyena heyahayasoni ya hedededi. Yo hinage kaiyaulina yona huyatubu unai na ye laoma hedehedede saha Yaubada ye tolewadamdi wa kabo ya hemasalahadi." (Same 78:2)

Yesu witi yo lagau heyahayasonidi kaniyona ye hededehemasalahi

³⁶ Yesu boda wa ye laugabaedi na ye mwalaе numakaloyena. Na yona hekahekatao wa se laoma iya unai se wane, "Witi koyana unai lagau heyahayasonina wa kaniyona ku hededehemasalahi kalimaiyena." ³⁷ Ye wane, "Like namwanamwana tauhesuluna, iya ede Tau Natuna. ³⁸ Na witi koyana meta kaiyaulina, na like namwanamwadi ede Yaubada yona basileiya tamowaidiyao, na lagau meta tauyababa yona tamowai, ³⁹ na waiunu ede diyabolo iya lagau likena tauhesuluna. Na kelikeli huyana meta kaiyaulina kana siga, na taukelikeli meta Yaubada yona anelu. ⁴⁰ Lagau ta se upadi na se gabudi meta kabo doha kaiyaulina yona huyagehe unai. ⁴¹ Tau Natuna yona anelu kabo ye hetamalidi se lau yona basileiya unai, na tamowai kadi kahao se woyahesuwalalaedi yababa unai, yo yababa tauginaulidi maudoidi se haigabaedi, ⁴² na kabo se tuudobiyedi kaiwa kalakalasina gigigibwalikalilina unai, kabo se doudou yo kawadi se kapuyahisidi. ⁴³ Na siya taukawamamohoi yo yodi laulau se dudulai kadi kao kabo se namanamali doha mahana, Tamadi yona basileiya unai. Kaiteyadi gonowana se lapulapui bema se lapulapuinamwanamwa!"

Wasawasa wadawadamna yo giniuba heyahayasonidi

⁴⁴ "Galewa basileiyana meta doha ginauli wasawasana hesau se tolewadam koyaena. Na tamowai hesau ye lobai bwatano luwanaena, ede ye puluhiwadam'uyoi, na ma gwauyalana ye lau yona gogo maudoidi ye

13:31 Kaiwa ne dimdim unai hesana se katai ede "mustard". Isalaela unai kaiwa ta se kumakumai yodi koya udiyedi, na ye kinimwamwayau ye hemala kaiwa lakilakina.

13:35 Peloweta wa hesana ede Asapa. Same badodi 12 ye kulidi, na tamowai se hedede meta iya hinage peloweta hesau (2 Chronicles 29:30).

lokunegabaedi na monina wa unai tano wa ye hemaisahai.

⁴⁵ Yo hinage galewa basileiyana meta doha gogo taulokulokune tamowaina hesau giniuba namwanamwadi ye wasewase. ⁴⁶ Ena giniuba namwanamwakalilina hesau ye lobai, kabo ye lau yona gogo maudoidi ye lokunegabaedi na monina wa unai giniuba wa ye hemaisahai.”

Hinaya heyaheyasonina

⁴⁷ “Hinage galewa basileiyana meta doha hinaya se galaei gabwaena, na yama kadi kao udoi'udoi se hekonadi. ⁴⁸ Hinaya wa yama ye mwayau ede tauyamayama hinaya wa se gayosaei salagomgom wa unai na yama wa se hekasadi, namwanamwadi se usaidi bosaena na yababadi se gabaedi. ⁴⁹ Kaiyaulina kana siga kabo doha teina: Anelu kabo se dobima tamowai namwanamwadiyao luwadiyena tamowai yababadi se tolehesuwaladi. ⁵⁰ Na ba'aya tamowaidiyao kabo se tuudobiyeidi kaiwa kalakalasina gigigigibwalikalilina unai. Temenai kabo se doudou yo kawadi se kapuyahisidi.”

⁵¹ Yesu yona hekahekatao wa ye henamaiyedi ye wane, “Teina ginauli maudoidi ya hedededi ta kwa nuwatulobaidi?” Se wane, “Aa, ka nuwatulobaidi.” ⁵² Ye hedededelau udiyedi ye wane, “Unai, ena laugagayo taulauhekataena tamowaina hesau Yaubada yona basileiya hedehededenya ye nuwatulobaidi, meta kana kao doha numa hesau tanuwagana yona gogo wasawasadi hauhaudi yo hinage beyabeyadi ye bahehepesadima na ye toledi tamowai matadiyena.” *

Nasaleta unai Yesu se subu

(Maleko 6:1-6; Luka 4:16-30)

⁵³ Yesu heyaheyasoni wa udiyedi ye lauhekatagehe ede magai wa ye laugabaei ⁵⁴ na ye lau yona magai mamohoina Nasaleta. Na yodi sunago unai ye lauhekata ede tamowai wa se siliyata na se wane, “Teina tamowai ta yona sibasiba haedi ye hai? Yo yona gigibwali ne haedi ye hai na laulau gigigigibwalidi ye ginaulidi?” ⁵⁵ Na hinage se wane, “Iya kabina ta katako meta kapenta Yosepa natuna, na sinana ede Maliya, yo kana kahao ede Yamesi, Yosepa, Simiyona yo Yuda. ⁵⁶ Na lounao maudoidi siya ede maiyadao ta miyamiya! Na haedi sonoga ta ye haidi?” ⁵⁷ Unai Yesu nige se kitahenamwa na se kouyalayalaei.

Na ye hedededelau udiyedi ye wane, “Peloweta kabo sehekasisiyei, na iyamo yona magai mamohoina yo yona numa tamowaidiyao taba nige se hekasisiyei.”

⁵⁸ Na Yesu laulau gigigigibwalidi hisa mo ye ginaulidi, matauwuwuna tamowai wa nige se sunumaei.

Yowane Babatiso yona boita

(Maleko 6:14-29; Luka 9:7-9)

14 Huyana ne meta Heloda Antipasi yona huyawasawasa Galili unai. Yesu yona paisowa wasana ye lapuidi ² ede ye hedededelau yona taupaisowa udiyedi ye wane, “Teina meta Yowane Babatiso boita unai ye tolo'uyoma, unai ede laulau gigigigibwalidiyao ye ginaulidi ta.”

³⁻⁴ Yowane Babatiso yona boita wasana ede doha teina: Heloda kana kaha Pilipi mwanena hesana ede Helodiyasi. Na Heloda bwasiyana waihiu wa ye kwayai ede Yowane ye hedeheddedelau unai ye wane, “Saha ku ginauli ta nige ye dudulai!” Unai Heloda Yowane ye hai ye pai na ye tole numatutuguduyena. ⁵ Ye henuwa bema ye unuhemwaloi, na Yudeya tamowaidiyao ye matausiyedi, matauwuwuna ede se hedede meta iya peloweta.

⁶ Na Heloda yona huyalabasi mayadaina henuwaisinina unai ma kana taumana se kaikaigogoi, na Helodiyasi natuna waihiu kadi ye sobu. Yona sobu wa unai Heloda nuwana ye namwakalili ⁷ ede ye hedede kaigwala unai ye wane, “Ena kaliguyena ginauli saha hesau ku kaibwadai meta kabo ya haiyawa.” ⁸ Na sinana iya ye guguyaiyako, ede ye hedededelau Heloda unai ye wane, “Ya henuwa Yowane Babatiso kulukuluna ku usai gaeba unai na ku haiyama.” ⁹ Heloda ye nuwayababa, na iyamo kana taumana matadiyena ye hedede kaigwalako. Unai waihiu wa yona nuwatu ye ginauli ¹⁰ ede ye hedede na Yowane Babatiso gadona se boli, ¹¹ na kuluna wa se usai gaebaena na se baheiyama ede se mosei waihiu wa unai, ede ye bahelaei sinana wa unai.

¹² Yowane yona hekahekatao se laoma ede sinalena wa se hai na se laei bwayabwayaena se tole. Na saha ye tubu wa wasana Yesu yona se hedehedede.

Pwalawa haligigi yo yama labui

(Maleko 6:30-44; Luka 9:10-17; Yowane 6:1-14)

¹³ Yesu Yowane wasana wa ye lapui ede ye dobi wagaena ye gelu na ye kawasi ye lau balabala hesau unai. Magai maudoidi wa tamowaidiyao Yesu yona kabalau wasana se lapui ede se hemuliwatani na se yona se lau. ¹⁴ Na huyana Yesu ye dunasae meta bodalakilaki ye kitadi se nayanayaesi. Na boda wa ye katekamkamnaedi ede taukasikasiyebwa maudoidi ye henamwanamwadi.

¹⁵ Ye hetubu ye meimeilahi ede Yesu yona hekahekatao se laoma iya unai se wane, “Teina meta balabalagaibuyena, yo mahana ye laoko. Boda ta ku hetamalidi se lau magai udiyedi kadi se lokune.”

¹⁶ Yesu ye wane, “Taba nige kwa hetamaligwaligwalidi, na komiu kai kwa moseidi se kai.” ¹⁷ Na se hedededelau unai se wane, “Teina

13:52 Laugagayo taulauhekataena ne kabo lauhekata beyabeyadi yo hinage galewa basileiyana hedehededenya ye hedede hemasalahadi tamowai udiyedi.

kalimaiyena ta meta pwalawa haligigi yo yama labui mo.”¹⁸ Ede Yesu ye wane, “Kwa baheidima kaliguwai.”

¹⁹ Na ye hedede boda wa se tuli lagau wa unai.

Pwalawa haligigi yo yama labui wa ye haidi ede ye kitasae galewa ne na ye lautoki Yaubada unai, kabo pwalawa wa ye kihidi na ye moseidi yona hekahekatao wa udiyedi, na yona hekahekatao pwalawa yo yama wa se soiyedi boda wa udiyedi.

²⁰ Tamowai maudoidi wa se kaikai meta bogadiyao se sese. Na kai kaitoledi wa se tanogogoidi meta bosa saudoudoi-labui se hemwayaudi.²¹ Taukaikai bodana wa unai meta tatao badodi 5,000, na sinesineo yo wawayao nige se hasilikesegaidi.

Yesu gabwaena ye laulau

(Maleko 6:45-52; Yowane 6:15-21)

²² Na kabo Yesu yona hekahekatao wa ye hegeludi se baguna se lau hali tanakawasi ne, na iya boda wa ye hetamaligwaligwalidi.²³ Se dahalaigwaligwali, na kabo iya ye bom ye sae kuduliyena bera ye tapwalolo. Na ye meimeilahi meta iya ye bom mo menai.

²⁴ Waga wa meta gabwa duwaduwalinaena na yaumai se taumatai ede bagodu waga wa se koikoinuwahi.

²⁵ Malatomtom gagilina sola ma masimasigilina* Yesu ye dobi gabwa ne na ye laulau ye lau yona hekahekatao wa udiyedi.²⁶ Yona hekahekatao wa iya se kita gabwa kewanaena ye laolaoma hesabadi meta se matausikalili, ma matausidi na se yogahi se wane, “Aiyoi! Teina ta yaluyaluwa.”²⁷ Na Yesu ye yogalau udiyedi ye wane, “Tabu kwa matausi! Yau Yesu! Kwa nuwabayao!”

²⁸ Ede Petelo ye hededelau iya unai ye wane, “Guuyau, ena mamohoina kowa, ku hedede na gabwa ta unai ya laowa kalimwai.”²⁹ Ye wane, “Ku laoma!” Kabo Petelo waga wa unai ye pesa na gabwa wa unai ye laulau ye lau Yesu hesabana.³⁰ Ye laulau na yaumai yo bagodu wa ye kitadi ede ye matausi na ye hetubu ye yoli, ede ye yogalau ye wane, “Yesu, ku saguigau!”

³¹ Na Yesu nimana ye helelelae na Petelo ye kabihekahini, na ye hededelau unai ye wane, “Yom sunuma taki ye gagili! Idohagi to ku nuwalabulabui?”³² Na se laoma waga wa unai se gelu meta yaumai wa ye motu.³³ Ede taumiyamiya waga wa unai Yesu se kaihelahui yo se wane, “Mamohoikalili, kowa Yaubada Natuna!”³⁴ Na kabo se kawasi se lau Genesaleta unai se duna.

³⁵ Magai wa tamowaidiyo Yesu se kitalobai ede wasa se hetamali ye lau magai maudoidi wa udiyedi. Ede yodi taukasikasiyebwa maudoidi se laedima Yesu unai,³⁶ na se kaibwadakatekamkamna taba kana luwuluwu se kabitonogi. Na kana luwuluwu taukabitonogina maudoidi wa se namwanamwa.

Yaubada yona hedehedede bera ta tolebagunaedi (Maleko 7:1-13)

15 Paliseya yo laugagayo taulauhekataena hekadiyo Yelusalema unai se laoma na Yesu se henamaiyei se wane,² “Idohagi to yom hekahekatao kada kulutubu yodi kabikabi laugagayona se utusi? Nimadiyao meta nige se deulidi na se kaikai.”³ Yesu ye hededelau udiyedi ye wane, “Na idohagi to komiu kami kulutubu yodi kabikabi debanaena Yaubada yona laugagayo kwa utusi?”⁴ Doha Mose yona laugagayo unai Yaubada ye wane,

‘Tamam yo sinam ku hekasisiyeidi.’

(Esodo 20:12; Dutelonomi 5:16)

Yo ye wane,

‘Ena kaiteya tamana yo sinana ye hededeheyababadi meta bera kwa koihemwaloi.’ (Esodo 21:17; Lewitikasi 20:9)

⁵ Unai ta kita meta Yaubada ye henuwa bera tamada yo sinada ta saguidi. Na komiu kwa hedede kwa wane, ‘Gonowana tamowai hesau ye hededelau tamana yo sinana udiyedi ye wane, “Yogu kainauya bera ya haiyawa kabasaguigomiu wa meta ya talameiyako Yaubada unai.”’⁶ Kabikabi ta kwa talameyi, na tama yo sina hekasisidi meta nige! Yomi lauhekata ta unai kwa laupwanokalili. Yaubada yona laugagayo wa kwa tolebasiyeidi na kami kulutubu kabikabidiyao mo kwa miyamiyaidi.⁷ Komiu taukailupolupo! Aisaiya yona hedehedede meta ye mamohoi, doha komiu hedeheddedemi ye hededenonohaiyako ye wane,

⁸ ‘Teina tamowai ta sopagaibudi mo udiyedi se hekasisiyeigau

na nuwamamohoidiyo udiyedi meta Yaubada nuwanuwatuna nigele.

⁹ Yodi tapwalolo kaliguyena meta nige kaniyodi. Laugagayo saha se lauhekataedi meta tamowai mo se ginaulidi.’” (Aisaiya 29:13)

Ginauli saha tamowai ye hebiki

(Maleko 7:14-23)

¹⁰ Kabo Yesu boda ye yogagogoidima na ye hededelau udiyedi ye wane, “Kwa lapulapuinamwanamwa na saha ya hedededi ta kabo kwa nuwatulobaidi.

¹¹ Ginauli saha kawamya ku kai ye dobi meta iya nige gonowana ye hebikigo, na saha luwam ne unai ye saema kawam ne unai ye pesa meta kabo ye hebikigo.”

¹² Kabo Yesu yona hekahekatao se laoma iya unai na se wane, “Yom hedehedede ta unai meta Paliseya bodadi se kouyalayalakalili.”¹³ Ede Yesu ye hededelau udiyedi ye wane, “Tamagu galewa ne unai taumiya, iya kaiwa sahasahadiyao nige ye kumaidi meta kabo ma lamdi ye suluhihaidi.”¹⁴ Kwa laugabaedi se miyawa, siya tauwoyawoya matagibugibudiyo. Taba

taumatagibugibu hesau yona hali taumatagibugibu ye woyai, meta kabo se bekulabulabuidobi duhaena.”

¹⁵ Na Petelo ye hededelau Yesu unai ye wane, “Taba gonowana kabahebikida heyahayasonina wa kaniyona ku hededehehemasalah kalimaiyena.” ¹⁶ Ede Yesu ye hededelau udiyedi ye wane, “Idohagi, sola ma nuwapwanopwanomiu? ¹⁷ Nige kwa nuwatulobai? Saha kawada ta unai ta kai meta ye dobi bogada ne unai na kabo ta miyagabaei. ¹⁸ Na hedehedede saha kawamiuyena se pesama meta nuwamiuyena se masalahama, siya tauhebikigomiu ede.

¹⁹ Matauwuwuna ede nuwada ta udiyedi kabo nuwatu yabayababadi se masalahama, kaiunu, ganawali, laulaubikibiki udoi'udoi, kaiwahali, hedehedelupolupo, yo hinage tamowai hededeheyababana. ²⁰ Teina laulau ta, siya tamowai tauhebikina ede. Na ena nimamiu ma bikidi na kai kwa hai kwa kai meta nige gonowana se hebikigomiu.”

Kanana waihiuna yona sunuma

(Maleko 7:24-30)

²¹ Kabo Yesu teha Galili ye laugabaei na ye sae teha Taiya yo Sidona udiyedi. ²² Na Kanana waihiuna hesau temenai taumiya ye laoma Yesu unai ye kaibwadalakilaki ye wane, “Guylau, Dawida natuna, ku katekamkamnaegau! Yaluwa yababana hesau meta ye luwu natugu sinesinekukuna unai na ye hekasiyebwakaliliyei.” ²³ Na Yesu nige saha hesau ye hedede waihiu wa unai. Kabo yona hekahekatao se wane, “Waihiu ta ku hetamali ye tausuwala, matauwuwuna ede ye dahikwatakatakili.” ²⁴ Ede Yesu ye hedehedede ye wane, “Tamagu ye hetamaligauma ta meta Isalaela yodi mamoe tautaukwadaleledi hesabadi.” ²⁵ Kabo waihiu wa ye laoma ye tulibonodobi Yesu matana wa unai na ye kaibwada ye wane, “Guylau, ku saguigau!” ²⁶ Yesu ye hededebyi ye wane, “Nige ye dudulai bena wawayao kadi kai ta haidi na ta gabalaedi kedewa udiyedi.” * ²⁷ Na waihiu wa ye wane, “Guylau, mamohoi, na iyamo kedewa kadi tanuwaga yona hatahataena kana kai mapuladi se bekudobi meta kabo kedewa ne se laoma se kaidi.” ²⁸ Unai Yesu ye hededelau unai ye wane, “Waihiu, yom sunuma meta ye lakikalili! Unai saha ku kaibwadai meta kabo ye masalah.”

Mahanana ne unai waihiu wa natuna sinekuku wa ye namwanamwa.

Yesu tamowai kasikasiyebwadi ye henamwanamwadi

²⁹ Yesu teha Taiya yo Sidona ye laugabaei na ye uyo Galili, na Galili Gabwana dedekanaena ye yona ye lau. Ye lau ede ye sae kuduli gagilina hesau unai, na ye

tuli. ³⁰ Kabo bodalakilaki se laoma na taukasikasiyebwa se laedima, kasiyebwa doha taubunibuni, taumatagibugibu, tamowai kae yo nima yababayabadiyao, una'unadi yo taukasikasiyebwa hekadi hinage se laedima Yesu unai, ede maudoidi ye henamwanamwadi. ³¹ Unai boda wa se siliyatatakili, matauwuwuna ede matadiyena tau'una'una se hedehedede, taubunibuni ye henamwanamwadi, tamowai kae yababayabadiyao se laulau yo taumatagibugibu matadiyao se lala yo se kaikewa. Na Isalaela yodi Yaubada se hedebasae.

Yesu bodalakilaki ye hekaidi

(Maleko 8:1-10)

³² Yesu yona hekahekatao wa ye yogagogoidima na ye hededelau udiyedi ye wane, “Tamowai ta ya katekamkamnakaliliyedi, matauwuwuna ede mayadai haiyona inai maiyadao na nige sola kai hesau se kai, unai nige ya henuwa ma hasalidi na ya hetamalidi se lau. Taba ma hasalidi na se lau kabo kedaena hasahasali ye haidi na se guli.” ³³ Na se hededebyi se wane, “Teina balabalagaibu ta unai kabo haedi kai ta hai na boda ta ta hekaidi?” ³⁴ Yesu ye henamaiyedi ye wane, “Pwalawa hisa kalimiuyedi?” Ede se wane, “Pwalawa haligigi-labui yo yama habuhabuludiyao hisa ede teina.” ³⁵ Ede ye hededelau boda wa se tulidobi bwatano wa unai. ³⁶ Kabo pwalawa yo yama wa ye haidi na ye hededelautokisae Yaubada unai, ye kihidi na ye moseidi hekahekatao wa kalidiyena, na se soiyedi boda wa udiyedi. ³⁷ Boda wa se kaikai meta maudoidi bogadiyao se sese. Na kadi kaitole wa hekahekatao wa se tanoi na se usagogoi meta bosa haligigi-labui se hemwayaudi. ³⁸ Taukaikai bodana wa unai meta tatao badodi 4,000, na sinesineo yo wawayao nige se hasilikesegaidi. ³⁹ Kabo Yesu boda wa ye hetamaligwaligwalidi. Na yawalana ye lau kabo waga hesau unai ye gelu se lau teha Magadani.

Paliseya yo Sadusiya se henuwa bena galewa hekihekinoina hesau se kita

(Maleko 8:11-13; Luka 12:54-56)

16 Paliseya yo Sadusiya tamowaidiyao hekadi se laoma Yesu unai bena se lautonogi. Na se kaibwadai taba bena galewa hekihekinoina hesau* ye ginauli se kita.

² Ye hededelau udiyedi ye wane, “Meimeilahiyena kwa wane, ‘Huya kabo ye namwa, matauwuwuna ede mahana ye dui na yada ne ye pululu.’ ³ Na malatomtom yena kwa wane, ‘Mayadai ta kabo huyayababa, matauwuwuna ede mahana ye dalasae na yada ne ye pululu yo huya ye toleyaloyalohi.’ Huya kadi kao gonowana kwa hededehehemasalahadi, na

15:26 Yesu yona hedehedede ta kaniyona ede, “Nige gonowana ya saguigo matauwuwuna kowa dagela sinena.”

16:1 Mataiyo Yaubada hesana nige ye katakatai, na yona kulikuli unai meta galewa mo ye hepahepaisowa. Yodi kaibwada ta kaniyona ede Yaubada yona gigibwali hekihekinoina hesau ye ginauli, na ye hemala yodi kabakita meta Yaubada Yesu ye hetamali ye dobima tanoubou ta unai.

idohagi to teina saha se tubutubu ta meta nige gonowana kaniyodi kwa nuwatulobaidi.⁴ Komiu yomi nuwanuwatu se yababa na Yaubada nige kwa kawamamohoiei, na kwa henuwa bena taba laulau gigigibwalina hesau kwa kita. Na taba nige hesau kwa kita, na kesega mo kabo ya hekitagomiu, iya ede saha ye tubu lyona peloweta unai wa.” Kabo Yesu ye laugabaedi na ye lau.

Paliseya yo Sadusiya yodi yisti

(Maleko 8:14-21)

⁵ Galili Gabwana unai se kawasi se lau na Yesu yona hekahekatao wa se nuwaluluhi ede nige pwalawa se bahei.

⁶ Yesu ye hededelau udiyedi ye wane, “Matamiyao se nega, na Paliseya yo Sadusiya yodi yisti kwa kaihaleidi.”

⁷ Hekahekatao wa se bom nuwatu wa se hetahetala se wane, “Yona hedehedede ta kaniyona ede pwalawa nige ta bahei.”

⁸ Saha se hetahetala wa meta Yesu kabina ye kata ede ye hededelau udiyedi ye wane, “Idohagi to yomi sunuma se gagili, na kwa bom pwalawa hedehededenwa kwa hedehedede? ⁹ Nuwana sola nige kwa nuwatulobai? Hage pwalawa haligigi wa kwa nuwatuidi, ya soiyedi boda 5,000 se kai na kadi kaitole kwa tanoi na kwa usagogoi meta bosa badona hisa?

¹⁰ Yo hinage taba pwalawa haligigi-labui wa kwa nuwatuidi! Ya soiyedi boda 4,000 se kai na kadi kaitole kwa tanoi na kwa usagogoi meta bosa hisa?

¹¹ Idohagi to nige kwa nuwatulobai meta yau nige pwalawa ya hetahetala? Na bena Paliseya yo Sadusiya yodi yisti unai komiu kwa kitahetete'uyoigomiu.”

¹² Unai kabo se nuwatulobai meta iya nige pwalawa kadi yisti ye hetahetala, na Paliseya yo Sadusiya yodi lauhekatao bena se kaihaleidi.

Petelo Yesu ye hededehemasalah

(Maleko 8:27-30; Luka 9:18-21)

¹³ Yesu maiyana hekahekatao se lage Sisaliya Pilipi tehana unai, kabo yona hekahekatao wa ye henamaiyedi ye wane, “Hage yogu kwa hedehedede, tamowai maudoidi yodi hededehemasalah meta Tau Natuna iya kaiteya?” ¹⁴ Ede se wane, “Hekadi se hedede meta kowa Yowane Babatiso, hekadi se wane kowa Eliya, hekadi se wane kowa Yelemaiya, yo hekadi se wane kowa peloweta hesau.” ¹⁵ Na ye wane, “Na hage kwa hededehemasalah yau meta kaiteya?” ¹⁶ Ede Simona Petelo ye hededelau unai ye wane, “Kowa meta Keliso, Yaubada maumaulina

natuna.” ¹⁷ Kabo Yesu ye hededelau unai ye wane, “Simona, lyona natuna, kowa gonowana ku gwauyal!* Teina nuwatu ta meta nige ku bom yom sonoga unai ye laoma, na nuwatu ta meta tamagu galewa ne unai ye hemasalah kalimwai. ¹⁸ Unai ya hededelaowa, kowa meta Petelo,* na teina weku ta unai kabo yogu dubu ya kabi. Na boita nige gonowana ye hekaiyawasi.* ¹⁹ Gigibwali ya leyawa na bena Yaubada yona tamowai ku kedabagunaedi. Laulau sahasahadi ku laugagayoidi tanoubu ta unai, meta Yaubada hinage ye laugagayoidi galewa ne unai. Na laulau sahasahadi ku kitahenamwadi, meta Yaubada hinage ye kitahenamwadi.” * ²⁰ Kabo ye hededelau yona hekahekatao wa udiyedi ye wane, “Tabu tamowai hesau yona kwa hedehedede meta yau Kelisona* ede.”

Yesu yona boita ye hededenonohai

(Maleko 8:31-33; Luka 9:22-27)

²¹ Huyana ne unai Yesu ye hetubu yona hekahekatao ye hekatadi na ye hededehemasalah meta bena taba ye lau Yelusalema. Temenai Dius babadadiyo yo taukaitalasam tauwoyaidi yo laugagayo taulauhekataena kabo iya se hekamkamna yo iya kabo se unuheboita, na mayadai hehaiyonana unai kabo Yaubada iya ye hetolo'uyoi na ye mauli. ²² Kabo Petelo Yesu ye woyahesuwala na ye dilai ye wane, “Guiau, teina ginauli ta taba tabu se tubutubu kalimyena.” ²³ Yesu ye kitabui Petelo ye kaikewai na ye hededelau unai ye wane, “Ku tausuwala, kowa Satani! Kowa ku hemala yau yogu kabakalabesibesi. Kowa nige Yaubada yona nuwanuwatu ku nuwatuidi, na tamowai mo yodi nuwanuwatu udiyedi ku nuwanuwatu.”

²⁴ Na kabo Yesu ye hededelau yona hekahekatao udiyedi ye wane, “Taba hesau ye henuwa bena ye hemuliwatanigau, meta iya ye bom ye nuwagabae'uyoi, na yona sataulo ye bahei na ye hemuliwatanigau. ²⁵ Kaniyona ede ena hesau ye henuwa bena yona mauli ye bom ye kitahetete, meta kabo yona mauli ye kabisapuli. Na ena debaguyena hesau yona mauli ye nuwagabaei, kabo yona mauli ye lobai'uyoi. ²⁶ Yo ena tamowai hesau tanoubu ta maudoudoina bena iya yona, na ye bom yaluwana ye heyababa'uyoi, kabo saha namwanamwana ye hai? Saha unai kabo yaluwana ye hemaisahai'uyoi?

²⁷ Matauwuwuna ede Tau Natuna kabo ye uyoma Tamana yona namanamaliyena, maidanao yona anelu. Huyana ne unai tamowai kesega kesega yona

16:17 Hedehedede ta, kowa gonowana ku gwauyal meta gonogonowana doha Mataiyo 5:3-10 udiyedi.

16:18 Petelo kaniyona ede weku.

16:18 Na boita nige gonowana ye hekaiyawasi: Kaniyona ede, gabemani o gigibwali hesau ena se kaipatei bena dubu tamowaidiyo se koihemwaloidi, meta nige gonowana dubu se hekaiyawasi, na dubu kabo ye miya ye lau.

16:19 Lausoisoi unai Yesu yona hedehedede kaniyona ku hasili. Na ena ta kulibui hedehedede kesega kesega unai, kabo doha teina: Kabo galewa basileiyana kana ki ya haiyawa kalimwai. Na saha ku kauhekahini tanoubu ta unai, meta galewa ne unai hinage se kauhekahini. Na saha ku yailigabaei tanoubu ta unai, kabo galewa ne unai hinage se yailigabaei.

16:20 Keliso kaniyona ede Yaubada yona kaisunuwa tamowaina.

mauliyena saha ye ginauliyako wa unai kabo maisana ye mosei.²⁸ Ya hededemamohoi: Hekadiyo inai tautotolo ta meta taba nige se boita ye lau ee Tau Natuna se kita ye laoma iya wasawasa.”

Yesu yona wasawasa se kita

(Maleko 9:2-13; Luka 9:28-36)

17 Mayadai haligigi-kesega mulidiyena kabo Petelo, Yamesi, yo Yamesi kana kaha Yowane, Yesu ye woyaidi se sae kuduli lakilakina hesau kewanaena. Menai se bom mo,² na matadiyena Yesu kana kao ye bui ye namanamali doha mahana, yo kana kaleko se posi yo se dawayakalili.³ Mahanana ne unai menai Mose yo Eliya se taumasalahna na Yesu maiyadi se hedehedede.

⁴ Na Petelo ye hededelau Yesu unai ye wane, “Guiyau, ye namwa mo kai ede inai. Ena ku henuwa, kabo inai gwau haiyona ya kabidi, hesau kowa yom, hesau Mose yona, yo hesau Eliya yona.”

⁵ Sola ma hedehededen, na kabo yalohi dawadawayana ye laoma ye gawuidi, na kalina hesau yalohi wa unai ye wane, “Teina yau natugu ya gadosisiyei. Iya unai yau ya gwauyalakalili. Kwa lapulapulau unai!”

⁶ Hekahekatao wa hedehedede ta se lapui ede se guliyaboyabomdobi bwatano wa unai ma matamatausidi. ⁷ Na Yesu ye laoma ye kabilau udiyedi na ye wane, “Kwa tolo. Tabu kwa matausi.” ⁸ Se tamaisima na se kaikewasae meta nige tamowai hesau se kita, na Yesu ye bom mo.

⁹ Kuduli wa unai se lidi se dobidobi na Yesu ye hededelau udiyedi ye wane, “Saha kwa kita wa meta tabu tamowai hesau yona kwa hedehedede, kana siga Yaubada Tau Natuna boita unai ye hetolo'uyoi.”

¹⁰ Na hekahekatao wa Yesu se henamaiyei se wane, “Idohagi to laugagayo taulauhekataena se hedede meta taba sera Eliya ye laomabaguna, na kabo Keliso?” ¹¹ Yesu ye wane, “Mamohoi, Eliya ye uyoma kabo ginauli maudoidi ye tolehedudulai'uyoidi. ¹² Iyamo ya hededelaowa kalimiuyena: Eliya ede ye laomako, na nige se kitalobai. Na yodi nuwatu saha se henuwa iya unai se ginauli meta se ginaulidiko. Teina kabikabi ta gonogonowana unai kabo Tau Natuna se hekamkamna.” ¹³ Kabo hekahekatao wa se nuwatulobai meta Yesu Yowane Babatiso ye hetahetala.

Yesu wawaya loheya ye henamwanamwa

(Maleko 9:14-29; Luka 9:37-43a)

¹⁴ Huyana se dobima boda luwadiyena kabo tamowai hesau ye laoma Yesu unai na ye tulibonodobi matana

wa unai¹⁵ ye wane, “Guiyau, natugu tau ku katekamkamnaei. Ye kikikiwi, na kasiyebwa ta unai ye kamkamnakalili. Na huya hekadi ye bekudobi kaiwa kalakalasidi kewadiyena yo waila kalodiyena hinage.” ¹⁶ Ya laeyama yom hekahekatao udiyedi na nige gonowana se henamwanamwa.”

¹⁷ Na Yesu ye hededelau udiyedi ye wane, “Komiu nuwatu namwanamwadi tauhe'una'unaedi, nige yomi sunuma! Yau maidamiu ta miya huyana ye lohakalili, na nige kwa kawamamohoi! Wawaya me kwa baheiyama kaliguwai.” ¹⁸ Yesu yaluwa yababayababana wa ye hededehepesa, ede demoni wa wawaya wa ye pesagabaei. Mahanana ne unai ede wawaya wa ye namwanamwa.

¹⁹ Mulyena kabo hekahekatao wa se bom se laoma Yesu unai se henamai se wane, “Matauwuna saha to kai nige gonowana demoni wa ka hededehepesa?”

²⁰⁻²¹ Ye hededebui ye wane, “Nige gonowamiu matauwuna yomi sunuma se gagilikalili. Ya hededemamohoi kalimiuyena: Taba yomi sunuma lakina doha lugu tumana,* gonowana kabo kwa hededelau kuduli ne unai, ‘Ku sigi ku lau menai’, gonowana kabo ye lauwatani. Nige gonowana ginauli hesau kalimiuyena paisowana ye laki.” *

Yesu yona boita hedehededen ye hedede'uyoi

(Maleko 9:30-32; Luka 9:43b-45)

²² Se laomagogoi Galili unai na Yesu ye hededelau yona hekahekatao udiyedi ye wane, “Tau Natuna kabo kana se walohai na tamowai yababayabadiyao kabo se hai.” ²³ Kabo iya se unuhemwaloi, na mayadai hehaiyonana unai kabo Yaubada iya ye hetolo'uyoi na ye mauli.” Ede yona hekahekatao wa se nuwayababakalili.

Numa tabuna takisina

²⁴ Yesu maiyana hekahekatao se lage Kapelenuma, na kabo numa tabuna takisina* tautanotano se lau Petelo unai se wane, “Kami tanuwaga hinage takisi ye toletole o nige?” ²⁵ Ye wane, “Aa, takisi ye toletole.”

Petelo ye uyo numa ede Yesu ye hededebagunalau unai ye wane, “Simona, hage yom nuwatu idohagi? Tanoubu ta wasawasadiyao kaiteyadi udiyedi takisi se tanotano? Se bom yodi magai tamowaidiyao udiyedi, o hali magai tamowaidiyao udiyedi?” ²⁶ Petelo ye wane, “Tamowai hekadiyao udiyedi.” Na Yesu ye hededelau unai ye wane, “Unai yodi magai tamowaidiyao meta taba nige takisi se tole.* ²⁷ Na takisi tautanotano wa sera tabu ta henuwapiplilidi. Unai ku lau gabwa ne unai ku huku. Yama bagubagunana ku katuni meta kawana ne ku gasi,

17:20-21 *Lugu tumana:* Dimdim yena se wane “mustard seed”, na hededehemasalahana meta Mataiyo 13:31 unai kabo ku hasili.

17:20-21 *Kulikuli beyabeyadiyao hisahisadi mo lausoiso 21 se kuli:* *Na yaluwa yababayabadi doha teina meta nige gonowana se pesa kana siga ta kaihudi yo ta tapwalolo.*

17:24 *Numa tabuna takisina* meta moni Dius babadadiyao se tanotano yodi hali Dius tamowaidiyao udiyedi, numa tabuna kabasaguina.

17:26 *Takisina* tanotano kabikabina se hetala ta, iya ede Loma yodi laulau. Loma yodi gabemani takisi monina se tanotano tamowai hekadiyo yodi basileiya unai taumiya udiyedi, na magai lakilakina Loma tamowaidiyao udiyedi nige se tano. Unai Yesu yona hedehedede wa kaniyona ede Yaubada natunao nige gonowana numa tabuna takisina se toletole.

kabo unai moni kesega lakina ede pene hasi ku lobai. Ku hai na kowa yo yau yoda takisi monina ku tole.”

Kaiteya ye saekalili galewa basileiyana unai
(Maleko 9:33-37 yo 42-48; Luka 9:46-48 yo 17:1-2)

18 Huyana ne unai hekahekatao wa se laoma Yesu unai se henamai se wane, “Galewa basileiyana unai meta kaiteya ye saekalili?”² Yesu wawaya gagilina hesau ye yoganeiyama na luwadi wa unai ye hetolo,³ na ye wane, “Ya hededemamohoi kalimiuyena: Nige gonowana kwa lau galewa basileiyana unai kana siga kwa buigomiu kwa hemala doha wawaya gagilina ta.”⁴ Unai, kaiteya ye nuwadobidobi doha wawaya ta meta iya ye saekalili galewa basileiyana unai.⁵ Na ena tamowai hesau wawaya gagilina doha teina wawaya ta ye yogaisini yau hesaguyena meta ye yogaisinigau.⁶ Na ena tamowai hesau teina wawayao tausunumaegau ta hesau ye woyalaei yababa unai, laulau te maisana ede kabo ye kamkamnakalili, na kabo weku lakilakina gadona ne unai se paihekahini na se dobiyei gabwatum ne unai se heyoli.

⁷ Ahani mo siya tanoubu ta tamowaidiyao, kabo kamkamna se hekalo, matauwuna ede tamowai se woyahesuwalalaedi yababa unai. Huya maudoina noho se laolaoma, na ahani mo siya noho ne yodi kabalaoma tamowaidi ne, kabo se kamkamnakalili.⁸ Ena nimam o kaem se woyahesuwalalaego yababa unai, taba ku bolihai na ku gabaei. Ye namwa mo taba ku bunibuni o nimam o kaem kesekesega unai na ku lau ku mauli, na kabo ma tau'udo'udoim na ku lau kaiwa kalakalasina.⁹ Na ena matam ye woyalaeo yababa unai, ku lamohai na ku gabaei. Ye namwa mo taba mata kesekesegam unai ku lau ku mauli, na kabo ma mata labulabuim na se gabalaego kaiwa kalakalasina unai.”

Mamoe tautaukwadalelena pilipilidaina
(Luka 15:3-7)

10-11 Na kabo Yesu ye hedede ye wane, “Tabu wawaya gagilidiyo* kwa kitadobidobiyedi! Ya hedehedehemasalahi kalimiuyena meta galewa ne unai yodi anelu, siya huya maudoina yodi se kaikaibwada Tamagu unai.*

¹² Yomi nuwatu idohagi? Taba tamowai hesau yona mamoe badodi handele kesega, na hesau ye taukwadalele, kabo hekadiyo wa ye tolenamwanamwaedi kuduli wa udiyedi na ye lau

kesega ye taukwadalele wa ye wasenei, e nige?¹³ Ya hededemamohoi kalimiuyena: Ena ye lobai, kabo kesega ta gwaualana ye lakikalili, na kabo mamoe 99 maidanao wa.¹⁴ Gonogonowana doha, Tamamiu galewa ne unai nige ye henuwa bena taba wawaya gagilina hesau ye taukwadalele yababa unai.”

Taulaupwano idohagi kabo ta sagui

15 “Ena kam kaha* saha hesau yababana ye ginauli kalimiya, meta ku lau unai na kowa yo iya yomi labui mo matamiuyena yona laupwano ne ku hedehedehemasalahi. Ena ye lapulaowa kalimwai, meta yababa yona teha unai ku gilihaiyako.¹⁶ Na ena nige ye lapulaowa kalimwai, kabo tamowai kesega o labui ku haidi na maidamwao kwa lau iya unai. Unai kabo yom hedehedede maudoidi se hemamohoiyedi, doha buka tabuna ye hekatada ye wane, ‘Lauhegilu maudoidi meta tamowai labui o haiyona yodi hemamoho ne unai kabo se dudulai.’*¹⁷ Ena nige ye henuwa ye lapulau udiyedi, kabo kwa laei dubu bodana udiyedi. Na ena nige ye lapulau udiyedi, meta iya kabo kwa kabi doha dagela tamowaina o yababa tauginaginauli yo takisi tautanotano yomi kabikabidi.

18 Hedehedede ta meta mamohoi, na hedehedede hesau ya hedede'uyo kalimiuyena: Laulau saha kwa kawanamwanamwaei tanoubu ta unai, Yaubada kabo hinage ye kawanamwanamwaei, na laulau saha kwa kitaheyababadi, Yaubada hinage ye kitaheyababadi.*¹⁹ Yo ya hedede'uyo kalimiuyena doha teina: Ena yomi labui tanoubu ta unai saha kwa talamei na kwa kaibwadai, Tamagu galewa ne unai kabo ye ginauli yomi. ²⁰ Matauwuna, ena tamowai labui o haiyona se laomagogoi yau hesaguyena, meta yau ede siya luwadiyena.”

Kada kaha yona yababa nuwatugabaena

21 Kabo Petelo ye laoma Yesu unai ye henamai ye wane, “Guiau, ena kaliguyena kagu kaha hesau yababa saha ye ginauli, kabo ma hisa yona yababa ne ya nuwatugabaei? Ma kesega o ma haligigi-labui o ma hisa?”²² Yesu ye hedebelui ye wane, “Ya hedehedelaowa, nige bena ma haligigi-labui mo, na bena ma 77.²³ Matauwuna galewa basileiyana kana kao ede doha teina:

Wasawasa hesau yona taupaisowa siya gogo taukitahetetedi ye yogagogoidi na ye henuwa bena yodi paisowa kaniyodi se tolehemasalahadi.²⁴ Yona hekasa ye hetubu ede moni baikidi 10,000* taukabihagahagaina tamowaina se woyaiyama

18:10 Wawaya gagilidiyo Yesu ye hetahetaladi lausoiso 10 yo 14 udiyedi, siya ede Yesu tausunumaena maudoidi, wawayao yo tamowai lakilakidiyao.

18:10-11 Kulikuli beyabeyadi hekadiyo lausoiso 11 se kuli: Matauwuna ede Tau Natuna ye laoma bena tamowai tautaukwadaleledi ye gilihaidi.

18:15 Kam kaha ede helem tausunuma Keliso unai.

18:16 Dutelonomi 19:15

18:18 Hedehedede ta gonogonowana doha Mataiyo 16:19 unai. Ena ta kulibui hedehedede kesega kesega unai meta kaniyona ede teina: Saha tanoubu ta unai kwa kauhekahini, kabo galewa ne unai hinage se kauhekahini. Na saha inai kwa yailigabaei, kabo galewa ne unai hinage se yailigabaei.

18:24 Moni lakina doha Kina unai meta million kesega.

kalinawai.²⁵ Nige gonowana ye hemaisa, ede wasawasa wa ye hedede bena taba tamowai wa ma mwanena yo natudiyao maudoidi, yo yona gogo maudoidi se lokunegabaedi na monina wa unai kana hagahaga wa se hedudulaidi.²⁶ Tamowai wa ye tulibonodobi matana wa unai na ye kaibwadabigabigalau unai ye wane, ‘Ku katekamkamnaegau, na kagu hagahaga ta maudoidi kabo ya hedudulai’uyoidi.’²⁷ Wasawasa wa tamowai ta ye katekamkamnaei ede kana hagahaga wa ye hededegabaedi, na ye kabigabaei ye lau.

²⁸ Na huyana tamowai wa ye pesa ye lau ede kalinaena taukahagahaga tamowaina hesau ye kita kana hagahaga meta nige ye lakikalili.* Gadona unai ye kabihekahini ye nukugwadagwadaei na ye hededesokaso ye wane, ‘Kam hagahaga kaliguwai wa ku hemaisa’uyoi!’.²⁹ Kana kaha wa ye tulibonodobi matana wa unai na ye kaibwadakatekamkamna ye wane, ‘Ku katekamkamnaegau, na kagu hagahaga ta kabo ya hemaisa’uyoidiwa.’³⁰ Nige ye kitalau tamowai ne yona kaibwada wa unai, na ye laei ye hedede se tole numatutuguduyena kana sigana kana hagahaga maudoidi wa ye hedudulaihegehedie.

³¹ Kana kahao hekadi se kita meta se nuwayababakalili, ede se lau wasawasa wa unai na saha ye tubu wa yona se hedehedede.³² Kabo wasawasa wa taukahagahaga kalinaena tamowaina wa ye yoganei’uyoi na ye hededelau unai ye wane, ‘Kowa tamowai yababayababana! Ku kaibwadalaoma kaliguwai, unai kam hagahaga maudoina ya hededegabaei.³³ Idohagi to nige gonowana kam kaha ne ku katekamkamnaei doha yau ya katekamkamnaego wa?’³⁴ Wasawasa wa ye kouyalayalakalili ede tamowai wa ye moselaei numatutugudu taukitahetetena udiyedi na se tole numatutugudu unai na se hekamkamna ye lau ee kana hagahaga maudoidi ye hedudulaidi.

³⁵ Ena nige nuwamiu mamohoidi udiyedi kami kahao yodi yababa kwa nuwatugabaedi, meta kabo Tamagu galewa ne unai yona kabikabigomiu ede doha teina.”

Inawase lauhekatana

(Maleko 10:1-12)

19 Yesu yona hedehedede ta se gehe, kabo Galili ye laugabaei na ye lau Yudeya ye lage Yolidani sagasagana hali tanakawasina unai.² Na bodalakilaki se hemuliwatani, na menai ye henamwanamwadi.

³ Na Paliseya tamowaidiyo hekadi se laoma bena Yesu se lautonogi, na se henamaiyei se wane, “Gonowana taba tamowai hesau mwanena nuwatu saha hesau debanaena ye inawasei, o ye

inawasegaibuimoei?”⁴ Yesu ye hededebui ye wane, “Buka Tabuna unai kwa hasili meta tanoubu huyahetubuna unai Tauginaulida ‘tau yo sine ye ginaulidi’,* o nige kwa hasili?⁵ Na ye hedede ye wane, ‘Teina debanaena kabo tau tamana yo sinana ye laugabaei na ye lau mwanena maidana se miyakesega. Na kabo taudi labui se hemala buluma yo kwasina kesega.’*⁶ Unai siya nige tamowai labui, na se hemalako tamowai kesega mo. Unai, Yaubada saha ye tubeikesegai meta tamowai nige gonowana se hetatagwaligwali.”

⁷ Kabo Paliseya wa se wane, “Idohagi na Mose ye hedede meta gonowana tau hesau inawase pepwana ye kuli na ye mosei mwanena unai na ye hetamali ye lau?”⁸ Yesu ye wane, “Mose ye talamyegomiu bena kwa inawase matauwuwuna ede kwa nuwakwailolokalili. Na iyamo tanoubu yona huyatubu unai meta nige doha teina.⁹ Ya hededelaowa kalimiuyena: Ena tau hesau mwanena yona tawasola miyana ye kabinamwanamwaei na nige ye ganawali, na iyamo ye inawasegaibui na waihiu hesau ye tawasolai, meta tau ne ye ganawali.”

¹⁰ Yona hekahekatao wa se hededelau unai se wane, “Ena teina ta tawasola miyamiyana ede, ye namwa mo taba tabu ta tawatasola.”

¹¹ Yesu ye hededebui’uyo ye wane, “Teina hedehedede ta meta nige gonowana tamowai maudoidi se miyawatani, na siya kaiteyadi Yaubada ye hebayaodi meta kabo hedehedede ta se miyawatani.

¹² Tatao hekadi nige se tawasola matauwuwuna se labasidi meta kobokobosidi, na hekadiyo meta tamowai siya se hekobosidi, na hekadiyo meta yodi talam se ginaulidi Yaubada yona paisowa unai, debanaena ede nige gonowana se tawasola. Unai kaiteyadi gonowana hedehedede ta se hai meta bena se hai.”

Yesu wawayao gagilidi ye hededehenamwadi

(Maleko 10:13-16; Luka 18:15-17)

¹³ Tamowai hekadiyo wawayao se laedima Yesu unai bena nimana ye tolesae kewadiyena yo yodi ye tapwalolo. Na yona hekahekatao tamowai wa se dilaidi bena tabu Yesu se hemohemode.¹⁴ Yesu ye wane, “Wawayao ta bena se laoma kaliguyena, na tabu kwa hededeguduguduidi. Matauwuwuna ede tamowai nuwadobidobina doha teina wawayao ta meta galewa basileiyana siya yodi.”¹⁵ Ede nimana ye tolesaedi wawayao wa kewadiyena yo ye hededehenamwadi. Kabo magai ne ye laugabai ye lau.

18:28 Hagahaga wa lakina ede 100 denali, meta nawalai hasi paisowana maisana, mayadai kesega denali kesega.

19:4 Genese 1:26

19:5 Genese 2:24

Tamowai wasawasana hesau yona henamai Yesu unai

(Maleko 10:17-31; Luka 18:18-23)

¹⁶ Kabo tamowai hesau ye laoma Yesu unai ye henamai ye wane, “Taulauhekata, taba laulau saha namwanamwana ya ginauli kabo mauli nige kana siga ya lobai?” ¹⁷ Na Yesu ye hededelau tamowai wa unai ye wane, “Idohagi to laulau namwanamwadiyo hesabadi ku henamaiyegau. Yaubada ye bom mo ye namwa. Ena ku henuwa bera mauli nige kana siga ku hai, meta laugagayo ku miyawatanidi.” ¹⁸ Na hewali wa ye henamai ye wane, “Laugagayo sahasahadiyo?” Ede Yesu ye wane, “Tabu ku kaiunu, tabu ku ganawali, tabu ku kaiwahali, tabu tamowai hesau ku hegilugaibui, ¹⁹ yo tamam yo sinam ku hekasisiyedi, hinage kam kaha hesau ku gadosisiyei doha kowa ku bom ku gadosisiyei’uyoigo.” ²⁰ Hewali wa ye hededebui ye wane, “Laugagayo maudoidi ta meta ya miyawatanidiko, na saha hesau meta nige sola ya miyawatani?”

²¹ Yesu ye wane, “Ena ku henuwa bera ku dudulai meta ku lau yom gogo maudoidi ku lokunegabaedi na monidiyo ku moseidi taudehadeha udiyedi, na galewa ne unai kabo yom wasawasa gogodiyao ku lobaidi. Na kabo ku laoma ku hemuliwatanigau.” ²² Na hewali wa hedehedede ta ye lapui ede ye nuwayababa na ye dahalai, matauwuna yona gogo meta se badokalili.

Kaiteya kabo ye mauli

(Maleko 10:23-31; Luka 18:24-30)

²³ Unai kabo Yesu ye hededelau yona hekahekatao wa udiyedi ye wane, “Ya hededemamohoi kalimiuyena meta tamowai gogogogodiyao yodi lusolalau galewa basileiyana unai meta ye kwailolokalili. ²⁴ Na ya hedehedemasalahau’yo kalimiuyena: Ye masalahakalili meta kamela nige gonowana ye lusola diu duhana unai. Gonogonowana doha tamowai gogogogona hinage nige gonowana ye lusolalau Yaubada yona basileiya unai.”

²⁵ Yesu yona hekahekatao wa hedehedede wa se lapui meta se siliyata ede se henamai se wane, “Kaiteya kabo gonowana ye mauli?”

²⁶ Yesu ye kitadudulailau kalidiyena na ye wane, “Tamowai se bom mo nige gonowana mauli se lobai, na Yaubada unai ginauli maudoidi meta gonowana.”

²⁷ Kabo Petelo ye hededelau unai ye wane, “Hemuliwatanigo ta unai meta ginauli maudoidi ka nuwatugabaediko. Na maisamai ede saha kabo ka lobai?”

²⁸ Yesu ye hededelau udiyedi ye wane, “Ya hededemamohoi kalimiuyena, ginauli maudoidi huyahehauhau’uyoidi mayadaina ne unai kabo Tau Natuna yona telona saesaena unai ye tuli, meta komiu tauhemuliwatanigau ta kabo hinage telona badodi saudoudoi-labui udiyedi kwa tuli na Isalaela tamowaidiyo boga saudoudoi-labui ta kwa

kitahetetedi. ²⁹ Yo kaiteyadi siya yodi numa, kadi kahao, loudiyao, tamadiyao, sinadiyao, natudiyao yo yodi tano se laugabaedi yau debaguyena, meta kabo se hai’uyoidi se laki yo se badokalili, yo hinage mauli nige kana siga meta kabo siya yodi. ³⁰ Na tamowai ta kitahesae’useidi meta hekadi kabo se laoma se dobi, na tamowai ta kitadobidobiyei’useidi wa meta hekadi kabo se laoma se sae.”

Taupaisowa wine koyana unai hedeheddededi

20 Na Yesu ye wane, “Galewa basileiyana heyahayasonina hesau ede doha teina: Koya tanuwagana hesau malatomtomyena ye lau yona taupaisowa ye haidi se laoma bera yona wine koyana unai se paisowa. ² Yona talam ye ginauli kalidiyena meta mayadai kesega paisowana ne unai kabo ye hemaisadi denali kesega. Kabo ye hetamalidi se lau se paisowa. ³ Mahana 9 kiloki yona teha wai ye uyo kabalokulokune bakubakuna wa unai. Menai tamowai hekadi ye kitadi se totologaibu nige kadi paisowa. ⁴ Ye hededelau udiyedi se lau yona wine koyana wa unai se paisowa yo kalidiyena ye wane, ‘Maisa dudulaina unai kabo ya hemaisagomiu.’ Ede se lau se paisowa. ⁵ Mayamayadailaki unai yo 3 kiloki meimeilahi unai hinage ye uyo na laulau kesekesegana wa ye ginauli’uyo.

⁶ Meimeilahi 5 kiloki unai ye uyo na tamowai hekadi ye lobai’uyoidi se totologaibu. Ede ye henamaiyedi ye wane, ‘Idohagi to mayadai udo’udoina ta unai inai kwa totologaibu na nige saha hesau kwa ginauli?’ ⁷ Se hededelau unai se wane, ‘Matauwuna ede nige tamowai hesau ye haigai bera taba yona ka paisowa.’ Kabo ye hededelau udiyedi ye wane, ‘Komiu hinage kwa lau yogu wine koyana unai taupaisowa ne kwa paisowasaguidi.’

⁸ Paisowakaiyawasi mahanagan unai koya tanuwagana wa ye hededelau yona taupaisowa kadi tanuwaga wa unai ye wane, ‘Yogu taupaisowa maudoidi ku yogagogoidima na yodi paisowa maisana ku moseidi. Taupaisowamulita udiyedi ku hetubu ku lau ee taupaisowabaguna udiyedi ku kaiyawasi.’

⁹ Taupaisowamulita awa kesega mo se paisowa wa se laoma ede maisadi denali kesega se hai. ¹⁰ Na taupaisowa ye haibagunai’useidi wa yodi nuwatu meta bera kabo siya maisa lakilakina se hai, na iyamo maudoidi wa meta hinage denali kesega se hai.

¹¹ Maisadi wa se haidi na se kitadi meta denali kesega kesega ede se hetubu se hetalapili koya tanuwagana wa unai, ¹² se wane, ‘Teina tamowai ta ku haimulita’useidi ta meta se paisowa awa kesega mo na kai meta ka paisowa mahana gigibwalina wa unai yo paisowa lakilakina ka ginauli mayadai udo’udoina wa unai, na iyamo ku hemaisadi meta gonogonowana doha kai ku hemaisagai ta.’ ¹³ Na koya tanuwagana wa ye hededelau kadi kaha hesau unai ye wane, ‘Kehagu, nige hekasa yababana hesau ya ginauli o ya

kaolupolupo kalimwai. Wau ku yali meta kabo denali kesega paisowana ku paisowa.¹⁴ Maisam ta ku hai na ku lau, yogu hekasa ya ginauliyako meta kabo taupaisowamulita maisana ya mosei doha kowa taupaisowa bagubagunana maisam ta.¹⁵ Teina moni ta yau yogu moni, unai yogu dudulai gonowana saha ya hekasa meta kabo ya ginauli. O nuwana ku kaikalomagigiliyedi matauwuwuna ede ya kabinamwanamwaedi?’”

¹⁶ Yesu yona hedehedede wa gehena unai ye wane, “Na tamowai ta kitadobidobiyei'useidi wa meta hekadi kabo se laoma se sae, na tamowai ta kitahesae'useidi meta hekadi kabo se laoma se dobi.”

Yesu yona boita hedehededenya hedede'uyoi

(Maleko 10:32-34; Luka 18:31-34)

¹⁷ Huyana Yesu yona sae Yelusalema unai yona hekahekatao saudoudoi-labui wa ye woyahesuwaladi na ye hededelau udiyedi ye wane,¹⁸ “Teina yoda sae Yelusalema ta unai meta Tau Natuna kabo se mosegabaei taukaitalasam tauwoyaidi yo laugagayo taulauhekataena udiyedi. Siya kabo se hegili yo se hetamalilaei ye boita.¹⁹ Yo kabo se moselaei dagela tamowaidiyao udiyedi kabo se talatalawasiyei, se pidili yo se laei se hesataulo. Na mayadai hehainonana unai kabo Yaubada iya ye hetolo'uyoi.”

Yamesi yo Yowane sinadi yona kaibwada Yesu unai

(Maleko 10:35-45)

²⁰ Na kabo Sebedaiyo natunao ma sinadi se laoma Yesu unai, na sinadi wa ye tulibonodobi na ye hededelau Yesu unai taba gonowana yona kaibwada ye ginauliwatani.²¹ Yesu ye wane, “Yom kaibwadana ede saha?” Sinebada wa ye wane, “Taba gonowana ku hededenonohai meta yom basileiya unai kabo natuguwao labui ta hesau tehatutum ne unai ye tuli yo hesau tehaseuseulim ne unai ye tuli.”²² Yesu ye hededelau udiyedi ye wane, “Saha kwa kaikaibwadai ta meta nige kabina kwa kata! Keyaka* unai kabo ya numa meta gonowami kabo unai kwa numa?” Ede se wane, “Kai gonowamai.”²³ Yesu ye hededelau udiyedi ye wane, “Kagu keyaka ta kabo komiu hinage unai kwa numa, na bena tehatutugu o tehaseuseuliguyena kwa tuli meta yau nige gonowana ya hekasa. Teina kabatuli ta meta tamagu ye kabinonohaidiko yona kaisunuwa tamowaidiyao siya yodi.”

²⁴ Yamesi yo Yowane yodi hedehedede wa hekahekatao hekadiyo wa se lapui ede se kouyalayala.

²⁵ Ede Yesu ye yogagogoidima na ye hededelau udiyedi ye wane, “Kabina kwa kata meta dagela tamowaidiyao yodi wasawasa saesaediyo yo yodi tauwoyawoya tamowaidi lakilakidiyo yodi loinai

gigibwalina yo bayabayaona unai yodi tamowai se loinaedi.²⁶ Na komiu yodi laulau ta tabu kwa laulauyeidi. Na ena hesau luwamiuyena ye henuwa bena hesana ye sae yo ye laki meta iya bena ye hemala heyayai tauhaina tamowaina.²⁷ Yo kaiteya ye henuwa bena ye bagunaegomiu meta iya taba ye hemala yomiu taupaisowa tamowaina.²⁸ Doha ede Tau Natuna ye laoma nige bena tamowai iya yona se paisowa, na iya bena tamowai yodi ye paisowa yo kabo yona mauli ye mosegabaei yo unai tamowai maudoidi ye hemaisahaidi na se mauli.”

Taumatagibugibu labui matadi se lala

(Maleko 10:46-52; Luka 18:35-43)

²⁹ Huyana Yesu maiyana hekahekatao Yeliko se laugabaei meta bodalakilaki se hemuliwatanidi.

³⁰ Keda wa dedekana unai meta taumatagibugibu labui se tutuli. Wasa se lapui meta Yesu kabo keda ne unai ye laoma ye lau, ede kalinalakilaki unai se yogayoga se wane, “Guiau Dawida natuna, ku katekamkamnaegai.”³¹ Na boda wa taumatagibugibu labui wa se dilaidi se wane, “Kwa taumodimodiya, kwa kaiyawasi!” Na nige se modelau udiyedi, na se yogahilakilaki'uyo se wane, “Guiau, Dawida Natuna e, ku katekamkamnaegai!”³² Kalinadi wa Yesu ye lapui ede ye kaiyawasi ye yoganeidi na ye henamaiyedi ye wane, “Saha kwa henuwa bena yomiu ya ginauli?”³³ Se hededelau iya unai se wane, “Guiau, ka henuwa bena matamai ta se lala yo ka kaikewa.”³⁴ Yesu ye katekamkamnaedi ede ye kabilau matadiyo wa udiyedi, na mahana na unai matadiyo wa se lala yo se kaikewa, na se tolo ede Yesu se hemuliwatanidi.

Yesu yona sae Yelusalema unai bodalakilaki se hailobai

(Maleko 11:1-11; Luka 19:28-40; Yowane 12:12-19)

21 Huyana se laoma Yelusalema se hanahanawui na Olibe koyana unai se lage Betepage magaina dagelana unai, kabo Yesu yona hekahekatao labui ye hetamalidi se lau² na ye hededelau udiyedi ye wane, “Kwa lau magai matamu ne unai. Menai kabo donki ma natuna se paihekahnidi kwa kitadi. Kwa yailihaidi na kwa laedima kaliguwai.³ Ena tamowai hesau saha ye hedede kalimiyena, meta kwa hededelau unai kwa wane, ‘Guiau ye henuwadi.’ Kabo mahana na unai ye talamgabaedi.”

⁴ Teina laulau ta ye tubu bena peloweta saha ye hededenonohaiyako wa ye laoma ye mamohoi.⁵ Ye wane,

“Kwa hededelau Saiyona* natunao udiyedi, ‘Kwa kita yomi wasawasa ye laolaoma kalimiuwai, ye nuwadobidobi yo donki unai ye gelu, na donkina ne meta donki natuna.’”

20:22 Keyaka unai kabo ye numa na ye hetahetala'usei ta meta kamkamna lakilakikalilina kabo unai ye lulau.
21:5 Yelusalema hesana hesau ede Saiyona.

⁶ Hekahekatao labui wa se lau ede saha Yesu ye hedede kalidiyena wa se ginauliwatani. ⁷ Donki wa ma natuna se laedima kabo kadi luwuluwu se haigabaeidi na se yesedi donki wa kewadiyena kabo Yesu ye tulisae donki natuna wa kewana ne unai.

⁸ Bodalakilaki kadi luwuluwu se haigabaedi na se yesedi keda wa unai yo hekadi se lau kaiwa lagadiyao gagigagilidi ma lugulugudi se bolihaidi na se laoma keda wa unai se yesedi. ⁹ Kabo bodalakilaki wa se baguna yo se mulita na se heyohheyoga se wane,

“Hosana,* Dawida Natuna!”

“Ka hedebasaego, kowa Guiyau hesanaena ku laoma!”

“Hosana saesaekalilina!”

¹⁰ Huyana Yesu ye mwalaesae Yelusalema meta magai wa tamowaidiyao maudoidi se siliyata na se henahenamai'uyoidi se wane, “Teina kaiteya tamowaini?” ¹¹ Boda wa se hededelau udiyedi se wane, “Teina ta Yesu, iya peloweta, Nasaleta tamowaina, Galili unai ye laoma.”

Yesu taulokulokune numa tabuna bakubakuna unai ye henakuhepesadi

(Maleko 11:15-19; Luka 19:45-48; Yowane 2:13-16)

¹² Yesu ye lusae numa tabuna unai na taulokulokunegabae yo tauhemahemaisa ye henakuhepesadi yo moni taulaulauhedudu* yodi hatahata ye buikahalaedi yo bunebune taulokulokunegabaei yodi kabatuli ye buikahalaedi. ¹³ Ye hededelau udiyedi ye wane, “Peloweta Yaubada kalinana ye kulihermasalahayako meta, ‘Yogu numa ta kabo hesana se katai ede kabatapwalolo numana’ (Aisaiya 56:7), na yomi kabikabina ta meta doha ‘taukaiyahali yodi kabakenowadam duhana’.” (Yelemaya 7:11)

¹⁴ Taumatagibugibu yo tamowai kaediyao yababayabadi se laoma numa tabuna wa unai na Yesu ye henamwanamwadi. ¹⁵ Na numa tabuna bakubakuna wa unai wawayao Yesu se nokonokoei se wane, “Hosana Dawida Natuna!” Na taukaitalasam tauwoyaidi yo laugagayo taulauhekataena laulau gigigibwalidi yo namwanamwadi Yesu ye ginaulidi wa se kitadi yo wawayao yodi hedebasae wa se lapui meta se kouyalayalakalili. ¹⁶ Se henamaiyei se wane, “Wawayao ta saha se hedehedede ta ku lapui, o nige?” Yesu ye wane, “Aa, na komiu sola nige kulikuli tabuna unai kwa hasili? Doha ye wane, ‘Wawayao yo wawayao bedabedalidi ku hepaisowadi na kabo sopadiyena kowa se nokoeigo yo se hedebasaego.’” (Same 8:2)

¹⁷ Kabo boda wa ye laugabaedi na magai lakilakina wa ye pesagabaei ye lau Betani unai ye kenokwaduwali.

Yesu kaiwa hesau ye hedede kita

(Maleko 11:12-14 yo 20-24)

¹⁸ Malatomtom gagilina unai yona seuyo magai lakilakina wa hesabana na keda wa unai ye tauhasahasali. ¹⁹ Na kaiwa hesau hesana ede fig keda wa dedekanaena ye totolo ye kita ede ye lau kaiwa wa unai na ye kita meta kaiwa wa lugugaibuna ye kuyawa na nige kaniyona. Ede ye hededelau kaiwa wa unai ye wane, “Kowa taba nige huya hesau ku kaniyo'uyo.” Mahana ne unai kaiwa wa ye wowoya.

²⁰ Yona hekahekatao saha ye tubu wa se kita meta se nokokalili. Se henamai se wane, “Idohagi na kaiwa ta ye wowoyamwamwayau?” ²¹ Yesu ye hedede bui ye wane, “Ya hededemamohoi kalimiyena, ena kwa sunuma na nige unai kwa nuwalabulabui, kabo laulau saha kaiwa ne unai ye tubu ta hinage gonowana kwa ginauli. Nige ye bom mo, na hinage gonowana kwa hededelau kuduli ne unai kwa wane, ‘Ku tudobiyei'uyoigo gabwa ne unai!’, meta gonowana kabo ye tubu. ²² Ena kwa kawamamohoi kabo ginauli sahasahadi tapwalolo ena kwa kaibwadaidi kabo kwa haidi.”

Yesu yona dudulai henamaina

(Maleko 11:27-22; Luka 20:1-8)

²³ Yesu ye seuyo numa tabuna wa unai na bakubakuna unai ye hetubu ye lauhekata, na taukaitalasam tauwoyaidi yo magai babadadiyao se laoma iya se henamaiyei se wane, “Kaiteya yona gigibwaliyena teina laulau ta ku ginaulidi, yo kaiteya yom dudulai ye haiyawa na taulokulokune wa ku henakuhepesadi?” ²⁴ Yesu ye hededelau kalidiyena ye wane, “Yau hinage kabo henamai hesau ya henamaiyeigomiu. Ena yogu henamai ta kwa bui, meta kabo kaiteya yona gigibwaliyena teina laulau ta ya ginaulidi ta kabo ya hedede hemasalah kalimiuwai. ²⁵ Hage, Yowane yona hebahebabatiso paisowana meta haedi ye laoma, o kaiteya ye mosei? Yaubada ye mosei o tamowai se mosei?” Se bom kalidiyena se hetahetala se wane, “Taba ta wane, ‘Yaubada unai ye laoma’, kabo iya ye wane, ‘Idohagi to nige kwa kawamamohoiyei?’ ²⁶ Ena taba ta wane, ‘Tamowai udiyedi ye laoma’, meta boda ta ta matausiyedi matawuwuna ede siya se kawamamohoi meta Yowane iya peloweta.” ²⁷ Ede se hededelau Yesu unai se wane, “Nige kabina ka kata.” Unai ye hededelau udiyedi ye wane, “Yau hinage taba nige ya hedede hemasalah haedi yogu gigibwali yo yogu dudulai ta ya haidi na laulau ta ya ginaulidi.”

Natu labui heyaheyasonidi

²⁸ Kabo Yesu ye hedede'uyo babadao wa udiyedi ye wane, “Hage kwa nuwatuhekasa, taubada hesau meta natunao labui. Huya hesau ye hededelau taubaguna

21:9 Hosana kaniyona ede “Ku saguigai!”, na Yesu yona huyaena Dius tamowaidiyao meta hedebasae unai se hepaisowa.
21:12 Taulaulauhedudu yodi paisowa meta dagela monidiyao se hai na numa tabuna monina unai se hedudu.

wa unai ye wane, ‘Natugu, ku lau yoda wine koyana unai ku paisowa.’²⁹ Ye wane, ‘Taba nige ya lau.’ Iyamo muliyena nuwana ye bui ede ye lau ye paisowa.

³⁰ Kabo tamadi wa ye lau natuna helabuina wa unai ye wane, ‘Ku lau yoda wine koyana unai ku paisowa.’ Natuna wa ye wane, ‘Aa, tamagu, kabu ya lau.’ Na iyamo nige ye lau.”³¹ Kabo Yesu ye henamaiyedi ye wane, “Natu sahasahana tamana yona nuwatu ye lauwatani?” Se wane, “Natu taubaguna wa.” Yesu ye hededelau udiyedi ye wane, “Ya hededemamohoi kalimiuyena, tauyababa doha takisi tautanotano yo sinesineo taudiyao se lokulokunegabaedi moni hesabana, siya kabu se lusolabagunalaub Yaubada yona basileiya unai na kabu komiu, matauwuna siya meta doha taubaguna wa.³² Matauwuna Yowane ye laoma kalimiuyena mauli dudulaina kamwasana ye hekitagomiu, na nige kwa kawamamohoiei, na takisi tautanotano yo sinesineo taudiyao se lokulokunegabaedi moni hesabana, siya se bom mo se kawamamohoiei. Yodi nuwabui ta kwa kita, na iyamo nige kwa nuwabui yo kwa kawamamoho.”

Wine koyana taukitahetetena heyahayasonidi

(Maleko 12:1-12; Luka 20:9-19)

³³ Kabo Yesu yona hedehedede babadao wa udiyedi ye tubei ye wane, “Teina hinage heyahayasoni hesau ta kwa lapui. Tano hesau tanuwagana yona wine koyana ye kumai, ye ganahetakikili, yo yona wine kaniyodi kabatamtam yo koya yona kabayaialiwaina ye ginaulidi. Kabo yona wine koyana ye moselae koya taupaisowa hekadiyo udiyedi se kitahetete na kabu ye lau ye kadau.³⁴ Wine huyagigidi nawalaina ye lage ede yona heyayai tauhaidi ye hetamalidi se lau wine koyana taukitahetetena wa udiyedi kabu wine giginonohaidi wa udiyedi koya tanuwagana yona lausoiso bena se haidi.³⁵ Na koya taukitahetetena wa heyayai tauhaidi wa se kabihekahnidi, hesau se bibigwadagwadai na hesau se koihemwaloi yo hesau se hekalaweku ede ye mwalo. ³⁶ Koya tanuwagana wa yona heyayai tauhaidi katubadodi ye hetamalidi se lau, na koya taukitahetetena wa hinage laulau kesekesegana wa se ginauli kalidiyena.³⁷ Unai gehegehena meta iya ye bom natuna ye hetamalilaei kalidiyena, na ye wane, ‘Natugu ta kabu se hekasisiyei na yoma lausoiso dudulaina se mosei.’³⁸ Huyana koya taukitahetetena wa koya tanuwagana natuna wa se kita meta se wane, ‘Teina tau ta meta iya tamana lauhedamaina ede, kwa laoma ta unuhemwaloi na yona gogo maudoidi meta kabu ta tanuwagaidi.’³⁹ Ede se hai na koya ganana wa unai se gabahepesa na se koihemwaloi.

⁴⁰ Unai hage kwa nuwatui, ena wine koyana tanuwagana ye uyoma meta kabu saha ye ginauli wine koyana taukitahetetena ne udiyedi?”⁴¹ Boda wa se wane, “Teina tamowai ta yodi laulau yababayababadi ta kabu ye haidi na ye unuhemwaloidi. Na wine koyana ne kabu ye mosehekawalaei taukitakitahetete

hekadiyo udiyedi. Ena wine kaniyodi huyagigidi nawalaina ye lage, siya kabu gonowana wine kaniyodi wa yona teha se moselaei koya tanuwagana unai.”

⁴² Yesu ye hededelau udiyedi ye wane, “Kulikuli tabudiyao udiyedi teina hedehedede ta kwa hasili o nige?

‘Taukabinuma weku se laukwatakataiusei wa meta ye hemala kabakabinuma wekuna namwanamwana yo saesaekalilina. Teina ta meta Yaubada ye ginauli, na matadaena kitakitana meta ye namwakalili.’ (Same 118:22, 23)

⁴³ Unai ya hededelaowa kalimiuyena: Yaubada yona basileiya meta kabu kalimiuyena ye haigabaei na ye moselaei tamowai hekadiyo udiyedi, siya kabu se paisowai na kaniyo namwanamwadi se masalaha.

⁴⁴ Ena hesau ye bekudobi weku ne unai kabu ye talugodugodu, na ena weku ne ye bekudobi tamowai hesau kewanaena meta kabu ye kaihesolusolu.”

⁴⁵ Taukaitalasam saesaedi yo Paliseya tamowaidiyao Yesu yona heyahayasoni wa se lapuidi ede kabina se kata meta siya kadi hedehedede.

⁴⁶ Unai kamwasa se wase kabu taba idohagi na Yesu se hai, na iyamo boda wa se matauseidi matauwuna ede siya se hedede meta iya peloweta.

Hetahetawasola kaikaigogona heyahayasonina

(Luka 14:15-24)

22 Kabo Yesu heyahayasoni hesau ye hedede'uyoi tamowai lakilakidiyao wa kalidiyena ye wane,
² “Galewa basileiyana kana kao ede doha wasawasa hesau natuna yona tawasola kabinonohana ye kabinonoha.³ Kabo yona heyayai tauhaina ye hetamalidi se lau kana taumana udiyedi na se hededelau udiyedi bena se laoma tawasola kaikaigogona ne unai, na iyamo se laukwatakata.

⁴ Ede yona heyayai tauhaina hekadiyo hinage ye hetamalidi se lau na ye wane, ‘Kwa hededelau tauloma ne kalidiyena meta kai yo yogu bulumakau sinisinibudi namwanamwadiyao ya ligadi yo ya kabinonohaidiko. Unai bena taba kwa laoma hetahetawasola kaikaigogona ta unai.’⁵ Na taumana ne nige se lapulau tautauwasa wa udiyedi na se bom mo yodi nuwatu se lauwatanidi, hekadi se lau yodi koya na hekadi se lau yodi sitowa.⁶ Yo hekadiyo heyayai tauhaidi wa se kabihekahnidi na se bibidi yo se koihemwaloidi.⁷ Na wasawasa wa saha ye tubu wa wasana ye lapui meta ye kouyalayalakalili. Unai yona tau'iyala tamowaidiyao ye hetamalidi se lau taukai'unu wa se koihemwaloidi yo yodi magai wa se gabu.

⁸ Kabo wasawasa wa ye hededelau yona heyayai tauhaidi wa udiyedi ye wane, ‘Hetahetawasola kaina wa ta kabinonohaiyako, na taumana ya hededelau udiyedi wa nige se mode, unai ede nige se laoma.

⁹ Unai kwa lau keda udiyedi tamowai kwa kitadi meta kwa heddedelau udiyedi na se laoma hetahetawasola kaikaigogona ta unai.¹⁰ Kabo heyayai tauhai i wa se lau magai lakilakina kedana maudoidi udiyedi tamowai namwanamwadi yo yababayababadi se lobaidi meta se woyagogoidima ede kabahetahetawasola numana wa se hemwayau.

¹¹ Na kabo wasawasa wa ye laoma ye mwalee numa wa unai bena taumana wa ye kitadi, na luwadiyena tamowai hesau ye kita meta nige hetahetawasola kwamana ye likwa.¹² Ede ye henamaiyei ye wane, ‘Kehagu, idohagi to ku laoma teinai na hetahetawasola kwamana nige ku likwa?’ Na tamowai wa nige saha hesau ye hedede.¹³ Kabo wasawasa wa ye heddedelau yona heyayai tauhaina hekadiyo udiyedi ye wane, ‘Tamowai ta nimana yo kaena kwa paidi na kwa gabahepesa masigili ne unai, temenai kabo ye doudou yo gadigadina ye kapuyahisidi.’¹⁴ Yesu yona hedehedede wa ye hegehe ye wane, “Yaubada ye hedede bena boda se laoma, na iyamo tamowai hisa mo se talam ede se laoma.”

Takisi tolene henamaina unai Paliseya se kaipate bena Yesu se lupohai

(Maleko 12:13-17; Luka 20:20-26)

¹⁵ Na kabo Paliseya bodana wa se laomagogoi na se koitalaliu bena taba idohagina kabo Yesu se lupoi na yona hedehededyena ye laupwano, na unai kabo se hegili.¹⁶ Kabo Paliseya bodana kadi hewahewaliyo yo Heloda kana boda tamowaidiyao se hetamalidi se lau Yesu unai, se wane, “Taulauhekata, kabina ka kata meta kowa laulaududulai tamowaina yo mamohoi yo dudulaiyena Yaubada yona laulau miyamiyadi ku laulauhekataedi, matauwuwuna tamowai maudoidi ku hekasisigogoidi na nige ku modelau kadi kao yo yodi laulau udiyedi.¹⁷ Hage yom nuwanuwatu saha ku hedede kalimaiyena: Gonowana takisi ka tole Sisa unai, o nige?”*¹⁸ Na yodi nuwatu yababana wa Yesu kabina ye katako ede ye heddedelau udiyedi ye wane, “Komiu taukailupolupo tamowaidiyao. Idohagi to kwa kaipate bena kwa lupohaigau?¹⁹ Hage takisi kabahemahemaisa monina hesau kwa hekitagau.” Ede denali kesega iya se hekita.²⁰ Na ye henamaiyedi ye wane, “Kaiteya tautauna yo hesana se kulidi denali ta unai?”²¹ Ede se wane, “Sisa.” Kabo ye heddedelau udiyedi ye wane, “Saha Sisa yona meta kwa mosei Sisa unai, na saha Yaubada yona meta kwa mosei Yaubada unai.”²² Yesu yona hedehedede wa se lapui meta se siliyata yo se nuwanuwatukalili ede se laugabaei.

Boita tolo'uyona hedechededena

(Maleko 12:18-27; Luka 20:27-40)

²³ Mayadai kesekesegana ne unai Sadusiya bodana se laoma Yesu unai. Sadusiya tamowaidiyao meta boita tolo'uyona nige se kawamamohoieyi. Na se henamaiyei se wane,²⁴ “Taulauhekata, Mose ye hedede meta ena tamowai hesau ye tawasola na nige natuna na ye boita, meta kana kaha kabo kwabuli ne ye tawasolai. Ena natuna meta kabo se hedede waihiu ne mwanena bagubagunana wa natuna.²⁵ Sinebada hesau natunao tatao badodi haligigi-labui. Taubaguna ye tawasola nige natuna, na ye boita, ede kana kaha helabuina kwabuli wa ye tawasolai.²⁶ Laulau kesekesegana ta ye tubu kalinawai ye lau hehaiyonadi wa unai ye lau ye dobi ee gehena hehaligigi-labuidi wa unai,²⁷ kabo waihiu wa hinage ye boita.²⁸ Unai hage ku hedede na ka lapui: Tolo'uyo unai meta waihiu ta mwanena ede kaiteya? Matauwuwuna ede tatao haligigi-labui wa waihiu ta se tawasolai.²⁹ Yesu ye heddedelau udiyedi ye wane, “Yomi nuwatupwano ta kaniyona ede kulikuli tabudi yo Yaubada yona gigibwali meta nige kabidi kwa kata.³⁰ Matauwuwuna ede tolo'uyo huyana unai meta taba nige tamowai se tawasola'uyo, yo taba nige natudiyo se hetawasola'uyoidi, na tautolo'uyo meta siya kabo kadi kao ede doha galewa aneludiyo.³¹ Na boita tolo'uyona hedechededena unai meta Yaubada kalinana kulikuli tabuna udiyedi kwa hasilidi e nige,³² doha ye wane, ‘Teina mayadai ta yau ede Abelahaha yona Yaubada, Isako yona Yaubada, yo Yakobo yona Yaubada hinage.’ (Esodo 3:6) Tamowai haiyona ta buluma unai se boitako. Na Yaubada meta nige tauboiboita yodi Yaubada, na iya taumaumali yodi Yaubada. Unai ye masalaha meta tamowai haiyona ta siya ede sola se maumauli galewa ne unai.”³³ Yona lauhekata hedehedededi boda wa se lapui meta se siliyatkalili.

Laugagayo saesaekalilina

(Maleko 12:28-34; Luka 10:25-28)

³⁴ Paliseya bodadi se lapui meta Sadusiya bodana wa Yesu ye hedede hemwanoudiko ede se laomagogoi,³⁵ na luwadi ne unai hesau meta iya laugagayo kabina taukatakalili na ye henuwa bena henamai hesau unai Yesu ye lupoi.³⁶ Ede ye wane, “Taulauhekata, laugagayo sahasahana meta iya laugagayo lakilakikalilina ede?”³⁷ Yesu ye heddedelau unai ye wane, “Guiau yom Yaubada ku gadosisiyei ma nuwam maudoina, yaluwam maudoina, yo yom nuwanuwatu maudoina hinage.³⁸ Teina meta iya laugagayo bagubagunana yo lakilakikalilina ede.³⁹ Yo helabuina meta doha bagubagunana ne: Kam kaha hesau ku gadosisiyei doha kowa ku bom ku gadosisiyei'uyoigo.⁴⁰ Mose yona laugagayo yo

22:17 Ena Yesu ye hedede bena takisi se hemaisa Sisa unai, meta kabo Dius tamowaidiyao se koipiliyei. Na ena ye wane, nige, kabo Heloda kana boda iya se koipiliyei.

peloweta yodi kulikuli maudoidi yodi wuwu ede teina laugagayo labui ta."

Keliso meta iya kaiteya natuna?

(Maleko 12:35-37; Luka 20:41-44)

41 Yesu Paliseya wa ye kitadi se totolo ede ye henamaiyedi ye wane, **42** "Yomi nuwatu ede saha? Keliso meta iya kaiteya? Yo iya kaiteya natuna?" Se wane, "Iya meta Dawida natuna." **43** Yesu ye heddedelau udiyedi ye wane, "Idohagi to Yaluwa Tabuna yona gigibwaliyena Dawida ye hedehedede na Keliso ye kawaguiyauyei? Doha ye wane,

44 'Guiau ye heddedelau yogu Guiayu unai ye wane, "Nimatehatutugu unai ku tuli kana siga kam waiunu ya toledobiyeidi kaem guninaena se hemala kaem kabatolena." (Same 110. 1)

45 Ena taba Dawida ye kawaguiyauyei, idohagi to bena iya Dawida natuna?" **46** Nige gonowana hesau ye heddedebui Yesu unai, na tenem mayadaina ne unai na ye lau meta nige tamowai hesau ye nuwabayao na henamai hesau unai bena Yesu ye lupoi'uyoi.

Yesu tamowai ye guguyaidi tauwoyawoya yodi kailupolupo tabu se miyamiyaedi

(Maleko 12:38-40; Luka 11:43 yo 46; Luka 20:45-47)

23 Na kabo Yesu ye heddedelau boda yo yona hekahekatao wa udiyedi ye wane, **2** "Laugagayo taulauhekataena yo Paliseya bodana, siya meta Mose yona kulikuli tabudiyo tautitahekanamwanamwaedi yo taulauhekataedi. **3** Unai saha se heddededi ne bena kwa miyawatanidi, na laulau saha se ginaulidi meta tabu kwa laulauyeidi, matauwuna ede saha se laulauhekataedi meta nige se miyamiyawatanidi. **4** Laugagayo bayabayaodi se ginaulidi bena taba tamowai se miyawatanidi, siya meta doha bahebahe polopolohedi se tolesaedi tamowai kewadiyena na se baheidi, iyamo siya nige gonowana nimadi se helelelaedi bena se saguidi.

5 Ginauli maudoidi se ginaulidi meta bena kabo unai tamowai se kitahenamwadi. Laugagayo hedehededediyo kulikulidi kaba'usaidi ne se helakigaibuidi na se paihepatudi debadi yo nimadi udiyedi,* yo kadi kwama pasadiyao se helohagaibuidi,* **6** yo kaikaigogo lakilakidiyo yo sunago udiyedi meta se henuwa bena kabatuli namwanamwadiyao udiyedi se tuli. **7** Na ena se lau kabalokulokune magaidiyo udiyedi se henuwa bena tamowai se laoma ma hekasisidi se lautokiyeidi na se kawayauwedo yo se kawatanuwaga* udiyedi.

8 Na komiu tabu se kawatanuwaga kalimiyena, matauwuna kami tanuwaga kesega ede yau, na

komiu meta doha boga kesega. **9** Tabu tanoubu ta tamowaina hesau kwa katai meta iya tamamiu, matauwuna tamamiu kesega ede galewa ne unai.

10 Yo hinage komiu tabu hesamiu se katai meta taulauhekata, matauwuna tauhekatagomiu kesega ede Keliso. **11** Kaiteya luwamiyena ye saekalili meta iya bena ye hemala yomi heyayai tauhaina. **12** Kaiteya ye bom ye toleisini'uyoi meta Yaubada kabo ye toledobiyei, na kaiteya iya ye nuwadobidobi meta Yaubada kabo iya ye toleisini."

Yesu tauwoyawoya ye guguyaidi

(Maleko 12:40; Luka 11:39-52 yo 20:47)

13-14 Kabo Yesu ye wane, "Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyo! Kabo kamkamna lakilakina kwa hekalo! Tamowai yodi lulau galewa basileiyana meta kwa gudukaliliyei. Komiu taba nige kwa lulau galewa basileiyana, na kaiteyadi se henuwa bena se lusola meta kwa hekahekaiyawasidi.*

15 Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyo! Kabo kamkamna lakilakina kwa hekalo! Kwa lau teha maudoina kwa tauhetakikilidi bena tamowai kwa nuwakoidi, na ena hesau ye nuwabui na ye hemala kami kaha hesau, yona laulau kabo se yababakalili na kabo komiu, na iya kabo ye lau kaiwa kalakalasina doha komiu.

16 Ahani mo komiu, tauwoyawoya matagibugibudi! Kwa hedede kwa wane, 'Ena tamowai hesau ye kaigwala numa tabuna ne unai meta yona kaigwala ne nige mamohoina, na ena tamowai hesau ye kaigwala numa tabuna golena ne unai meta nige gonowana ye bui'uyoi.' **17** Komiu taumatagibugibu yo tamowai yauyaulediyao! Ginauli saha meta ye saekalili, gole ne o numa tabuna yona tabu ne debanaena gole ne ye tabu? **18** Yo hinage kwa hedede kwa wane, 'Ena tamowai hesau ye kaigwala kaitalasam kabagabuna ne unai meta nige mamohoi, na ena tamowai hesau ye kaigwala kaitalasam udiyedi meta yona kaigwala ne nige gonowana ye bui'uyoi.' **19** Komiu tamowai matagibugibudiyo! Kaitalasam gogodiyao kabahetabudi ede kaitalasam kabagabuna. Unai kaitalasam kabagabuna ye saekalili na kabo kaitalasam gogodiyao. **20** Unai ede ena tamowai hesau ye kaigwala kaitalasam kabagabuna ne unai, meta hinage ye kaigwala ginauli maudoidi kewana ne unai se toledi wa udiyedi. **21** Na ena kaiteya ye kaigwala numa tabuna ne unai, meta hinage ye kaigwala Yaubada unai, iya meta numa tabuna ne unai

23:5 Kabikabi ta meta laugagayona Yaubada unai ye laoma. Dutelonomi 6:8 unai ta lobai.

23:5 Kwama pasadiyao meta hinage Yaubada yona laugagayo hesau, Numela 15:38 unai ta lobai.

23:7 Dius Kalinadiyena meta se wane "Rabbj", kaniyona ede tanuwaga o taulauhekata.

23:13-14 Kulikuli beyabeyadi hekadiyo lausoiso 14 hinage se kuli doha tenem: Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyo! Wabuwabu kwa lupoidi na yodi numa kwa haidi kwa tanuwagaidi. Na kabo kwa lau tamowai matadiyena yomi tapwalolo kwa helohadi. Unai hekamkamna lakilakikalilina kabo kwa lobai.

taumiya.²² Yo ena kaiteya ye kaigwalasae galewa ne unai meta ye kaigwala Yaubada yona telona unai, yo hinage telona ne unai tautuli ne.

²³ Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Laugagayo lakilakidi kwa tolehesuwaladi, na laugagayo gagigagilidi kwa toleisinidi. Doha yomi koya uwa'uwadi gagilidiyao* udiedydi yomi taiti kwa toledi, na laugagayo nuwanuwatudi lakilakidi nige kwa lauwatanidi, siya ede laulaududulai, katekamkamna, yo sunuma. Taba laugagayo gagilidi ne tabu kwa nuwaluluhiyedi na hinage laugagayo lakilakidi ta bena kwa miyawatanidi.²⁴ Komiu tauwoyawoya matagibugibudiyao! Kami waila udiedydi nabugala kwa hekonagabaei na iyamo kamela meta kwa tonoli.*

²⁵ Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Kami keyaka yo gaeba* dageladiyao kwa deulinamwanamwaedi, na kalodiyao ne udiedydi meta mahimahihi yo nuwatu'uyo se mwayau.²⁶ Komiu Paliseya matagibugibudiyao! Kami keyaka yo gaeba kalodiyao ne kwa deulibagunaedi na dageladiyao ne kabo hinage se a'a.

²⁷ Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Matauwuna ede kami kao meta doha bwayabwaya dagelana se deulihe'a'a na se pokahuheposiposi na iyamo kalona ne unai meta boha yo tauboiboita siliyadi ye mwayau.²⁸ Gonogonowana doha, komiu kami kao ede doha bwayabwaya ne: Tamowai se kitagomiu meta bena komiu miyamiya dudulaidi tamowaidiyao, na iyamo nuwakalomiuyena meta laulaulupolupo yo nuwatu yababayababadiyao se mwayau.

²⁹ Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Peloweta bwayabwayadi kwa kabinamwanamwaedi yo hekihekinoidiyao kwa hetolodi, yo laulaududulai tamowaidiyao bwayabwayadi kwa hepasanamwanamwaedi.³⁰ Na kwa wane, 'Taba kama kulutubu maidamaiyao ka miya meta peloweta yodi hekamkamnadi ne unai taba nige ka kabisagusaguidi.'³¹ Yomi hedehedede ta unai kwa bom kwa hedehedemasalahau'yoigomiu meta komiu peloweta taukohemwaloidi wa kadi isimilitao ede.³² Taba kulutubumiyo laulau yababadi saha se ginaulitoledi wa kwa lae kwa hegehemolosiyeidi!³³ Komiu mwata yo mwata yababayababadi natudiyao!

Idohagi kabo Yaubada yona hekamkamna magaina kwa wasabugabaei?³⁴ Unai kabo peloweta yo tamowai sibasibadiyao yo taulauhekata ya hetamalidiwa kalimiuwai. Hekadi kabo kwa koihemwaloidi yo kwa hesataulodi, na hekadi kabo sunago kalodiyena kwa sapidi yo kwa henakudi se lau teha udoi'udoi udiyedi.³⁵ Teina laulau ta debanaena laulaududulai tamowaidiyao kaiyaulina ta unai se unuidi wa kwasinadi giludi kabo se dobima kewamiuyena, laulaududulai tamowaina Abela kwasinana unai ye hetubu ye dobima ee Belakiya natuna Sakaliya unai, iya ede kabakaitalasam yo numa tabuna duwaduwalidiyena kwa koihemwaloi'usei wa.³⁶ Ya hededemamohoi kalimiuyena, ginauli maudoidi ta giludi kabo se dobima kewamiuyena na kamkamna lakilakina kabo kwa lobai."

Yesu Yelusalema tamowaidi ye katekamkamnaedi (Luka 13:34-35)

³⁷ Kabo Yesu ye wane, "Ae Yelusalema, Yelusalema ee, kowa peloweta taukohemwaloidi yo tamowai Yaubada ye hetamalidiwa kalimyena meta ku hekalawekudi. Huya maudoina meta ya henuwa bena natumwao ya kabigogoidima doha kamkam sinadi natunao ye kabigogoidi pepenao gunidiyena, na iyamo komiu nige kwa henuwa.³⁸ Unai sola kwa kita, Yaubada kabo numa tabuna ye laugabaei na ye hemala numagaibu.³⁹ Unai ya hededelaowa kalimiuwai, nige gonowana kwa kita'uyoigau kana sigana ee kwa wane, 'Ka hedebasaego, kowa Guiyau hesanaena ku laoma!'

Huya gehegehedi hedeheddedi

Mataiyo 24:1 ye lau 25:46

Numa tabuna kabo ye ulugwaligwali (Maleko 13:1-2; Luka 21:5-6)

24 Numa tabuna bakubakuna wa unai Yesu ye dahalai ye laulau na yona hekahekatao wa se laoma ede se yogahekaiyawasi na se hedehedelau unai se wane, "Sola numa tabuna yo numana hekadiyo ne yodi kabikabidi yo kadi wawali ne ku kitadi!"² Na ye hedehedelau udiedydi ye wane, "Ginauli maudoidi ta kwa kitadiko. Ya hededemamohoi kalimiuyena, taba nige weku hesau ye miya yona hali weku kewanaena, na maudoidi meta kabo se ulugwaligwali." *

23:23 Koya uwa'uwadi gagilidi meta siya ede kai kabahepanedi, na Dimdim yodi hesa ede "mint, dill, cummin". Kalina Saliba yoda hesa ede "saiyala".

23:24 Kamela meta laugagayo, Dius tamowaidi nige gonowana se kaidi (Lewitikasi 11:4). Nabugala yo kamela hedeheddedi ta kaniyona ede, "Yababa gagilidi kwa kaihaleidi, na yababa lakilakidi kwa ginaulidi".

23:25 Keyaka yo gaeba, siya ede nuwadi yo yodi mauli heyaheyasonidi.

24:2 Yesu saha ye hededenonohai ta meta bolimai 70 unai ye laoma ye mamohoi. Loma yodi tau'iyala Yelusalema magaina yo hinage numa tabuna se hayababa. Numa tabuna se gabu na kaiwa gigibwalina unai gatowa golena ye solu ye bwaliyi ye dobi na ye luwu numa wekuna duwaduwalidiyena. Unai weku maudoidi se tabegwaligwalidi.

Kamkamna huyahetubudi
(Maleko 13:3-13; Luka 21:7-19)

³ Se lau se lage Olibe koyana unai, ede Yesu ye lau ye tuli na yona hekahekatao wa se bom se laoma iya unai na se henamaiyei se wane, "Taba yomai ku hedehedede, kaiuyana kabo laulau ku hedehedede wa se tubu, na yom uyoma yo tanoubu yona huyagehe hekihekinoidi ede saha?"

⁴ Yesu ye hedehedelau udiyedi ye wane, "Bena matamiyao se nega na tabu tamowai hesau ye lupohaigomiu. ⁵ Tamowai se bado kabo hesagu ena se laoma na se hedehedede meta siya Keliso, na tamowai se bado kabo se lupohaidi. ⁶ Iyala wasadiyao yo hinage iyala wasalupolupodiyo kabo kwa lapuidi, na tabu udiyedi kwa matausi. Ginauli doha teina kabo se tubu, na iyamo teina nige huyagehena ede. ⁷ Magai hesau bodana yo magai hesau bodana kabo se haihewahawaiunu'uyoidi. Basileiya hesau yo basileiya hesau kabo hinage se haihewahawaiunu'uyoidi. Yo hinage hasahasali lakilakidi yo mwanikuniku kabo se tubu teha udoi'udoi udiyedi. ⁸ Ginauli saha se tubu ne meta ginauli nuwamatamatausidiyo sola kabo se laoma yodi kabahetubu ede.

⁹ Na kabo se hekamkamnagomiu yo se unuhemwaloigomiu, yo magai maudoidi bodadiyao kabo se hewaiunugomiu yau debaguyena. ¹⁰ Tenem huyana ne unai boda hekana kabo Guiyau sunumana se laugabaei, ede kadi kahao se hewaiunudi yo kadi se walohai. ¹¹ Peloweta bwalabwala se bado kabo se masalahna na bodalakilaki kabo se lupohaidi. ¹² Yababa udoi'udoi se lakikalili, debanaena tamowai kadi kahao gadosisidi nuwadiyena kabo se gagili yo se gehe. ¹³ Na ena kaiteya ye tolobayao ye lau ee pilipili maudoidi sigadi ne unai, meta Yaubada kabo ye hemauli. ¹⁴ Na basileiya wasana namwanamwana se lauguguyaei kaiyaulina teha maudoina unai na tamowai maudoidi se lapui, na kabo huyagehehena ye laoma.

¹⁵ Na numa tabuna unai kabo ginauli nuwamatamatausina kwa kita ye totolo, iya magai tauheyababana, iya ede peloweta Daniyela ye hedehedemasalahalusei wa* —lausoisoi ta tauhasilina meta kaniyona bena ye nuwatulobai. Na huyana ginauli ne ye tubu ¹⁶ kabo Yudeya unai taumiya bena se yabubu se sae kuduli ne udiyedi.

¹⁷ Taba nige tamowai hesau yona numa kewanaena ye pesadobi numa ne kalonaena bena gogo hesau ye hai na ye wasabu. ¹⁸ Yo taba nige tamowai hesau yona koya wai ye uyo magai kana kwama hesabana. ¹⁹ Na sinesineo diyadiyakadi yo sinesineo labalabahauhaudi ya nuwanuwatuidi, matauwununa tenem mayadai ne

kabo ye pilipilikilili kalidiyena. ²⁰ Na kwa tapwalolo Yaubada unai yomi huyawasabu meta tabu huyagwagwama o Sabatiyena.* ²¹ Matauwununa kamkamna ye tubu ne kabo ye lakikalili, nige doha beyabeyana tanoubu yona huyatubu unai ye laoma teina huya ta, yo mulina ne unai hinage taba nige ye tubu'uyo. ²² Ena Yaubada tenem mayadai ne nige ye hekubwadima, meta nige gonowana tamowai hesau mauli ye lobai. Na iyamo yona kaisunuwa tamowaidi debadiyena tenem huya ne ye hekubwadi. ²³ Tenem huyana ne unai, ena tamowai hesau ye hedehedelaowa ye wane, 'Kwa kitalaoma, Keliso ede inai!', o hesau ye wane, 'Iya ede temenai!', meta tabu kwa kawakawamamohoeyeidi. ²⁴ Kabo kelisolupolupo yo pelowetalupolupo udoi'udoi se masalahna na laulau gigigibwalidi yo kabanuwapwanopwano se ginaulidi bena kabo tamowai se lupohaidi. Yo hinage se kaipate bena Yaubada yona kaisunuwa tamowaidiyo se lupohaidi, na iyamo nige gonowadi. ²⁵ Teina ta meta ya hededehebasibasanonohaigomiu.

²⁶ Unai, ena tamowai hesau ye hedehedelaowa meta Keliso ede balabalagaibu ne unai, tabu kwa laulau menai. Yo ena ye hedehedelaowa meta bena iya ede numa hesau dahalana wadawadamma unai, tabu kwa kawakawamamohoeyei. ²⁷ Matauwununa Tau Natuna yona laoma doha namanamali, ye sili teha kaluwabu ne unai na dawayana gonowana ye masalahna teha Yalasi unai. ²⁸ Gonogonowana doha kaiteya teha unai suisui boibotana panena, kabo ao'ao* se lagegogoi menai.

²⁹ Nuwadubu mayadai ne se gehe na 'nige bayaona mahana kabo ye masigili, yo waikena kabo nige ye dawaya, na galewa ne kipwaladi kabo se beku, yo hinage galewa ginaulidiyo kabo se tabutabubu.' (Aisaiya 13:10 yo 34:4)

³⁰ Na kabo huyagehena ne unai Tau Natuna yona laoma hekihekinoidi kabo se taumasalahna galewa ne unai, yo tanoubu tehana maudoina tamowaidiyo se dousiyasiyau, na kabo Tau Natuna se kita ye lagema galewa yadana unai ma gigibwalina yo ma namanamali lakilakina. ³¹ Na bwagigi kabo se yuhi na daguguna ne unai kabo yona anelu ye hetamalidi se lau bena yona kaisunuwa tamowaidiyo teha hasi yaumaidi yodi kabatowalaoma udiyedi yo tanoubu ta maudoina unai se laedima."

³² Yesu ye hedede'uyo ye wane, "Kwa kitalau saido* kaiwana ne unai, iya kabo ye hekatagomiu: Ena lagadi ne udiyedi lugudi hauhaudi se kini meta kabina kwa kata ede huyamahamahana ye

24:15 Daniyela 9:27 yo 11:31 yo 12:11

24:20 Huya gwagwama unai meta nabu yo kabaita, unai ye pilipilikilili taukadau udiyedi. Na Sabati laugagayona ede nige gonowana se kadau. Mayadaina ne unai nige gonowana se yona se lau kedaloha, na kedakubwakubwa mo, doha 1.2 kilomita.

24:28 Ao'ao: Manuwa wa Dimdim yena se wane *vultures*, siya suisui boibotadi taukaikadi manuwadi. Manuwa ne nige Papua New Guinea unai, ede *ao'ao* mo ta hepaisowa.

24:32 Kaiwi Yesu ye katala ta kalina Dimdim yena se wane *fig*. Saido ka kuli matauwununa huyagwagwama unai luguna se ulu, gonogonowana doha *fig*, na huyagwagwama ye gehe, kabo lugu hauhaudi se tole'uyoidi.

hanahanauma. ³³ Gonogonowana doha huyana ginauli maudoidi ta kwa kitadi se tubu kabu kabina kwa kata meta Tau Natuna ye hanahanaumako, iya ede kawakeda ne unai. ³⁴ Ya hededemamohoi kalimiuwai, teina isi ta taba nige ye gehe ye lau ee ginauli maudoidi ta se tubu. ³⁵ Galewa yo tanoubu kabu se gehe, na yogu hedehedede ta taba nige se gehe.”

Mayadaina yo mahanana ne nige kabina ta kata
(Maleko 13:32-37; Luka 17:26-30 yo 34-36)

³⁶ Kabo Yesu ye wane, “Tau Natuna yona huya'uyoma mayadaina yo mahanana nige hesau kabina ye kata, galewa aneludi hinage nige kabina se kata, Natuna hinage nige kabina ye kata, na Tamana iya ye bom mo. ³⁷ Tau Natuna yona laoma ne meta gonogonowana doha beyabeyana Nowa yona huya mayadaidi wa udiyedi. ³⁸ Huyana sola nige kabaita ye tubu meta tamowai se kaikai yo se numanuma, yo hinage tatao yo sinesineo se tawatasola ye lau ee kana siga Nowa ma natunao se mwalaesae waga ne unai. ³⁹ Tamowai wa nige se nuwatulobai saha kabu ye tubu kalidiyena kana siga kabaita wa ye dididobima ede ye yaluhaidi. Na Tau Natuna yona huya'uyoma kana kao kabu doha tenem mayadaidi ne. ⁴⁰ Huyana ne unai tatao labui se paipaisowa koya kesega unai. Yaubada kabu kesega ye hai na kesega kabu ye laugabaei. ⁴¹ Sinesineo labui witi kabagiligliena se paipaisowalabulabui meta hesau kabu Yaubada ye haigabaei, na hesau kabu ye miya.

⁴² Unai bena kwa silasilawa yo kwa nonoha matauwuwna ede yomi Guiyau yona uyoma mayadaina meta nige kabina kwa kata. ⁴³ Ginauli kesega ye masalahakalili: Ena taba numa tanuwagana kabina ye kata boniyayena mahana saha unai kabu taukaiwahali ye laoma bena ye kaiwahali, kabu ye silasilawa yo yona numa ye kitahetete na taukaiwahali tabu ye lusae yona numaena. ⁴⁴ Unai komiu hinage bena kwa nonoha, matauwuwna tau natuna yona uyoma mahanana unai kabu ye hesiliyatagomiu.

⁴⁵ Heyayai tauhaina laulaududulaina yo sibasibana yona kabikabi kwa nuwatuidi. Kana tanuwaga iya ye kaisunuwi yona numa kalonawai heyayai tauhaidi maudoidi taukitahetetedi yo kadi kai ye mosemoseidi kaikai mahanana dudulaina unai. Na kabu kana tanuwaga ye dahalai ye lau ye kadau. ⁴⁶ Yona huya'uyoma unai, ena yona heyayai tauhaina wa ye lobai yona paisowa unai ye paipaisowanamwanamwa, kabu yona kainauya ye mosei. ⁴⁷ Ya hededemamohoi kalimiuyena, kabu ye tole yona gogo maudoidi taukitahetetedi.

⁴⁸ Na taba heyayai tauhaina ne yona nuwanuwatu se yababa na ye wane, ‘Kagu tanuwaga taba nige ye lagemwamwayauma’, meta idohagi? ⁴⁹ Nuwana ye hetubu yona hali heyayai tauhaidi wa ye kabihenayaidi yo hinage numanuma bayabayaodi taunumanumadi maiyanao se kaikai yo se numagogoi.

⁵⁰ Kana tanuwaga ne kabu ye lage'uyoma na yona heyayai tauhaina ne kabu ye siliyata, matauwuwna kana tanuwaga yona uyoma mayadaina meta nige ye nuwatui. ⁵¹ Tanuwaga wa yona heyayai tauhaina wa ye hekamkamnakaliliyei yo ye hai ye tolelai taukailupolupo yodi kabakamkamna magaina unai kabu ye doudou yo gadigadina ye kapuyahisidi.”

Hasahasalao saudoudoi heyaheyasonidi

25 Yesu yona hedehedede wa ye tubei ye wane, “Galewa basileiyana heyaheyasonina hesau ede doha teina: Hasahasalao saudoudoi yodi lampa se haidi na se lau tautawasola tamowaina se launayanayai bena se hailobai. ² Taudi haligigi meta se naganaga na hinage taudi haligigi meta se sibasiba. ³ Naganagadiyao wa yodi lampa se baheidi na nige yodi kelesini hetulanidi se baheidi. ⁴ Na sibasibadiyao wa yodi lampa se baheidi yo yodi kelesini initoledi hinage.

⁵ Tautawasola tamowaina wa yona laoma ye pahili ede hasahasalao maudoidi wa kamnadi se yababa yo matadiyao se kenokeno ede se keno.

⁶ Boniyai duwaduwalina unai tamowai hesau ye heyoheyoga ye wane, ‘Tautawasola tamowaina wa ye lagemako, kwa laoma kwa hailobai!’

⁷ Hasahasalao saudoudoi wa se kenotolo ede yodi lampa se nukutonogidi. ⁸ Kabo naganagadiyao wa se hededelau sibasibadiyao udiyedi se wane, ‘Kelesini teuna unai kwa saguigai! Yoma lampa ta bena se boso.’ ⁹ Na sibasibadiyao wa se wane, ‘Nigele, yoma kelesini ta gonogonowamai, nige gonowana ka saguigomiu. Na kwa lau kabalokulokune unai yomi kelesini kwa hemaisadi.’ ¹⁰ Naganagadiyao haligigi wa se lauko bena yodi kelesini se hemaisadi, na kabu tautawasola tamowaina wa ye lage. Ede sibasibadiyao haligigi se nonohako wa maidanao se lau hetahetawasola kaikaigogona unai. Se lusae, na kabu keda taukitahetetenka keda wa ye gudui.

¹¹ Muliyyena kabu hasahasalao hekadi wa se lage ede se koikoi na se yogalau tautawasola tamowaina wa unai se wane, ‘Taubada, taubada, keda ku soke na ka mwalaewa!’ ¹² Na ye hededelau udiyedi ye wane, ‘Ya hededemamohoi, nige kabimiu ya kata.’”

¹³ Na Yesu ye hededehasahasaidi ye wane, “Unai bena kwa silasilawa, matauwuwna ede Tau Natuna yona laoma mayadaina yo mahanana meta nige kabina kwa kata.”

**Heyayai tauhaina namwanamwana yo yababana
heyaheyasonidi**
(Luka 19:11-27)

¹⁴⁻¹⁵ Yo hinage Yesu heyaheyasoni hesau ye hedede ye wane, “Galewa Basileiyana meta doha tamowai hesau bena ye kadau ye lau kedaloaloha, na yona heyayai tauhaidi ye yogagogoidima na kesega kesega yona paisowa kana kaoyena yona moni maudoina ye soiyeidi kalidiyena. Heyayai tauhaina tamowaina

bagubagunana unai moni tausani haligigi ye mosei, helabuina moni tausani labui ye mosei, na hesau unai moni tausani kesega ye mosei. Unai yodi paisowa ye moseidi na yona kabakadauyena ye kadau.¹⁶ Heyayai tauhaina bagubagunana wa yona moni tausani haligigi wa ye hepaisowa na ye helaki'uyoi ede tausani haligigi ye lobai'uyoi.¹⁷ Na taupaisowa hesau yona moni tausani labui ye hai wa ye lau ye hepaisowa na ye helaki'uyoi ede tausani labui ye lobai'uyoi.¹⁸ Na heyayai tauhaina hesau wa yona moni tausani kesega wa ye hai na ye lau, bwatano unai duha ye sala na kana tanuwaga yona moni wa ye tolewadam.

¹⁹ Huya lohaloha mulinaena heyayai tauhaidi kadi tanuwaga wa ye uyoma na ye yogagogoidima yo ye henamaiyedi idohagi yona moni wa yodi hepahepaisowadi.²⁰ Kabo moni lakina tausani haligigi tauhaina wa ye laoma ye wane, 'Kagu tanuwaga, moni tausani haligigi ku haidima wa ya hepaisowadi ede hinage hagahagana tausani haligigi ya lobai.'

²¹ Kana tanuwaga wa ye wane, 'Kowa heyayai tauhaina namwanamwana, ya sunumaego matauwuna moni gagilina gonowana ku kitahetete. Unai kabo ya tolego ginauli lakilakidi ku kitahetetedi. Ku laoma yo yogu gwauyala ta unai ta gwauyala kesega.'

²² Kabo moni lakina tausani labui tauhaina wa hinage ye laoma ede ye wane, 'Kagu tanuwaga, moni tausani labui ku haidima wa ya hepaisowadi ede hinage hagahagana tausani labui ya lobai.'²³ Kana tanuwaga ye wane, 'Kowa heyayai tauhaina namwanamwana, ya sunumaego, matauwuna moni gagilina gonowana ku kitahetete. Unai kabo ya tolego ginauli lakilakidi ku kitahetetedi. Ku laoma yo yogu gwauyala ta unai ta gwauyala kesega.'

²⁴ Na kabo moni lakina tausani kesega tauhaina wa ye laoma ede ye wane, 'Kagu tanuwaga, kabim ya kata meta kowa tamowai yona laulau yababayabana, matauwuna ede haedi nige saha hesau ku kumai meta kabo unai ku kelikeli, yo haedi nige witi likena ku hesulu meta kabo unai kaniyona ku tanogogo.²⁵ Unai ya matausi ede ya lau bwatano ena yom moni wa ya puluhiwadam, unai saha kowa yom wa meta iya ede teina.'²⁶ Ede kana tanuwaga wa ye hededelau unai ye wane, 'Kowa tamowai yababana yo yauyaulekalili! Ku hedede meta kabigu ku kata na haedi nige saha hesau ya kumai meta unai ya kelikeli, yo haedi nige witi likena ya hesulu meta udiyedi kaniyodi ya tanotanogogo?²⁷ Idohagi to yogu moni ne nige ku lau ku tole moni taukitakitahetetedi udiyedi na yogu uyoma ta unai kabo ya hai'uyoi yo hagahagana hinage?'²⁸ Kabo ye hededelau yona heyayai tauhaidi hekadiyo udiyedi ye wane, 'Moni ne kalinawai kwa haigabaei na kwa moselaei moni tausani saudoudoi tauhaina ne unai.²⁹ Kaiteyadi saha kalidiyena meta kabo se koihewpata'uyoidi na ginauli saha kalidiyena wa kabo ye lakikalili. Na kaiteyadi nige saha kalidiyena meta kabo ginauli saha gagilina kalidiyena ne se

haigabaei.'³⁰ Na ye wane, 'Teina tamowai ta, iya heyayai tauhaina yababakalilina, kwa gabahepesadobiyei masigili ne unai! Menai kabo ye doudou yo gadigadina ye kapuyahisidi.' "

Yaubada yona hekasa mayadaina

³¹ "Huyana Tau Natuna kabo ye uyoma ma didigana yo ma namanamalina, yo yona anelu maudoidi maidanao, meta kabo yona telona wasawasana yo saesaekalilina unai ye tuli yo ye hemala wasawasa.

³² Na basileiya maudoidi tamowaidiyo kabo se laomagogoi kalinawai na tamowai wa ye hekasadi, doha suisui taukitahetetedi yona suisui ye hekasadi, mamoe teha hesau unai ye toledi yo gouti teha hesau unai.³³ Mamoe kabo ye toledi tehatutuna unai, yo gouti ye toledi teha seuseulina unai.

³⁴ Na kabo wasawasa wa ye hededelau nimatutuna tamowaidiyo wa udiyedi ye wane, 'Kwa laoma, komiu tamagu yona hededehehenamwa tamowaidiyo! Huyana sola nige tanoubu ye tubu meta tamagu galewa basileiyana ye ginaulinonohaiyako komiu hesabamiu. Kwa laoma na unai kwa miya.³⁵ Huyana ya hasali meta kai kwa haiyama ya kai, yo gadogu ye magu meta waila kwa haiyama ya numa, na yau laolaoma, iyamo kwa yogaisinigau yomi numaena.

³⁶ Huyana nige yogu kaleko meta kaleko yogu kwa haidima, ya kasiyebwa meta kwa kitahetetegau, yo hinage numatutuguduyena se tolegau meta kwa laoma kwa kaitaumanaigau.'

³⁷ Kabo miyamiyadudulai tamowaidiyo wa se hededelau unai se wane, 'Guiau, kaiuyana ka kitago ku hasali na kai ka haiyawa, gadom ye magu na waila ka haiyawa ku numa?³⁸ Yo kaiuyana ka kitago kowa laolaoma na ka yogaisinigo, yo nige yom kaleko na kaleko yom ka haidiwa?³⁹ Hinage kaiuyana ka kitago ku kasiyebwa o numatutuguduyena na ka laowa ka kaitaumanaigo?'⁴⁰ Wasawasa wa kabo ye hedede'uyo kalimiuyena: Ena teina laulau ta hesau kwa ginauli kagu kahao ta hesau unai meta kwa ginauli yau kaliguwai.'

⁴¹ Kabo ye hededelau teha seuseulina unai tautolo wa udiyedi ye wane, 'Kwa tausuwala kaliguwai, komiu tamagu yona hededeheyababa tamowaidiyo. Kwa lau kaiwa kalakalasina nige yona huyaboso ne unai, tamagu ye kabinonohai diyabolo yo yona anelu hesabadi.⁴² Matauwuna ede ya hasali na nige kai kwa haiyama ya kai, gadogu ye magu na nige waila kwa haiyama ya numa.⁴³ Yau laolaoma na nige kwa yogaisinigau, nige yogu kaleko, na nige kwa hekalekogau, ya kasiyebwa yo numatutuguduyena se tolegau na nige kwa laoma kwa kaitaumanaigau.'

⁴⁴ Na kabo se wane, 'Guiau, kaiuyana ka kitago ku hasali, gadom ye magu, kowa laolaoma, nige yom kaleko, ku kasiyebwa, yo se tolego numatutuguduyena, na nige ka saguigo?'⁴⁵ Ede ye hededelau udiyedi ye wane, 'Ya hededemamohoi

kalimiuyena, ena nige laulau ta hesau kwa ginauli tamowai hesau unai meta hinage nige saha hesau kwa ginauli yau kaliguwai.⁴⁶ Kabo se lau kamkamna nige yona huyagehe unai, na miyamiyadudulai tamowaidiyao wa kabo se lau mauli nige kana siga unai.”

Yesu unuina koitalaliuna

(Maleko 14:1-2; Luka 22:1-2; Yowane 11:45-53)

26 Yesu yona lauhekata hedeheddededi wa mulidi ne unai kabo ye hededelau yona hekahekatao wa udiyedi ye wane,² “Kabina kwa kata meta mayadai labui mo na kabo Taukiuli Henuwaisinina,* unai Tau Natuna kabo se mosegabaei na se hesataulo.”

³ Na taukaitalasam tauwoyaidi yo magai wa babadadiyao se lagegogoima taukaitalasam saesaena hesana Kaiyapasi yona numa unai,⁴ na se koitalali idohagi kabo lupo hesau se ginauli na unai kabo Yesu se hai na se unuhemwalo. ⁵ Na se wane, “Nige teina Taukiuli Henuwaisinina huyana ta unai, matauwuna ede boda ta yo kita kalidaena kabo hetalagegagega lakilakina ye tubu.”

Betani unai waihiu hesau Yesu ye heyausi

(Maleko 14:3-9; Yowane 12:1-8)

⁶ Huya hesau Betani unai, Yesu meta lepela tamowaina hesau hesana Simona yona numaena.

⁷ Yodi huyakaikai unai meta waihiu hesau yausi panena namwanamwana yo maisana lakilakina ye bahei na ye laoma ede Yesu kuluna kewanaena ye ini.

⁸ Yona hekahekatao wa se kita meta se kouyalaya yo se hetalapili, se wane, “Idohagi to yausi ta ku kaiheyagaibui. ⁹ Teina yausi ta taba ta lokunei kabo moni lakilakina ta hai na ta mosei deha tamowaidiyao udiyedi.”

¹⁰ Yodi nuwatu wa Yesu kabina ye kata ede ye hededelau udiyedi ye wane, “Idohagi to waihiu ta kwa hemohemode. Teina ta meta laulau namwanamwana ye ginauli kaliguyena. ¹¹ Deha tamowaidiyao kabo huya maudoina maidamiyao, na yau meta nige gonowana huya maudoina maidamiu. ¹² Taugu ta ye heyausi meta ye kulinonohaigau toletoletau hesabana. ¹³ Hedehedede ta mamohoina ede, na ya hedede'uyo kalimiuyena: Kaiyaulina maudoina ta unai, ena haedi wasa namwanamwana ta se lauguguyaei, meta waihiu ta saha ye ginauli ta wasana kabo se hasili kabahenuhenuwaisinina.”

Yudasi Yesu kana ye walohai

(Maleko 14:10-11; Luka 22:3-6)

¹⁴ Saudoudoi-labui wa luwadiyena hesau hesana Yudasi Isakaliyota ye lau taukaitalasam tauwoyaidi

¹⁵ ye henamaiyedi ye wane, “Moni lakina saha kabo

kwa haiyama ena Yesu ya mosegabaeiyawa kalimiuyena?” Unai moni siluba badona ede 30* se mosei. ¹⁶ Huyana ne unai ye lau meta ye hetubu ye kaikewasipwa na taba kamwasa saha unai kabo Yesu ye mosegabaei kalidiyena.

Yesu maiyana hekahekatao Taukiuli kaina se kai

(Maleko 14:12-21; Luka 22:7-13; Yowane 13:21-30)

¹⁷ Pwalawa Nige Yistina henuwaisinina* mayadaina bagubagunana unai, hekahekatao wa se laoma Yesu se henamaiyei se wane, “Kaiteya tupwa ku henuwa kabo unai Taukiuli kaina ka kabinonohai?” ¹⁸ Ede ye hededelau udiyedi ye wane, “Kwa lau magailaki ne* unai, kabo tamowai hesau kwa lobai na kwa hededelau unai kwa wane, ‘Taulauhekata ye wane, “Yogu huya ye hanahanauma. Unai yau yo yogu hekahekatao kabo yom numaena Taukiuli kaikaigogona ka hai.”’” ¹⁹ Unai hekahekatao wa se lau na saha Yesu ye hedede wa se ginauliwatani na Taukiuli Henuwaisinina kaina wa se kabinonohai.

²⁰ Ye meimeilahi ede Yesu yo yona hekahekatao saudoudoi-labui wa se laomakesega na se kaikaigogoi.

²¹ Yodi kaikai wa unai Yesu ye hededelau udiyedi ye wane, “Ya hededemamohoi kalimiuyena, bodamiu ta unai kabo hesau kagu ye walohai.” ²² Yona hedehedede wa unai nuwadiyao se yababakalili ede kesega kesega ye henahenamailau Yesu unai ye wane, “Guiau, yau, e nige?” ²³ Yesu ye hedede'bui ye wane, “Yoda kaikaigogo ta unai luwamuyena kaiteya nimanaena pwalawa ye hai na ye hedakwadobiyei kada gaeba ta unai meta iya kabo kagu ye walohai.”

²⁴ Hinage ye wane, “Tau Natuna yona boita kulikuli tabuna unai se kulinonohaiyako wa meta kabo ye laoma ye mamohoi. Na ahani mo tauwalohai tamowaina ne, kabo kamkamna lakilakikalilina ye hekalo. Taba ye namwa mo sinana iya tabu ye labasi.”

²⁵ Ede Yudas iya kabo Yesu kana ye walohai wa ye wane, “Taulauhekata, ku nuwatui meta yau, e nige?” Na Yesu ye hededelau unai ye wane, “Kowa ku bom ku hedede'uyoigo.”

²⁶ Yodi kaikaigogo wa unai, Yesu pwalawa ye hai ye lautoki, ye kihi na ye mosei yona hekahekatao wa udiyedi na ye wane, “Kwa hai kwa kai, teina ta yau taugu.”

²⁷ Waina keyakana ye hai ye lautoki na ye mosei yona hekahekatao wa udiyedi na ye wane, “Maudoimiu ta kwa numa. ²⁸ Teina ta yau kwasinagu, na unai kabo Yaubada yona talam hauhauna ye ginauli kalimiuwai. Kwasinagu ta kabo ye didi na unai kabo tamowai maudoidi yodi yababa ye deuligabaedi. ²⁹ Ya hededelaowa kalimiuyena, taba nige waina ta ya numa'uyoi kana sigana ee Tamagu yona basileiya unai komiu yo yau waina ta numagogoi'uyo.”

26:2 Taukiuli Henuwaisinina: Hedehematalahana ede Maleko 14:1 unai ku hasili.

26:15 Moni siluba badona 30, iya ede taupaisowa yona paisowa maisana nawalai hasi unai ye hai.

26:17 Pwalawa nige Yistina henuwaisinina: Hedehematalahana ede Maleko 14:1 unai ku hasili.

26:18 Magai laki ne, iya ede Yelusalema.

³⁰ Yodi kaikaigogo gehena wa unai wanalautoki hesau se wanai na kabo se pesa se lau Olibe koyana unai.

Yesu ye hededenonohai meta Petelo kabo iya ye uhalaesi

(Maleko 14:27-31; Luka 22:31-34; Yowane 13:36-38)

³¹ Na Yesu ye hededenelau udiyedi ye wane, "Teina boniyai ta unai saha kabo ye tubu kaliguyena debanaena maudoimi kabo kwa wasabugabaeigau, matauwuwuna kulikuli tabuna unai se kulinonohaiyako ye wane:

'Mamoe tauwoyaidi kabo ya unui,
na yona mamoe yawoina kabo se
wasabugwaligwali.' (Sakaliya 13:7)

³² Na yogu tolo'uyo mulinaena kabo ya baguna ya lau Galili na kwa laowa kabo menai ta hailobai."

³³ Petelo ye hededenbui ye wane, "Ena kagu kahao ta maudoidi se wasabugabaeego, na yau taba nige."

³⁴ Ede Yesu ye hededenelau unai ye wane, "Ya hededenamohoi kalimyena, teina boniyai ta unai sola nige kamkam hakiyana ye dou, na ma haiyona kowa kabo ku uhalaiegau."

³⁵ Na kabo Petelo ye hedehedede'uyo ye wane, "Ena kowa to yau bena kabo ta boita, iyamo yau taba nige ya uhalaiegol!" Hinage hekahekatao hekadi wa yodi hedehedede meta gonogonowana.

Getesemani unai Yesu ye tapwalolo

(Maleko 14:32-42; Luka 22:39-46)

³⁶ Na kabo Yesu maiyana hekahekatao wa se lau koya hesau hesana Getesemani.* Menai ye hededenelau udiyedi ye wane, "Inai kwa babawa na yau ya lau temenai ya tapwalolo." ³⁷ Ede Petelo yo Sebedaiyo natunao labui ye woyaidi na se lau, menai kabo Yesu ye hetubu ye nuwakamkamna yo ye nuwayababa.

³⁸ Na kabo ye hededenelau udiyedi ye wane, "Nuwagu ta ye kamkamnakalili gonowana kabo unai ya boita, unai inai kabo komiu yo yau ta silasilawa."

³⁹ Yesu ye tausigilau kabo ye guliyaboyabomdobi tano ne unai na ye tapwalolo ye wane, "Tamagu, taba gonowana teina kamkamna keyakana ta kaliguyena ku haigabaei. Na tabu yau yogu nuwatu ya lauwatani, na kowa yom nuwatu mo bena ya lauwatani."

⁴⁰ Ye uyoma meta yona hekahekatao wa ye lobaidi se kenoko, ede ye hededenelau Petelo unai ye wane, "Kagu kahao, idohagi to nige gonowana komiu yo yau ta silasilawa awa kesega?" ⁴¹ Kwa silasilawa yo kwa tapwatapwalolo, na taba nige noho kwa hekalo na unai kwa beku. Yaluwamiai ta se talam, na iyamo taumiutu se basabasa."

⁴² Helabuina ye uyo ye tapwalolo ye wane, "Tamagu, ena nige kamwasa hesau unai bena kamkamna keyakana ta ku haigabaei, na ku henuwa

bena ya numa, takiyede yom nuwatu kabo ya lauwatani."

⁴³ Ye uyoma meta ye lobai'uyoidi se kenokeno matauwuwuna ede matadiyao wa se kenokenokalili.

⁴⁴ Huya hehaiyonana ye laugabaedi na ye uyo ye tapwalolo, yona tapwalolo wa meta hedeheddededi kesekesegadi udiyedi ye tapwalolo'uyo.

⁴⁵ Ye uyo yona hekahekatao wa udiyedi na ye hededenelau udiyedi ye wane, "Komiu sola kwa kenokeno yo kwa kaikaiyawasi? Kwa kita, mahanana ede ye hanahanaumako, na Tau Natuna kabo se mosegabaeilaei yababa tamowaidiyao nimadiyena.

⁴⁶ Kwa tolo na ta lau, kagu tauwalohai meta ye lageko."

Yesu huyahaina

(Maleko 14:43-50; Luka 22:47-53; Yowane 18:3-12)

⁴⁷ Yesu sola ma hedehededenai, na Yudasi ye lage, iya meta saudoudoi-labui wa hesauna. Bodalakilaki maiyanao se laoma ma kelekelepadi yo yodi kepata hinage se baheidi. Boda ta meta taukaitalasam tauwoyaidi yo magai babadadiyao se hetamalidima.

⁴⁸ Na tauwalohai wa meta maiyadi se koitalaliuko hekihekinoi saha kabo ye ginauli na tamowaina ne unai se kitalobai na se hai, ye wane, "Ena kaiteya ya sumtai meta iya kwa hai'usei ede." ⁴⁹ Yudasi ye laududulai ye lau Yesu unai na ye wane,

"Taulauhekata, yauwedol!" na kabo ye sumtai. ⁵⁰ Yesu ye hededenelau unai ye wane, "Kehagu, saha hesabana ku laoma ta meta ku ginauli!" Kabo boda wa se lau Yesu se hai na se laei. ⁵¹ Temenai Yesu kana kahao wa hesau yona kelepa ye hai ede taukaitalasam saesaena yona heyayai tauhaina tamowaina hesau beyana ye bolihai.

⁵² Yesu ye hededenelau unai ye wane, "Yom kelepa ne ku tole'uyoi yom kabatolena ne unai, matauwuwuna ede kaiteyadi kelepaena se lulu meta kabo hinage kelepaena se boita. ⁵³ Nige ku nuwatulobai meta gonowana ya yogasae tamagu unai na anelu bodadiyao* saudoudoi-labui ye hetamalidima?" ⁵⁴ Na idohagi kabo kulikuli tabudi hedeheddediyao se laoma se mamohoi, matauwuwuna se hededenonohai meta teina laulau ta kabo ye tubu."

⁵⁵ Mahanana ne unai Yesu ye hededenelau boda wa udiyedi ye wane, "Huya maudoina numa tabuna bakubakuna unai ya laulauhekata na nige kwa kabihekahnigau. Kana kao doha yau laugagayo tau'utu'utusidi na ma kelekelepamu yo kepata kwa baheidi na kwa laoma hesabagu?" ⁵⁶ Na teina ginauli maudoidi se tubu ta udiyedi meta Peloweta yodi kulikuli kabo se laoma se mamohoi."

Na kabo hekahekatao wa Yesu se wasabugabaei.

26:36 Getesemani koyana meta Olibe kudulina dedekana wa unai.

26:53 Anelu bodadiyao ne kalina Dimdimyena se kuli *legions*. Legion kesega meta tau'iyala badodi 6,000.

Sunedeli unai Yesu se helauhetala

(Maleko 14:53-65; Luka 22:54-55 yo 63-71; Yowane 18:13-14 yo 19-24)

57 Boda wa Yesu se hai na se laei taukaitalasam saesaena hesana Kaiyapasi yona numaena. Menai meta laugagayo taulauhekataena yo magai babadadiyao* se laomagogoiko na se nayanaya. **58** Na Petelo meta Yesu maiyanao taulaeina wa ye hemuliwatanidi kana siga se lage taukitalasam saesaena yona numa bakubakuna unai. Ye mwalaesae na heyayai tauhaidi hekadi maidanao se tuli na se kaikaikewa kabo saha ye tubu Yesu unai.

59 Taukitalasam saesaedi yo Sunedeli tamowaidiyao Yesu kana mata se wasenei na hedehedede lupolupodiyao udiyedi se hegili na unai bera se unuhemwaloi. **60** Na tauhededelupolupo yodi hedehedede se heddededi, na iyamo nige kana mata hesau se lobai kabo unai se hegili. **61** Na gehena ne unai kabo tauhededede labui se wane, "Teina tamowai ta ye wane, 'Yaubada yona numa tabuna kabo ya hetatagwaligwali, na mayadai haiyona unai kabo ya kabi'uyoi.'

62 Na kabo Kaiyapasi ye tolo na ye hededelau Yesu unai ye wane, "Kabo hedehedede hesau ku hedede o nige? Teina kam hedehedede maudoidi se heddededi ta mamohoidi o nige?" **63** Na Yesu nige saha hesau ye hedede, ede taukitalasam saesaena wa ye hededelau Yesu unai ye wane, "Ya hededelaowa kalimyena, Yaubada maumaulina hesanaena ku kaigwala na ku hededelaoma kalimaiyena: Kowa Keliso, Yaubada Natuna, o nige?" **64** Yesu ye talam ye wane, "Aa, saha ku hedede ne meta mamohoi, na ya hededelaowa maudoimi kalimiyena, huya matadaena kabo Tau Natuna kwa kita Yaubada saesaekalilina nimatutunaena ye tutuli na galewa yadana kewanaena ye laolaoma." **65** Na kabo taukitalasam saesaena wa kana kaleko ye pulisidi na ye wane, "Teina tamowai ta meta Yaubada ye hededeheyababa, idohagi to bena tamowai hekadiyo ta laedima na se hedehedede teina tamowai ta hesabana, na yona hededeheyababa maudoidi meta kwa lapuidiko. **66** Na yomi nuwatu ede saha?" Boda wa se wane, "Ye namwa mo taba ye boita."

67 Na kabo matana wa se kaikaisoi yo nimadiyena se biteli, yo hekadi se laupapali, **68** na se wane, "Keliso, ku hededehehemasalah kalimaiyena, kaiteya ye biteligo?"

Petelo Yesu ye uhalaei

(Maleko 14:66-72; Luka 22:56-62; Yowane 18:15-18 yo 25-27)

69 Na Petelo meta ye tutuli bakubaku wa unai, kabo heyayai tauhaina waihiu hesau ye laoma iya unai na ye wane, "Kowa hinage Yesu Galili tamowaina

tauhemuliwatanina hesau." **70** Na boda wa matadiyena ye uhala ye wane, "Saha ku hetahetala me nige kabina ya kata."

71 Ede ye lau gana kedana wa unai, na menai waihiu hesau Petelo ye kita na ye hededelau tamowai hekadiyo udiyedi ye wane, "Teina tamowai ta meta Yesu Nasaleta tauna tauhemuliwatanina hesau." **72** Na kabo ye kaigwala na ye uhala'uyo ye wane, "Temeta tamowai ne meta nige kabina ya kata."

73 Yawalana ye lau na temenai tautotolo wa se lau Petelo unai na se wane, "Yom hedehedede daguguna meta doha Galili tamowaina, unai kabina ka kata meta kowa kadi kaha hesau." **74** Kabo Petelo ye hedede kaigwala na ye wane, "Ena ya uhalalupolupo meta giluna Yaubada kabo ye tole kaliguyena. Temeta tamowai me nige kabina ya kata!" Na mahanana ne unai kamkam hakiyana ye dou.

75 Ede Petelo Yesu yona hedehedede wa ye nuwatuidi: "Sola nige kamkam hakiyana ye dou na ma haiyona kabo ku uhalaeigau." Unai nuwana wa ye yababakalili na ye pesa ye lau dagela wa unai ye dou mwalomwaloi.

Yesu se laei Pilato matanaena

(Maleko 15:1; Luka 23:1-2; Yowane 18:28-32)

27 Malatomtom gagilina unai taukitalasam tauwoyaidi yo magai babadadiyao maudoidi yodi hineli se ginauli bena kabo Yesu se mosegabaei na se unuhemwaloi. **2** Ede se pai na se woyaei se lau na se moselaei Gabana Pilato* unai.

Yudasi ye hegadosoha'uyoi

(Apostolo 1:18-19)

3 Huyana ne unai Yesu kana tauwalohai Yudasi ye kita meta Yesu kabo se unuhemwaloi, ede ye nuwakuhali na moni siluba badona 30 wa ye mose'uyoi taukitalasam tauwoyaidi yo magai babadadiyao wa udiyedi. **4** Na ye wane, "Mamohoi, laupwano ya ginauli, matauwuwuna ede tamowai ta nige kana mata hesau na kana ya walohai." Se hededelau unai se wane, "Nige ka modeigo, temeta kowa yom pilipili." **5** Unai Yudasi moni wa ye tusaedi numa tabuna kalona wa unai na ye dahalai ye lau ede ye gadosoha.

6 Taukitalasam tauwoyaidi moni wa se haidi na se wane, "Yoda laugagayo unai ye hedede meta nige gonowana moni ta ta usaidi moni kabatoledi unai, matauwuwuna ede moni ta tamowai kwasinana maisana." **7** Se koitalaliu na moni wa se hai ede walata taulaulauginauli yona tano se hemaisa na ye hemala laolaoma tamowaidiyao yodi bwabawya. **8** Tenem huyana ne unai na ye laoma ee teina mayadai ta meta tano wa hesana se tole ede Kwasina Tanona.⁹ Ede Peloweta Yelemaiya yona hedehedede wa ye laoma ye mamohoi, ye wane:

26:57 Taukitalasam yo laugagayo taulauhekataena yo magai babadadiyao, siya meta Sunedeli tamowaidiyao.

27:2 Gabana Pilato meta Loma tamowaidi se hetolo iya Yudeya tanona taukitahetetena.

"Moni lakina 30 Isalaela tamowaidiyao se talamei tamowai maisana,¹⁰ se hai na walata taulaulauginauli yona tano se hemaisa. Saha se ginauli ta unai meta Yaubada saha ye hedede kaliguwai wa ye laoma ye mamohoi."
(*Sakaliya 11:12-13; Yelemaiya 19:1-3 yo 32:6-9*)

Pilato Yesu ye helauhetala

(*Maleko 15:2-5; Luka 23:3-5; Yowane 18:33-38*)

¹¹ Yesu se woyalaei Gabana Pilato unai na ye henamaiyei ye wane, "Kowa Dius yodi wasawasa?" Ede Yesu ye wane, "Aa, saha ku hedede ne mamohoi."
¹² Na kabo taukitalasam tauwoyaidi yo magai babadadiyo yodi hedehedede udiyedi se hegili, na iyamo nige saha hesau ye hedede.¹³ Na Pilato Yesu ye henamaiyei ye wane, "Teina kam hedehedede maudoidi ta ku lapuidi, o nige?"¹⁴ Na iyamo Yesu nige saha hesau ye hedede, unai Pilato ye siliyata yo ye nokokalili.

¹⁵ Na bolimai kesega kesega, Tausikiuli Henuwaisinina unai, gabana yona kabikabi meta numatutuguduyena taumiya tamowaina hesau kabo Dius tamowaidiyao se kaisunuwai na ye yailigabaei.
¹⁶ Tenem huyana ne unai wasalaulau tamowaina hesau hesana Balabasi numatutuguduyena ye miyamiya.¹⁷ Na huyana boda wa se laomagogoi ede Pilato ye henamaiyedi ye wane, "Kaiteya tamowai kwa henuwa kabo ya yailigabaei, Balabasi o Yesu, iya hesana kwa katai ede Keliso?"¹⁸ Matauwuna Pilato kabina ye kata meta kaikalomagigili debanaena na Yesu se moselaei iya kalinawai.

¹⁹ Na Pilato tauhelauhetala yona kabatuli unai ye tutuli na mwanena wasa ye hetomalilaei unai ye wane, "Tamowai me nige kana gilu hesau, unai tabu saha hesau ku ginauli kalinawai. Matauwuna boni iya ya kenosuwaito, na kenosuwaigu wa unai ya matausikalili."

²⁰ Na taukitalasam tauwoyaidi yo magai babadadiyo boda wa se nuwakoidi na se kaibwada Pilato unai taba Balabasi ye yailigabaei na Yesu se unuhemwaloi.²¹ Na Gabana boda maudoidi wa ye henamaiyedi ye wane, "Teina taudi labui ta, kaitoya kwa henuwa kabo ya yailigabaei?" Ede se wane, "Balabasi."²² Ede Pilato ye henamaiyedi ye wane, "Na saha kabo ya ginauli Yesu unai, iya hesana hesau ede Keliso?" Na boda wa se yogasae se wane, "Ku hesataulo."²³ Pilato ye henamaiyedi ye wane, "Kana mata saha, o yababa saha ye ginauli?" Na boda wa ma kalinalakilakidi se wane, "Ku hesataulo."

²⁴ Na Pilato ye nuwatulobai meta nige gonowana dudulai hesau ye lobai, na boda wa se hetubu se hetalagegagaga. Unai waila gaebana ye hai na boda wa matadiyena ye nimadeuli na ye wane, "Tamowai ta kwasinana giluna meta yau nige kagu gilu. Na polohena maudoina meta komiu kalimiuwai."²⁵ Na boda wa se wane, "Kwasinana giluna meta kai ma natumaiyao kewamaiyena."

²⁶ Ede Pilato Balabasi ye yailigabaei na ye hedelau tau'iyala tamowaina hesau wipiyena Yesu ye pidili na kabo se laei bena se hesataulo.

Tau'iyala Yesu se talatalawasiyei

(*Maleko 15:16-20; Yowane 19:2-3*)

²⁷ Na kabo gabana wa yona iyala tamowaidiyao Yesu se hai se laei yodi kabamiya numana lakilakina unai na tau'iyala bodana maudoina se yogagogoidima na Yesu se tolohetakikili.²⁸ Kana kwama se haigabaei na wasawasa kwamana pulupululuna se heluwui.
²⁹ Na kabo pasa gwaligwalina se hei na se tolesaei kuluna ne unai, yo kaikaiwa se mosei nimatutuna ne unai ye kabi, na se tulibono matanaena na se talatalawasiyei se wane, "Yauwedo, Dius yodi wasawasa!"³⁰ Yo hinage se kaikaisoi na kaikaiwa wa se hai na kuluna wa unai se koikoiyei.³¹ Se talatalawasiyei ye gehe, kabo kwama pulupululuna wa se haigabaei na iya kana kwama wa se heluwui'uyoi. Na kabo se woyalaei bena se hesataulo.

Yesu se hesataulo

(*Maleko 15:21-32; Luka 23:26-43; Yowane 19:17-21*)

³² Yelusalema bena kabo se pesagabaei na Sailini tamowaina hesau hesana Simona se lobai, na se lauhelili ede Yesu yona sataulo wa ye bahei.³³ Se lau magai hesau hesana Golagota unai se lage. "Golagota" kaniyona ede "mwayalu kudulina".

³⁴ Temenai kamkamna kabahekaiyawasina mulamulana yo waina se yebwali na se mosei Yesu bena ye numa. Na ye numatonogi ede nige ye henuwa ye numa.³⁵ Na kabo Yesu se hesataulo, na mulina ne unai kabo kana kwama wa se kaiheyaidi, kaitoya kabo yona hesau ye hai.³⁶ Kabotaki se tuligogoi na Yesu se kitahetete.³⁷ Kulubawana ne unai kabahegiluna hedehededeni se kuli molumolu hesau unai na se tutuhepatu, ye wane, "Teina ta Yesu, Dius yodi wasawasa."

³⁸ Laulau yababayababadi tauginaginalidi labui maiyanao se hesataulodi, hesau teha tutuna unai na hesau teha seuseulina ne unai.

³⁹ Tamowai se sae yo se dobi meta se kulukulukwade na se hagahagasiyei yo se wane,

⁴⁰ "Kowa numa tabuna bena ku hetatagwaligwali na mayadai haiyona unai kabo ku kabi'uyoi, hage ku hemauli'uyoigo! Ena kowa Yaubada natuna, sataulo ne unai ku pesadobima!"

⁴¹ Taukitalasam saesaedi, laugagayo taulauhekataedi, yo magai babadadiyo hinage hedehededeni se kesekesegana unai se hagahagasiyei.

⁴² Se wane, "Tamowai hekadiyo ye saguidi na nige gonowana iya ye bom ye sagu'uyoi. Na ye wane bena iya kita Isalaela yoda wasawasa! Taba sataulo ne unai ye pesadobima kabo ka kawamamohoiyei.⁴³ Yona mauli maudoina unai Yaubada ye sunumaei, na hinage ye wane, 'Yau Yaubada Natuna.' Ena mamohoi

Yaubada iya ye gadosisiyei kabo ye hesaguhai!" ⁴⁴ Na laulau yabababadi tauginaginaludi labui wa hinage Yesu se hagahagasiyei.

Yesu yona boita

(Maleko 15:33-41; Luka 23:44-49; Yowane 19:28-30)

⁴⁵ Mayamayadailaki unai magai wa maudoina ye masigili ye lau ee meimeilahi awa hehaiyonana unai. ⁴⁶ Tenem mahanana ne unai Yesu ye yoga ma kalina lakilakina ye wane, "Eloi, eloi, lama sabatani?" Kaniyona ede, "Yogu Yaubada, yogu Yaubada, idohagi to ku nuwagabaeigau ta?"

⁴⁷ Na temenai tautotolohekadiyo kalinana wa se lapui ede se wane, "Eliya ye yogayoganei."

⁴⁸ Dedeckana ne unai tautotolo wa yona hedehedede ta se lapupwanoli, ede hesau ye heloi ye lau balo ye hai ye hedakwa winega unai na ye paihepatu kaikaiwa hesau unai na ye helelesaiyei Yesu bena ye numa. ⁴⁹ Na maudoidi wa se wane, "Ku laugabaei! Hage ta kita kabo Eliya ye laoma ye sagui."

⁵⁰ Kabo Yesu ye yoga'uyo ma kalina lakilakina, na yawasina ye pito.

⁵¹ Tenem mahanana ne unai numa tabuna woyona kaleko* ye taigalilabuiyei kewa unai ye dobi guni. Tano ye tabutabubu yo weku se taigali.

⁵² Bwayabwaya se tasoke na tamowai tabudiyao se boitako wa se tolo'uyo. ⁵³ Kadi bwayabwaya se pesagabaedi na Yesu yona tolo'uyo mulina ne unai se Iusae Yelusalema na se taumasalahatamowai gwaudi udiyedi.

⁵⁴ Huyana iyala kapinana yo yona tau'iyala maiyanao Yesu se kitakitahetete wa mwanikuniku yo ginauli saha se tubu wa se kitadi ede se matausikalili na se wane, "Mamohoi, iya Yaubada natuna!"

⁵⁵ Sinesinebadao bodana kedalo halohawai se totolo se kaikaikewa. Siya ede sinesineo maiyadi Yesu Galili unai se laoma wa, na yona paisowa ne unai saha udiyedi ye deha, kabo udiyedi se sagui. ⁵⁶ Bodadi wa unai meta Maliya Magadala waihiuna, yo Maliya Yamesi yo Yosepa sinadi, yo hinage Sebedaiyo natunao sinadi.

Yesu se tole bwayabwayaena

(Maleko 15:42-47; Luka 23:50-56; Yowane 19:38-42)

⁵⁷ Ye hetubu ye meimeilahi ede Yosepa Alimatiya tamowaina, iya tau gogogogona yo Yesu tauhemuliwatanina hesau, ye laoma ⁵⁸ ye lau Pilato ye kaibwadai taba Yesu sinalena ye hai na ye tole bwayabwayaena. Ede Pilato ye hedede na sinale wa se mosei Yosepa unai. ⁵⁹ Ede Yosepa sinale wa ye hai na kaleko posiposina hauhauna unai ye suma, ⁶⁰ na iya yona bwayabwaya hauhauna weku unai se

salanonohaiyako wa unai ye tole. Na kabo weku lakilakina ye builaei bwayabwaya wa kedana ye buigudui na ye laugabai. ⁶¹ Bwayabwaya wa tehaluna ne unai Maliya Magadala waihiuna yo Maliya hesauna wa se tutuli na se kaikaikewa.

Tau'iyala tamowaidiyao Yesu bwayabwayana se kitahetete

⁶² Kabinonoha mayadaina mulina ne unai* taukaitalasam saesaedi yo Paliseya tamowaidiyao se lau Pilato unai ⁶³ na se wane, "Tanusaga, teina taukailupolupo ta yona hedehedede hesau ka nuwatui. Huyana sola ma maumaulina meta ye hedede ye wane, 'Mayadai haiyona mulidi ne unai kabo ya tolo'uyo.' ⁶⁴ Unai ku hededelau yom tau'iyala tamowaidi udiyedi bena bwayabwaya ne se kitahetetenamwanamwaei kana siga mayadai hehaiyonana ne unai, madai yona hekahekatao se laoma na sinalena ne se hai se laei na se hededelau tamowai udiyedi meta bena ye tolo'uyoko, na yodi kailupolupo mulimulitana ne kabo ye yababakalili na kabo bagubagunana wa."* ⁶⁵ Ede Pilato ye talam ye wane, "Tau'iyala tamowaidi kwa haidi na kwa lau bwayabwaya ne se kitahetetenamwanamwaei."

⁶⁶ Unai se lau bwayabwaya wa kawamatana buiguduna wa se dedeligudugudui na tau'iyala tamowaidiyao se toledi bwayabwaya wa se kitahetete.

Yesu yona tolo'uyo

(Maleko 16:1-10; Luka 24:1-12; Yowane 20:1-10)

28 Dius yodi Sabati wa ye gehe na sabati kesega mayadaina bagubagunana* unai mala ye hetubu ye uyali na Maliya Magadala waihiuna maiyana Maliya hesauna se lau bwayabwaya wa se lohei. ² Mahanana ne unai meta mwanikuniku lakilakina, na Guiyau yona anelu galewa ne unai ye dobima na bwayabwaya buiguduna wekuna wa ye buihesuwala na kewana ne unai ye tuli. ³ Kana kao meta ye namanamali na yona kaleko se posiposikalili. ⁴ Tau'iyala tamowaidiyao bwayabwaya se kitakitahetete wa se matausei ede se tabutabubu na se gulidobi doha tauboibooita.

⁵ Anelu wa ye hededelau sinesinebadao wa udiyedi ye wane, "Tabu kwa matausi! Kabina ya kata meta Yesu se hesataulo'usei wa kwa wasewasenei. ⁶ Iya nige inai, na ye tolo'uyoko, doha saha ye hededeyako wa. Kwa laoma kabatolena ne kwa kita. ⁷ Na kabo kwa lau mwayamwayau na kwa hedede hemasalah yona hekahekatao udiyedi meta iya boita unai ye tolo'uyoko, na kabo ye baguna ye lau Galili na menai kabo kwa kita. Teina yomi wasa ya haiyawa ede."

27:51 Numa tabuna unai bili labui. Bagubagunana hesana se tole *Teha tabuna*, na helabuina ede *Teha tabukalikalilina*.

Duwaduwalidiyena ede *woyo kaleko* lausoisoitai unai se hetala ne. Hebelu 9:1-15 ye hedede hemasalah namwanamwa.

27:62 Mayadaina ne iya ede Taukiuli Henuwaisinina mayadaina bagubagunana.

27:64 Kailupolupo bagubagunana se hedehedede ta, iya ede yodi hedehedede meta Yesu iya Kelisona ede.

28:1 Mayadaina ne, iya ede yoda Sabati, na Dimdim yena se wane "Sunday".

⁸ Ede sinesinebadao wa se lau ma matamatausidi na iyamo ma gwaugwauyaladi, na se heloi se lau bena anelu yona wasa wa se hededegabaei hekahekatao wa udiyedi. ⁹ Se laulau na kamwasa wa unai Yesu ye hailobaidi na ye lautokiyedi ye wane, “Yauwedo!” Ede se laoma iya unai, se tulibonodobi se kabilau kaena wa udiyedi na se taba'ohui. ¹⁰ Kabo Yesu ye hededelau udiyedi ye wane, “Tabu kwa matausi! Na kwa lau kwa hededelau kagu kahao ne udiyedi na se lau Galili, kabu menai se kitagau.”

Diis yodi tauwoyawoya yodi kailupo

¹¹ Sinesinebadao wa sola ma laulaudi na tau'iyala bwayabwaya taukitahetetena wa hekadi se baguna se lau Yelusalema na sahasaha se tubu wa taukaitalasam saesaedi yodi se hedehedede. ¹² Ede taukaitalasam tauwoyaidi yo magai babadadiyao se laomagogoi se koitalaliu ede tau'iyala tamowaidiyao wa monilakilaki unai se hemaisadi ¹³ na se hededelau udiyedi se wane, “Kabo kwa hedede kwa wane, ‘Boniyaiyena ka kenoko na yona hekahekatao wa se laoma ede Yesu sinalena wa se kaiawahali se laei.’ ¹⁴ Ena teina wasa ta Gabana ye lapui kabu ka lausabilauyeigomiu na taba nige ye hekamkamnagomiu.” ¹⁵ Unai tau'iyala

tamowaidiyao wa moni wa se hai na hedehedede saha unai se guguyaidi wa se hededewatanidi. Na teina wasalupolupo ta ye lau Dius tamowaidiyao maudoidi udiyedi, na teina mayadai ta unai sola se hedehededei.

Yesu yona hekahekatao ye hededehetamalidi

(Maleko 16:14-18; Luka 24:36-49; Yowane 20:19-23; Apostolo 1:6-8)

¹⁶ Na kabu Yesu yona hekahekatao saudoudoi-kesega wa se lau Galili, na kuduli Yesu ye hedede wa se lau unai. ¹⁷ Menai se kita ede se taba'ohui, na iyamo hekadi se nuwalabulabui. ¹⁸ Yesu ye laoma udiyedi na ye wane, “Gigibwali maudoina galewa yo tanoubu ta unai meta Tamagu ye haidimako kaliguwai. ¹⁹ Unai kwa lau basileiya maudoidi udiyedi tamowai kwa guguyaidi na se hemala yogu hekahekatao. Kwa hebabatisoidi Tamana, Natuna yo Yaluwa Tabuna hesadiyena, ²⁰ yo ginauli maudoidi ya hedehededeidi kalimiuyena wa bena kwa hekatadi na se miyawatanidi. Na mamohoikalili: yau kabu huya maudoina maidamu ye lau ee tanoubu ta yona huyagehe.”

Yesu wasana Maleko ye kuli wa

Yowane Babatiso kana paisowa

(Mataiyo 3:1-12; Luka 3:18; Yowane 1:19-28)

1 Yesu Keliso Yaubada natuna wasana namwanamwana ye hetubu doha teina: **2** Yaubada yona hedehehedede wa Aisaiya peloweta yona buka unai, ye wane:

“Yogu tautauwasa ya hetamalibagunaiyawa kowa yom keda ye kabinonohai.” (Malakai 3:1)

3 “Tamowai hesau balabala unai ye yogayoga ye wane,
‘Guiau yona keda kwa kabinonohai, yo yona kabalau kwa hedudulai!’” (Aisaiya 40:3)

4 Unai Yowane ye laoma. Balabala unai ye miyamiya na ye hebahebabatiso. Taulaoma udiyedi ye lauguguya: “Nuwamiu kwa buidi, kabo Yaubada yomi yababa ye nuwatugabaedi. Yomi nuwabui ne kabahemamohoina ede babatiso.” **5** Yudeya kasa taumiyaidi yo Yelusalema unai taumiya maudoidi se lau iya unai. Yodi yababa se hedehehemasalahadi, na Yolidani sagasagana unai ye hebabatisoidi.

6 Yowane kana kwama kamela wiiana unai se ginauli na kana dagilolo meta suisui dahina. Na kana kai meta mwadimwadi yo kamwakamwa. **7** Ye hedehehemasalahya ye wane, “Tamowai hesau kabo ye mulitama. Iya ye saekalili na kabo yau. Na nige gonowagu taba ya dunedobi iya kana buti mainadi ya yailidi.* **8** Yau waila unai ya hebabatisoigomiu, na iya kabo Yaluwa Tabuna unai ye hebabatisoigomiu.”

Yesu yona babatiso yo yona laukita

(Mataiyo 3:13-4:11; Luka 3:21-22 yo 4:1-13)

9 Tem huyana ne unai Yesu Galili magaina hesau hesana Nasaleta unai ye laoma ede Yowane ye hebabatisoi Yolidani sagasagana unai. **10** Waila wa unai ye gayo ye sae na ye kitasae ede galewa ye kita ye taigali, na Yaluwa Tabuna kana kao doha bunebune ye dobima iya kewana ne unai. **11** Na kalina hesau galewa ne unai ye laoma na ye wane, “Kowa natugu! Ya gadosisikaliliyego, yo nuwagu ku henamwakaliliyei!”

12 Mahanana ne unai Yaluwa Tabuna Yesu ye hetamali ye lau balabala unai. **13** Mayadai 40 balabala unai suisui kaikaiklasidi kalidiwai ye miya. Na Satani Yesu ye laukita, na kabo anelu iya se kitahetete.

Yesu tauyamayama hasi ye yoganedi

(Mataiyo 4:12-22; Luka 4:14-15 yo 5:1-11)

14 Huya hesau Heloda wasawasa Yowane ye gudu numatutugudu unai. Kaboutaki Yesu ye lau Galili Yaubada wasana namwanamwana ye lauguguya, **15** ye wane, “Huya wa ye lagemako, Yaubada yona basileiya ye hanahanaumako. Nuwamiu kwa buidi yo wasa namwanamwana ta kwa kawamamohoiei.”

16 Huya hesau Yesu Galili Gabwana* dedekana wa unai ye yona ye laulau ede tauyamayama labui ye kitadi, Simona ma kana kaha Andeleya yodi hinaya unai se yamayama. **17** Na kabo ye yoganedi ye wane, “Kwa saema kwa hemuliwatanigau, na kabo ya hektagomiu tamowai tauyamayamaidi.” **18** Na mahanana ne unai se dahalai yodi hinaya se laugabaedi na iya se hemuliwatan.

19 Yesu ye taulau na kabo Sebedaiyo natunao labui Yowane yo Yamesi ye kitadi yodi waga unai yodi hinaya se polapolaidi. **20** Na ye yogalau yodi labui wa udiyedi na waga wa se pesagabaei, na tamadi Sebedaiyo ma kana hewahewaliyo se laugabaedi na Yesu se hemuliwatan.

Yesu Kapelenuma unai yaluwa yababayababana ye hededehepesa

(Luka 4:31-37)

21 Yesu yona hekahekatao maiyanao se lage Kapelenuma unai, na kabo Sabati* unai ye mwalaesae sunago* unai, na ye hetubu ye lauhekata.

22 Yona lauhekata wa se nokoei, matauwuwuna ye hedehehasahasaidi ma gigibwalina, nige doha laugagayo taulauhekata tamowaidi.

23 Sunago wa kalonawai tamowai hesau. Yaluwa yababayababana iya ye luwui na ye yogayoga **24** ye wane, “Yesu Nasaleta tamowaina! Ku laoma inai kam paisowa saha? Bena ku hetatagwaligwaligai! Kabim ya kata kowa tabuna Yaubada unai ku laoma ede.” **25** Na Yesu ye hededebayao iya unai ye wane, “Ku mwanou na tamowai me ku pesagabaei!” **26** Yaluwa yababayababana wa tamowai wa ye nukui na ye yogahi yo ye pesagabaei. **27** Siya maudoidi se noko na se henahenamaiuyoidi se wane, “Teina ta saha? Teina ta lauhekata hauhauna? Yona gigibwalienya ye hededelau yaluwa yababayababadi udiyedi, na se kawakabiyei!” **28** Nige bayaona iya wasana ye lau Galili maudoina ye hetakikili.

1:7 Teina meta heyayai tauhaidi dobidobidi yodi paisowa.

1:16 Galili Gabwana meta waila lakinakina Galili tanona unai, kana kao doha gabwa.

1:21 Sabati kaniyona ede kaiyawasi mayadaina. Huya bagubagunana unai mayadai Satade Dius se hetabuyei yo unai se tapwalolo. Satade meta wiki kesega mayadaina gegegehena. Teina huya ta meta kita mayadai Sande (Sunday) ta hetabuyei yo unai ta tapwalolo, matauwuwuna ede Yaubada Yesu ye hetoloyoi tenem mayadaina ne unai. Na kalinadawai mayadai Sande hesana ta tole ede Sabati.

1:21 Sunago meta Dius yodi kabakoikoigogo yo tapwalolo numana. Apostolo 6:9 hededehehemasalahana hinage ku hasili.

Yesu tamowai gwaudi ye henamwanamwadi

(Mataiyo 8:14-17; Luka 4:38-41)

29 Sunago unai se pesa se lau Simona ma kana kaha Andeleya yodi numa unai se mwalaes, Yamesi yo Yowane maiyadiyao. **30** Simona bwasiyana sinebada ye kasiyebwa tauna se gigibwalikalili, unai se hededelau Yesu unai. **31** Ede ye laoma na ye kabilau nimana ne unai na ye kabihetolo. Na sinebada wa ye namwanamwa na kabo kadi kai ye moseidi.

32 Mahana wa ye dui kabo taukasikasiyebwa gwaudi yo hinage tamowai yaluwa yababayababadi siya se luwuidi wa se woyaidima Yesu unai. **33** Magai tamowaidiyao bodalakilaki se lagegogoi numa kawamatana wa unai. **34** Tamowai kadi kasiyebwa udoi'udoi ye henamwanamwadi. Yo yaluwa yababayababadi gwaudi ye hededehepesadi na ye hededehekaiyawasidi tabu se hedehedede, matauwuwuna ede iya kabina se katako.

Yesu Galili unai ye lauguguya

(Luka 4:42-44)

35 Malatomtom gagilina Yesu numa wa ye laugabaei na ye lau balabala hesau unai ye tapwalolo. **36** Na Simona ma kana kahao se lau iya se wasenei. **37** Yesu se lobai ede se hededelau unai se wane, "Tamowai maudoidi se wasewaseneigo!" **38** Na ye hededelau udiyedi ye wane, "Taba ta lau magai hekadiyo udiyedi hinage ya lauguguya. Teina hesabana ede ya laoma ta." **39** Galili se tauhetakikili na Yesu ye lauguguya sunago udiyedi, yo hinage yaluwa yababayababadi ye hededehepesadi.

Yesu taulepela hesau ye henamwanamwana

(Mataiyo 8:1-4; Luka 5:12-16)

40 Huyana ne unai, tamowai hesau kana kasiyebwa lepela hinage ye laoma Yesu unai ye tulibono na ye kaibwadakatekamkamna ye wane, "Ena ku henuwa, meta kowa gonowana ku henamwanamwagau."

41 Yesu tamowai wa ye katekamkamnaei na nimana ye helelelaiye kabilau unai, na ye hededelau unai ye wane, "Ya henuwa, kowa kabo ku namwanamwa."

42 Na mahana ne unai kasiyebwa lepela wa ye ulugehe na tamowai wa ye namwanamwana. **43** Na Yesu ye hededebayao iya unai ye wane, **44** "Tabu tamowai hesau yona ku hedehedede. Na ku lau taukitalasam unai ku hemasalahago na ye kitasipwaigo. Na kabo he'a'la kaitalasamdi Mose ye hedede wa* ku ginaulidi, na kabo tamowai se kitago meta ku namwanamwako." **45** Na tamowai wa ye pesa ede ye lau wasana wa ye hededehemasalahayoye helaki.

1:44 Lewitikasi 14:2-4

2:4 Dius yodi numa kewadiyao meta se tabataba. Numa maudoidi kadi keda se ginaulidi dageladi udiyedi se lau se sae kewadi udiyedi.

2:10 Yesu hesa *Tau Natuna* ye hepaisowa ye hemala hesana. Matauwuwuna buka bagubagunana unai Daniyela peloweta yona kulikuli unai Keliso ye katai ede "*Tau Natuna*" (Daniyela 7:13-14).

2:15 *yababa tamowaidi*: Paliseya takisi tautanotano yo tamowai hekadiyo doha tauganaganawali yo taukaikaiwahali se hedededi siya "yababa tamowaidi", matauwuwuna teina tamowaidi ta dagela tamowaidi yodi se paipaisowa yo Dius yodi laugagayo se utu'utusidi. Kalina dimdim unai se hedede "sinners".

Unai Yesu nige gonowana ye taumasalahayoye magai udiyedi, na balabalagaibu udiyedi ye miya. Na teha maudoina tamowaidi se laoma iya unai.

Yesu tamowai bunibunina hesau ye henamwanamwana

(Mataiyo 9:1-8; Luka 5:17-26)

2 Mayadai hisa se lau, na kabo Yesu ye uyo Kapelenama. Wasana se lapui ede² tamowai gwaudi se laoma Yesu yona kabamiya unai. Na numa wa nige solasolana hesau, gonogonowana doha hinage dagela wa. Na Yesu wasa namwanamwana ye lauguguya udiyedi. **3** Na tamowai hasi se laoma taubunibuni hesau se baheiyama Yesu unai. **4** Boda ye lakikalili to nige gonowana se sae Yesu unai. Ede gatowa* se bolilapai taubunibuni wa ma diyadiyalina se hedalolodobiyei Yesu unai. **5** Yesu tamowai wa yodi sunuma ye kitadi, unai ye hededelau taubunibuni wa unai ye wane, "Natugu, yom yababa wa ya nuwatugabaedi."

6 Na laugagayo taulauhekata hekadiyo se tutuli se bom se nuwanuwatu se wane, **7** "Tamowai ne tabu tenem doha ye hedehedede! Yaubada ye hededeheyababa! Yaubada ye bom mo gonowana yababa ye nuwatugabaedi!" **8** Na Yesu saha se nuwanuwatui wa kabina ye katako, unai ye hededelau udiyedi ye wane, "Idohagi to yomi nuwanuwatu doha temeta?" **9** Hedehedede sahasahana ye biga kabo ya hedede taubunibuni ta unai: 'Yom yababa ya nuwatugabaedi', o ya wane, 'Yom dam ku bahei na ku lau'? **10** Ya henuwa bena kwa nuwatulobai meta Tau Natuna* yona gigibwali kaiyaulina ta unai meta gonowana yababa ye nuwatugabaedi." Na ye hededelau taubunibuni wa unai ye wane, **11** "Ku tolo, yom dam ne ku bahei na ku lau yom numa." **12** Iya kabo ye dahalai yona dam wa ye bahei. Maudoidi matadiyena ye lau, na kabo siya se nokoei yo Yaubada se hedebasae se wane, "Teina laulau ta huya wa nige ta kitakita!"

Lewi kana yoga

(Mataiyo 9:9-13; Luka 5:27-32)

13 Yesu ye uyo Galili wailana dedekana unai, na bodalakilaki se lagegogoma iya unai, na ye hekatadi.

14 Ye gehe na ye taulau, ede Lewi Alepaiya natuna ye kita takisi kabatanotano numana unai ye tutuli, na kabo ye hededelau iya unai ye wane, "Ku hemuliwatanigau!" Ede Lewi ye dahalai Yesu ye hemuliwatan. **15** Kabotaki Yesu maiyana hekahekatao se kaikai Lewi yona numa unai. Na takisi tautanotano yo yababa tamowaidi* Yesu se hemuliwatan

wa maiyanao se kaikaigogo.¹⁶ Laugagayo taulauhekata tamowaidi hekadiyo, siya Paliseya* tamowaidi, Yesu se kita yababa tamowaidi yo takisi tautanotano maiyadi se kaikaigogo, na se hededelau yona hekahekatao udiyedi se wane, "Iya idohagi to takisi tautanotano yo yababa tamowaidi maiyanao se kaikaigogo?"¹⁷ Yesu yodi hedehedede wa ye lapuidi kabo ye hededelau udiyedi ye wane, "Tamowai namwanamwadi doketa nige se nuwatuidi, na tamowai kasikasiyebwadi mo. Yau nige ya laoma tamowai laulaududulaidi hesabadi, na tamowai yodi laulau yababayababadi mo, nuwadi bena se buidi."

Lauhekata hauhauna yo kabikabi beyabeyadi

(Mataiyo 9:14-17; Luka 5:33-39)

¹⁸ Huya hesau Yowane yona hekahekatao yo Paliseya yodi hekahekatao se kaihudi. Mayadaina ne unai tamowai hekadiyo se laoma Yesu unai se wane, "Yowane yona hekahekatao yo Paliseya yodi hekahekatao se kaikaihudi. Na kowa yom hekahekatao idohagi to nige se kaihudi?"¹⁹ Yesu ye henamaiyedi ye wane, "Huyana tautawasolahauhau ma kana taumanao se miyamiya, kabo se kaihudi e nige? Nige! Huyana ne unai taba nige se kaihudi."²⁰ Na mayadaina kabo ye lagema iya kabo se lahesuwal. Tenem mayadaina ne unai kabo se kaihudi.

²¹ Nige tamowai hesau kwama hauhauna ye polai kwama beyabeyana unai. Taba kwama hauhauna ye polai kwama beyabeyana unai kabo beyabeyana tapulisina wa ye helaki.²² Hinage nige tamowai hesau waina hauhauna ye ini waina pakuna beyabeyana kalona unai. Ena doha temeta, waina hauhauna kabo waina pakuna ye hesese kabo ye tapulisi yo waina wa ye bwalili. Na waina hauhauna mo ye inidobiyei waina pakuna hauhauna* kalona ne unai."

Yesu meta iya Sabati guuyauna ede

(Mataiyo 12:1-8; Luka 6:1-5)

²³ Sabati mayadaina hesau unai Yesu ye lulau witi koyana unai, na yona hekahekatao ma laulaudi witi kaniyodi se huhudi na se kaidi.²⁴ Paliseya tamowaidi se hededelau Yesu unai se wane, "Ku kita! Idohagi to mayadai Sabati laugagayona nige se lauwatani?"²⁵ Iya ye hededelau udiyedi ye wane, "Huyana Dawida ma kana kahao se hasali na saha Dawida ye ginauli wa kwa hasillobai o nige?*²⁶ Abiyata iya taukaitalasam saesaena. Yona huya unai Dawida ye lusae Yaubada yona numa unai pwalawa tabudi wa ye kaidi, na hekadi hinage ye mosedi kana kahao se kaidi. Tenem pwalawa ne meta kai tabuna, na taukaitalasam se bom mo kabo se kai."²⁷ Yesu ye hededelau udiyedi ye

wane, "Yaubada Sabati ye ginauli tamowai yodi namwanamwa hesabadi. Tamowai nige Sabati yona. ²⁸ Unai Tau Natuna iya Sabati guuyauna ede."

Sabati unai Yesu ye kabihenamwanamwa

(Mataiyo 12:9-14; Luka 6:6-11)

3 Sabati hesau Yesu ye mwalaesae sunago unai, na tamowai hesau nimayabayababana temenai.
² Paliseya tamowaidiyo hekadi Yesu kana mata se wasenei, unai iya se kitasipwanamwanamwaei, kabo Sabati unai tamowai ne ye henamwanamwa e nige. Ena ye henamwanamwa, kabo unai se hegili.³ Kabo Yesu ye hededelau tamowai nimayabayababana wa unai ye wane, "Ku toloma."⁴ Na ye henamaiyedi ye wane, "Laulau saha ye namwa ede mayadai Sabati unai: namwa ta ginauli o yababa, ta kabihenamwa o ta kaiunu?" Maudoidi wa se mwanouhai.⁵ Ye kitahetakikilidi, na ye kouyalayala yo nuwana ye yababa, matauwuna ede se nuwakwailolokalili. Na ye hededelau tamowai wa unai ye wane, "Nimam ku heleleyama." Kabo nimana wa ye heleleliae, ede Yaubada nimana wa ye henamwanamwa.⁶ Na kabo Paliseya tamowaidi se lau Heloda kana bodao maiyadiyo se koitalaliu idohagi Yesu bena kabo se unui.

Bodalakilaki Yesu se hemuliwatani

(Mataiyo 12:15,16; Luka 6:17-19)

⁷ Na kabo Yesu maiyana hekahekatao se dahalai se lau Galili Gabwana unai, na Galili tamowaidi gwaudi se hemuliwatani.⁸ Yesu saha ye ginauli wa wasana se lapui meta bodalakilaki teha Yudeya yo Yelusalema yo Idumeya yo Yolidani teha kaluwabu udiyedi yo hinage Taiya yo Sidona magaidi udiyedi se laoma iya unai.⁹ Boda ye lakikalili unai madai Yesu se dudukahalaei, ede Yesu ye hededelau yona hekahekatao udiyedi bena waga gagilina se kabinonohai, unai bena kabo ye gelu.¹⁰ Na taukasiyebwa gwaudi ye henamwanamwadiko, unai kabo tamowai kasikasiyebwadi maudoidi se dudu se lau bena se kabilau Yesu unai.¹¹ Na tamowai yaluwa yababayababadi kalidiyena wa iya se kita ede se tulibono iya talanuwana unai, na yaluwa yababayababadi wa se yogayoga se wane, "Kowa Yaubada natuna ede!"¹² Yesu kabo ye guguyaidi tabu se hededehemasalahi iya kaiteya.

Yesu yona hekahekatao saudoudoi-labui ye hetolodi

(Mataiyo 10:1-4; Luka 6:12-16)

¹³ Yesu ye sae koya hesau tupina unai. Temenai kaiteyadi ye henuwadi wa ye yoganedi na se laoma

2:16 *Paliseya*: Siya Dius kadi boda hesau. Hesa *Paliseya* kaniyona ede "siya se bom se tolehesuwaladi". Paliseya tamowaidi wa se kaikaipate bayao na laugagayo maudoina se hemuliwatani ye dobi gagilina unai. Yodi nuwatu bena Yaubada kabo Isalaela ye hekamkamnadi, ena nige tamowai maudoidi laugagayo maudoina se lauwatanidi. Unai se kouyalayala tamowai kalidiwai, ena siya matadiwai Yaubada yona laugagayo se utusidi.

2:22 *Waina pakuna* meta suisu hesau dahina unai se ginauli. Waina hauhauna bena paku hauhauna unai se hemwayau, matauwuna waina hauhauna meta ye waiwaini unai paku hauhauna sola ma bigabigana kabo gonowana ye sese.

2:25 Ku hasili 2 Samuwela 8:17, yo 1 Samuwela 21:1-6, yo Lewitikasi 24:9.

iya unai.¹⁴ Na Saudoudoi-labui ye kaisunuwaidi yo hesadi ye tole apostolo bena maiyanao se miya, yo bena kabo ye hetamalidi se lau se lauguguya.¹⁵ Na yona gigibwali ye mosei siya udiyedi, kabo yaluwa yababadi se hededehepesadi.

¹⁶ Teina saudoudoi-labui ye yoganedi wa hesadi ede:

Simona, hesana hesau ye tole Petelo,
¹⁷ Yamesi ma kana kaha Yowane, Sebedaiyo natunao, hesadi ye tole Bowanele, meta kaniyona ede, "Tulutululu natunao",
¹⁸ Andeleya,
 Pilipo,
 Batolomaiyo,
 Mataiyo,
 Tomasi,
 Yamesi Alepaiya natuna,
 Tadaiyo,
 Simona Tauhaikabi,*
¹⁹ yo Yudasi Isakaliyota, iya ede Yesu kana tauwalohai.

Yesu kana bogao iya bena se woyahai

²⁰ Kabo Yesu ye mwalaesae numa hesau kalona unai, na bodalakilaki se lagegogo'uyoma. Na iya maiyana hekahekatao nige yodi solasola bena se kaikai.²¹ Na Yesu kehanao wasana se lapui meta Yesu nige ye kaikai, unai se lau iya bena se woyahai, matauwuna ede se nuwatui se wane, "Iya bena ye bwadebwade!"

Laugagayo taulauhekata Yesu yona gigibwali se hededeheyababa

(Mataiyo 12:25-29; Luka 11:17-22)

²² Laugagayo taulauhekata hekadi Yelusalema unai se dobima se wane, "Satani iya luwana ne unai! Yaluwa yababadi ye hededehepesadi yodi wasawasa yona gigibwaliyena."²³ Yesu ye yoganedi na palabole hekadi ye hedededi kalidiwai, ye wane, "Satani kabo idohagi na Satani ye hededehepesa?"²⁴ Taba basileiya kesega se haitoledagela, kabo basileiya ne nige gonowana ye tolobayao.²⁵ Taba boga kesega se haitoledagela, kabo boga ne nige gonowana se tolobayao.²⁶ Taba Satani ye bom ye hewahawaiunu'uyoi na nuwana ye labulabui, kabo nige gonowana ye tolobayao, na ye kaiyawasi.²⁷ Nige gonowana tamowai hesau ye mwalaes tamowai yasiyasiyalana yona numa unai yona gogo ye haidi. Tamowai yasiyasiyalana wa taba ye paibagunai, na kabo yona numa gogodi ye haidi.²⁸ Ya hededemamohoi: Yababa maudoidi yo Yaubada hededeheyababaina Yaubada kabo ye nuwatugabaedi.²⁹ Na taba tamowai hesau Yaluwa Tabuna ye hededeheyababa, kabo yona yababa wa taba nige ye

nuwatugabaei. Kana gilu kabo ye bawahai ye lau ee nige kana siga."

³⁰ Yesu yona hedehehede ta matauwuna ede se wane, "Yaluwa yababana ye luwu iya unai."

Yesu kana boga mamohoidi

(Mataiyo 12:46-50; Luka 8:19-21)

³¹ Na Yesu sinana yo kana kahao se lagema dagela wa unai se totolo, na tamowai hesau se hetamali ye sae bena ye woihaei.³² Boda Yesu se tulihetakikili wa se hededenlau iya unai se wane, "Sinam yo kam kahao yo loumwao, siya ede dagela ne unai na se henuwago."

³³ Na ye henamai ye wane, "Sinagu kaiteya? Yo kagu kahao kaiteyadi?"³⁴ Tamowai iya se tulihetakikili wa ye kaikewaidi na ye wane, "Sinagu yo kagu kahao ede teina!"³⁵ Kaiteya Yaubada yona nuwatu ye ginauliwatani meta iya kagu kaha ede, lougu ede, yo sinagu ede."

Tuma tauhesuhesulu palabolena

(Mataiyo 13:1-9; Luka 8:4-8)

4 Na Yesu ye uyo Galili Gabwana dedekana unai na ye lauhekata. Bodalakilaki se lagegogoma iya unai, ede Yesu waga hesau unai ye gelu, na ye kahaisuwala musamusana, na boda wa nagali unai se totolo.

² Ginauli gwaudi ye hekatadi palabole udiyedi. Na yona lauhekata wa unai ye wane,³ "Kwa lapulapui! Huya hesau tauhesuhesulu ye lau witi tumadi ye hesuludi yona koya unai.⁴ Na hekadi se bekudobi keda kalonawai, na manuwa se laoma ede se kaidi.⁵⁻⁶ Hekadi se bekudobi debadeba wai na nige bayaona se kini. Mahana ye dalasae na ye sinahewowoyadi, matauwuna bwatano ye yaloyalo na lamdi nige se dobikalili.⁷ Hekadi se bekudobi gwaligwali luwadiwai. Gwaligwali kabo se kinipuluhidi, ede tuma wa nige se kininamwanamwa, unai nige se kaniyo.⁸ Tuma hekadi hinage se bekudobi bwatano namwanamwana unai, na se kini yo se kaniyo: Witi kewa kesega kesega hekadi kaniyodi badodi 30, 60 o 100."⁹ Na Yesu ye hededenlau udiyedi ye wane, "Kaiteya beyana unai ye lapui bena ye lapunamwanamwaei."

Yesu palabole yona hepaisowadi wuwuna ye hemasalahi

(Mataiyo 13:10-17; Luka 8:9-10)

¹⁰ Boda wa se tatagwaligwali mulina ne unai yona hekahekatao saudoudoi-labui yo tamowai hekadiyo Yesu maiyanao se tuligogoi, na palabole kaniyona se henamaiyei iya unai.¹¹ Na Yesu ye hededenlau udiyedi ye wane, "Yaubada yona basileiya ginaulina wadawadamdi kabo ya hemasalahadi kalimiuwai. Na kaiteya Yaubada yona basileiya dagelanawai, kabo palabole mo udiyedi ya hekatadi,¹² to bena

3:18 Tauhaikabi ne meta boda hesau Yudeya unai hesana. Yodi nuwatu bena Yudeya se bom se kitahetete'uyoidi. Unai Loma tamowaidiyo maiyadiyo se haihaikabi. Huyana Simona sola nige ye patulau Yesu unai, iya hinage kadi boda hesau. Unai iya hesana se tole Simona Tauhaikabi.

'se kitakita,
na taba nige se kitalobai,
se lapulapui,
na taba nige se lapulobai,
madai nuwadi se buidi,
na Yaubada yodi yababa kabo ye nuwatugabaedi.'
"(Aisaiya 6:9,10)

Yesu tauhesuhesulu palabolena ye hedehedemasalah

(Mataiyo 13:18-23; Luka 8:11-15)

¹³ Na Yesu ye hededelau udiyedi ye wane, "Ena palabole ta nige kwa nuwatulobai, kabo idohagi na palabole hekadi ne hinage kwa nuwatulobaidi?
¹⁴ Tauhesuhesulu Yaubada yona hedehedede ye hesulu. ¹⁵ Tamowai hekadi nuwadi doha keda tuma se bekudobi unai. Yaubada yona hedehedede se lapui, na mahanana ne unai diyabolo ye laoma ede hedehedede wa ye haigabai. ¹⁶ Tamowai hekadi nuwadi doha debadeba tuma se bekudobi unai. Hedehedede wa se lapui yo se hai ma nuwanamwanamwadi. ¹⁷ Na hedehedede wa nige ye dobi nuwadi wa udiyedi, unai ede yodi sunuma se basabasa. Na huyana pilipili hesau se hekaloo, o tamowai siya se subudi hedehedede wa debanawai, ede yodi sunuma wa se kaiyawasi. ¹⁸ Tamowai hekadi nuwadi doha gwaligwali tuma se bekudobi udiyedi. Siya hedehedede wa se lapuimoei. ¹⁹ Na kaiyaolina ta nuwamadena yo gogobadobado nuwadi se kaidi yo ginauli hekadi gadosisidi udiyedi hedehedede wa se kinipuluhidi na nige ye kaniyo. ²⁰ Na hekadiyo nuwadi doha bwatano namwanamwana tuma se bekudobi unai. Hedehedede wa se lapui na se kawamamohoiei, kabo se kaniyo: * hekadi 30, 60 o 100."

Lampa palabolena

(Luka 8:16-18)

²¹ Na Yesu yona hedehedede ye tubei ye wane, "Taba lampa ta gabu, kabo gulewa unai ta buikasini o kabakeno gunina unai ta tole? Nige! Ta tolesae kabatolena unai! ²² Gonogonowana doha hinage Yaubada yona basileiya ginauli maudoidi wadawadamdi kabo ye hemasalahadi, yo ginauli maudoidi Yaubada ye toletolewadamdi wa kabo hinage ye tolehemasalahadi. ²³ Kaiteya beyana unai ye lapui bena ye lapunamwanamwaei!" ²⁴ Na kabo ye wane, "Saha kwa lapui ta bena kwa lapunamwanamwaei. Ena kwa lapulapuinamwanamwa, kabo kwa nuwatulobainamwanamwa. Na kabo Yaubada yomi sibasiba ye helakidi. ²⁵ Kaniyona ede kaiteya yogu

lauhekata udiyedi ye lapulapuinamwanamwa, kabo yona sibasiba ye helaki. Na kaiteya nige ye lapulapuinamwanamwa, saha gagilina ye lapulobaiyako kabo ye nuwaluluhiyei."

Tuma yona kinikini palabolena

²⁶ Na Yesu ye wane, "Yaubada yona basileiya meta doha teina: Tamowai hesau witi tumana ye hesulu yona koya unai. ²⁷ Boniyai huyadi ye keno, na mala ye tom ye tolo, meta nige ye mode na tuma wa se bom se kini kabo se tubu. Tuma yodi kinikini meta tamowai wa nige ye nuwatulobai idohagi. ²⁸ Na bwatano ye bom ye hekinidi: se kinibaguna, kabo se kinilakilaki yo se kaniyo. ²⁹ Witi wa kaniyodi se suna, kabo tamowai wa ye bolidi, matauwuwuna ede masuli wa ye lage."

Kaitabu tumana palabolena

(Mataiyo 13:31-35; Luka 13:18-19)

³⁰ Yesu ye wane, "Yaubada yona basileiya kana kao kabo idohagi yoda hedehededen? O palabole saha unai kabo ta hekaigonogonowaei? ³¹ Basileiya ne doha kaitabu tumana.* Ye gagilikalili tuma maudoidi udiyedi. ³² Tumana ye bekudobi bwatano unai, kabo ye kinilakilaki doha kaiwa hekadiyo. Lagana lakilakidi se kini, na manuwa kabo se towa yo se kaiyawasi loguloguna ne unai."

³³ Yona lauhekata maudoidi udiyedi palabole unai ye hekatadi yodi nuwatulobai gonogonowana unai.

³⁴ Palabole mo ye hepaisowadi yona lauhekata udiyedi. Na yona hekahekatao maiyanao se bom mo, kabo palabole kaniyodi wa ye hemasalahadi udiyedi.

Yesu wowoli ye hedehededaumwali

(Mataiyo 8:23-27; Luka 8:22-25)

³⁵ Meimeilahina ne unai, Yesu ye hededelau yona hekahekatao udiyedi ye wane, "Ta kawasilau hali tanakawasi ne." ³⁶ Na tamowai maudoidi wa se laugabaedi, na Yesu yona hekahekatao waga wa unai hinage se gelu na Yesu maiyanao se lau, yo waga hekadi hinage se hemuliwatanidi. ³⁷ Kabo yaumai lakilakina ye lotalu yo bagodu se inilinisae waga wa kalona unai, na musamusana kabo se yoli.

³⁸ Na Yesu waga yiuna wa unai kunuwa unai ye kenokeno. Iya se hanoi se hededelau unai se wane, "Tanusaga! Ku nuwatui meta kabo ta mwaloi e nige?" ³⁹ Yesu ye tolo ede ye hededelau yaumai yo bagodu wa udiyedi ye wane, "Kwa kaiyawasi yo kwa daumwali!" Kabo yaumai yo bagodu wa se kaiyawasi na ye daumwalikimkim. ⁴⁰ Na ye hededelau yona hekahekatao wa udiyedi ye wane, "Idohagi to kwa matausi? Nuwana nige yomi sunuma?" ⁴¹ Na se siliyata yo se matausikalili, unai se

4:20 Kabo se kaniyo: Galatiya 5:22-23 unai sunuma kaniyona hedehedemasalahana hesau ku hasili.

4:31 Kaitabu tumana: Isalaela unai kaiwa hesau kaniyona na tumana gagilidi meta se kumakumaidi yodi koya udiyedi. Kalina dimdim yena kaiwa ne tumana hesana ede *mustard seed*. Saliba unai teina kaiwa ta hesana *mustard* meta nigele, unai kaiwa kaitabu ta hepaisowa heyahayasoni ta unai. Matauwuwuna kaitabu kaniyona tumadi se gagili yo manuwa se henuwa kaiwa ta unai se towa na se kaiyawasi.

henahenamai'uyoidi, "Teina tamowai ta tamowai sahasahana? Yaumai yo bagodu iya se kawakabiyei!"

Gadala tehadiwai, tamowai hesau unai Yesu yaluwa yababadi ye hededehepesadi

(Mataiyo 8:28-34; Luka 8:26-39)

5 Siya kabo se dunasae hali tanakawasi wa unai, Gadala tamowaidi yodi tano unai.² Yesu waga wa ye pesagabaei, na tamowai hesau ye laoma Yesu ye hailobai. Yaluwa yabababadi tamowai wa se luwui³ na bwayabwaya duhadiyao udiyedi ye miyamiya, yo tamowai hekadi nige gonowana seniyena se paihekahini.⁴ Huya hekadi iya nimana yo kaena seni udiyedi se paidi, meta ye utusidi, na nige gonowana se hekaiyawasi.⁵ Mayadai yo boniyai bwayabwaya wa unai yo kuduli udiyedi ye sae ye dobi na ye yogayogahi, yo sapakila ye haidi na tauna wa ye sasagwadagwadai.

6 Tamowai wa Yesu ye kitalae na kedana ye katuloha unai ede ye heloi ye lau ye tulibono Yesu talanuwana wa unai.⁷ Ye yogahilakilaki ye wane, "Yesu, Yaubada saesaekalilina natuna, idohagi to ku laoma kaliguwai? Yaubada hesana unai ku kaigwala meta taba nige ku hekamkamnagau."⁸ Matauwuna ede Yesu ye hededelauko iya unai ye wane, "Yaluwa yababana, kowa tamowai me ku pesagabaei."

9 Na kabo Yesu ye henamai ye wane, "Hesam ede saha?" Na ye hedebui ye wane, "Yau hesagu ede Legiyona, kaniyona ede ka bado."¹⁰ Na ye kaibwadakalili ye wane, "Tabu ku hetamaligai ka lau kedalo haloha."

11 Kuduli hesau papalina unai meta puwaka yawolina lakilakina se dumudumuli.¹² Yaluwa yababadi wa se kaibwadalau Yesu unai se wane, "Ku hetamaligai ka lulau tenem puwaka ne yawolina ne udiyedi."¹³ Yesu ye talam ede yaluwa yababadi wa kabo se pesa na se lulau puwaka wa udiyedi. Na se heloilidilidi padipadi wa unai se dobi ede se bekudobi gabwa wa unai se yoligogoi na se mwaloi. Na puwaka wa badodi ede nuwana 2,000.¹⁴ Puwaka wa taukitahetetedi kabo se wasabu se lau, wasa wa se helaki magai maudoidi udiyedi. Magai wa tamowaidiyo kabo se lau bena laulau wa se kita.

15 Se lage Yesu unai, na tamowai yaluwa yabababadi se luwui'usei wa se kita ye tulitautaubigai, ma kalekalekona yo ma nuwanamwanamwana. Unai se matausi.¹⁶ Na saha ye tubu tamowai yo puwaka wa udiyedi taukitadi wa wasadiyao se heddedi taulaoma wa udiyedi.¹⁷ Siya kabo se kaibwadalau Yesu unai bena yodi magai ne ye laugabaei.¹⁸ Yesu waga wa unai ye gelu, na tamowai yaluwa yabababadi se luwui'usei wa ye kaibwadalau bena iya maiyana se lau.¹⁹ Yesu nige ye henuwa na ye hededelau iya kalinawai ye wane, "Ku lau yom magai yo kehamwao udiyedi na Guiyau yona katekamkamna

yo gigibwali ye hemasalahadi kowa kalimwai wa, wasana yodi ku hedehedede."²⁰ Iya kabo ye lau Dekapolisi* tehana unai Yesu saha ye ginauli iya unai wa ye hewasa, ede tamowai maudoidi se nokokalili.

Yesu waihiu hesau ye henamwanamwa yo Yailo natuna waihiu boita unai ye hetolo'uyoi

(Mataiyo 9:18-26; Luka 8:40-56)

21 Yesu ye gelu waga wa unai na ye uyo hali tanakawasi wa. Ye duna kabo ye pesa nagali wa unai, na bodalakilaki temenai se tupagogoima iya unai.

22 Kabo sunago tanuwagana hesau, hesana ede Yailo, iya Yesu ye kita ede ye lau ye tulibono Yesu talanuwana unai.²³ Na ye hedede katekamkamnalau iya unai, ye wane, "Natugu waihiu gagilina ye kasiyebwakalili. Taba gonowana ku laoma ku kabilau unai to kabo ye namwanamwa."²⁴ Unai Yesu maiyana se lau, na bodalakilaki wa se hemuliwatanidi na yodi lau wa unai meta Yesu unai se heduheduna.

25 Waihiu hesau temenai, kana kasiyebwa meta kwasina ye miyamiyagabaei bolimai saudoudoi-labui.

26 Bolimai ne luwadiyena doketa maudoidi yodi sagu kalinawai meta nige gonowana, na waihiu wa meta ye kamkamnakalili. Na hemaisadi mo udiyedi yona moni maudoina ye hegehe, na kana kasiyebwa wa kabo ye helahelaki mo ye lau.²⁷ Iya Yesu yona laoma wasana ye lapui ede boda luwadiyena ye laoma Yesu dagelana unai na kana kwama ye kabitonogi,²⁸ unamo ede yona nuwatu ye wane, "Tabu kana kwama mo ya kabitonogi, kabo ya namwanamwa."²⁹ Mahanana ne unai kwasina kasiyebwana wa ye kaiyawasi, na tauna kamnana ye lapui meta kasiyebwa wa ye tatagwaligwaliko.

30 Na Yesu kamnana ye lapui meta gigibwali ye pesagabaei, unai ye kitabui boda wa udiyedi na ye henamai ye wane, "Kaiteya kagu kwama ta ye kabitonogi?"³¹ Yona hekahekatao se hededelau unai se wane, "Boda wa ku kitadi se heduheduna kalimwai, na ye saha to ku henamai ku wane, 'Kaiteya ye kabiloma kaliguwai?'"³² Na Yesu ye kaikewatakikili taba bena laulau ne tauginaulina wa ye kita.³³ Saha ye tubu wa unai ede waihiu wa ye nuwatulobai, unai ye matausitabatabubu. Kabo ye laoma ye tulibono Yesu talanuwana wa unai, na kabo saha ye ginauli wa ye hedehedemasalaha.³⁴ Yesu kabo ye wane, "Natugu, kowa yom sunuma unai ede ku namwanamwa. Ku lau ma nuwabigam, kam kasiyebwa ye kaiyawasiko."

35 Sola iya ma hedehededenai sunago tanuwagana wa yona numa unai tamowai hekadi se laoma na se hededelau iya unai se wane, "Natum waihiu wa meta ye boitako! Tanuwagada tabu ku hemohemode."³⁶ Yesu nige ye lapulau yodi hedehedede wa udiyedi, na ye hededelau sunago tanuwagana wa unai ye wane, "Tabu ku

5:20 Dekapolisi kaniyona ede "magai lakilakidi badodi saudoudoi".

nuwabasabasa, na ku kawamamohoieigau mo.”³⁷ Na kabo boda wa ye hededenuwahidi, na Petelo yo Yamesi ma kana kaha Yowane mo se hemuliwatani.³⁸ Se lage numa wa unai tamowai se lapuidi se doudou numakalo wa unai.³⁹ Yesu ye mwalaesae numakalo wa unai na ye hededelau udiyedi ye wane, “Saha kwa doudouyei? Wawaya me nige ye boita, iya ye keno meta.”⁴⁰ Na siya Yesu se malumaluhiei. Yesu kabo ye hedede se pesa dagelawai, na kabo wawaya wa tamana yo sinana ye woyaidi na maiyana hekahekatao haiyona wa se lusae wawaya wa yona bili unai.⁴¹ Kabo Yesu ye kabilau wawaya waihiu wa nimana unai na ye hededelau unai ye wane, “Talita koum!”, kaniyona meta, “Wawaya waihiu, ku tolo!”.*⁴² Ede wawaya wa ye tolo na ye laulau. Wawaya wa yona bolimai ede saudoudoi-labui. Na taukitana meta se nokokalili.⁴³ Na kabo Yesu ye guguyaedi tabu saha ye ginauli wa se hewahewasa, na ye hededelau udiyedi bena wawaya wa kai se mosei ye kai.

Yesu Nasaleta unai se laukwatakwataei (Mataiyo 13:53-58; Luka 4:16-30)

6 Yesu tenem tupwa ne ye laugabaei kabo maiyana hekahekatao se uyoma yona magai Nasaleta unai.² Sabati mayadaina ye hekalo, na ye hetubu ye lauhekata sunago kalonawai. Boda maudoidi yona hedehedede se lapui ede se nokoei. Se henahenamai'uyoidi se wane, “Tamowai ta haedi ginauli maudoidi ta ye kaipateidi yo sibasiba ta haedi ye hai? Idohagi na teina laulau gigigibwalidi ta ye ginaulidi?”³ Iya meta kapenta. Yo hinage Maliya natuna, na kana kahao ede Yamesi, Yosepa, Yudas yo Simona. Na lounao hinage maiyadao ta miyamiya.” Unai ede se laukwatakwataei.

⁴ Na Yesu ye hededelau udiyedi ye wane, “Magai maudoidi peloweta se hekasisiyei, na yona magai tamowaidi yo kana bogao yo kehanao nige se hekasisiyei.”⁵ Ede magai wa unai nige gonowana laulau gigibwalina hesau ye ginauli, na nimana ye tolesae tamowai kasikasiyebwadi hisa mo udiyedi na se namwanamwa.^{6a} Yesu ye nokokalili, matauwunwa ede yona magai tamowaidi nige se sunumaei.

Yesu Saudoudoi-labui ye hetamalidi (Mataiyo 9:35 yo 10:1,5-15; Luka 9:1-6)

6b Na Yesu ye lau magai gagilidi udiyedi tamowai ye hekatadi.

⁷ Na kabo Saudoudoi-labui wa ye yoganeidi bena labui labui ye hetamalidi. Iya yona gigibwali ye moseidi na unai kabo yaluwa yabayababadi se

hededehepesadi.⁸ Na kabo ye guguyaidi ye wane, “Tabu ginauli hesau kwa laubahei yomi kabalau ne unai, na tuke mo. Tabu kami kai, yomi tobwa yo moni kwa bahebaheidi.”⁹ Na gonowana mo buti kwa likwadi, na tabu kami kwama hagahagadi kwa baheidi.”¹⁰ Na ye hedede'uyo ye wane, “Kaiteya numa unai se yoganeigomiu na kwa mwalaesae, meta unai kwa miya ye lau ee magai me kwa laugabaei.”¹¹ Ena kaiteya magai nige se yogalsinigomiu, yo yomi hedehedede nige se lapuidi, meta kwa laugabaei na kaemiu nagalidi mo kwa koinihinihiyedi.* Temeta ye hemala magai ne yodi hekihekinoi.”

¹² Yesu yona hekahekatao wa se pesa se lau, se lauguguya bena tamowai nuwadi se buidi.¹³ Yaluwa yabayababadi gwaudi se hededehepesadi, na bunama unai taukasikasiyebwa gwaudi se heyausidi yo se henamwanamwadi.

Yowane Babatiso se unui wa wasana

(Mataiyo 14:1-12; Luka 9:7-9)

14 Heloda wasawasa Yesu wasana ye lapui, matauwunwa Yesu hesana wa tamowai maudoidi kabina se kata. Hekadi se wane, “Nuwana Yowane Babatiso iya boita unai ye tolo'uyoma, unai ede paisowa gigigibwalidi ye hemasalahadi.”¹⁵ Hekadi se wane, “Nuwana Eliya”, yo hekadi se wane, “Nuwana peloweta hesau, yo doha peloweta bagubagunadi wa hesau.”¹⁶ Na huyana Heloda wasa wa ye lapui meta ye wane, “Yesu ede Yowane. Iya gadona ya boliyako, na boita unai ye tolo'uyoma.”

¹⁷ Matauwunwa Heloda ye bom ye hedehedeyako unai Yowane se hai na se kau na se tole numatutugudu unai. Yona ginaulina matauwunwa ede Helodiyasi. Helodiyasi meta Heloda yona saeya Pilipo mwanena, na Heloda ye tawasolai.¹⁸ Unai Yowane ye hedehedelau Heloda unai, ye wane, “Kowa laugagayo ku utusi, taba tabu kam kaha mwanena ku tawatasolai.”¹⁹ Unai ede Helodiyasi ye kouyalayalakalili, na ye henuwa bena Yowane ye unuhemwaloi. Na iyamo nige gonowana ye ginauli,²⁰ matauwunwa Heloda Yowane ye kitalobai meta tamowai dudulaina yo tamowai tabuna, unai ye hekasisikaliliyei yo ye kitahetetenamwanamwaei. Huya badobado Heloda Yowane yona hedehedede wa ye lapuidi meta nuwana ye haikabi, na iyamo ye henuwakalili bena ye lapulapulau Yowane unai.

²¹ Nige bayaona kabo Helodiyasi yona nuwatu wa mayadaina ye lage. Heloda yona huyalabasi unai henuwaisini ye ginauli maiyanao tamowai lakilakidi yo iyala babadadi yo Galili babadadi hekadiyo.

²² Helodiyasi natuna waihiu, iya kabo ye lau siya

5:41 Talita koum: Teina hedehedede ta meta kalina Alamaiki, iya Yesu kalinana.

6:11 Dius tamowaidi, ena se lau dagela tamowaidi yodi tano se laugabaei, siya bena kadi buti yo kwama udiyedi *nagali se koinihinamwanamwaedi*, matauwunwa se nuwatuidi meta dagela tamowaidi yo yodi tano se biki. Yesu yona hekahekatao ye hededelau udiyedi teina laulau kesekesegana ta bena se ginaginali Dius tamowaidi Yaubada yona wasa se tolehesuwala udiyedi. Teina ye hemasalahia meta Yaubada ye nuwatuidi meta se biki doha dagela tamowaidiyo. Unai kabo ye hekamkamnadi, ena nige nuwadi se buidi.

matadiwai ye sobu. Heloda yo kana taumanao nuwadi se namwakalili, unai wasawasa wa ye hededelau wawaya waihiu wa unai, ye wane, "Kowa kam henuhenuwa saha? Kabo ya ginauli, yo kabo ya leyawa."²³ Na ye hededehehesunuma ye wane, "Ginauli saha ku kaibwadai meta kabo ya leyawa yom. Gonogonowana doha yogu basileiya ta tehana, ena ku henuwa."

²⁴ Waihiu wa kabo ye lau sinana unai ye henamai, ye wane, "Saha kabo ya kaibwadai?" Helodiyasi ye wane, "Yowane Babatiso kulukuluna."²⁵ Ede ye laumwamwayau ye uyo wasawasa wa unai na ye kaibwadalau unai ye wane, "Yau yogu kaibwada ede teina: Mahana ta unai Yowane Babatiso kulukuluna gaeba unai ku usaei na ku haiyama."

²⁶ Wasawasa wa nuwana ye yababakalili, na nige saha hesau ye hedede, matauwuna kana taumanao yona hedehededehehesunuma wa se lapuiyako.

²⁷ Wasawasa wa taukai'unu hesau ye lauhelili ye wane, "Yowane kulukuluna ku baheyama." Iya kabo ye lau numatutugudu unai na Yowane gadona ye boli utusi²⁸ na kulukuluna wa gaeba unai ye usaei na ye baheyama ye mosei waihiu wa unai. Na ye baheilaei sinana wa unai.²⁹ Huyana Yowane yona hekahekatao wasa se lapui ede se laoma, taugaibuna mo se bahei se laei bwayabwaya unai se tole.

Yesu tamowai 5,000 ye hekaidi

(Mataiyo 14:13-21; Luka 9:10-17; Yowane 6:1-14)

³⁰ Apostolo se lagegogoma Yesu unai, yodi paisowa yo yodi lauhekata wasadi yona se hedehedede.³¹ Na tamowai se badokalili se hemohemode, unai nige gonowana bena se kaikai. Ede Yesu ye wane, "Kwa laoma, kita ta bom ta lau teha hesau unai. Temenai kabo ta kaiyawasi huyakubwakubwa."

³² Siya se bom waga unai se gelu se lau balabala hesau unai.³³ Yodi kabalau ne meta tamowai gwaudi se kitayako yo se kitalobaidiko. Unai magai maudoidi se laugabaedi na se heloi na se lagebaguna Yesu yona kabalage wa unai.³⁴ Yesu kabo ye dunasae ede bodalakilaki ye kitadi na ye katekamkamnaedi, matauwuna ede siya doha mamoe nige taukitahetetedi. Unai kabo ye hetubu ginauli maudoidi ye hekatadi.³⁵ Mahana ye talukeo, ede yona hekahekatao wa se lau iya unai na se wane, "Teina ta balabala, yo mahana ye laukalili."

³⁶ Gonowana taba ku hetamalidi se lau dedekawai kasa gagilidi yo magai udiedydi na kadi kai se hemaisa."

³⁷ Na Yesu ye hededelau udiedydi ye wane, "Komiu kadi kai kwa moseidi." Siya kabo se henamaiyei se wane, "Haedi kabo denali 200* ka hai na kadi kai ka lokune yo ka hekaidi?"³⁸ Unai kabo ye wane, "Hage, kwa kita, pwalawa hisa kalimiyuena?" Apostolo kabo se lau pwalawa se wase na se lobaidi ede se uyoma

Yesu unai na se wane, "Pwalawa haligigi yo yama labui."³⁹ Kabo ye hededelau udiedydi ye wane, "Tamowai maudoidi kwa hedede bena se tuligogoi lagau ne unai."⁴⁰ Kabo se tulinamwanamwa, pwalu hekadi 100 yo pwalu hekadi 50.⁴¹ Yesu kabo pwalawa haligigi yo yama labui ye haidi, ye kitasae galewa unai, na Yaubada ye lautokiyei. Na kabo pwalawa ye kihihagahegagili na ye moseidi yona hekahekatao kalidiwai. Siya kabo se soiyei tamowai wa kalidiwai. Na hinage yama labui ye kihihagahegagili na ye moseidi se kai.⁴² Na maudoidi se kaikai yo bogadi se sese.⁴³ Yesu yona hekahekatao kaitole wa se tanogogoidi, meta bosa saudoudoi-labui se hemwayaudi.⁴⁴ Na taukaikai badodi meta 5,000.

Yesu Galili Gabwana kewanawai ye laulau

(Mataiyo 14:22-33; Luka 6:15-21)

⁴⁵ Yesu yona hekahekatao ye hegelumwamwayayuedi bena se kawasibaguna se lau Betesaida, na kabo boda wa ye hetamalidi se lau.⁴⁶ Na kabo ye sae koya tupina hesau unai ye tapwalolo.⁴⁷ Boniyaina ne unai meta waga wa sola waila duwaduwalina unai ye laulau, na Yesu ye bom mo tano wa unai ye miyamiya.⁴⁸ Na ye kitadi wose unai se kabikabi'useidi, matauwuna ede yaumai ye bayao yo hinage se wosematai. Malatomtom gagilina Galili Gabwana kewana ne unai ye laulau udiedydi, na bena kabo ye laugabaedi.⁴⁹ Na huyana se kita waila unai ye laulau ede yodi nuwatu bena kaiyabu na se yogahi,⁵⁰ matauwuna maudoidi iya se kita na se matauskalili. Na ye hedehedelau udiedydi ye wane, "Nuwamii se talu. Doha yau. Tabu kwa matausi!"⁵¹ Na kabo ye gelusae waga wa unai maiyanao, na yaumai wa ye kaiyawasi. Siya kabo se nokokalili,⁵² matauwuna pwalawa haligigi laulauna wa nige se nuwatulobai, na nuwadi se kwailolo.

Genesaleta unai Yesu tamowai ye henamwadi

(Mataiyo 14:34-36)

⁵³ Se kawasigehe ede se duna Genesaleta unai, na menai yodi waga se lowoni.⁵⁴ Huyana waga se pesagabaei meta tamowai hekadi Yesu se kitalobai,⁵⁵ ede magai wa maudoina se tauhetakikili. Kabo taukasikasiyebwa se baheidi diyadiyali udiedydi, na ena Yesu wasana se lapui yona kabalau haedi meta se laedi temenai.⁵⁶ Yesu yona kabalau ne udiedydi—magai gagilidi o magai lakilakidi udiedydi—tamowai kasikasiyebwadi se toledi yodi kabamaketi bakubakudiyao udiedydi. Se kaikaibwadai bena kana kwama dedekanawai se kabilau, na siya kaiteyadi se kabilau unai wa kabo se namwanamwa.

6:37 Denali 200 meta tamowai kesega taba ye paisowa waikena badona haligigi-haiyona unai gonowana kabo tenem moni lakkilakina ne ye lobai ye hemala maisana.

**Kulutubu laugagayodi lauwatanina unai tamowai
Yaubada yona laugagayo se utusi**
(*Mataiyo 15:1-9*)

7 Paliseya tamowaidi yo laugagayo taulauhekata hekadi Yelusalema unai se laoma na se lagegogoma Yesu unai. **2** Yona hekahekatao hekadi se kitadi se kaikai, na nige se nimadeuli doha kadi kulutubu yodi kabikabi mamohoina unai. **3** Paliseya tamowaidi yo Dius tamowaidi maudoidi kadi kulutubu miyamiyadi se hekasisiyedi, unai taba nige se kaikai kana siga nimadi se deulidi doha kulutubu yodi kabikabi mamohoina unai. **4** Ena yodi kabalokulokune unai se uyoma meta se nimadeulibaguna na kabo se kaikai. Kulutubu yodi kabikabi yo laugagayo se bado bena se hekasisiyedi. Hinage kabikabi hekadi doha keyaka yo waila kabayaiyai yo gulewa deudeulidi udiyedi.

5 Unai Paliseya tamowaidi yo laugagayo taulauhekata Yesu se henamai se wane, “Idohagi to kowa yom hekahekatao kulutubu miyamiyadi nige se miyawatanidi, na ma nimabikibiki se kaikai?” **6** Yesu ye hededelau udiyedi ye wane, “Komiu taukailupolupo, Aisaiya peloweta kami hedehedede ye hededehemasalaha wa meta mamohoi, doha ye kuliako ye wane,

‘Siya kawadi unai mo se hedebasaegau, na nuwadi unai se lausuwalaegau.

7 Siya yodi hedebasaegau nige kaniyona, matauwuna tamowai yodi laugagayo mo se hekahekataadi.’ (*Aisaiya 29:13*)

8 Yaubada yona laugagayo kwa tolehesuwaladi, na tamowai yodi laugagayo kwa kabihekahinidi.”

9 Na kabo ye wane, “Komiu laugagayo tolebuina unai kwa katakalili ede Yaubada yona laugagayo kwa tolehesuwalna komiu kami kulutubu kabikabidiyao mo kwa lauwatanidi. **10** Mose ye hededeyako ye wane,

‘Tamam yo sinam ku hekasisiyedi.’ (*Esodo 20:12*)

Yo ye wane,

‘Ena hesau tamana yo sinana ye hededeheyababadi, iya kabo se unuhemwaloi.’ (*Lewitikasi 20:9*)

11 Na komiu yomi laugagayo doha teina: Ena tamowai hesau sinana yo tamana yodi kainauya ye nonohai na nige ye mosei udiyedi na ye mosei Yaubada unai,

12 kwa hedede temeta laulau ne bena ye dudulai.

13 Unai komiu yomi laugagayo kwa lauwatani na Yaubada yona laugagayo kwa tolehesuwalna. Yo hinage Yaubada yona laugagayo hekadi hinage kwa tolebuidi gonogonowana doha teina.”

Ginauli sahasahadi tamowai se hebiki
(*Mataiyo 15:10-20*)

14 Na kabo Yesu tamowai maudoidi wa ye yoganedi se laoma iya unai, na ye hededelau udiyedi ye wane, “Komiu maudoimiu yogu hedehedede kwa lapunamwanamwaei yo bena kwa nuwatulobai.

15-16 Tamowai saha ye kai na ye dobi bogana luwanawai meta nige ye hebiki Yaubada matanawai. Na ginauli saha nuwanawai ye pesama meta iya ye hebiki ede.” *

17 Kabo Yesu maiyana hekahekatao boda wa se laugabaedi na se mwalaesae numa hesau unai, na kabo palabole kaniyona wa se henamaiyei. **18** Iya ye hededelau udiyedi ye wane, “Idohagi to nige kwa nuwatulobai? Komiu taba kabina kwa kata saha tamowai ye kai na ye dobi bogana luwanawai nige ye hebiki. **19** Kana kao ede nige ye dobi nuwana unai, na ye dobi bogana luwanawai, na kabo ye miyagabaei.” (Teina hedehedede ta unai Yesu ye hededehemasalaha meta kai maudoidi se a'a.)

20 Kabotaki ye wane, “Saha tamowai nuwanawai ye pesama meta iya ye hebiki ede, **21** matauwuna saha nuwanawai se pesama wa siya ede teina: nuwatu yababayabadi, laulaubikibiki,* kaiwahali, kaiunu, **22** ganawali, samagogo, henunu, kailupolupo, matabado, kaikalomagigili, monunu, nuwasaesae, yo walobayao. **23** Teina ginauli yababayabadi maudoidi ne meta tamowai nuwana unai se laoma yo siya tauhebikina ede Yaubada matana unai.”

Dagela waihiuna yona sunuma
(*Mataiyo 15:21-28*)

24 Temenai kabo Yesu ye dahalai ye lau Taiya yo Sidona* tehana ne unai. Na ye mwalaesae numa hesau kalona unai. Yona nuwatu meta bena tabu iya se kita. Na iyamo nige gonowana ye tauwadam.

25-26 Magai wa unai waihiu hesau, iya dagela waihiuna Siliya tehana tupwana Penisiya unai ye laoma. Natuna sinekuku meta yaluwa yababana ye luwu iya unai. Na waihiu wa Yesu wasana ye lapui ede ye laoma ye tulibono iya talanuwana unai na ye kaibwada Yesu unai taba yaluwa yababana wa natuna wa unai ne ye hededehepesa. **27** Na Yesu ye hededelau iya unai ye wane, “Sola wawayao ya hekaibagunaedi. Tabu wawayao kadi kai ya gabalae kedewa* udiyedi, temeta nige ye namwa.” **28** Waihiu wa ye hededebeui ye wane, “Guiyau, mamohoi! Na iyamo wawayao saha se kaidi na mapuladi se bekudobi hatahata gunina ne unai meta kedewa kabo se kaidi.” **29** Na kabo Yesu ye hededelau unai ye wane,

7:15-16 Kulikuli beyabeyadi hekadi lausoiso 16 se kulitubei doha teina: “Ena hesau beyana udiyedi ye lapui bena ye lapulapuinanwanamwaei.”

7:21 Laulaubikibiki kaniyona ede tau yo sine nige se tawasola na yababa se ginauli, yo hinage hewali yo hasala yodi kaiheya, yo laulauna kadi kao udo'i'udo'i.

7:24 Loma tamowaidiyao Penisiya se laugilihai na se tole Siliya tehana yodi gabemani guninawai. *Taiya yo Sidona* meta siya magai lakinakidai labui Penisiya yona teha unai. Kulikuli beyabeyadi hekadi magai *Sidona* nige se katai lausoiso ta unai.

7:27 Hedehedede ta unai meta Dius tamowaidi siya ede wawayao. Siya se nuwatui'uyoidi bena se namwa, na kabo dagela tamowaidi. Unai huya hekadi se kataidi “kedewa”.

"Yom hedehedede ta ye namwakalili. Unai ku lau yom numa. Yaluwa yababayabana wa natum ye pesagabaeyako." ³⁰ Waihiu wa kabo ye uyo numa, metai natuna wa ye kita ye kenokeno, na yaluwa yababayabana wa ye pesagabaeyako.

Yesu tamowai beyakolakolana yo ye una'una ye henamwananamwa

(Mataiyo 15:29-31)

³¹ Yesu Taiya kana sigasiga ye laugabaei na ye lau Sidona yo ye dobi Galili Gabwana, na kabo ye lage Dekapolisi tehanawai. ³² Temenai tamowai beyakolakolana yo ye una'una se woyaiyama Yesu unai. Na se kaibwada Yesu unai bena nimana ye tolesae iya unai. ³³ Boda wa luwadiyena Yesu tamowai wa ye woyahesuwala. Kabo ye kabilau beyana duhadu udiyedi, yo ye kaiso nimana unai na ye kabilau memenana unai. ³⁴ Ye kitasae galewa ne unai na katekamkamna nuwana ye mwayau, na ye hedelau tamowai wa unai ye wane, "Epata",* kaniyona ede, "Ku malapai." ³⁵ Mahanana ne unai beyana se malapai yo memena unai gonowana ye hedehededenamwanamwa.

³⁶ Yesu boda wa ye guguyaidi na ye hedebayaolau udiyedi tabu wasana se hedehelaki. Iyamo nige gonowana se lapulau unai, na huya maudoina se hedehelakaliliyei. ³⁷ Tamowai maudoidi se nokokalili se wane, "Ginauli maudoidi ye ginaulidi meta se namwa. Tamowai beya kolakoladi ye hemalapaidi, yo tamowai una'unadi ye saguidi na se hedehedede."

Yesu tamowai 4,000 ye hekaidi

(Mataiyo 15:32-39)

8 Huya hesau boda se tupagogoi'uyoma na nige kadi kai. Ede Yesu yona hekahekatao ye yoganedu na ye hedelau udiyedi ye wane, ² "Bodalakilaki ta ya katekamkamnaedi, matauwuwa mayadai haiyona maiaguwao ka miyamiya na nige saha hesau ye miya bena kabo se kai. ³ Ena taba ma hasalidi na ya hetamalidi, meta kabo keda ne unai matadi se kamumu na se guli, matauwuwa hekadiyo kedaloaloha udiyedi se laoma." ⁴ Na yona hekahekatao se hedelau unai se wane, "Teina balabalagaibu. Haedi kabo kai ta hai na bodalakilaki ta ta hekaidi?" ⁵ Yesu ye henamailau udiyedi ye wane, "Kami pwalawa hisa?" Siya se wane, "Hiligigi-labui." ⁶ Na ye hedede boda wa se tuli bwatano unai. Na kabo pwalawa haligigi-labui wa ye haidi na Yaubada ye lautokiyei, na kabo ye kihidi na ye mosedi yona hekahekatao udiyedi, na se soiyedi. ⁷ Yo hinage yona hekahekatao yama gagilidi hekadi kalidiwai, ede Yaubada unai ye lautoki'uyo, na kabo ye mosedi na se

^{7:34} Teina hedehedede ta meta kalina Alamaiki, iya Yesu kalinana.

^{8:11} Se henuwa bena se kita ena mamohoi galewa ne unai ye dobima o nige.

^{8:15} Dius tamowaidi yisti se heyahayasoniyei lauhekata se tadada tamowai udiyedi doha yisti pwalawa unai.

soiyedi. ⁸ Maudoidi se kaikai na bogadi se sese. Yesu yona hekahekatao kaitole wa se tanogogoidi, meta bosa haligigi-labui se hemwayaudi. ⁹ Taukaikai wa badodi ede nuwana 4,000. Na kabo ye hetamalidi se lau. ¹⁰ Na yona hekahekatao wa maiyanao se gelumwamwayau se lau Dalemanuta magaina tehana unai.

Paliseya tamowaidi hekihekinoi se kaibwadai

(Mataiyo 16:1-4)

¹¹ Na Paliseya tamowaidi se laoma na se hetubu Yesu maiyadi se haikawayagala. Se henuwa bena Yesu se laukita,* unai galewa hekihekinoina se kaibwadai kalinawai. ¹² Yesu nuwana ye kamkamna na ye wane, "Matauwuwa saha to teina isi ta hekihekinoi se kaibwadai? Ya hededemamohoi, taba nige hekihekinoi hesau ya ginauli teina komiu kalimiuwai." ¹³ Na kabo ye laugabaei na waga wa unai ye gelu'uyo na ye lau hali tanakawasi ne.

Paliseya yo Heloda yodi yisti debanawai Yesu yona hekahekatao ye guguyaidi

(Mataiyo 16:5-12)

¹⁴ Yesu yona hekahekatao nuwadi se luluhu na nige kai se bahei, na pwalawa kesega mo waga wa unai. ¹⁵ Yesu ye guguyaidi ye wane, "Kwa nanabu! Tabu Paliseya yo Heloda yodi yisti* udiyedi se lupohaigomi!" ¹⁶ Na siya se bom yodi se hedehedede se wane, "Doha teina ye hedehedede matauwuwa ede nige pwalawa ta bahei." ¹⁷ Yodi hedehedede wa Yesu ye lapui ede ye wane, "Idohagi to kwa wane, 'Nige pwalawa ta bahei'? Nuwana sola nige kwa kitalobai yo nuwamu sola nige se masalah? Idohagi to kwa nuwakwailolo?" ¹⁸ Idohagi to matamiu udiyedi nige kwa kita yo beyamu udiyedi nige kwa lapui? Taba saha ye tubutubu wa kwa nuwatui! ¹⁹ Huyana pwalawa haligigi ya kihidi na tamowai 5,000 ya hekaidi meta kaitoledi wa bosa hisa kwa usahemwayaudi?" Siya se wane, "Saudoudoilabui." ²⁰ "Yo pwalawa haligigi-labui ya kihidi na tamowai 4,000 ya hekaidi, na kaitoledi wa meta bosa hisa kwa usahemwayaudi?" Se wane, "Hiligigi-labui." ²¹ Kabo Yesu ye hedelau udiyedi ye wane, "Unai yisti hedehededenwa taba kwa nuwatulobai!"

Yesu tamowai matagibugibuna hesau ye henamwananamwa

²² Na kabo Yesu maiyana hekahekatao se lage Betesaida. Temenai tamowai hesau matagibugibuna se woyaiyama Yesu unai na se kaibwadai bena ye kabilau iya unai. ²³ Yesu tamowai matagibugibuna wa nimana unai ye kabi ye woyalae magai dagelana unai. Na kabo Yesu ye kaisolau tamowai wa matana unai na

nimana ye tolesae na ye wane, "Saha hesau ku kita e nige?"²⁴ Tamowai wa ye kaikewatakikili na ye wane, "Tamowai ya kitadi kadi kao doha kaiwa se taitaihile'usi."²⁵ Yesu nimana ye tolesae'uyoi tamowai wa matana unai. Na matana wa se lala yo se nega. Ede kabo ginauli maudoidi ye kitanamwanamwaedi.²⁶ Na Yesu tamowai wa ye hetamali ye lau yona magai na ye wane, "Tabu ku uyo magai ne unai."

Petelo Yesu ye hededehehemasalah meta iya Keliso
(Mataiyo 16:13-20; Luka 9:18-21)

²⁷ Na kabo Yesu maiyana hekahekatao se lau magai udiyedi Sisaliya Pilipi dedekana unai. Yodi kabalu ne unai Yesu ye henamaiyedi ye wane, "Tamowai saha se hedehedede, yau meta kaiteya?"²⁸ Siya Yesu kalinana se bui se wane, "Hekadi se wane, Yowane Babatiso, na hekadi se wane, Eliya. Hekadi se wane, peloweta hesau."²⁹ Unai kabo ye henamaiyedi, "Na komiu kabo saha kwa hedede, yau meta kaiteya?" Na Petelo ye wane, "Kowa meta Keliso."³⁰ Ede Yesu ye guguyaidi bena tabu tamowai hesau yona se hedehedede.

Yesu yona boita yo tolo'uyo ye hededehehemasalah
(Mataiyo 16:21-23; Luka 9:22)

³¹ Na kabo Yesu ye hetubu yona hekahekatao ye hekatadi meta Tau Natuna kabo ye kamkamna ginauli maudoidi udiyedi. Na tamowai lakilakidi, taukaitalasam babadadi, yo laugagayo taulauhekata iya kabo se laukwatakwtataei, na kabo se unuhemwaloi, na mayadai haiyona mulidiwai kabo ye tolo'uyo.³² Yesu ye hededehehemasalahananamwanamwaei, unai Petelo Yesu ye woyahesuwala na ye wane, "Tabu temeta doha ku hedehedede."³³ Yesu ye tolobui ye kitalau yona hekahekatao wa udiyedi na ye hededebayao Petelo unai ye wane, "Ku tausuwalawa, kowa Satani. Temeta nuwatu me nige Yaubada unai ye laoma, na tamowai siya yodi nuwanuwatu."

Yesu idohagi hemuhemuliwatanina
(Mataiyo 16:24-28; Luka 9:23-27)

³⁴ Na kabo boda wa ye yoganedi se laoma yona hekahekatao maiyadiyo na ye hedede lau udiyedi ye wane, "Ena kaiteya ye henuwa bena ye hemuliwatanigau, meta taba tanoubu ta maulina ye nuwagabaei, yona sataulo ye bahei na ye hemuliwatanigau."³⁵ Ena tanoubu ta maulina ye gadosisiyei, meta yona mauli namwanamwana kabo ye tauwadam. Ena tanoubu ta maulina ye nuwagabaei yau yo ewaneliya* debamaiwai, kabo mauli namwanamwana ye lobai.³⁶ Taba tamowai hesau

tanoubu ginaulidi maudoidi ye haidi, na yona mauli namwanamwana ye tauwadam, meta yona namwa saha?³⁷ Saha namwanamwana unai kabo yona mauli ne ye hai'uyoi?³⁸ Ena hesau teina isi ganaganawalina* yo yababayababana ta unai ye mwadineigau yo yogu hedehedede ta unai ye mwadine, Tau Natuna hinage kabo ye mwadinei huyana Tamana yona namanamali unai ye uyoma maiyana yona anelu tabudiyo."

9 Na kabo Yesu ye hedede lau udiyedi ye wane, "Ya hedede mamohoi. Hekadi inai taba nige se boita kana siga Yaubada yona basileiya se kita ye lagema ma gigibwalina."

Yaubada Yesu kana kao ye bui
(Mataiyo 17:1-8; Luka 9:28-36)

² Mayadai haligigi-kesega se lau, na kabo Petelo, Yamesi, yo Yowane Yesu ye woyaidi se sae kuduli lohalohana hesau unai. Siya se bom mo menai. Matadiwai se kaikaikewa na Yaubada Yesu kana kao wa ye bui.³ Na kana kwama ye bui ye posi na ye namanamalikalili, nige gonowana yona posiposi ne tamowai hesau ye deulilibai kaiyaulina ta unai.⁴ Na kabo Eliya maiyana Mose se taumasalah na Yesu maiyadi se hedehedede.⁵ Kabo Petelo ye hedede lau Yesu unai ye wane, "Tunuwaga, ye namwakalili to kai inai. Unai taba gwau haiyona ka kabidi, hesau kowa yom, hesau Mose yona, yo hesau Eliya yona."⁶ Hedehedede wa ye hedede matauwuna siya se matausikalili, unai nige kabina ye kata saha dudulaina kabo ye hedede.⁷ Na kabo yada ye taumasalah ede ye sumadi. Na yada wa unai kalina hesau se lapui ye laoma ye wane, "Natugu ya gadosisikaliliyei ede teina. Kwa lapulau iya unai!"⁸ Nige bayaona na se kaikewatakikili meta Mose yo Eliya nige se kitadi, na Yesu ye bom mo.

Hekahekatao Yesu unai Eliya se henamaiyei
(Mataiyo 17:9-13)

⁹ Yesu maiyadi kuduli wa unai se lidi se dobido na ye hedede lau udiyedi ye wane, "Saha wau kwa kita wa tabu tamowai hesau yona kwa hedehedede ye lau ee kana siga Tau Natuna boita unai ye tolo'uyo."¹⁰ Siya se bom hedehedede wa se nuwanuwati yo se hedehededei se wane, "Boita tolo'uyona meta kaniyona ede saha?"¹¹ Na kabo se henamaiyei se wane, "Matauwuna saha to laugagayo taulauhekata se wane, Eliya* taba ye uyomabaguna?"¹² Yesu ye hedede lau udiyedi ye wane, "Mamohoi, Eliya ye laomabaguna na ginauli maudoidi ye kabinonohaidi. Yo hinage Buka Tabuna unai se kuli yako se wane, 'Tau

8:29 Keliso kaniyona ede "Yaubada yona kaisunuwa tamowaina iya tauhemahemauli".

8:35 Ewaneliya kaniyona ede "Yesu wasana namwanamwana".

8:38 Yesu ye hedede siya isi ganaganawalina matauwuna yodi hekasisi Yaubada unai meta kana kao doha maitawasola mwanena nige ye hekasisiyei. Kaniyona ede teina isi ta Yaubada nige se hekasisiyei yo nige se mode yona laugagayo udiyedi.

9:11 Dius yodi nuwatu bena Eliya kabo se kita ye baguna ye uyoma tanoubu ta na kabo Keliso. Yo se nuwatui Eliya yona uyoma ne unai taba nige kamkamna ye hekalo.

Natuna kabo ye kamkamnakalili yo se laukwatakataeai.'¹³ Na ya hededelaowa, Eliya ye laomako,* na saha yababadi se nuwatuidi na se henuwadi wa tamowai se ginaulidiko iya unai, doha iya wasana unai se kuliyako."

Yesu wawaya ye henamwanamwa

(Mataiyo 17:14-21; Luka 9:37-43a)

¹⁴ Na kabo se lage kadi kahao wa udiyedi. Na bodalakilaki se kitadi meta kadi kahao wa se tololahetakikilidi, yo hinage laugagayo taulauhekata hekadi maiyadiyao se haihaikawayagala.¹⁵ Na tamowai wa Yesu se kita meta kaluwadi se loi na se heloi se lau iya se lautokiyei.¹⁶ Na Yesu ye henamaiyedi ye wane, "Komiu saha kwa haihaikawayagala?"¹⁷ Boda wa luwadiwai tamowai hesau ye wane, "Tanusaga, natugu ya woyaiyama kalimwai. Yaluwa yababana iya ye luwui, unai nige gonowana ye hedehedede."¹⁸ Ena yaluwa yababana yona kasiyebwa ye heduwaisini kabo ye gabadobiyei bwatano ne unai, na kawana ne unai kabo gwasapulo se pesa, yo hinage kawana ye kapuyahisi yo tauna se todi. Yom hekahekatao ya kaibwadaidi bena yaluwa yababana ne se hededehepesa na nige gonowadi."¹⁹ Na kabo Yesu ye hededelau udiyedi ye wane, "Komiu isi ta, yomi sunuma se gagili! Huya lohaloha ya miya maiyamu, na iyamo nige kwa kawamamohoeyeigau. Wawaya me ku woyaiyama kaliguwai."²⁰ Na kabo wawaya wa se woyalae Yesu unai. Huyana yaluwa yababana Yesu ye kita ede wawaya wa ye gulidobi bwatano unai. Ye tapitapipili yo ye gwasagwasapulo.²¹ Yesu gama wa tamana ye henamaiyedi ye wane, "Kauyana teina kasiyebwa ta ye tubu iya unai?" Tamana wa ye wane, "Ma gagilina unai."²² Huya badobado iya ye gabadobiyei kaiwa kalakalasina yo waila unai bena kabo ye unuhemwalo. Na ena kowa gonowam, kabo ku katekamkamnaegai yo ku sanguigai."²³ Yesu ye wane, "Ye saha to ku wane, 'ena kowa gonowam'? Ginauli maudoidi kabo se masalahataukawamamohoeyeigau unai."²⁴ Na gama wa tamana ye yogalau ye wane, "Ya kawamamohoeyeigo! Na yogu sunuma gagilina ta unai ku hebayaogau."²⁵ Na Yesu boda wa ye kitadi se heloi se laoma iya unai, na kabo ye hededelau yaluwa yababana wa unai ye wane, "Yaluwa beyakolakolana yo una'unana, wawaya me ku pesagabae na tabu ku luwu'uyo iya unai."²⁶ Na yaluwa yababana wa ye yogahi ede wawaya wa ye nukui na ye laugabaei. Na gama wa kana kao doha tamowai boiboitana, unai boda wa yodi nuwatu bena ye boitako.²⁷ Na Yesu ye kabilau wawaya wa nimana unai ye kabihetolo, ede ye tolo.²⁸ Na kabo Yesu maiyana hekahekatao se mwalaesae numa kalona unai. Meta siya se bom na se henamaiyedi se wane, "Ye saha to nige gonowamai

wawaya ne unai yaluwa yababana ne ka hededehepesa?"²⁹ Yesu ye hededelau udiyedi ye wane, "Yaluwa kana kao doha teina ta, meta tapwalolo* mo unai kabo kwa hededehepesa."

Yesu yona boita yo tolo'uyo ye hededehemasalahayoi

(Mataiyo 17:22-23; Luka 9:43-45a)

³⁰ Kabo Yesu maiyana hekahekatao magai wa se laugabae na Galili unai se laulau. Yesu nige ye henuwa bena tamowai kabina se kata meta siya ede haedi,³¹ matauwuna yona hekahekatao wa ye hekatadi. Ye hededelau udiyedi ye wane, "Tamowai hesau kabo Tau Natuna kana ye walohai na ye moselaei tamowai hekadi nimadiwai. Na kabo se unuhemwalo, na mayadai haiyona mulidiwai kabo ye tolo'uyo."³² Na Yesu saha ye hedehededeidi ta, yona hekahekatao wa nige se nuwatulobai. Iyamo nige se henamaiyedi, matauwuna ede se matausi.

Kaiteya ye saekalili Yaubada matanawai?

(Mataiyo 18:1-5; Luka 9:46-48)

³³ Na kabo se lage Kapelenuma unai. Siya numa hesau kalona unai, na Yesu ye henamaiyedi ye wane, "Komiu saha kwa hetahetala keda ne unai?"³⁴ Siya nige kalinadi, matauwuna keda wa unai se bom se henahenamai'uyoidi luwadi ne unai kaiteya kabo yodi boda.³⁵ Yesu ye tulidobi na Saudoudoi-labui wa ye yoganedi na ye wane, "Yaubada matanaena kaiteya tamowai ye henuwa bena ye baguna, taba ye lau ye mulitamolosi, yo ye hemala heyayai tauhaina mamohoi."

³⁶ Na kabo Yesu ye kabilau wawaya gagilina hesau nimana unai. Ye kabihetolo matadiyena na ye labasiyama na ye wane,³⁷ "Taba kaiteya wawaya gagilina hesau doha teina ye yogaisini yau hesaguwai, meta hinage yau ye yogaisinigau. Yo kaiteya ye yogaisinigau meta hinage tauhetamaligau ye yogaisini."

Kaiteya nige ye guduguduwa meta iya kada kaha hesau

(Mataiyo 18:6-9; Luka 9:49-50 yo 17:1-2)

³⁸ Na Yowane ye hededelau Yesu unai ye wane, "Tanusaga, tamowai hesau ka kita yaluwa yababadi tamowai udiyedi ye hededehepesadi kowa hesamwai. Na ka hededelau unai taba ye kaiyawasi, matauwuna iya nige kada kaha hesau."³⁹ Yesu ye wane, "Tabu kwa hekahekaiyawasi, matauwuna kaiteya laulaugigibwali ye ginauli yau hesaguwai, iya taba nige gonowana ye hededeheyababagau tenem huyana ne unai."⁴⁰ Kaiteya nige ye guduguduwa, iya meta kada kaha hesau.⁴¹ Ya hededemamohoi:

Kaiteya waila kaputina ye leyawa yau hesaguwai matawuwuna kowa Keliso yona, unai kainauya kabo ye hai."

Yesu ye guguyaida bena tabu yababa kedadi udiyedi ta laulau

42 "Ena tamowai hesau tausunumaegau hesau doha teina wawaya gagilina ta ye woyapwanoli na yababa ye ginauli, taba ye namwa mo weku lakilakina gadonawai se kau, na se tuudobiyei gabwawai, na kabo Yaubada yona hekamkamna ye lobai." **43-44** Ena nimam hesau ye woyahesuwalago na yababa ku ginauli, ku bolihai. Ye namwa mo nimam kesega unai mauli nige kana siga ku hai, na kabo ma nimalabulabuim na ku lau kaiwa kalakalasina nige kana siga unai.* **45-46** Yo ena kaem hesau ye woyahesuwalago na yababa ku ginauli, meta ku bolihai. Ye namwa mo kaem kesega unai mauli nige kana siga ku hai, na kabo ma kaelabulabuim na Yaubada ye gabalaego kaiwa kalakalasina unai.* **47** Yo hinage ena matam hesau yona kaikaikewa ye yababa, ku lamohai. Ye namwa mo matam kesega na Yaubada yona basileiya unai ku lage, na kabo ma matalabulabuim na Yaubada ye gabalaego kaiwa kalakalasina unai,

48 'temenai mwatamwata buluma taukaikaidi taba nige se mwaloi,

yo kaiwa nige yona kababoso'. (Aisaiya 66:24)

49 Yaubada kabo ye hekalitagoniu kaiwa kalakalasina unai.* **50** Kalita meta ye namwa, na taba ye tomatoma, kabo idohagi na ye kalita'uyo. Kwa hemala doha kalita, kaniyonia ede bena kwa hainuwakesega na kwa miya."

Paliseya tamowaidi Yesu unai inawase laugagayona se henamaiyei

(Mataiyo 19:1-12)

10 Yesu ye dahalai ye lau Yudeya tehana unai ye lage. Na kabo Yolidani wailana unai ye kawasi. Temenai bodalakilaki se lagegogoma Yesu unai na ye hekatadi. Iya yona laulau doha tenem. **2** Huyana ne unai kabo Paliseya tamowaidi hekadi se laoma iya unai bena se laukita ede se henamaiyei se wane, "Taba tamowai hesau mwanena ye inawasei, meta ye dudulai?" **3** Na Yesu ye henamaiyedi ye wane, "Mose yona laugagayo sahasahana ye leyawa?" **4** Na se wane, "Mose ye talamyei kabo tamowai ye inawase. Na bagubaguna bena inawase pepwana ye kuli kabo mwanena ye hetamali." **5** Yesu ye hededelau udiyedi

ye wane, "Teina laugagayo ta Mose ye kuli komiu yomiu, matawuwuna nuwamiu se kwailolokalili.

6 Huyana Yaubada tanoubu ta ye hetubu meta loheya yo waihiu ye ginaulidi.* **7** Unai ede loheya kabo tamana yo sinana ye laugabaedi na ye patulau mwanena unai,* na siya taudi labui se hemala buluma kesega.* Unai siya nige tamowai labui, na se hemala tamowai kesega.* **9** Unai Yaubada saha ye tolekesegai meta tabu tamowai hesau ye hetatagwaligwali."

10 Huyana se uyo numa kalona unai ede yona hekahekatao Yesu yona hedehedede wa se henamaiyei. **11** Na ye hededelau udiyedi ye wane, "Kaiteya tamowai mwanena ye inawasei na waihiu hesau ye tawasolai, meta iya ye ganawali." **12** Yo kaiteya waihiu iya mwanena ye inawasei na loheya hesau ye tawasolai, meta iya hinage ye ganawali."

Yesu ye kaibwada Yaubada unai kabo wawayao ye kitahetetedi

(Mataiyo 19:13-15; Luka 18:15-17)

13 Huya hesau kabo tamowai hekadi wawayao gagilidi se woyalaedi Yesu unai bena kabo ye kabilau udiyedi. Na yona hekahekatao wa tamowai wa se hededehekaiyawasidi. **14** Yesu ye kitadi na ye koipili ede ye hededelau yona hekahekatao wa udiyedi ye wane, "Wawayao gagilidi ne taba se laoma kaliguwai, na tabu kwa guduguduidi, matawuwuna tamowai yodi laulau doha siya, Yaubada yona basileiya meta siya yodi. **15** Ya hededemamohoi: Kaiteya tamowai Yaubada yona basileiya nige ye hai ma sunumana doha wawayao gagilina ta, meta taba nige ye lusola Yaubada yona basileiya unai." **16** Na kabo wawayao wa kesega kesega ye labasi, na nimana ye tolesaedi kewana ne unai na ye kaibwada Yaubada unai kabo ye kitahetetedi.*

Tamowai gogogogona Yesu unai mauli nige kana siga ye henamaiyei

(Mataiyo 19:16-30; Luka 18:18-30)

17 Yesu ye hetubu bena ye dahalai, na tamowai hesau ye heloi ye laoma ye tulibono Yesu talanuwana wa unai na ye henamaiyei ye wane, "Tanuswaga namwanamwana, taba saha ya ginauli kabo mauli nige kana siga ya hai?" **18** Yesu ye hededelau unai ye wane, "Ye saha to ku wane yau ya namwa? Nige tamowai hesau ye namwa, na Yaubada ye bom mo. **19** Kowa Yaubada yona laugagayo kabidi ku kata: Tabu ku kaiunu, tabu ku ganawali, tabu ku kaiwahali, tabu

9:43-44 Kulikuli beyabeyadi hekadiyo se kuli doha teina lausoiso 44 unai: "temenai mwatamwata buluma taukaikaidi taba nige se mwaloi, yo kaiwa nige yona kababoso."

9:45-46 Kulikuli beyabeyadi hekadiyo se kuli doha teina lausoiso 46 unai: "temenai mwatamwata buluma taukaikaidi taba nige se mwaloi, yo kaiwa nige yona kababoso."

9:49 Hedehedede ta kaniyonia doha teina: Yaubada kabo tamowai maudoidi yodi sunuma unai ye laukitadi. Laukitia kamkamnana doha kaiwa kalakalasina.

10:6 Genese 1:27 ku hasili.

10:8 Genese 2:24 ku hasili.

10:16 Yesu ye kaibwada Yaubada unai kabo ye kitahetete. Teina hedehedede ta kaniyonia dimdim unai se wane, "Jesus blessed them."

lauhetala unai ku hededelupolupo, tabu tamowai hesau ku lupohai, yo hinage tamam yo sinam ku hekasisiyedi.”²⁰ Tamowai wa ye hedehedehemasalah ye wane, “Taruwaga, ma gagiligu unai ye laoma teina meta laugagayo maudoidi ta ya miyawatanidi.”²¹ Yesu ye kitalau ma gadosisina na ye wane, “Ginauli kesega mo sola nige ku hai. Yom gogo maudoidi ku lokunegabaedi, na monidi ne ku moseidi taudehadeha yodi, na kabo yom kainauya ku hai galewa ne unai. Na kabo ku laoma ku hemuliwatanigau.”²² Hedehedede wa ye lapui ede ye siliyata. Na ye dalahai ye lau ma nuwakamkamnana, matauwuwuna ede ye gogokalili.

²³ Kabo Yesu yona hekahekatao ye kitahetakikilidi na ye hededelau udiyedi ye wane, “Tamowai gogogogodi bena se lusola Yaubada yona basileiya unai meta ye pilipilikalili.”²⁴ Yona hedehedede wa unai se siliyata, na ye hedede'uyo ye wane, “Natuguwao, Yaubada yona basileiya lusolana meta ye pilipilikalili.”²⁵ Doha kamela nige gonowana diu duhanawai ye lusola, gonogonowana doha tamowai gogogogona iya hinage nige gonowana ye lusola Yaubada yona basileiya unai.”²⁶ Yesu yona hekahekatao wa kabo se siliyata na se henahenamai'uyoidi se wane, “Kaiteya kabo mauli nige kana siga ye hai?”²⁷ Yesu ye kitalau udiyedi na ye wane, “Tamowai kalidiwai nige gonowadi, na Yaubada kalinawai iya gonowana tamowai ye haidi se lau yona basileiya unai, matauwuwuna Yaubada ginauli maudoina gonowana ye ginaulidi.”

²⁸ Na Petelo ye hededelau Yesu unai ye wane, “Ku kitagaiko, yoma ginauli maudoidi ka laugabaedi na ka hemuliwatanigo.”²⁹ Yesu ye hededelau udiyedi ye wane, “Ya hededemamohoi: Kaiteya yona numa, kana kahao, lounao, tamana, sinana, natunao, yo yona koya ye laugabaedi yau debaguwai yo ewaneliya debanawai,”³⁰ teina huya ta unai Yaubada kabo ginauli maudoidi udiyedi ye kainauyakaliliyei, yona numa, kana kahao, lounao, sinana, natunao, yo yona koya kabo se badokalili. Yo hinage pilipili kabo ye hekalodi, na malaitom huya kabo mauli nige kana siga ye hai.³¹ Tamowai gwaudi siya kaiteyadi wasalaulau tamowaidi huya ta unai, kabo se mulita. Na tamowai gwaudi siya kaiteyadi nige wasa laulau tamowaidi, kabo se baguna.”

Yesu yona boita hedehededenah hehaiyonana (Mataiyo 20:17-19; Luka 18:31-34)

³² Yesu yona hekahekatao ye bagunaedi se laulau Yelusalema. Yona hekahekatao wa se siliyata yo tauhemuliwatanina hekadiyo wa se matausi. Iya kabo yona hekahekatao wa ye woyahesuwaladi na ye hedehedehemasalah udiyedi saha kabo ye tubu iya unai.³³ Yesu ye wane, “Kwa lapulapuinamwanamwa!

Teina ta saesae Yelusalema. Na temenai taukatalasam babadadi yo laugagayo taulauhekata udiyedi kabo tamowai hesau Tau Natuna kana ye walohai. Se koitalaliu kabo bena se unui, na kabo se moselae dagela tamowaidiyao kalidiwai.³⁴ Iya kabo se talatalawasiyei yo se kaikaisoi yo se pidili, yo kabo se unuhemwaloi na mayadai hehaiyonana unai kabo ye tolo'uyo.”

Yamesi yo Yowane yodi kaibwada (Mataiyo 20:20-28)

³⁵ Sebedaiyo natunao Yamesi yo Yowane se laoma Yesu unai se wane, “Taruwaga, saha ka kaibwadai ne, ka henuwa bena ku ginauli yomai.”³⁶ Yesu ye henamaiyedi ye wane, “Komiu saha kwa henuwa bena ya leyawa?”³⁷ Na se wane, “Ku hedehedesunumagai taba yom basileiya unai kai tauma labui kabo teha saesaena unai ka tuli, hesau kowa nimakahatum na hesau seuseulim unai.”³⁸ Yesu ye hededelau udiyedi ye wane, “Komiu saha kwa kaikaibwadai ta, nige kabina kwa kata. Numanuma sahasahana kabo yau ya numa ne gonowamiu kabo kwa numa? Yo hinage babatiso kabo ya hai* ne gonowamiu kabo kwa hai?”³⁹ Na se wane, “Kai gonowamai.” Unai Yesu ye hededelau udiyedi ye wane, “Mamohoi, komiu kabo numanuma ne kwa numa, yo yogu babatiso ne unai kabo kwa babatiso,⁴⁰ na yau nige gonowana ya hineli kaiteya kabo kahatugu unai ye tuli yo kaiteya seuseuligu unai ye tuli. Teina kabatuli ta tamagu ye hinelinonohaidiko kaiteyadi kabo udiyedi se tuli.”

⁴¹ Yamesi yo Yowane yodi kaibwada wa Yesu yona hekahekatao hekadi wa se lapui ede se koipili.⁴² Kabo Yesu ye yogagogoidi na ye wane, “Komiu kabina kwa kata meta dagela tamowaidi yodi wasawasa yodi tamowai se tanuwagaidi yo idohagi yodi tauwoyawoya laugagayo bayabayaona unai se woyaidi.”⁴³ Na komiu tabu doha tenem. Kaiteya ye henuwa bena yomi bada, iya taba yomi heyayai tauhaina.⁴⁴ Yo kaiteya ye henuwa bena ye baguna, meta iya tamowai maudoidi yodi heyayai tauhaina.⁴⁵ Matauwuwuna Tau Natuna nige ye laoma bena tamowai ye heyayaiyedi, na ye laoma bena iya yodi heyayai tauhaina, na yona mauli ye mosegabaei tamowai maudoidi yodi mauli maisana.”

Yesu Batimaiyo matana ye helaladi (Mataiyo 20:29-34; Luka 18:35-43)

⁴⁶ Yodi kabalau wa unai kabo se lage Yeliko unai. Na Yesu maiyana hekahekatao yo bodalakilaki maiyadiyao magai wa se laugabae, na tamowai matagibugibuna hesau hesana Batimaiyo, Timaiyo natuna, keda dedekanawai ye tutuli na ye kaikaibwada.⁴⁷ Na huyana Batimaiyo wasa ye lapui

10:38 Teina hedehedede ta numanuma sahasahana kabo ya numa yo babatiso kabo ya hai kaniyodi ne meta kesega: *kabo ya kamkamna*.

meta Yesu Nasaleta tamowaina ye laolaoma dedekana ne unai, ye yogalau ye wane, "Yesu, Dawida natuna, ku katekamkamnaegau!" ⁴⁸ Na tamowai gwaudi iya se dilai se wane, "Ku mwanou!" Na iya kabo ye yogalakilaki na ye wane, "Dawida natuna, ku katekamkamnaegau!" ⁴⁹ Ede Yesu ye talutolo na ye hededelau yona hekahekatao wa udiyedi ye wane, "Tamowai ne kwa yoganeiyama." Ede se yogalau unai se wane, "Nuwam ye talu na ku tolo! Yesu ye yoganeigo!" ⁵⁰ Iya kana kwama ye haigabae na ye kamposi na ye lau Yesu unai. ⁵¹ Yesu ye henamaiyei ye wane, "Saha ku henuwa bena ya ginauli kalimwai?" Tamowai matagibugibuna wa ye wane, "Tantuwa, ya henuwa taba matagu ku helaladi." ⁵² Yesu ye hededelau unai ye wane, "Yom sunuma debanawai ku namwanamwa. Na yom kabalauyenka ku lau." Na tamowai wa matana se lala ede Yesu ye hemuliwatani keda wa unai se lau.

Yesu se hailobai yo se hedebasae doha wasawasa Yelusalema unai

(Mataiyo 21:1-11; Luka 19:28-38; Yowane 12:12-19)

11 Yesu ma kana bodoa Yelusalema se hanahanawui, na se lage Betepage yo Betaniya Olibe koyana unai. Na kabo yona hekahekatao labui ye hetamalidi se lau ² na ye hededelau udiyedi ye wane, "Kwa lau na matamu ne unai magai gagilina hesau unai kwa lage, metai kabo donki natuna kwa kita se paihekahini duu unai, sola nige tamowai hesau ye tulisae unai. Kwa yailihai na kwa woyaiyama. ³ Ena tamowai hesau ye henamaiyeigomiu ye wane, 'Saha temeta kwa ginauli?', kabo kwa wane, 'Kama tanuwa ye henuwa na mahana kubwakubwa mo unai kabo ye hetamali'uyoiyama.' ⁴ Se lau ede donki natuna wa se kita duu unai se paihekahini. Se yaiyaili, ⁵ na tamowai hekadi temenai se totolo se hededelau kalidiwai se wane, "Ye saha to donki natuna ne kwa yaili?" ⁶ Yesu saha ye hedede kalidiwai wa gonogonowana hinage se hedede udiyedi ede suisui wa se talamyei. ⁷ Donki natuna wa se woyai se leyama Yesu unai. Na kadi kwama se tolesaedi kewana ne unai, na Yesu ye tulisae unai. ⁸ Tamowai hekadi kadi kwama se yesedi keda wa unai, na hekadi hinage kaiwa lagadi se bolidi na keda wa unai se yesedi.

⁹ Kaiteyadi se baguna yo se mulita na Yesu maiyadi se laulau na se heyoheyoga se wane,

"Hosana!"*

"Ka hedebasaego, kowa Guiyau hesanawai ku laoma!"*

¹⁰ "Ka hedebasaego, kowa kama kulutubu Dawida kana isimulita. Ku laoma ku tanuwagaigai!"

"Yaubada galewa unai ta hedebasae!"

¹¹ Na kabo Yesu ye lusae Yelusalema na ye mwalaе numa tabuna bakubakuna* unai na ginauli maudoidi ye kitasipwaidi. Na ye hetubu ye meimeilahi, unai numa tabuna bakubakuna wa ye pesagabae, na maiyana hekahekatao se uyo Betaniya.

Yesu kaiwa ye kawagulaiyei

(Mataiyo 21:18-19)

¹² Mala ye tom kabo Betaniya se laugabae se laulau na Yesu ye hasali. ¹³ Kedalohawai ye kitalau kaiwa hesau* ma lugulugu na ye kita, ede kaniyona hesabana ye lau. Na ye kita wa meta lugugaibuna, matauwuna kaiwa wa nige yona huyakanayo. ¹⁴ Ede Yesu kaiwa wa ye kawagulaiyei ye wane, "Taba nige tamowai hesau kaniyom ye kai'uyoi." Yona hekahekatao hedehedede wa se lapui.

Yesu taulokune ye henakudi se pesa numa tabuna bakubakuna unai

(Mataiyo 21:12-17; Luka 19:45-48; Yowane 2:13-22)

¹⁵ Na kabo se lage Yelusalema ede Yesu ye mwalaе numa tabuna bakubakuna unai. Na ye hetubu taulokune yo tauhemahemaisa ye henakudi se pesa. Yo hinage moni tauheduhedudu yodi hatahata ye kahalabuidi. Yo kaitalasam bunebunediyo taulokunedi yodi kabatutuli ye buikahalaedi. ¹⁶ Na ye laugagayoidi tabu tamowai hesau lokune ye bahei na ye mwalaе numa tabuna bakubakuna unai. ¹⁷ Yona lauhekata wa unai ye hededelau udiyedi ye wane, "Se kuliyako se wane:

'Yogu numa tabuna meta tamowai maudoidi yodi kabatapwalolo.' (Aisaiya 56:57)

Komiu kwa hai ye hemala taukaiwahali yo taukailupolupo yodi numa." ¹⁸ Taukaitalasam babadadi yo laugagayo taulauhekata hekadi yona hedehedede se lapui ede keda se wase bena taba idohagi kabo se unui. Na Yesu se matausiyei, matauwuna ede tamowai gwaudi yona lauhekata wa se nokoei.

¹⁹ Ye meimeilahi ede Yesu maiyana hekahekatao Yelusalema se laugabaei.

Sunuma gigibwalina Yesu ye lauhekatae

(Mataiyo 21:20-22)

²⁰ Malatomtom yena se laulau Yelusalema na kaiwa wa se kita meta ye wowoya yo ye pog. ²¹ Saha ye tubu wa Petelo nuwana ne unai ye sae ede ye hededelau Yesu unai ye wane, "Tantuwa, ku kitalau! Lahi kaiwa wa ku kawagulaiyei wa ye pog." ²² Yesu ye hededelau udiyedi ye wane, "Yaubada kwa sunumai. ²³ Ya hededemamohoi: Ena kaiteya ye hededelau teina kuduli ta unai ye wane, 'Ku tuudobiyego gabwa

11:9 Hosana meta kalina Alamaiki hedehededen, na kaniyona ede, "Ya kaibwadaigo, ku saguigau!", na Yesu yona huyamiyawai hedededede ta unai Yaubada se hedebasaei.

11:9 Hedehedede ta meta Same 118:25-26 unai hinage ta lobai.

11:11 Numa tabuna bakubakuna: Dimdim unai se wane temple courts.

11:13 Kaiwa ta hesana ede "fig" dimdim unai, na kaniyona se kamnakalili.

ne unai', na nige ye nuwalabulabui, na ye sunuma mo bena yona kaibwada ne Yaubada kabo ye ginauli, meta kabo Yaubada ye ginauli. ²⁴ Unai ya hededelaowa, tapwalolo unai saha kwa kaibwadai na kwa sunumai meta kwa hainonohaiyako, kabo Yaubada ye leyawa. ²⁵⁻²⁶ Na yomi huyatapwalolo Yaubada unai, na ena yomi pilipili kami kahao hekadi udiyedi, bena kwa nuwatugabaedi, metai kabo Yaubada tamamiu galewa unai yomi yababa hinage ye nuwatugabaedi."*

Yesu yona gigibwali se henamaiyei

(Mataiyo 21:23-27; Luka 20:1-8)

²⁷ Kabo se lage'uyo Yelusalema unai na Yesu numa tabuna bakubakuna unai ye laulau, na kabo taukaitalasam tauwoyaidi yo laugagayo taulauhekata yo tamowai lakilakidi se laoma iya unai. ²⁸ Na se henamaiyei se wane, "Gigibwali sahasahana unai yo kaiteya yona gigibwali unai teina ginauli ta ku ginaulidi?" ²⁹ Yesu ye hededelau udiyedi ye wane, "Hedehedede hesau kabo ya henamaiyeigomiu. Na ena yogu kwa hedehedede, kabo hinage ya hededelaowa kaiteya yona gigibwali unai teina ginauli ta ya ginaulidi. ³⁰ Yowane yona gigibwali haedi ye hai na ye hebahebabatiso? Yaubada unai o tamowai udiyedi? Hage, yogu kwa hedehedede."

³¹ Siya se bom se henahenamai'uyoidi se wane, "Taba ta wane, 'Yaubada unai ye hai', iya kabo ye wane, 'Ede ye saha to nige kwa kawamamohoieyi?' ³² O taba ta wane, 'Tamowai udiyedi', kabo boda se heyababada." (Na boda se matausiyedi, matauwuna maudoidi Yowane se kitayako meta iya peloweta mamohoina.) ³³ Unai kabo se hededelau Yesu unai se wane, "Kai nige kabina ka kata." Unai Yesu ye wane, "Yau hinage taba nige yomiu ya hedehedede kaiteya yona gigibwali unai ginauli ta ya ginaulidi."

Taukitakitahetete yababadi palabolena

(Mataiyo 21:33-46; Luka 20:9-19)

12 Na kabo Yesu ye hetubu ye hededepalabole tamowai lakilakidiyao wa kalidiwai ye wane, "Tamowai hesau wine koyana* ye kumai, na ye ganahetakikili, wine kaniyodi kabatamtam ye ginauli, yo kabayaiyaiwa numana ye kabi. Na kabo yona wine koyana ye mosei taukitakitahetete hekadiyo kalidiwai na ye lau magai hesau keda lohaloha unai. ² Wine yona huyakaniyo ye lage ede yona heyayai tauhaina hesau ye hetamali ye lau taukitakitahetete wa kalidiwai bena koya tanuwagana yona wine kaniyona ye haidi. ³ Taukitakitahetete wa heyayai tauhaina wa

se kelebesi yo se pidili, na se hetamali ye uyo ma nimagaibuna.

⁴ Heyayai tauhaina hesau ye hetamali'uyoi. Iya kuluna se koilapai yo se kabihenayaikaliliyei. ⁵ Hinage hesau ye hetamali'uyoi. Iya se kohemwaloi. Na gwaudi kabo ye hetamalidi se lau, meta hekadiyo se pidilidi yo hekadiyo se kohemwaloidi. ⁶ Na kabo iya natuna tahunuwana ye bom mo maiyana se miyamiya. Na ye hetamalimulitai na ye nuwatui ye wane, 'Yau natugu, unai kabo se hekasisiyei.' ⁷ Iyamo taukitakitahetete wa se koitalaliu se wane, 'Teina ta koya tanuwagana natuna tahunuwana. Kwa laoma ta kohemwaloi, na koya ta kabo kita ta tanuwagai.' ⁸ Na se kelebesi se kohemwaloi na se gabaedikwaei gana dagelana wa unai.

⁹ Koya tanuwagana kabo saha ye ginauli? Iya kabo ye laoma koya taukitakitahetetena wa ye unuhemwaloidi, na kabo wine koyana wa ye moselaei tamowai hekadi se kitahetete. ¹⁰ Komiu taba kabina kwa kata Buka Tabuna unai saha se kuli wa,

'Taukabinuma duu se subu na se tolehesuwala, na iyamo iya duu salibebe yo numa tauhebayaona ede.

¹¹ Teina Guiyau yona nuwatu na ye namwakalili matada ne unai.' (Same 118:22-23)

¹² Yesu yona palabole wa Dius yodi tamowai lakilakidiyao wa se nuwatulobai meta siya kadi hedehedede, unai bena se pai. Iyamo boda wa se matausiyedi, unai ede se laugabaei.

Takisi monina hedehededen

(Mataiyo 22:15-22; Luka 20:20-26)

¹³ Huya hesau kabo Paliseya tamowaidi yo Heloda yona tamowai hekadi se hetamalidi se lau Yesu unai yona hedehedede unai bena se henuwapwanopwano.

¹⁴ Se lage iya unai kabo se wane, "Tunuwaga, ka kabina ka kata meta kowa ku dudulai. Tamowai nige ku matausiyedi, matauwuna tamowai nige ku hekasisigaibuidi. Na Yaubada yona keda mamohoina mo ku lauhekataei. Ye dudulai kabo takisi ka mosei Sisa* unai o nige? ¹⁵ Kabo ka tole o tabu ka toletole?"

Yodi kailupolupo Yesu ye kita na ye wane, "Idohagi to bena kwa lautonogigau? Hage, denali* hesau kwa leyama ya kita." ¹⁶ Ede denali wa se mosei Yesu unai na ye wane, "Teina kaiteya kana kao yo hesana?" Siya se wane, "Sisa." ¹⁷ Yesu ye hededelau udiyedi ye wane, "Ena Sisa yona, kwa mosei Sisa unai, na ena Yaubada yona kwa mosei Yaubada unai." Siya kabo Yesu se nokoeikaliliyei.

11:25-26 Kulikuli beyabeyadi hekadiyo lausoisoi 26 se kulitubei doha teina: "Ena taba komiu yodi yababa ne nige kwa nuwatugabaedi, meta hinage tamamiu galewa unai yomi yababa taba nige ye nuwatugabaedi."

12:1 Wine koyana meta tano hesau maimaina hesana ede "wine" kabakumaina. Iya kaniyona kana kao ede dimdim se wane "grapes". Tamowai grapes wa se tam meta kaedi se hepaisowa se utuhiji kabatamtam tehanawai, dimdim se wane "wine press". Masina wa ye bui ede numanuma hesana "waina". Waina wa ye hemala mayadai badobado numanumana siya Dius kalidiwai.

12:14 Sisa meta Loma tamowaidi yodi wasawasa saesaena. Buka Suau unai "kaisala" se hepaisowa, na kalinadaena meta Dimdim yodi katakataena ta watani.

12:15 Denali meta Loma tamowaidi yodi moni hesau.

Tolo'uyoma tawasolana

(Mataiyo 22:23-33; Luka 20:27-40)

¹⁸ Sadusiya* tamowaidi yodi nuwatu tauboiboita taba nige se tolo'uyoma. Na se laoma Yesu se henamaiyei se wane, ¹⁹ "Tanuswaga, Mose yona kulikuli unai ye wane, ena tamowai hesau ye boita, na mwanena ye miyamiya, na nige natunao, meta bena kana kaha hesau kwabulina ne ye tawasolai na natunao ye labasidi, kabo se hemala kana kaha wa natunao.* ²⁰ Huya hesau tamowai hesau natunao loheloheyao badodi haligigi-labui. Tabaguna ye tawasola, nige natunao, na ye boita. ²¹ Kana kaha helabuina kwabuli wa ye tawasolai. Iya hinage nige natunao, na ye boita. Na hehaiyonadi ye tawasolai wa gonogonowana. ²² Yodi haligigi-labui waihiu kesegana wa se tawasolai, na nige natudiyao. Sine wa kabo hinage ye boita. ²³ Badodi haligigi-labui wa meta waihiu wa se tawasolai, na tolo'uyoma unai waihiu wa kabo kaiteya mwanena?" ²⁴ Yesu ye hededelau udiyedi ye wane, "Komiu yomi kabanuwapwanopwano ede teina. Yaubada yona hedehedede yo yona gigibwali nige kabina kwa kata. ²⁵ Huyana tauboiboita se tolo'uyoma taba nige se tawasola yo taba nige se hetahetawasola. Na siya kadi kao kabo doha galewa aneludi. ²⁶ Na tauboiboita yodi tolo'uyoma Mose yona buka unai saha ye kuli wa, idohagi to nige kwa nuwatui? Temenai, Yaubada ye taumasalahi kaiwa hesau unai, na kana kao doha kaiwa ye kalapulupulu. Na ye hededelau Mose unai ye wane, 'Yau Abelahama yona Yaubada, yo Isako yona Yaubada, yo Yakobo yona Yaubada.' (Esodo 3:6) ²⁷ Yaubada ta iya nige tauboiboita yodi Yaubada, na iya taumaumauli mo yodi Yaubada. Komiu nuwamiu se pwanopwanokalili."

Laugagayo saesaekalilidi

(Mataiyo 22:34-40; Luka 10:25-28)

²⁸ Na laugagayo taulauhekata hesau ye laoma ede saha se hetahetaladi wa ye lapuidi. Ye nuwatulobai meta Yesu hedehedede namwanamwadi ye heddededi udiyedi, ede ye henamai Yesu unai ye wane, "Laugagayo maudoidi wa udiyedi meta sahasahana ye baguna ede?" ²⁹ Yesu ye wane, "Teina laugagayo saesaekalilina ede: 'Isalaela tamowaidiyao, kwa lapulapui! Guiyau yoda Yaubada, iya Guiyau kesega mo. ³⁰ Unai Guiyau yom Yaubada ku gadosisiyei ma nuwam ye gehe, ma yaluwam ye gehe, yo ma nuwanuwatum ye gehe, yo ma bayaom ye gehe.' (Dutelonomi 6:4-5)

Teina ta laugagayo bagubagunana. ³¹ Helabuina ede teina: 'Kowa helem taumiya tamowaina ku gadosisiyei, doha ku bom ku gadosisiyeigo.' (Lewitikasi 19:18) Teina laugagayo labui ta se saekalili na kabo hekadi wa." ³² Na kabo laugagayo taulauhekata wa ye hededelau Yesu unai ye wane, "Tanuswaga, saha ku hedede wa meta ye dudulai. Ye mamohoikalili meta Yaubada kesega mo, na nige Yaubada hesau, iya ye bom mo Yaubada. ³³ Yaubada bena ta gadosisiyei ma nuwada ye gehe, yo ma sonogada ye gehe, yo ma bayaoda ye gehe. Yo heleda taumiya tamowaina bena ta gadosisiyei, doha ta bom ta gadosisi'uyoida. Teina laugagayo ta se saekalili ede, na kabo kaitalasam gabugabudi yo kaitalasam hekadi." ³⁴ Yesu ye kita meta tamowai wa ye sibasiba unai ye wane, "Kowa Yaubada yona basileiya ku hanahanawuiko." Unai siya maudoidi luwadiyena nige hesau ye nuwabao ede nige saha hesau se henamai'uyoi.

Dawida natuna hedehededeni

(Mataiyo 22:41-46; Luka 20:41-44)

³⁵ Huya hesau kabo Yesu numa tabuna bakubakuna unai ye laulauhekata na ye henamaiyeidi ye wane, "Matauwuna saha to laugagayo taulauhekata se hedede bena Keliso meta Dawida natuna?" ³⁶ Yaluwa Tabuna yona gigibwali unai Dawida ye hedede ye wane,

'Guiyau ye hededelau yogu guiyau unai ye wane,
"Nima tuutuuguyena ku tuli* ye lau ee kam
waiunu ya toledi kaem guninaena
na se hemala kaem kabatoledi." ' (Same 110:1)

³⁷ Dawida Keliso hesana ye katai Guiyau. Na komiu yomi nuwatu saha, idohagi na iya hinage Dawida natuna?" Boda wa se lapui meta nuwadi se namwa.

Yesu laugagayo taulauhekata ye hededeheyababadi

(Mataiyo 23:1-36; Luka 20:45-47)

³⁸ Yona lauhekata wa unai Yesu ye hededelau udiyedi ye wane, "Laugagayo taulauhekata kwa kitamnamwanamwaedi. Yodi taitaihile udiyedi se henuwa bena kwama lohalohadi se luwuidi yo kabalokulokune udiyedi bena tamowai siya se hailobaidi, ³⁹ yo hinage sunago yo kabakaikaigogo udiyedi kabatutuli namwanamwadi se henuwadi. ⁴⁰ Na kwabukwabuli yodi numa se lupohaidi, yo yodi tapwalolo se helohadi bena kabo tamowai se nokoeidi. Tamowaidiyao ne Yaubada kabo ye hekamkamnakaliliyeidi."

12:18 Sadusiya meta Dius kadi boda hesau. Siya meta Dius babadadiyao Sunedeli unai se bado na kabo hekadiyo. Hinage se gogokalili. Se tolabayao laugagayo bukadiyao haligigi (Genese ye lau Dutelonomi) udiyedi. Na yodi nuwatu doha teina: Teina tanoubu ta meta kabamiya namwanamwana. Unai boita tolo'uyona siya nige se kawamamohoeyei yo hineli mayadaina yo mauli hesau matada ne unai nige se nuwatui.

12:19 Dutelonomi 25:5-6 ku hasili.

12:36 Nima tuutuuguyena ku tuli: Nima tuutuuna unai kabatulina ne meta tamowai saesaedi yodi kabatuli.

Kwabuli dehadehana yona kainauya

(Luka 21:1-4)

4¹ Kabo Yesu ye tuli moni kaba'usa'usa dedekadiwai na ye kaikaikewa na boda se monimonitole. Tamowai monimonidi yodi moni lakilakidi se usaidi kaba'usa'usa wa kalodi udiyedi. **4²** Na kabo kwabuli dehadehana hesau ye laoma, na pene gagilidi labui ye usaidi. Pene labui wa lakidi meta se gagilikalili. **4³** Yesu yona hekahekatao ye yoganedima na ye hededelau udiyedi ye wane, "Ya hededemamohoi. Teina kwabuli ta kainauya lakilakikalilina ye tole, na kabo maudoidi ne. **4⁴** Matauwuna ede siya yodi moni lakilakidi udiyedi na kabo hisa mo se haidi na se toledi, na iya yona deha unai yona moni maudoina kalinawai ye tolehegehe."

Yesu numa tabuna koigwaligwalina ye hededenonohai

(Mataiyo 24:1-2; Luka 21:5-6)

13 Yesu maiyana hekahekatao numa tabuna unai se pesa, na yona hekahekatao wa hesau ye hededelau Yesu unai ye wane, "Tunuwaga, numa lauyahidi ne wekudi woiyawa'udoidi ne sola ku kitadi yo hinage numa namwamuyomuyoudi ne!"* ² Yesu ye wane, "Teina numa yo woyo lakilakidi maudoidi ta kwa kitadi? Taba nige weku hesau ye kaitalae weku hesau kewana ne unai. Dius kadi waiunu kabo maudoidi se koigwaligwalihegehedi."

Tanoubu yona huyagehe hekihekinoina

(Mataiyo 24:3-14; Luka 21:7-19)

3 Muliyena kabo Olibe koyana unai Yesu maiyana hekahekatao se tutuli na numa tabuna se kaikaikevalaei. Na Petelo, Yamesi, Yowane yo Andeleya se bom se laoma Yesu unai na se henamaiyei se wane, **4** "Teina ginauli ta kauyana kabo se tubu, yo hekihekinoidi saha kabo se tububaguna, ku hededehemasala kalimaiwai?" **5** Yesu ye wane, "Komiu kwa kitakitanamwanamwa, madai se lupohaigomiu. **6** Tamowai gwaudi kabo se laoma yau hesagu se hepaisowa na se wane, 'Yau Keliso ede,' na tamowai gwaudi se lupohaidi. **7** Huyana iyala dagugudi o wasadi kwa lapuidi, tabu kwa matausi. Teina ginaulidi ta kabo se tubu, na tanoubu ta yona huyagehe meta sola. **8** Magai hesau yo magai hesau kabo se hai'iya'iyala'uyoidi, basileiya hesau yo basileiya hesau kabo se hai'iya'iyala'uyoidi. Yo mwanikuniku teha hekadi udiyedi yo hasahasali hinage. Hekihekinoi ta yodi tubutubu meta kana kao doha sine diyadiyakanayetebu bena ye labalaba. **9** Komiu kwa kitakitanamwanamwaegomiu! Tamowai kabo se woyalaegomiu kabalaulehetala udiyedi, yo

sunago kalodi udiyedi kabo se pidiligomiu. Yau debaguwai kabo se woyalaegomiu tamowai lakilakidiyo yo wasawasa udiyedi, na bena kabo kwa hededehemasalahagau siya kalidiwai.

10 Bagubagunana komiu yo tauhemuliwatanigau maudoidi teina wasa namwanamwana ta bena kwa lauguguyaesi basileiya maudoidi udiyedi, na kabo tanoubu yona huyagehe. **11** Na taba huyana se paigomiu yo se laegomiu kabalaulehetala udiyedi, meta tabu kwa nuwanuwatu kabo hedehedede saha udiyedi kwa hedehedede. Na saha Yaubada ye leyawa ne unai kwa hedehedede, matauwuna komiu taba nige yomi nuwanuwatuyena kwa hedehedede, na Yaluwa Tabuna mo iya kabo ye hekatagomiu na kwa hedehedede.

12 Tamowai kabo yona saeya kana ye walohai, yo tama kabo natuna kana ye walohai. Natu kabo tamadiyao yo sinadiyao maiyadi se haikawayagala na kadi se walohai na kabo se unuidi. **13** Tamowai kabo se subugomiu yau debaguwai. Na kaiteya ye tolobayao ye lau ee kamkamna ne kana siga unai, Yaubada kabo ye hemauli."

Kamkamnalakilaki huyana

(Mataiyo 24:15-28; Luka 21:20-24)

14 Na kabo Yesu ye wane, "Ginauli hesau nuwamatamatausina iya yababa lakilakina tauginaulina*" kabo kwa kita ye totolo nige yona kabatolo mamohoina unai—tauhasilina bena ye nuwatulobai! Huyana ne unai Yudeya taumiyaina taba se wasabu se lau kuduli udiyedi se kenowadam.

15 Kaiteyana yona numa kewana unai ye pesadobi tabu ye mwalaesae numa kalona unai bena gogo hesau ye hai. **16** Hinage kaiteya yona koya unai ye paipaisowa, tabu ye uyo yona numa unai kana kwama hesabana. **17** Huyana ne unai taudiyadiyaka yo waiwaihiwo labalabadiyao, siya kabo se kamkamnakalili. **18** Na taba kwa tapwatapwalolo bena yomi huyawasabu ne tabu huyagwagwama unai.

19 Tenem mayadaidi ne udiyedi kabo kamkamna lakilakina ye tubu. Yaubada tanoubu yona huyaginaulina wa unai na ye laoma ee teina nige kamkamna hesau doha teina, yo hinage taba nige ye tubu'uyo. **20** Tenem mayadaidi ne Guiyau kabo ye hekubwadi. Ena nige ye hekubwadi, taba nige tamowai hesau gonowana ye miya. Na iya yona kaisunuwa tamowaidi hesabadi kabo huya ne ye hekubwa. **21** Tenem huyana ne unai, ena tamowai hesau ye hededeheowa kalimiuwai ye wane, 'Keliso iya ede teinai!', o 'Keliso iya ede temenai!', yona hedehedede ne tabu kwa kawamamohoiei.

22 Matauwuna ede Keliso lupolupodi yo peloweta

13:1 Yesu yona hekahekatao wa numa tabuna bakubakuna unai numadi maudoidi se kaikewaidi. Numadi wa meta weku lakilakidi taditadidi udiyedi se ginaulidi.

13:14 Teina hedehedede ta "Ginauli hesau nuwamatamatausina iya yababa lakilakina tauginaulina" meta Dimdim unai se wane, "the abomination that causes desolation". Hedehedede ta Daniyela yona kulikuli unai hinage ta lobai: Daniyela 9:27, 11:31, yo 12:11 ku hasili.

Iupolupodi kabo se masalaha. Siya kabo hekihekinoi yo laulau gigigibwalidi se ginaulidi na udiyedi bera tamowai se lupohaidi, yo hinage se kaipate Yaubada yona kaisunuwa tamowaidi se lupohaidi.²³ Unai komiu kwa kitahetetenamwanamwaegomiu! Ginali maudoidi ya hededenonohaidiko kalimiuwai!"

Keliso yona uyoma

(Mataiyo 24:29-31; Luka 21:25-28)

24 Na kabo Yesu ye wane, "Kamkamnalakilaki mayadaidi ne gehedi ne unai kabo mahana ye wahuwahuhuli, yo waikena taba nige ye dawayo.
25 Galewa kipwaladi kabo se beku, yo galewa ginaulidi hekadi kabo se tabutabubu.*²⁶ Na tamowai maudoidi kabo Tau Natuna se kita yada unai ye laoma ma gigibwalina yo ma namanamalina.²⁷ Iya yona anelu kabo ye hetamalidi se lau yaumai hasi yodi kabalaoma udiyedi, yo tanoubu yo galewa kadi sigasiga udiyedi kabo yona kaisunuwa tamowaidi se woyagogoidima."

Yesu yona huya'uyoma kaiwa unai ye heyaheyasoniyei

(Mataiyo 24:32-35; Luka 21:29-33)

28 Na kabo Yesu ye wane, "Kaiwa* heyaheyasonina hedehededeni ne kwa kitalau unai. Huyana lagadi ne udiyedi se bwagu, kabo lugudi se laukaladi, meta kwa nuwatui yaikini huyana ye lage.²⁹ Doha hinage, huyana teina ginali maudoidi ta kabo kwa kitadi se tubu, meta kwa nuwatui Tau Natuna yona huya'uyoma mayadaina* ye hanahanaumako numa kawakedana unai.³⁰ Ya hededemamohoi! Teina isi ta taba nige ye gehe, ye lau ee teina ginali maudoidi ta se tubu.³¹ Galewa yo tanoubu kabo se gehe, na yogu hedehedede ta taba nige kana siga."

Bena ta nonononoha!

(Mataiyo 24:36-44)

32 Na kabo Yesu ye wane, "Mayadaina yo mahana* ne nige hesau kabina ye kata. Galewa aneludi yo

Natuna hinage nige kabina se kata, na Tamana ye bom mo.³³ Komiu bera kwa kitamwanamwa yo kwa nonononoha, matauwuna mahanana ne nige kabina kwa kata.³⁴ Nuwatu ta heyaheyasonina meta doha teina: Tamowai hesau yona numa ye laugabaei ye lau magai kedaloaloha unai. Yona heyayai tauhaidi ye toledi yona numa se kitahetete. Hesau to hesau yodi gigibwali yo yodi paisowa ye moseidi, na keda taukitaheteteni ye hededenau unai bera ye silasilawa.³⁵ Unai komiu, huya maudoina kwa silasilawa, matauwuna numa tanuwagana yona huya'uyoma nige kabina kwa kata, nuwana kabo meimeilahi, o boniyai duwaduwalina, o pwaole se doudou, o malatomtom gagilina unai.³⁶ Yona uyoma ne unai tabu bera ye lobraigomiu kwa kenokeno.³⁷ Hedechedede ta ya hedede kalimiuwai yo tamowai maudoidi udiyedi ya hededenau ya wane, 'Bera kwa silasilawa yo kwa nonononoha!' "

Diis babadadiyao se koitalaliu idohagi bera Yesu se unui

(Mataiyo 26:1-5; Luka 22:1-2; Yowane 11:45-53)

14 Mayadai labui mo na kabo Taukiuli* yo hinage Pwalawa Nige Yistina*. Henuwaisinidi, na taukaitalasam tauwoyaidiyao yo laugagayo taulauhekata keda se wasenei meta kailupo sahasahana unai kabo Yesu se hai bera se unuhemwaloi.² Na se wane, "Tabu henuwaisini mayadaidi ne unai, madai boda se luluida."

Waihiu hesau Yesu ye heyausi Betaniya unai

(Mataiyo 26:6-13; Yowane 12:1-8)

3 Tenem huyana ne Yesu Betaniya unai. Simona hesana hesau Taulepela yona numa unai se kaikaigogo. Na waihiu hesau ye laoma yausi panepanena pakuna alabasata* unai se ginali ye bahei. Yausi panepanena wa nadi* unai se ginali yo maisana ye lakikalili. Waihiu wa yausi pakuna wa kabo gadona ye kesihai na yausi wa ye ini Yesu kuluna unai.

13:25 Aisaiya hinage nuwanuwatudi ta ye hededeneloweta. Aisaiya 13:10 yo 34:4 ku hasili.

13:28 Kaiwa ne Yesu ye hedede meta fig.

13:29 Tau Natuna yona huya'uyoma mayadaina: Teina hedehedede ta nige ye masalaha kalina Giliki unai, na ka kulihemasalaha matauwuna nuwanuwatu ta unai Yesu ye hedehedede. Tausonoga hekadi se nuwatui teina hedehedede ta kaniyona ede tanoubu yona huyagehe ye hanahanaumako.

13:32 Tanoubu ta yona huyagehe Mayadaina yo mahana: Iya ede tanoubu ta yona huyagehe yo Yesu yona huya'uyoma mayadaina yo mahana. Lausoiso 29 yo 31 ku hasili.

14:1 Taukiuli Henuwaisinina meta Dius tamowaidi nuwadi se uyo idohagi Dius kadi mumugao Yaubada ye yailihaidi huyana Aikupito se heyaheyaliyedi. Tenem huyana wa unai Dius yodi numa kesega kesega mamoe natuna bera se koihemwaloi na kwasinadi udiyedi yodi numa kedadi kadi duu udiyedi se hesaudi. Hesa taukiuli kaniyona meta Yaubada yona taukai'unu aneluna wa numa kedadi duudi udiyedi kwasina se hesaudi kabo ye taukiulidi. Na numa duudi udiyedi nige kwasina meta wawayao loheloheyao yo suisui natudiyo bagubagunadi anelu wa kabo ye unuhemwaloidi (Esodo 12 ku hasili). Tenem Taukiuli Henuwaisinina wa bolimai badobado se ginaginali Yelusalema unai. Numa kesega kesega mamoe natuna se bahelaei numa tabuna unai se kaitalasam. Taukaitalasam mamoe momonadi se gabudi yo kwasinadi se inidi kabakaitalasam unai. Na kabo numa kesega kesega yodi mamoe mwalomwaloidi wa se bahelaei yodi numa udiyedi, maudoudoina se gabu na se kai Taukiuli Henuwaisinina meimeilahina ne unai.

14:1 Pwalawa Nige Yistina meta iya henuwaisini udoi. Huyana Dius bera kabo Aikupito se laugabae na nige mahana gonowana bera pwalawa yisti unai se hebwalni na kabo se gabu ede pwalawa gaibu se gabu na se kai. Taukiuli Henuwaisinina yo Pwalawa nige Yistina Henuwaisinina bolimai badobado se ginalidii Yelusalema unai. Hesau ye gehe, mulina ne unai, hesau. Unai se hemala henuwaisini kesega. Taukiuli mamoe wa mayadai bagubagunana meimeilahina unai se kai. Na kabo Pwalawa nige Yistina Henuwaisinina ne ye lau ee mayadai haligigi-labui kabo ye gehe. Tenem huyana ne unai Dius kabo pwalawa nige yistina ye bom mo se kai doha kadi mumugao huyana Aikupito se wasabugabaei na laulauna wa.

14:3 Alabasata meta weku kana kao namwamuyomuyouna posiposina yo yogeyogena, unai paku se tadidi. Tenem paku ne meta maisadi se lakikalili.

⁴ Na tamowai hekadi se koipili, unai se gadigadigugu se wane, "Matauwuna saha to yausi ne ye kaiheyai?"
⁵ Taba ye lokunei, denali badodi 300* ye haidi, kabo ye mosedi tamowai dehadehadi yodi." Na waihiu wa se dilai. ⁶ Na Yesu ye wane, "Waihiu me kwa Kitagabae! Ye saha to kwa kitaheyababa? Iya laulau namwanamwana ye ginauli kaliguwai. ⁷ Huya badobado tamowai dehadehadi kabo maiyamiu, unai huya hekadi kabo kwa nuwatuidi na kwa kainauyaidi. Na yau, huya badobado taba nige yau maiyamiu. ⁸ Laulau saha kalinawai wa ye ginauli na ye namwa. Taugu ye heyausi na ye kabinonohai yogu huyabaita hesabana. ⁹ Ya hededemamohoi: Kabo ewaneliya ta se lauguguyaei tanoubu ye tauhetakikili unai, na teina waihiu ta saha ye ginauli wa kabo hinage se hedehededei, iya kabanuwanuwaituina."

Yudasi Isakaliyota Yesu kana ye walohai

(Mataiyo 26:14-16; Luka 22:3-6)

¹⁰ Na kabo Yudasi Isakaliyota, iya Saudoudoi-labui wa hesau, kabo ye lau taukitalasam tauwoyaidi udiyedi bena Yesu kana ye walohai. ¹¹ Siya yona hedehedede se lapui meta se gwauyala, na se hededehehesunuma kabo moni yona se mosei. Unai yona kabikabina kedana ye wasenei idohagi kabo Yesu ye moselaei udiyedi.

Yesu yona hekahekatao Taukiuli kaina se kabinonohai

(Mataiyo 26:17-19; Luka 22:7-14)

¹² Na kabo Pwalawa Nige Yistina Henuwaisinina mayadaina bagubagunana unai Dius yodi laulau bena Taukiuli mamoea se kaitalasamyei, unai Yesu yona hekahekatao se henamaiyei se wane, "Haedi kabo kada Taukiuli kaina ka kabinonohai?" ¹³ Unai yona hekahekatao labui ye hetamalidi se lau Yelusalema, na ye hededelau udiyedi ye wane, "Komiu kwa lau magai ne unai, kabo tau hesau waila pakuna ye bahebahei kabo kwa lobai. Iya kwa hemuliwatani ¹⁴ ee ye mwalaesae numa hesau unai. Temeta numa ne tanuwagana kabo kwa henamaiyei kwa wane, 'Tanusaga taumana dahalana ye henamaiyei bera unai maiyana hekahekatao Taukiuli kaina se kai.' ¹⁵ Iya kabo numa heisi helabuina unai dahala lakilakina hesau ye hekitagomiu. Dahala ne meta kabatuli yo tebolo udiyedi se kabinonohaiyako. Na metai kabo kada kwa kabinonoha." ¹⁶ Yona hekahekatao se lau magai wa unai se lage, na Yesu yona hedehedede wa se hemamohoiyei. Unai kabo Taukiuli kaina wa se kabinonohai.

Yesu kana tauwalohai ye hededenonohai

(Mataiyo 26:20-25; Luka 22:21-23; Yowane 13:21-30)

¹⁷ Meimeilahina ne unai Yesu maiyana Saudoudoi-labui wa se lagelau numa wa unai. ¹⁸ Siya sola ma kaikaidi na Yesu ye hededelau udiyedi ye wane, "Ya hededemamohoi! Luwamu ta unai hesau maiyagu ka kaikaikesega, iya kabo kagu ye walohai." ¹⁹ Siya kabo se nuwayababakalili na kesega kesega Yesu se henamaiyei se wane, "Nuwana yau?" ²⁰ Na ye hededelau udiyedi ye wane, "Iya meta Saudoudoi-labui ta luwamu ne unai. Tamowaina ede maiyagu kama pwalawa ka hedakwadobiyei gaeba kesega unai. ²¹ Tau Natuna kabo ye boita doha se kulyako wa. Na yababa mo kabo ye talu Tau Natuna kana tauwalohaina ne unai. Taba ye namwa mo iya tabu se labasi."

Yesu yona hekahekatao maiyanao yodi kaikaigogo gehegehena

(Mataiyo 26:26-30; Luka 22:15-20; 1 Kolinito 11:23-25)

²² Sola ma kaikaidi na Yesu pwalawa ye hai, Yaubada ye lautokiyei,* na kabo pwalawa wa ye kihi na ye mosedi yona hekahekatao kalidiwai na ye wane, "Kwa hai na kwa kai! Teina ta yau taugu." ²³ Na kabo waina kaputina hinage ye hai, Yaubada ye lautokiyei, na ye mosei kalidiwai. Na maudoidi unai se numagogoi. ²⁴ Na Yesu ye wane, "Teina ta yau kwasinagu ye bwalili tamowai maudoidi hesabadi. Kwasinagu unai Yaubada yona talam hauhauna* ye hemamohoiyei yona tamowai udiyedi. ²⁵ Ya hededemamohoi: Wine masina taba nige ya numa'uyoi ye lau ee Yaubada yona basileiya unai kabo waina hauhauna ya numa'uyoi."

²⁶ Kabo wana hesau se wanai yo Yaubada se hedebasaei, na kabo se dahalai se lau Olibe koyana unai.

Yesu Petelo yona uhala ye hededenonohai

(Mataiyo 26:31-35; Luka 22:31-34; Yowane 13:36-38)

²⁷ Kabo Yesu ye hededelau yona hekahekatao udiyedi ye wane, "Maudoimiu kabo kwa laugabaegau, matauwuna Yaubada ye hededyako Buka Tabuna unai ye wane,

'Mamoe taukitahetetedi kabo ya unuhemwalo, unai kabo yona mamoe se tatagwalingwali.'

(Sakaliya 13:7)

²⁸ Na yogu tolo'uyo mulina ne unai kabo ya bagunaegomiu ya lau Galili." ²⁹ Na Petelo ye hededelau Yesu unai ye wane, "Nuwana maudoidi kabo se laugabaego, na yau taba nige." ³⁰ Yesu ye hededelau unai ye wane, "Ya hededemamohoi! Teina boniyai ta unai kabo ku uhalaegau ma haiyona, na

^{14:3} Nadi meta yausi panepanenamwanamwana. Teina yausi ta meta pasa hesau lamna masina unai se ginauli. Pasa hesana meta nadi, teha India yo Nepal yo China udiyedi ye kinikini.

^{14:5} Denali badodi 300 meta taupaisowa bolimai kesega ye paisowa maisana meta moni lakilakikalilina.

^{14:22} Kalina Giliki unai hedehedede ta kaniyonha hesau meta ye hedehedehenamwa.

^{14:24} Talam hauhauna kalina Dimdim unai se hedede "new covenant".

kabo pwaole hakiyana ye dou helabuina.”³¹ Na Petelo ye hedehedebayao ye wane, “Ena yau maiyam kabo ta boita, taba nige ya uhalaego.” Na yona hekahekatao maudoidi wa yodi hedehedede kesega.

Yesu Getesemani unai ye tapwalolo

(Mataiyo 26:36-46; Luka 22:39-46)

³² Na kabo se lage teha hesau unai hesana ede Getesemani, na Yesu ye hedehedelau yona hekahekatao udiyedi ye wane, “Teinai kwa babawa, na ya lau ya tapwalolo.”³³ Petelo, Yamesi yo Yowane maiyanao se lau na kabo ye hetubu ye nuwakamkamna yo nuwana ye dagugu.³⁴ Na ye wane, “Ya nuwadubukalili. Teinai kwa miyamiya na kwa silasilawa!”

³⁵ Yesu ye tausigilau na ye gulidobi bwatano unai ye talu na ye tapwalolo taba kamkamna mahanana ne tabu ye hekalo.³⁶ Na ye wane, “Aba,* Tamagu, kowa gonowam ginauli maudoidi ku ginaulidi. Teina kamkamna kaputina ta ku lahesuwala. Iyamo yogu nuwanuwatu ta tabu ku ginauli, na kowa yom nuwanuwatu mo ku ginauli.”³⁷ Na kabo Yesu ye uyoma ye lobaidi wa ma kenodi. Na ye hedehedelau Petelo unai ye wane, “Simona, nige gonowana awa kesega ku silasilawa?”³⁸ Kwa silasilawa na kwa tapwatapwalolo, kabo taba nige kwa yababa ena noho kwa hekalo. Yaluwami se yali bena ginauli namwananamwadi se ginaulidi, na taumi se basabasa.”

³⁹ Yesu kabo ye uyo ye tapwalolo na yona kaibwada wa kesekesegana mo.⁴⁰ Na ye uyoma ye lobaidi meta se kenoko, matauwuna ede kamnadi se yababakalili. Na nige kabina se kata kabo saha se hedede iya unai. Na kabo Yesu ye uyo ye tapwalolo'uyo.*

⁴¹ Na hehaiyonana unai Yesu ye uyoma na ye hedehedelau udiyedi ye wane, “Komiu sola ma kenomiu yo kwa kaikaiyawasi? Nabada! Huya wa ye lageko! Tamowai hesau kabo kwa kita Tau Natuna ye mosegabaei yababa tamowaidiyao nimadiyena.⁴² Kwa tolo na ta lau! Kagu tauwalohai wa ye laolaoma.”

Yudasi Yesu ye moselae Dius babadadiyao yodi tau'iyla udiyedi

(Mataiyo 26:47-56; Luka 22:47-53; Yowane 18:3-12)

⁴³ Yesu ma hedehededen, na Yudasi—iya Saudoudoilabui wa hesau—bodalakilaki maiyanao se laoma. Siya taukitalasam yo laugagayo taulauhekata yo tamowai lakilakidi se hetamalidi se lau ma kelekelepadi yo ma kebukebubulidi.

⁴⁴ Bagubaguna tauwalohai wa hekihekinoi ye hededehebasibanonohaidi ye wane, “Tamowai ya

simtai ne meta iya. Kwa hai na kwa woyahesulanamwanamwaei.”

⁴⁵ Yudasi kabo ye dudulai ye lau Yesu unai na ye wane, “Tunuwaga!”, na ye simtai.⁴⁶ Na kabo boda wa Yesu se kabihekahini na se hai.⁴⁷ Na tamowai hesau Yesu maiyana se totolo wa kelepa ye niusi na ye heguli ede taukitalasam saesaena yona heyayai tauhaina hesau beyana ye bolihai.

⁴⁸ Yesu ye hedehedelau boda wa udiyedi ye wane, “Yau doha taukaikaigahu, na kelebesigau hesabana kwa laoma meta ma kelekelepamu yo ma kebukebubulimi? ⁴⁹ Yau maiyamiu mayadai badobado ta miyamiya yo numa tabuna bakubakuna unai ya laulauhekata, na nige menai kwa unuigau. Na saha se kuliyako Buka Tabuna unai, kabo ye laoma ye hemamohoiyei.”

⁵⁰ Na Yesu yona hekahekatao maudoidi wa se laugabaei na se wasabugwalgwali.⁵¹ Hewali hesau temenai, kaleko maisa lakilakina ye likwa na iya Yesu ye hemuhemuliwatani. Iya hinage bena se kabihekahini,⁵² na kana kaleko wa nimadiwai se kabikabi, na iya ma taugaibuna ye wasabu.

Sunedeli Yesu se helauhetala

(Mataiyo 26:57-68; Luka 22:54-55, 63-71; Yowane 18:13-14, 19-21)

⁵³ Na kabo Yesu se woyai se laei taukitalasam saesaena yona numa unai. Menai taukitalasam tauwoyaidi, tamowai lakilakidi yo laugagayo taulauhekata maudoidi se koigogo.⁵⁴ Boda wa dageladi unai Petelo ye laoma ede ye mwalaesae taukitalasam saesaena yona numa wa bakubakuna unai. Menai taukitalasam saesaena yona taupaisowa tamowaidi maiyanao se tuligogoi, na Petelo kaiwa unai ye kaimwaiga.

⁵⁵ Na kabo taukitalasam tauwoyaidi yo Sunedeli* maudoidi Yesu kana mata se wasenei bena se unuhemwaloi. Na nige kana mata saha hesau se lobai.

⁵⁶ Tamowai hekadi se hedehedelupolupo na Yesu se hegilu, na yodi hedehedede wa nige kesega.⁵⁷ Na kabo hekadi se tolo Yesu kana gilu se hedehedelupolupo na se wane,⁵⁸ “Iya doha teina ye hedede na ka lapui ye wane, ‘Teina numa tabuna tamowai nimadiyena se ginauli ta, kabo ya koigwaligwali, na mayadai haiyona mulidi ne unai kabo hesau ya hetolo'uyoi nige doha tamowai nimadiyena se ginauli.’”⁵⁹ Na yodi hedehedede wa gonogonowana mo nige kaniyodi.

⁶⁰ Na kabo taukitalasam saesaena wa ye tolo matadi wa unai na Yesu ye henamaiyei ye wane, “Kowa nige kalinam? Maudoidi ne yodi hedehedede ku lapuidiko

14:36 Aba kalina Alamaiki unai ede “tamagu”. Iya Yesu kalinana.

14:40 Na kabo Yesu ye uyo ye tapwalolo'uyo: Hedehedede ta ka kulitubei matauwuna kalinadaena ena wasa ta hasili meta taba tamowai yodi kabikabi maudoidi ta hasilihegehehi.

14:55 Sunedeli meta Dius yodi boda saesaekalilina. Boda ta kadi tanuwaga meta taukitalasam saesaena. Teina boda ta luwana ne unai meta boda haiyona: (1) taukitalasam tauwoyaidi, (2) tamowai lakilakidi, yo (3) laugagayo taulauhekata. Teina boda ta luwana ne unai meta tautolo badodi 71. Siya dubu pilipilidiyao tauhedudulaidi. Doha ta wane, huyana taba hesau ye lauhekata, siya kabo se hekasia meta yona lauhekata ne ye namwa o ye yababa. Yo huya hekadi Loma yodi gabana gigibwali ye mosedi bena laulau yababadi hekadiya tauginaulidi se helauhetaladi, doha taukaiwahali yo tauhaikabi.

na nige gonowana ku hededebui?"⁶¹ Na Yesu ye mwanomwanou na nige saha hesau ye hedede. Taukaitalasam saesaena kabo ye henamai'uyo ye wane, "Kowa Keliso, Saesae Kalilina natuna wa?"⁶² Kabo Yesu ye hededebui ye wane, "Yau Kelisona ede. Na Tau Natuna kabo kwa kita Gigigibwali Kalilina nima tuutuuna unai ye tutuli yo hinage galewa yadadi udiyedi ye laoma."⁶³ Taukaitalasam saesaena wa ye bom kabo kana kwama ye pulisi'uyoi na ye wane, "Taba nige kana mata hesau ta wasenei'uyoi!"⁶⁴ Maudoimiu kwa lapuiyako iya Yaubada ye hededeyababai. Na yomi hineli doha saha?" Na maudoidi se talam meta iya yababa ye ginauli, unai taba ye boita.⁶⁵ Na kabo hekadi iya se kaikaisoi yo matana se suma kabo nimadi se nokudi na se biteli na se wane, "Hage, ku hededehemasalah kaiteya ye biteligo?" Na kabo taukaitalasam saesaena yona taupaisowa Yesu se hai na hinage se biteli.

Petelo Yesu ye uhalaei

(Mataiyo 26:69-75; Luka 22:56-62; Yowane 18:15-18, 25-27)

⁶⁶ Petelo sola numa bakubakuna wa unai na taukaitalasam saesaena yona heyayai tauhaina waihiuna hesau ye laoma.⁶⁷ Na Petelo ye kita ye kaikaimwaiga ede ye kitinanwanamwaei na kabo ye hededelau unai ye wane, "Kowa hinage Yesu Nasaleta tamowaina wa maiyam."⁶⁸ Na Petelo ye uhala ye wane, "Saha ku hedehedede me nige kalikalili kabina ya kata." Na kabo ye sigilau gana kawamatana dedekanawai na pwaole hakiyana ye dou.⁶⁹ Na temenai heyayai tauhaina waihiuna wa ye kita'uyoi ede ye hededelau tautotolo wa udiyedi ye wane, "Teina tamowai ta meta siya kadi kaha hesau."⁷⁰ Na iya ye uhala'uyo. Huya kubwakubwa mo kabo tautotolo temenai wa se hededelau unai se wane, "Mamohoi, kowa kadi kaha hesau, matauwuuna kowa Galili tamowaina."^{*}⁷¹ Petelo kabo ye bom ye kawagulai'uyoi na ye kaigwala ye wane, "Temeta tamowai me yau nige kabina ya kata."⁷² Na kabo pwaole hakiyana ye dou helabuina. Mahanana ne unai Yesu yona hedehedede wa Petelo nuwana ne unai ye sae, doha teina, "Kabo ku uhalaegau ma haiyona, na kabo pwaole hakiyana ye dou helabuina." Unai nuwana ye kamkamnakalili na ye doumwalomwaloi.

Yesu se hetolo Pilato matana unai

(Mataiyo 27:1-2,11-14; Luka 23:1-5; Yowane 18:28-38)

15 Malatomtom gagilina unai taukitalasam tauwoyaidi maiyadi tamowai lakilakidi,

laugagayo taulauhekata yo Sunedeli maudoidi nuwatu kesega se kawanamwanamwaei. Na kabo Yesu nimana se paidi na se woyahai se laei se moselaei Pilato* unai.² Pilato Yesu ye henamaiyei ye wane, "Kowa Dius tamowaidi yodi wasawasa wa?" Yesu ye hededebui ye wane, "Mamohoi, saha ku hedede me iya ede."³ Na kabo taukitalasam tauwoyaidi yodi hedehedede maudoidi udiyedi Yesu se hegihu.⁴ Unai Pilato Yesu ye henamai'uyoi ye wane, "Kowa nige kalinam? Siya hedehedede maudoidi udiyedi se hegilugo."⁵ Yesu nige saha hesau ye hedede, unai Pilato ye nokokalili.

Dius se henuwa bena Yesu ye boita

(Mataiyo 27:15-26; Luka 23:13-25; Yowane 18:39-19:16)

⁶ Bolimai badobado Taukiuli Henuwaisinina huyana unai Pilato yona laulau meta taba Dius tamowaidi numatutugudu tamowaina hesau se kaibwadai kabo ye yailigabaei.⁷ Tenem huyana ne unai taukai'unu hesau hesana Balabasi numatutugudu unai ye miyamiya. Iya ma kana kahao maiyadi gabemani se haikabi, na tamowai hekadi se koihemwaloidi.⁸ Bodalakilaki se lagegogo Pilato unai na se kaibwadai bena Taukiuli Henuwaisinina unai na laulau saha ye ginaginali wa bena ye ginauli.⁹ Pilato ye henamaiyedi ye wane, "Kwa henuwa bena Dius yodi wasawasa ya yailigabaei kalimiuwai?"¹⁰ Na ye henamaiyedi, matauwuuna ye nuwatulobaiyako meta taukitalasam tauwoyaidi Yesu se kaikalomagigiliyei na debanawai se moselaei iya unai.¹¹ Taukitalasam tauwoyaidi boda se henuwasaedi na se kaibwada Pilato unai bena Balabasi ye yailigabaei.¹² Na Pilato ye henamaiyedi ye wane, "Saha kabo ya ginauli Dius yodi wasawasa ta unai?"¹³ Na se yogasae se wane, "Ku hesatauloyawa!"¹⁴ Pilato kabo ye henamai'uyoi ye wane, "Matauwuuna saha? Yababa sahasahana ye ginauli?" Siya kabo se yogalakilaki se wane, "Ku hesatauloyawa!"¹⁵ Pilato ye henuwa bena boda wa ye henuwanamwadi, unai Balabasi ye yailigabaei. Na kabo ye hedede yona iyala tamowaidi Yesu se pidili wipi* unai na mulinaena kabo ye moselaei na se hesataulo.

Iyala tamowaidi Yesu se talatalawasiyei

(Mataiyo 27:27-31; Yowane 19:2-3)

¹⁶ Na kabo iyala tamowaidi Yesu se woyalaei Pilato yona numa bakubakuna unai,* na kadi kahao se yogagogoidima.¹⁷ Siya kabo kwama pulupululuna kana kao doha wasawasa kana kwama se baheiyama na Yesu se heluwui na kaiwa gwaligwalina unai peyaula* se hei na se henabai.¹⁸ Na se laulautokiyei

^{14:70} Kulikuli beyabeyadi hisa mo lausoisoi 70 gehegehena ne se kuli doha teina: "kowa Galili tamowaina, yo hinage kalinam iu kesega."

^{15:1} Pilato meta Loma yodi gabemani se tole iya Yudeya yodi gabana, na iya Loma tamowaina.

^{15:15} Wipi unai Yesu se pidili wa meta suisui dahina unai maina se boldili na siliya yo pawati matamatadiyao se hepatudi maina wa udiyedi na maina gwaudi udiyedi wipi se pai. Na wipina ne unai tamowai se pidili meta ye kamkamnakalili.

^{15:16} Pilato yona numa bakubakuna meta tau'iyala yodi kabamiya.

^{15:17} Peyaula meta wasawasa o tamowai lakilakidi kadi hati or kuludi kadi pasa.

se wane, "Dius yodi wasawasa miyamiyahaina, yauwedo!"¹⁹ Kuluna ne didiyali unai se pidili, yo se kaikaisoi, na se tulibono iya talanuwana ne unai na se talatalawasiyei.²⁰ Se talawasikaiyawasi kabo kwama pulupululuna wa se haigabaei na kana kwama wa se helikwa'uyoidi. Na kabo se woyalaei Yelusalema dagelanawai na se hesataulo.

Yesu se hesataulo

(Mataiyo 27:32-44; Luka 23:26-43; Yowane 19:17-27)

²¹ Yelusalema se hetubu bena se laugabaei na tamowai hesau hesana Simona se lobai koya unai ye uyoma. Iya Sailini tamowaina, Alekisenda yo Lupuso tamadi. Iyala tamowaidi wa Simona se lauhelili Yesu yona sataulo ye bahei.²² Yesu se woyai se laei teha hesau hesana Golagota, kaniyona ede "mwayalu magaina".²³ Kabo mulo* yo waina se hebwalikesegaidi na se mosei bena ye numa, na ye laukwatakawata.²⁴ Na kabo se hesataulo.

Tauhesataulona wa Yesu yona kaleko se hinelidi, na se kaiheyaidi kaiteya kabo yona saha ye hai.

²⁵ Malatomtom awa hehaligigi-hasina unai Yesu se hesataulo.²⁶ Yodi kabahegiluna hedehededenwa se kuli molumolu* hesau unai na se pawatisae kulubawana wa unai. Kulikuli wa doha teina, "Dius yodi wasawasa."²⁷⁻²⁸ Taukaiwahali labui se hesataulodi iya maiyanao. Hesau kahatuna unai na hesau seuseulina unai.*²⁹ Keda unai tamowai se sae yo se dobi na se hagahagasiyei yo se kulukulukwadei na se wane, "Kamokisa! Kowa bena numa tabuna tausokegwaligwalina, na mayadai haiyona unai kabo ku hetolo'uyoi wa!³⁰ Hage, ku henamwanamwa'uyoigo na ku pesadobima!"³¹ Yo hinage taukitalasam tauwoyaidi yo laugagayo taulauhekata iya se talatalawasiyei se wane, "Tamowai hekadi ye henamwanamwadi, na nige gonowana ye bom ye henamwanamwa'uyoi!³² Teina Keliso ta, iya Dius yodi wasawasa, taba sataulo ne unai ye pesadobima, kabo ka kita yo ka kawamamohoiyei." Tamowai labui maiyanao se hesataulodi wa Yesu hinage se hagahagasiyei.

Yesu ye boita

(Mataiyo 27:45-56; Luka 23:44-49; Yowane 19:28-30)

³³ Mayamayadailaki unai magai wa maudoina ye masigili ye lau ee meimeilahi awa haiyonana unai.

³⁴ Mahanana ne unai Yesu ye yoga ma kalina lakilakina ye wane, "Eloi, eloi, lama sabatani?",

kaniyona ede, "Yogu Yaubada, yogu Yaubada, idohagi to ku nuwagabaegau ta?"³⁵ Na tautotolo hekadi dedekana unai, kalinana se lapui ede se wane, "Kwa lapui! Iya Eliya ye yogayoganei."³⁶ Tamowai hesau ye heloi ye lau balo ye hedakwa winega unai, na ye paihepatu didiyali unai, na kabo ye helelesae Yesu unai bena ye numa, na ye wane, "Hage ta kita kabo Eliya ye laoma na ye toledobiyei."³⁷ Yesu ye yoga ma kalina lakilakina, na kabo yawasina ye pito.

³⁸ Tenem mahanana ne unai meta numa tabuna unai woyo kalekona* ye tapulisilabuiyei kewa unai ye dobi guni.³⁹ Iyala tamowaidi kadi tanuwaga* Yesu yona sataulo wuwuna ne unai ye totolo, kalinana ye lapui yo ye kita idohagi ye boita, unai ye wane, "Mamohoi, teina tamowai ta iya Yaubada natuna!"

⁴⁰ Waiwaihiwo hekadi kedalohawai se kitakitalau. Luwadi ne unai meta Maliya, Magadala waihiuna, yo Maliya Yamesi gagilina maiyana Yose sinadi, yo Salome.⁴¹ Huyana Yesu Galili unai meta se hemuliwatani yo se kitahetete. Yo waiwaihiwo gwaudi Yesu maiyanao se saema Yelusalema wa, siya hinage temenai.

Yosepa Yesu ye tole bwayabwaya unai

(Mataiyo 27:57-61; Luka 23:50-56; Yowane 19:38-42)

⁴²⁻⁴³ Yelusalema unai Alimatiya tamowaina hesau hesana Yosepa. Iya Sunedeli kadi boda saesaena hesau yo Yaubada yona basileiya ye nayanayai. Yesu yona huyaboita mayadaina ne meta Sabati kabinonoha mayadaina.* Mahana ye duitalu na sola kabo Sabati hekasisina ye hetubu na Yosepa ma nuwabyaona ye lau Pilato unai na Yesu tauna ye kaibwadai.⁴⁴ Yesu yona boita wa wasana Pilato ye lapui meta ye siliyata na nige ye kawamamohoi. Unai iyala tamowaidi kadi tanuwaga wa ye yoganei na ye henamaiyei.⁴⁵ Pilato hedehedede wa ye lapui meta mamohoi, unai Yesu tauna ye talamgabaei kabo Yosepa ye hai.

⁴⁶ Yosepa kabo kaleko maisana lakilakina ye hemaisa na kabo ye lau Yesu tauna ye taluhidobiyei na kaleko wa unai ye suma, na ye tole bwayabwaya* unai. Na kabo weku lakilakina ye builae bwayabwaya duhana wa ye buigudui.⁴⁷ Maliya Magadala waihiuna maiyana Maliya Yose sinana se kita haedi Yosepa Yesu tauna ye tole.

15:23 Mulo meta kaiwa hesau masina. Unai yausipanepane se ginauli, yo hinage se hepaisowa kamkamna kabahenkaiyawasina mulamulana hesau.

15:26 Molumolu meta Saliba kalinadi, huya bagubagunana unai se hepaisowa. Molumolu meta kaiwa o timba tehana.

15:27-28 Kulikuli beyabeyadi hisa mo lausoiso 28 se kuli: *Na teina saha se ginauli ta meta peloweta ye kulyako wa ye wane, "Yodi kabikabina meta doha iya yababa tauginalina hesau."* (Aisaiya 53:12)

15:38 Teina woyo kalekona ta tamowai ye guduguduidi bena tabu se mwalamwalesae teha tabukalilina unai.

15:39 Tau'iyala kadi tanuwaga meta Apostolo 10:1 unai ka kuli sentuliyo. Lausoiso ne unai hinage hedehedemasalahana ku hasili.

15:42-43 Dius yodi Sabati meta Palaide meimeilahina awa haligigi-kesega unai ye hetubu, ye lau ee Satade awa haligigi-kesega meimeilahina unai.

15:46 Isalaela unai yodi bwayabwaya meta weku duhadzi se tadidi.

Yaubada Yesu ye hetolo'uyoi

(Mataiyo 28:1-8; Luka 24:1-12; Yowane 20:1-10)

16 Sabati mayadaina gehena unai Maliya Magadala waihiuna, Maliya Yamesi sinana, yo Salome se lau yausi panepanedi se hemaisadi bena kabo Yesu se heyausi. ² Mayadai bagubagunana malatomtomna mahana ye dalasae kabo se dahalai se lau Yesu bwayabwayana unai. ³ Na se bom se henahenamai'uyoidi se wane, "Bwayabwaya kawamatana unai weku wa kabo kaiteya ye buihai?" ⁴ Na se kitalau bwayabwaya guduna weku lakilakina wa se kita meta kawamata wa dedekanawai. ⁵ Na kabo se lusae bwayabwaya kalona wa unai na hewali hesau se kita meta se matausi. Kana kwama posiposina na ye tutuli tehakahakahatu unai. ⁶ Na ye hededenlau udiyedi ye wane, "Tabu kwa matausi! Yesu Nasaleta tamowaina se hesatauloyako wa kwa wasewasenei. Yaubada ye hetolo'uyoiyako, unai iya nige inai. Sola kabatolena wa kwa kita, iya nige inai. ⁷ Na kwa lau yona hekahekatao yo Petelo yodi kwa hedehedede kwa wane, 'Yesu kabo ye baguna ye lau Galili. Temenai kabo kwa kita doha ye hededenonohaiyako.' " ⁸ Waiwaihiwo wa se matausikalili yo se tabutabubu, unai bwayabwaya wa se pesagabae na se wasabu se lau. Na nige tamowai hesau yona se hedehedede, matauwuna ede se matausikalili.*

Yesu ye taumasalahi Maliya Magadala waihiuna unai

(Yowane 20:11-18)

⁹ Mayadai bagubagunana malatomtom gagilina unai Yesu ye tolo'uyo na ye taumasalahabagna Maliya Magadala waihiuna unai. Nabada wa unai yaluwa yababayababadi haligigi-labui Yesu ye hededehepesadi waihiuna ne unai.

¹⁰ Maliya kabo ye lau Yesu yona hekahekatao wa yodi ye hedehedede. Siya meta sola ma nuwadubudi yo ma doudoudi. ¹¹ Na wasa wa se lapui meta Yesu ye tolo'uyoko yo Maliya Yesu ye kitayako, na iyamo nige se kawamamohoiyei.

Yesu ye taumasalahi tauhemuliwatanina labui udiyedi

(Luka 24:13-35)

¹² Na kabo Yesu kana kao udoi unai ye taumasalahi tauhemuliwatanina labui udiyedi huyana se laulau magai hesau unai. ¹³ Siya kabo se uyo Yelusalema unai kadi kahao yodi se hedehedede, na hinage nige se kawamamohoiyedi.

Yesu ye taumasalahi yona hekahekatao wa udiyedi na kabo yodi paisowa ye mosedi

(Mataiyo 28:16-20; Luka 24:36-49; Yowane 20:19-29)

¹⁴ Na huyana Saudoudoi-kesega wa ma kaikaidi kabo Yesu ye taumasalahi udiyedi. Na ye dilaidi, matauwuna se nuwakwailolo yo nige se kawamamohoi taukitana wa udiyedi. ¹⁵ Na ye hededenlau udiyedi ye wane, "Kwa lau magai maudoidi kaiaulina ta unai na Yaubada yona wasa namwanamwana kwa lauguguya tamowai maudoidi kalidiwai. ¹⁶ Kaiteya ye kawamamohoiyeigau yo se hebabatisoi, Yaubada kabo ye hemauli. Na kaiteya nige ye kawamamohoiyeigau, Yaubada kabo ye hekamkamna. ¹⁷ Taukawamamohoiyeigau ne kabo teina laulau ta se ginaulidi Yaubada yona gigibwali unai: Yau hesaguwai kabo yaluwa yababayababadi se hededehepesadi tamowai udiyedi. Yo kalina hekadi nige kabidi se kata kabo udiyedi se hedehedede. ¹⁸ Siya kabo mwata kaikaikalsidi nimadi udiyedi se haidi, yo ena kaikailewa se numa, taba nige se boita. Yo ena nimadi se tolesaedi taukasikasiyebwa udiyedi, kabo se namwanamwa."

Yaubada Yesu ye hai ye sae galewa

(Luka 24:50-53)

¹⁹ Guiyau Yesu yona hedehedede gehena unai meta kabo Yaubada iya ye hai ye saei galewa. Temenai Yaubada nimatutuna unai ye tuli.

²⁰ Yesu yona hekahekatao kabo se lau magai maudoidi se tauhetakikilidi na se lauguguya tamowai maudoidi kalidiwai. Na Guiyau maiyadi, yo yodi lauguguya ye hemamohoiyedi laulau gigigigibwalidi udiyedi.

Yesu wasana Yowane ye kuli wa

Yaubada yona Hedechedede ye hemala tamowai

1 Ginauli maudoidi huyahetubudi unai Yaubada yona Hedechedede wa ye miyamiya, yo Hedechedede wa Yaubada maihana, yo Hedechedede wa ede Yaubada. **2** Ginauli maudoidi huyahetubudi wa unai Hedechedede wa meta Yaubada maihana.

3 Ginauli maudoidi Yaubada ye hetubudi wa iya maihana se hetubudi, yo Hedechedede wa meta ginauli maudoidi tauhetubudi. **4** Iya mauli yona kabalaoma ede, na mauli ne ye hemala tamowai yodi mala. **5** Na mala wa ye sina masigili unai, na masigili nige gonowana ye saedikwai.*

6 Yaubada tamowai hesau ye hetamaliyama, hesana ede Yowane. **7** Iya ye laoma meta mala wa tauhededehemasalahana. Na yona hedehedede debanawai tamowai maudoidi bena se kawamamohoi. **8** Iya nige mala wa, na ye laoma mala wa ye hedehedehemasalahana. **9** Na mala mamohoina kabo ye laoma tanoubu ta unai, na Yaubada kana kao mamohoina ye hedehedehemasalahana tamowai maudoidi udiyedi.

10 Iya Yaubada maihana tanoubu se hetubu, yo ye miya tanoubu ta unai, na iyamo tanoubu ta tamowaidiyo nige se kitalobai. **11** Ye laoma yona tanoubu ye ginauli'usei wa unai, na iyamo yona tamowai wa nige se hailobai. **12** Na kaiteyadi iya se hailobai yo hesana se sunumai, meta dudulai ye mosedi se hemala Yaubada natunao. **13** Na nige labalaba unai, o tamowai yodi gadosisi wai o maitawasola loheya yona nuwatu wai, na Yaubada yona hineli unai se hemala Yaubada natunao.

14 Hedechedede wa ye hemala tamowai, na maiyamai ka miya. Yo kana kao saesaena mamohoina ka kitayako, iya ede Yaubada natukesekesegana mo kana kao saesaena mamohoina. Natu ta meta tamana Yaubada unai ye laoma yo kalinawai kabinamwa yo mamohoina se mwayau.

15 Yowane ma kalina lakilakina ye hedehedehemasalahya ye wane, "Tamowaina ede teina lahinaidi ya hedehedehemasalahayako wa, 'Iya ede dagelagu ne unai kabo ye laoma, iya meta ye saekalili na kabo yau, matauwuwna iya ye tububaguna.'"
16 Iya kalinawai kabinamwa ye mwayau. Na kita maudoida iya unai kabinamwa ta haidi na sola ta haihai'uyoidi. **17** Mose unai laugagayo wa se laoma, na Yesu Keliso unai kabinamwa yo mamohoina se laoma.

18 Sola nige tamowai hesau Yaubada ye kita, na natukesekesegana ye bom mo. Iya meta Yaubada, yo Tamana maihana se kawakeha, yo iya Tamana ye hemasalahayako kalidawai.

Yowane Babatiso ye hedede meta iya nige Keliso

19 Dius tauwoyaidi Yelusalema unai taumiyamiya wa, taukaitalasam yo Lewi tamowaidiyo se hetamalidi se lau Yowane unai na se henamaiyei iya meta kaiteya. Teina ta meta Yowane yona hedehedehemasalah. **20** Iya nige ye uhala na ye hedehedehemasalahayako kalidawai.

21 Na se henamaiyei, "Ena kowa nige Keliso, meta kowa kaiteya? Kowa Eliya?"

Ede ye wane, "Yau nige."

"Nuwana kowa peloweta ka nayanayai'usei wa?"*

Na ye wane, "Nige."

22 Na kabo se wane, "Na kowa kaiteya? Yoma henamai ta buina ku leyama, na kabo ka uyo tauhetamaligai wa yodi ka hedehedede. Taba ku bom ku hedehedehemasalahayako kalidawai."

23 Ede Aisaiya peloweta yona hedehedede unai Yowane ye hedehedebui ye wane, "Yau tamowaina ede tauyogayoga balabala ne unai ya wane, 'Guiau yona keda kwa kabinonohai.'" (Aisaiya 40:3)

24 Kabo Paliseya tamowaidiyo hekadi se hetamalidima wa **25** Yowane se henamaiyei se wane, "Ena kowa nige Keliso, nige Eliya, yo nige tenem peloweta ne, matauwuwna saha to ku hebahebabatiso?"

26 Yowane ye wane, "Waila unai ya hebahebabatiso. Na tamowai hesau meta nige kabina kwa kata ye totolo luwamu ne unai. **27** Iya ede muligu ne unai kabo ye laoma, na yau nige ya namwakalili kabo gonowagu kana buti mainadi ya yailidi."

28 Teina laulau maudoidi ta se tubu Yowane yona kabahebahebabatiso Betaniya, Yolidani hali tanakawasina unai.

Yaubada yona mamoe natuna ede Yesu

29 Na mayadai hesauna unai Yowane Yesu ye kitalaei ye laolaoma hesabana ede ye wane, "Kwa kitalau, Yaubada yona mamoe natuna ye laolaoma. Iya tanoubu yona ba'aya tauhaigabaeina. **30** Teina iya ede lahinaidi ya hedehededei wa ya wane, 'Tamowai hesau yau dagelagu unai kabo ye laoma meta ye saekalili na kabo yau, matauwuwna iya ye tububaguna.' **31** Yau nige ya kitalobai meta iya Keliso.

1:5 Hedechedede kalina Giliki unai se hepaisowa ne kaniyonao labui. Bagubaguna "ye saedikwai", helabuina "kabina ye kata". Unai buka hekadiyo se kulibui doha teina: "na masigili iya nige kabina ye kata."

1:21 Yaubada Dius tamowaidi ye hedehedehemasalahayako kalidawai. Na Yesu yona huya unai meta sola se nayanayai.

Na ya laoma ya hebabatisoigomiu waila unai meta bena iya ya hemasalahalisa laela tamowaidiyao kalimiuwai."

³² Kabo Yowane ye hededehehemasalahalisa ye wane, "Yaluwa Tabuna ya kita doha bunebune galewa ne unai ye dobima, na ye talu iya kewana ne unai.

³³ Iyamo iya meta nige ya kitalobai, na Yaubada ye hetamaligauma waila unai ya hebahebabatiso na ye hededehehemasalahalisa ye wane, 'Tamowai hesau kabo ku kita Yaluwa kabo ye dobima na kalinawai ye talu meta iya Yaluwa Tabuna unai kabo ye hebahebabatiso.' ³⁴ Ya kitayako yo ya hemamohoiyei meta iya Yaubada natuna."

Yesu yona hekahekatao bagubagunadi

³⁵ Mayadai hesauna unai Yowane maiyana hekahekatao labui se totolo Yowane yona kabahebahebabatiso magaina wa unai. ³⁶ Na Yowane ye kaikaikevalau Yesu ye kita ye laulau ede ye wane, "Kwa kita, tenem meta Yaubada yona mamoe natuna!"

³⁷ Yona hekahekatao labui wa yona hedehedede se lapui ede Yesu se hemuliwatani. ³⁸ Na Yesu ye kaikewabui ye kitadi se hemuhemuliwatani, ede ye henamaiyedi ye wane, "Saha kwa henuwa?"

Se hededelau unai se wane, "Labi" (kalina Hebelu unai kaniyona ede Taulauhekata), "haedi ku miyamiya?"

³⁹ Kabo ye hededelau udiyedi ye wane, "Kwa laoma na kabo kwa kita!"

Unai se lau yona kabamiya wa se kita. Na yodi huyalau ne meta meimeilahi mahanana 4 kiloki unai. Na tenem mayadaina ne unai iya maiyadi se miya.

⁴⁰ Simona Petelo kana kaha Andeleya, iya Yowane yona hekahekatao labui wa hesauna, na Yowane yona hedehedede wa ye lapui ede Yesu ye hemuliwatani.

⁴¹ Na kabo Andeleya ye lau kana kaha Simona ye lobai na yona ye hedehedede ye wane, "Mesaiya wa ka lobaiyako." (Mesaiya Giliki kalinadi unai kaniyona ede Keliso.)* ⁴² Ede ye woyaiyama Yesu unai.

Yesu ye kitalau iya unai na ye wane, "Kowa Simona, Yowane natuna. Kabo hesam se katai Kipasi."* (Na kalina Giliki unai se wane Petelo.)

Yesu Pilipo yo Natanaela ye yoganedi

⁴³ Mayadai hesauna unai Yesu nuwana ye hineli bena kabo ye lau Galili. Na Pilipo ye lobai ede ye hededelau unai ye wane, "Ku laoma ku hemuliwatanigau."

⁴⁴ Pilipo meta Betesaida unai ye miyamiya doha hinage Andeleya yo Petelo.

⁴⁵ Pilipo ye lau Natanaela ye lobai na yona ye hedehedede ye wane, "Kulikuli tabuna unai Mose yo

peloweta tamowai se hetahetala'usei wa ka lobaiyako. Hesana ede Yesu, Nasaleta tamowaina, iya Yosepa natuna."

⁴⁶ Na Natanaela ye henamai ye wane, "Mamohoi Nasaleta? Ginauli saha namwanamwana kabo temenai ye laoma?" Pilipo ye wane, "Ku laoma na ku kita."

⁴⁷ Huyana Yesu Natanaela ye kita ye laolaoma ede iya ye hededehehemasalahalisa ye wane, "Teina tamowai ta meta Isalaela tamowaina mamohoina, iya nige gonowana tamowai hesau ye lupoi."

⁴⁸ Kabo Natanaela ye henamai ye wane, "Idohagi na kabigu ku kata?"

Yesu ye hededebeui ye wane, "Huyana kaiwa* guninawai ku miyamiya meta ya kitagoko, na kabo Pilipo ye yoganeigo."

⁴⁹ Ede Natanaela ye hededelau unai ye wane, "Taulauhekata, kowa Yaubada natuna, Isalaela yoma wasawasa."

⁵⁰ Yesu ye wane, "Yom kawamamohoi ne matawuwuna ede ya hededelaowa kalimwai meta ya kitago kaiwa guninawai ku miyamiya. Na sola kabo ginauli saesaedi ku kitadi na kabo teina." ⁵¹ Yesu yona hedehedede ye tubei ye wane, "Ya hededemamohoi kalimiuwai kabo galewa kwa kita ye tasoke, na Yaubada yona anelu se dobidobima Tau Natuna unai yo se seuseuyo."*

Yesu waila ye bui ye hemala waina

2 Mayadai labui mulidiwai, teha Galili unai magai hesau hesana Kana unai tawasola kaikaigogona se ginauli. Yesu sinana meta iya menai, ² yo hinage Yesu maiyana hekahekatao se kaibwadaidi se laoma tawasola kaikaigogona ne unai. ³ Huyana waina ye gehe ede Yesu sinana ye hededelau iya unai ye wane, "Kadi waina wa ye gehe."

⁴ Yesu ye hededebeui ye wane, "Sinagu, idohagi to ku hededelaoma kaliguwai? Sola nige yogu huya ye lagema."

⁵ Na sinana wa ye hededelau heyayai tauhaidi udiyedi ye wane, "Saha ye hedededi ne meta bena kwa ginauliwatanidi."

⁶ Na Dius tamowaidi yodi kabakaideuli wailana kabahemwayaudi paku haligigi-kesega meta menai. Paku ne weku unai se tadidi, na hekadi gonowana waila 75 lita yo hekadi 115 lita unai se hemwayaudi.

⁷ Na Yesu ye hededelau heyayai tauhaidi wa udiyedi ye wane, "Paku ne waila unai kwa hemwayaudi", ede se inihemwayaudi.

⁸ Kabo ye wane, "Kabo gagilina kwa yaihai na kwa bahelae kaikaigogo tauloinaena unai."

1:41 Keliso yo Mesaiya kaniyona meta Apostolo Yodi Paisowa Bukana 2:36 unai ka kulihemasalahalisa na ku hasili.

1:42 Kipasi meta kalina Alamaiki, na kaniyona ede weku.

1:48 Teina kaiwa ta kalina dimdim unai se wane "fig tree".

1:51 Genese 28:12 unai ku hasili meta Yaubada yona anelu se dobidobima Yakobo unai yo se seuseuyo. Na kaniyona ede, Yaubada yona hedehededehesunuma kabo ye hemamohoiyedi.

Siya kabo se bahelae⁹ na waila ye hemala waina wa ye numatonogi. Yodi kabayaina meta nige kabina ye kata, na yona heyayai tauhaidi mo se bom kabina se kata. Kabo kaikaigogo tauloinaena wa tautawasola loheyana ye yoganeiyama¹⁰ na ye hededelau unai ye wane, "Yoda kabikabi kabina ku katakalili, meta waina namwanamwana ta mosebagunai taumana udiyedi. Na huyana se numa se lau na nige gonowana ginauli hesau kamnana se lapulobai kabo waina maisana gagilina ta moseidi. Na idohagi to waina namwanamwakalilina ta ku hemulitayama?"

¹¹ Teina ta meta laulau gigigibwalina bagubagunakalilina teha Galili unai magai hesana Kana unai Yesu ye ginauli. Na teina laulau ta unai iya kana kao saesaena mamohoina ye hemasalah, unai yona hekahekatao iya se sunumai.

Yesu numa tabuna unai taulokulokune ye henakudi

¹² Tawasola kaikaigogona mulinawai Yesu ma sinana, kana kahao yo yona hekahekatao wa se dobi Kapelenuma, na menai se miya mayadai hisa mo.

¹³ Kabo Dius tamowaidiyao yodi Taukiuli Henuwaisinina huyana ye hanhanauma, ede Yesu ye sae Yelusalema.¹⁴ Na numa tabuna bakubakuna unai tamowai hekadi ye lobaidi siya bulumakau, mamoe yo bunebune se lokulokuneidi, yo siya moni taulauluhedudu meta hatahata kabatulidi udiyedi se tutuli.¹⁵ Yesu kabo maina udiyedi wipi ye ginauli na kabo numa tabuna bakubakuna wa unai tamowai, bulumakau yo mamoe maudoidi wa ye henakuhepesadi. Moni taulauluhedudu yodi moni ye kuyahe'uludi yo yodi hatahata ye buidi.¹⁶ Na ye hededelau bunebune taulokulokunedi wa udiyedi ye wane, "Manuwa ta kwa bahehepesadi! Idohagi to tamagu yona numa tabuna ta kwa hai ye hemala kabalokulokune numana!"

¹⁷ Na kabo yona hekahekatao kulikuli tabuna beyabeyana se nuwatui doha ye wane, "Yom numa tabuna ya gadosisikaliliyei, na unai kabo se heyababagau." (Same 69:9)

¹⁸ Na Dius tauwoyaidi se hededelau Yesu unai se wane, "Laulau gigigibwalina saha kabo ku ginauli kalimaiwai, na unai kabo kabina ka kata yom tanuwaga gigibwalina ta meta Yaubada unai ye laoma?"

¹⁹ Yesu ye hededebui ye wane, "Numa tabuna ta kwa lopagwaligwali, na mayadai haiyona unai kabo ya ginauli'uyoi."

²⁰ Na kabo Dius tauwoyaidi wa se hededebui se wane, "Teina numa tabuna ta meta bolimai badona 46 unai se ginauli. Idohagi to bena mayadai haiyona unai kabo ku ginauli'uyoi?"²¹ Na numa tabuna Yesu ye hetahetala'usei ta meta iya ye bom tauna.²² Unai huyana Yesu ye boita na ye tolo'uyo meta yona hekahekatao saha ye hededediko wa se nuwatuidi,

ede kulikuli tabuna yo Yesu yona hedehedede wa se kawamamohoiyedi.

²³ Huyana Yesu iya Yelusalema unai Taukiuli Henuwaisinina hesabana na menai laulau gigigibwalidi ye ginaulidi wa meta tamowai gaudi se kitadi, ede iya hesana unai se sunuma.

²⁴ Na Yesu nige ye sunumaidi, matauwuwuna tamowai maudoidi nuwadi kabidi ye katakalili.²⁵ Na nige ye henuwa bena taba tamowai hesau ye laoma kalinawai na kana kaha kana kao ye hedehededeidi, matauwuwuna yodi laulau meta kabidi ye katakalili.

Yesu Nikodemo ye hekata

3 Temenai meta Paliseya tamowaina hesau, hesana ede Nikodemo, na iya hinage Sunedeli* bodana tamowaina hesau.

² Boniyai hesau unai ye lau Yesu kalinawai na ye wane, "Taulauhekata, kabim ka kata meta kowa taulauhekata Yaubada unai ku laoma. Laulau gigigibwalidi ku ginaulidi wa nige tamowai hesau gonowana ye ginaulidi. Teina unai ye hemasalah meta Yaubada iya maiyam."

³ Yesu ye hededebui ye wane, "Ya hededemamohoi kalimwai, ena tamowai hesau nige labasi helabuina ye hai, meta nige gonowana Yaubada yona basileiya ye kita."

⁴ Na Nikodemo ye hededelau Yesu unai ye wane, "Idohagi kabo tamowai tautaubadana ye luwu'uyo sinana bogana unai, na labasi helabuina ye hai?"

⁵ Yesu ye hededelau unai ye wane, "Ya hededemamohoi kalimwai, ena tamowai hesau nige labasi helabuina ye hai waila yo Yaluwa udiyedi, meta taba nige ye lusolalau Yaubada yona basileiya unai.

⁶ Tamowai wawayao se labasidi buluma unai meta buluma mo maulina unai se miya, na Yaluwa meta gonowana mauli nige kana siga ye mosei kalidiwai.

⁷ Kowa taba nige yogu hedehedede ta udiyedi ku siliyata doha wau ya wane, 'Kowa yo tamowai maudoidi bena labasi helabuina kwa hai.'⁸ Yaumai ye towama kabo yasasana mo ta lapui, na nige kabina ta kata haedi ye laolaoma o haedi kabo ye laulau. Unai gonogonowana doha siya Yaluwa unai labasi helabuina tauhaina ne."

⁹ Nikodemo ye henamai'uyo ye wane, "Teina ta meta idohagi?"

¹⁰ Na Yesu ye wane, "Kowa meta Dius tamowaidiyao yodi laugagayo taulauhekataena, na idohagi to teina nuwanuwatu ta nige ku nuwatulobaidi?¹¹ Ya hededemamohoi kalimwai: Saha kabidi ka kata meta ka hedehededeidi, yo saha ka kitadi meta ka hededehehemasalahadi kalimiuwai. Na iyamo yoma hedehedede ta nige kwa haidi.

¹² Tanoubu ginaulidi ya hedehededeidi kalimiuwai, na nige kwa kawamamohoiyegau; na idohagi kabo kwa kawamamohoiyegau taba galewa ginaulidi ya

hedehehededeidi? ¹³ Nige tamowai hesau ye sae galewa, na kesega mo galewa ne unai ye dobima, iya ede Tau Natuna. ¹⁴ Doha Mose mwata ye lausini balabalagaibu unai wa,* meta gonogonowana doha tenem kabo Tau Natuna hinage se lausini, ¹⁵ na unai tausunumaena maudoidi kabo mauli nige kana siga se lobai. ¹⁶ Matauwuwuna Yaubada tanoubu ye gadosisikaliliyei, ede natukesekesegana ye mosegabaei. Unai kaiteya iya ye sunumai, meta taba nige hekamkamna ye lobai, na mauli nige kana siga kabo ye hai. ¹⁷ Yaubada natuna ye hetamaliyama nige bena tanoubu ta ye hegili, na bena ye gilihai. ¹⁸ Na kaiteya Yaubada natuna ye sunumai, meta Yaubada taba nige ye hegili. Na kaiteya nige ye sunumai, meta Yaubada iya ye hegilunonohaiyako, matauwuwuna Yaubada natukesekesegana hesanawai nige ye sunuma. ¹⁹ Yaubada yona hekasa nuwanuwatuna ede doha teina: Mala wa ye laomako tanoubu ta unai, na tamowai yodi laulau meta se yababakalili, unai masigili se henuwakaliliyei na kabo mala. ²⁰ Na kaiteyadi yodi laulau se yababa meta mala wa se subu, yo taba nige se laoma mala ne unai, matauwuwuna nige se henuwa bena yodi ba'aya se hemasalahadi.

²¹ Na kaiteyadi yodi laulau se dudulai meta se laoma mala ne unai. Na kabo tamowai maudoidi se kitadi meta saha se ginaulidi ne Yaubada ye henuwadi."

Yowane Babatiso Yesu ye hedehedemasalah

²² Na kabo Yesu maiyana hekahekatao Yelusalema se laugabae se lau Yudeya magaina hesau unai. Menai se miya huyana ye katuloha, na Yesu ye hebahebabatiso. ²³ Na Yowane meta teha hesau unai hinage ye hebahebabatiso. Na iya Aenona unai Salim dedekanawai, matauwuwuna temenai waila lakilakina yo tamowai se bado se laolaoma bena se babatiso. ²⁴ Tenem huyana ne unai Yowane sola nige se tole numatutugudu unai. ²⁵ Yowane yona hekahekatao yo Dius tamowaina hesau Dius yodi lauhe'a kabikabina debanaena se haikawayagala. ²⁶ Ede se laoma Yowane unai na se wane, "Taulauhekata, tamowai wa maiyam Yolidani hali tanakawasina unai na ku hedehedemasalah'ausei wa meta hinage ye hebahebabatiso, na tamowai maudoidi se laulau iya kalinawai."

²⁷ Yodi hedehedede wa unai Yowane ye hedebui ye wane, "Nige gonowana tamowai hesau paisowa ye haigaibui, na paisowa ye hai ne meta Yaubada ye mosei. ²⁸ Saha ya hedehedededi wa komiu kwa lapuidiko doha ya wane, 'Yau nige Kelisona ede, na yau meta Yaubada ye hetamalibagunaigauma.'

²⁹ Tautawasola waihiuna meta iya tautawasola loheyana yona. Na tautawasola loheyana tausaguina

meta ye nayanaya yo ye lapulapui. Na huyana tautawasola loheyana kalinana ye lapui meta ye gwauyalakalili. Tenem gwauyala ne meta yau yogu, matauwuwuna tautawasola loheyana ede ye masalahako. ³⁰ Iya hesana meta bena ye saekalili, na yau hesagu bena ye dobi.

³¹ Iya galewa ne unai ye dobima wa meta tamowai maudoidi ye saedikwaidi. Na kaiteya tanoubu ta unai* meta tanoubu ta yona, yo yona hedehedede doha tanoubu ta tamowaina. Na galewa ne unai taudobima wa meta tamowai maudoidi ye saedikwaidi. ³² Saha ye kitadi yo ye lapuidi wa ye hedehedehemasalahadi. Na iyamo nige hesau ye lapulau yona hedehedede wa udiyedi. ³³ Na kaiteyadi yona hedehedede wa se hai meta se hemamhoiyei ede Yaubada yona hedehedede wa ye mamohoi.

³⁴ Matauwuwuna Yaubada Keliso ye hetamaliyama yo Yaluwa Tabuna unai iya ye hemwayaukaliliyei, ede Yaubada yona hedehedede ye hedehedehemasalahadi.

³⁵ Tamana meta Natuna ye gadosisiyei, unai ginauli maudoidi ye tolegabaeidi iya nimanawai. ³⁶ Na kaiteya iya Natuna ne ye kawamamhoiyei meta mauli nige kana siga ye hai, na kaiteya iya Natuna ne ye subu, taba nige mauli nige kana siga ye hai na Yaubada yona kouyalayala unai ye miya."

Yesu maiyana Samaliya waihiuna se hedehedede

4 Paliseya tamowaidi wasa se lapui meta Yesu iya yona hekahekatao se bado ye haidi yo ye hebabatisoidi, na kabo Yowane. Na iyamo mamohoina ede Yesu nige ye hebahebabatiso, na yona hekahekatao mo se hebahebabatiso. Huyana Yesu wasa ye lapui meta Paliseya tamowaidiyao yona kabikabi wa kabina se kata, ede Yudeya ye laugabae na ye uyo Galili. ⁴ Na yona lau ne unai meta ye lau teha Samaliya unai ⁵ na ye lage Samaliya magaina lakilakina hesana Saeka unai. Na menai meta tano gagilina hesau beyabeyana Yakobo ye mosei natuna Yosepa unai. ⁶ Na Yakobo kana wailakeli meta temenai. Na Yesu yona taihile wa unai kamnana ye yababa ede ye tuli na ye kaiyawasi wailakeli wa dedekanawai. Na mahanagan wa meta mayamayadailaki yona tupwa unai.

⁷ Na kabo Samaliya waihiuna hesau ye laoma bena waila ye yai, na Yesu ye hedebelau unai ye wane, "Waihiu, taba gonowana waila ku haiyama ya numa?"

⁸ Na yona hekahekatao meta se laoko magailaki wa unai bena kadi kai se lokune.

⁹ Kabo Samaliya waihiuna wa ye hedebelau unai ye wane, "Kowa Dius tamowaina, na yau meta Samaliya waihiuna, na idohagi to ku kaibwadaigau bena waila ya leyawa ku numa?" (Matauwuwuna ede Dius tamowaidiyao meta nige Samaliya tamowaidi maidadiyao se hebodakesegena.)

3:14 Wasana meta Numela 21:4-9 ku hasili.

3:31 Tausonosonoga hekadi yodi nuwatu meta teina hedehedede ta "na kaiteya tanoubu ta unai" iya Yowane Babatiso kana hedehedede. Na hekadi yodi nuwatu meta hedehedede ne ye lau tanoubu tamowaidi maudoidi udiyedi.

¹⁰ Yesu ye hededebui ye wane, "Ena taba Yaubada yona kainauya kabina ku kata yo taukaibwadawaila kalimwai ta ku kitalobai, kabonowana ku kaibwadai na waila maumaulina ye leyawa."

¹¹ Na waihiu wa ye wane, "Taubada, nige kam waila kabayaiyai, na wailakeli ne duhana meta ye dobikalili. Na haedi kabo waila maumaulina ta ku hai?" ¹² Bena kowa ku saekalili na kabo tamamai Yakobo? Iya wailakeli ta tauleyamana ede. Na iya yo natunao yo yona suisui maudoidi hinage unai se numanuma."

¹³ Na Yesu ye hededelau unai ye wane, "Kaiteya teina waila ta ye numa, meta kabo gonowana ye gadomagu'uyo. ¹⁴ Na kaiteya waila ya mosei ne ye numa, meta taba nige gonowana ye gadomagu'uyo. Waila ya mosei ne kabo ye hemala bonobonowasi kalinawai na ye miya ye lau yo mauli nige kana siga ye mosei."

¹⁵ Kabo waihiu wa ye hededelau unai ye wane, "Taubada, waila ta ku leyama, to taba nige ya gadomagu'uyo yo hinage taba nige ya uyoma inai waila ya yaiyai."

¹⁶ Yesu ye wane, "Ku lau mwanem ku woihai na kwa laoma inai."

¹⁷ Waihiu wa ye hededebui ye wane, "Yau nige mwanegu." Kabotaki Yesu ye wane, "Ku hedededudulai ede ku wane, 'Yau nige mwanegu.'

¹⁸ Mamohoi, yom hedehedede ne ye dudulai. Na iyamo kowa mwanemwao haligigi ku haidiko, na loheya maiyam ne meta iya nige mwanem."

¹⁹ Kabo Waihiu wa ye hededelau unai ye wane, "Taubada, ya nuwatulobai meta kowa peloweta.

²⁰ Kama mumugao teina kuduli ta unai Yaubada se tabataba'ohui, na komiu Dius tamowaidi kwa wane, 'Kabataba'ohu mamohoina ede Yelusalema unai.'

²¹ Yesu ye hededelau waihiu wa unai ye wane, "Waihiu, saha ya hedehededeidi ta taba ku kawamamohoiyedi. Huyana kabo ye laolaoma meta taba nige Tamamai kwa taba'ohui teina kuduli ta unai o Yelusalema unai. ²² Na komiu Samaliya

tamowaidiyao kaiteya kwa taba'ohui ne meta nige kabina kwa kata, na kai Tamamai kabina ka kata na kai taba'ohui, matauwuna ede kabihemauli meta kai Dius kalimaiwai ye laoma. ²³ Huyana sola ye laolaoma yo iya ede ye laomako na tautaba'ohu mamohoidi kabo Tamamai se taba'ohui yaluwa yo hedehedemamohoi udiyedi,* matauwuna tautaba'ohu doha tenem meta Tamamai iya ye henuwa'useidi ede. ²⁴ Yaubada meta iya yaluwa, unai tautaba'ohuina bena yaluwa yo hedehedemamohoi udiyedi se taba'ohui."

²⁵ Na waihiu wa ye wane, "Kabina ya kata meta Mesaiya kabo ye laoma." (Iya ede Keliso.) "Na huyana ye laoma meta ginauli maudoidi kabo ye hedehedemasalahadi kalidawai." ²⁶ Na kabo Yesu ye hedehedemasalah'uyoi ye wane, "Yau ya hedehedelaowa ta meta yau Kelisona ede."

Yesu yona hekahekatao se uyoma

²⁷ Na huyana yona hekahekatao wa se uyoma meta se kita waihiu hesau maiyana se hedehedede, ede se siliyata. Na nige hesau bena ye henamaiyei ye wane, "Saha ku henuwa?" o, "Idohagi to waihiu ne maiyam kwa hedehedede?"

²⁸ Kabo waihiu wa kana waila pakuna wa ye tole na ye uyo magailaki wa unai, na tamowai maudoidi yodi ye hedehedede ²⁹ ye wane, "Kwa laoma ta lau tamowai hesau kwa kita. Ginauli maudoidi ya ginaulidiko wa meta ye hedehedemasalahadi. Nuwana iya Keliso?" ³⁰ Na kabo tamowai gwaudi magailaki wa unai se laoma na se lau Yesu hesabana.

³¹ Waihiu wa ye lauko, na kabo yona hekahekatao wa se hededelau unai se wane, "Taulauhekata, taba kai hesau ku kai." ³² Na ye hededelau udiyedi ye wane, "Yau kagu kai meta komiu nige kabina kwa kata."

³³ Unai se bom se henahenamai'uyoidi se wane, "Nuwana tamowai hesau kai ye moseiyako ye kai."

³⁴ Yesu ye wane, "Kagu kai ede bena tauhetamaligauma yona nuwatu ya ginauliwatanidi na yona paisowa ya ginaulihegehedi. ³⁵ Yomi hedehedede hesau meta doha teina kwa wane, 'Nawalai hasi mo na kabo witi huyabolina ye lage.' Yau ya hedehedelaowa ya wane, kwa kaikewalau koya ne udiyedi! Witi ye sunako ye posiposi, na huyabolina ede ye lageko.* ³⁶ Na witi tautanogogoina kabo yona paisowa maisana ye hai yo witi ye tanogogoi. Witi ne meta siya ede tamowai se laoma mauli nige kana siga se hai. Unai bena witi tumana tauhesuluna* yo witi tautanogogoina kabo se gwaulyala kesega. ³⁷ Teina unai hedehedede ta, 'Hesau ye hesulu na hesau ye tanogogoi' meta mamohoi. ³⁸ Ya hetamaligomiu bena kwa lau witi nige kwa hesuludi wa kwa tanogogoidi. Tamowai hekadiyo paisowa lakilakina se ginauliyako, na komiu kabo yodi paisowa wa yona namwanamwa kwa hai."

Samaliya tamowaidi gwaudi Yesu se kawamamohoiyei

³⁹ Samaliya tamowaidi gwaudi magai lakilakina unai taumiya wa Yesu se sunumaei matauwuna waihiu wa yona hedehedede se lapui ye wane, "Ginauli maudoidi ya ginaulidiko wa meta ye

4:23 Teina hedehedede ta se taba'ohui yaluwa yo hedehedemamohoi udiyedi kaniyona ede tautaba'ohu mamohoidi bena Yaluwa Tabuna ye hemwayaudi yo Yesu se sunumai, na kabo Yaubada se taba'ohui.

4:35 Witi huyabolina ede ye lageko: Teina hedehedede ta meta palabole, na kaniyona ede Yesu yona hekahekatao bena se kitalau tamowai udiyedi. Tamowai ne se nonoha na Yaubada wasana se lapui.

4:36 Dius yodi kabikabi unai witi tumana nige se kumai, na se hesuhesulu koya unai.

hededehemasalahadi kaliguwai.”⁴⁰ Se laoma Yesu unai na se kaibwadai taba menai sola maiyadi se miya, ede ye miya mayadai labui.⁴¹ Na Yesu yona hedehedede debanawai ede tamowai hekadi'uyo se laoma se hemala tausunumaena.

⁴² Na se hededelau waihiu wa unai se wane, “Huya bagubagunana unai meta yom hedehedede wa debanawai ka sunuma. Na mahana ta unai meta kai ka bom yona hedehedede ta ka lapuidi, unai kabina ka kata meta kita tanoubu tamowaidi tauhemaulida mamohoina ede iya.”

Yesu gabemani yodi tamowai lakilakina natuna ye henamwanamwa

⁴³ Mayadai labui wa mulidiwai Yesu ye dahalai ye sae Galili.⁴⁴ Na Yesu ye hededehemasalahayako meta peloweta yona magai tamowaidiyao iya nige gonowana sehekasisiyei, na iyamo ye sae Galili.

⁴⁵ Huyana ye lage Galili, meta Galili tamowaidi iya se hailobai, matauwuwna ede Taukiuli Henuwaisinina mayadaidi wa udiyedi siya Yelusalema unai na saha ye ginalidii wa maudoidi se kitadiko.

⁴⁶ Kabo Yesu ye uyo magai gagilina hesana Kana unai. Magai ta unai meta lahinaidi waila ye bui ye hemala waina. Kana dedekanawai meta magai hesau hesana Kapelenuma, na temenai gabemani yodi tamowai lakilakina hesau, na natuna loheya meta ye kasiyebwakalili.⁴⁷ Na huyana tamowai wa Yesu wasana ye lapui meta Yudeya unai ye saemako Galili, ede ye lau unai na ye kaibwadai bena taba natuna ne ye henamwanamwa. Wawaya ne meta boita ye hanahanawui.

⁴⁸ Yesu ye hededelau unai ye wane, “Idohagi, kowa yo tamowai maudoidi, ena nige hekihekinoi yo laulau gigigigibwalidi kwa kitadi meta nige gonowana kwa kawamamohoi!”

⁴⁹ Na gabemani yodi tamowai lakilakina wa Yesu ye kaikaibwadai ye wane, “Guiau, ku laoma ta lau, madai natugu ne ye boita.”

⁵⁰ Na Yesu ye hededelau unai ye wane, “Ku uyo yom magai. Natum ne kaboye namwanamwa.”

Tamowai wa Yesu yona hedehedede ye sunumaei ede ye uyo.⁵¹ Sola ma laulauna na yona heyayai tauhai di hekadi se laoma ede yona se hedehedede meta natuna loheya wa ye namwanamwako.⁵² Na ye henamaiyedi ye wane, “Mahana saha unai ye namwanamwa?”, na se wane, “Lahi meimeilahi mahanana 1 kiloki unai taugwagwama wa ye laugabaei.”

⁵³ Kabo loheya wa tamana wa nuwana ne unai ye sae meta tenem mahanana ne unai Yesu ye wane, “Natum ne kaboye namwanamwa.” Ede tamowai wa yo yona numa tamowaidi maudoidi Yesu se sunumaei.

5:2 Kipu wa meta teha labui, na kabala laulauna numana hesau meta duwaduwalidiyena, na numana hasi kipu labui wa dedekadi hasi wa udiyedi. Unai ede Yowane ye kuli kabala laulauna numadi haligigi.

5:4 Lausoiso 3b yo 4 kulikuli hisahisadi mo udiyedi ta hasilidi, na kulikuli beyabekalilidi udiyedi meta nige se kulidi.

⁵⁴ Huyana Yesu Yudeya ye laugabae na ye uyoma Galili, meta teina ta yona laulau gigigigibwalina helabuina ede.

Waila kipuna dedekanawai Yesu taukasikasiyebwa hesau ye henamwanamwa

5 Mayadai hisa mulidiwai kabo Yesu ye sae Yelusalema Dius yodi kaikaigogo hesau hesabana.

² Na Yelusalema unai meta waila kipuna hesau keda hesau hesana Mamoe Kedana dedekanawai. Kipuna wa hesana kalina Alamaiki unai se katai Beteseta. Na kabala laulauna numadi haligigi meta waila kipuna wa se tauhetakikili.*^{3a} Temenai meta taukasikasiyebwa doha taumatagibugibu, kae yababayababadi yo taubunibuni bodadi se kenokeno [^{3b} na waila hekahekasina ne se nayanayai].⁴ Matauwuwna huya hekadi anelu hesau ye dobi kabo waila kipuna ne ye hekasihetakikili, na ena taukasikasiyebwa hesau ye gayodobibaguna waila hekahekasina ne unai kabo ye namwanamwa.]*⁵ Temenai tamowai hesau ye kasiyebwa bolimaina badona 38.⁶ Yesu taukasikasiyebwa wa ye kita ye kenokeno na ye nuwatulobai meta ye kasiyebwa huyalohaloha, ede ye henamaiyiei ye wane, “Kowa ku henuwa bena ku namwanamwa?”

⁷ Na tamowai wa ye wane, “Taubada, huyana anelu waila ne ye hekasihetakikili na ya kaipate bena ya gayodobi meta tamowai hesau ye gayodobibagunako, matauwuwna ede nige tausaguigau hesau.”

⁸ Na Yesu ye hededelau unai ye wane, “Ku tolo yom lauwese ne ku bahei na ku lau.”⁹ Tenem mahana ne unai tamowai wa ye namwanamwa, na yona lauwese wa ye noku ye bahei na ye lau.

Na teina laulau gigigigibwalina ta mayadai Sabati unai ye tubu.¹⁰ Ede Dius tauwoyaidi hekadi se hededelau taunamwanamwa wa unai se wane, “Teina mayadai ta meta Sabati, na laugagayo ye hedede meta tabu yom lauwese ku bahei na ku taitaihile’usi.”

¹¹ Na tamowai wa ye hedede buei ye wane, “Tauhenamwanamwagau ye hededelaoma kaliguwai ye wane, ‘Yom lauwese ne ku bahei na ku lau.’”

¹² Unai se henamaiyiei se wane, “Kaiteya ye hedede bena ku bahei na ku lau?”

¹³ Taunamwanamwa wa nige kabina ye kata, matauwuwna ede temenai boda wa luwadiyena Yesu ye luwukwadaleko.

¹⁴ Na muliyena Yesu iya ye lobai numa tabuna unai, ede ye hededelau unai ye wane, “Kowa ku namwanamwako, na tabu yababa ku ginali’uyo, madai yababalakilaki kabo ku hekalo.”¹⁵ Tamowai wa Yesu ye laugabaei na ye lau Dius tauwoyaidi wa yodi ye hedehedede meta tauhenamwanamwana wa Yesu.

Yaubada Natuna mauli ye leyama

¹⁶ Mayadai Sabati udiyedi Yesu laulau gigigibwalidi wa ye ginaginalidi, unai Dius tauwoyaidi se hetubu se hewaiunu. ¹⁷ Na Yesu ye hededelau udiyedi ye wane, “Tamagu meta mayadai badobado ye paipaisowa ye laoma ee teina, unai yau hinage bera ya paipaisowa.” ¹⁸ Unai Dius tauwoyaidi wa se kaipatebayaokalili bera se koihemwalo, matauwunna ede mayadai Sabati laugagayona ye utu'utusi, yo hinage ye hedede meta tamana ede Yaubada. Na teina hedehedede ta unai ye hemasalahadi meta maiyana Yaubada gonogonowadi.

¹⁹ Ede Yesu ye hededelau udiyedi ye wane, “Ya hededemamohoi kalimiuwai: Natu nige gonowana saha ye bom ye ginauli, na saha Tamana ye ginauli ye kita kabu ye ginauliwatani. Matauwunna Tamana ginauli saha ye ginauli, Natuna hinage kabu ye ginauliwatani. ²⁰ Tamana iya Natuna ye gadosisiyei, unai ginauli maudoidi ye ginaulidi meta ye hekita. Mamohoi, Tamana ginauli saesaekalilidi kabu ye hemasalahadi Natuna unai, na kabu teina saha ye ginaulidi ta. Unai kabu kwa noko. ²¹ Tamana tauboiboita ye hetolo'uyoidi yo mauli ye mosedi, gonogonowana hinage Natuna mauli ye mosedi kaiteyadi ye henuwadi ne udiyedi. ²² Tamana nige hekasa hesau ye ginauli, na kitahekasa maudoina ye moseiyako Natuna unai, ²³ matauwunna ye henuwa bera tamowai maudoidi Natuna se hekasisiyei doha hinage Tamana se hekasisiyei. Kaiteya Natuna nige ye hekasisiyei meta hinage Tamana—iya ede tauhetamaliyamana—nige ye hekasisiyei.

²⁴ Ya hededemamohoi kalimiuwai: Kaiteya yogu hedehedede ta ye lapuidi yo tauhetamligau ye sunumaei, iya meta mauli nige kana siga ye hai, yo Yaubada yona hekasa taba nige ye hekalo. Na boita yona tupwa ye laugabaeyako na mauli nige kana siga kabu ye lobai. ²⁵ Ya hededemamohoi kalimiuwai: Huyana sola ye laolaoma yo iya ede ye laomako kabu tauboiboita* Yaubada Natuna kalinana se lapui. Na kalinana taulapuina ne kabu se mauli. ²⁶ Tamana iya mauli wuwuna ede, na mauli wa ye mosehekawayako Natuna unai, ede iya hinage ye hemala mauli wuwuna. ²⁷ Yo hinage gigibwali ye mosehekawayako iya unai kabu kitahekasa ye ginauli, matauwunna iya meta Tau Natuna.

²⁸ Teina unai tabu kwa noko. Huyana ye laolaoma kabu bwayabwaya udiyedi taukenokeno maudoidi Yaubada Natuna kalinana se lapui ²⁹ na se pesahaima. Na laulau namwanamwadi tauginalidi kabu se tolo'uyo na se mauli. Na laulau yababayabadi tauginalidi kabu hinage se tolo'uyo, na se lau kamkamna nige kana siga unai.

5:25 Tausonoga yodi nuwatu meta teina hedehedede ta *tauboiboita* kaniyona ede “Yaluwa yona teha unai tauboita”. Siya nige Yaubada yona tamowai, matauwunna ede nige Yesu se sunumai, unai nige Yaluwa Tabuna se hai yo mauli nige kana siga nige kalidiwai.
5:42 Teina hedehedede ta *Yaubada gadosisina* kalina Giliki unai meta kaniyona labui. Bagubagunana ede lausoisoi unai ka kuliyako, *Yaubada gadosisina*, na helabuina ede *Yaubada yona gadosisi*.

³⁰ Yau nige gonowana ya bom saha hesau ya ginauligaibui. Na saha ya lapui, kabu unai ya hekasa. Na yogu hekasa ne meta ye dudulai, matauwunna nige yau yogu nuwatu, na tauhetamligau yona nuwatu ya lauwatani.”

Yesu hededehemasalahana hedehedede

³¹ “Ena taba ya bom ya hededehemasalahal'uyoigau, meta yogu hededehemasalahana ne nige kaniyona.

³² Na Tamagu, iya hinage tauhededehemasalahagau ede, na kabina ya kata meta yona hedehedede ne mamohoidi.

³³ Komiu tamowai hekadi kwa hetomalidi se lau Yowane unai bera se henamaiyei. Na yau kagu kao mamohoina ye hededehemasalahal'uyoigau.

³⁴ Tamowai yodi hededehemasalahana nige ya henuwadi, iyamo Yowane yona hedehedede hekasa ye hedehedehemasalahana wa ya hedehedede kalimiuwai, bera udiyedi kabu mauli kwa lobai. ³⁵ Yowane kana kao meta doha lampa ye kalakalasi, na komiu dawayana ne unai bera kwa gwauyala huyakubwakubwa mo.

³⁶ Na kabahemasalahagau hesauna kaliguwai, iya meta ye saekalili na kabu Yowane yona hedehedede wa, iya ede yogu paisowa Tamagu ye ledima bera maudoidi ya ginaulidi. Kabu yogu paisowa ne se hemamohoiyeigau meta Tamagu ede tauhetamligau.

³⁷ Yo hinage Tamagu tauhetamligau meta ye hemamohoiyeigau. Na komiu nige gonowana kalinana kwa lapui yo kana kao kwa kita, ³⁸ yo yona hedehedede nige se miya nuwamu ne udiyedi, matauwunna ede yau Yaubada ye hetamli'useigau wa nige kwa sunumaeigau. ³⁹ Na komiu meta kulikuli tabuna kwa hasilinamwanamwakaliliyei, matauwunna yomi nuwatu ede unai kabu mauli nige kana siga kwa lobai. Mamohoi, kulikuli tabuna wa hinage ye hededehemasalahagau. ⁴⁰ Na iyamo nige kwa henuwa bera taba kwa laoma kaliguwai na mauli kwa hai.

⁴¹ Yau tamowai yodi hedebasae meta nige ya henuwadi. ⁴² Na kabimiu ya kata meta Yaubada gadosisina* kalimiuwai nigele. ⁴³ Yau Tamagu hesanawai ya laoma, na iyamo nige kwa lapulaoma kaliguwai. Na nuwana taba tamowai hesau ye bom hesanawai ye laoma, kabu kwa lapulaunai.

⁴⁴ Maidami kwa hedehedebasae'uyoigomiu, na Yaubada, iya ye bom Yaubada, yona kitahenamwa meta nige kwa henuwa. Idohagi na kabu kwa sunumaeigau?

⁴⁵ Tabu yomi nuwatu bera Tamagu matanawai kabu ya tolo na ya hegiligomiu. Tauhegilugomiu ede Mose, na komiu yomi nuwatu ede bera iya unai kabu sagu kwa lobai. ⁴⁶ Ena taba Mose kwa

kawamamohoiyei, yau hinage bena kwa kawamamohoiyegau. Matauwuna wasagu wa Mose ye kuliya. ⁴⁷ Na ena saha ye kuli wa nige kwa kawamamohoiyei, meta idohagi kabo yau kwa kawamamohoiyegau?"

Yesu tamowai 5,000 yehekaidi

(Mataiyo 14:13-21; Maleko 6:32-44; Luka 9:10-17)

6 Mayadai hisa se laoko mulidiwai Yesu ye gelu waga hesau unai na Galili Gabwana unai ye kawasi ye lau hali tanakawasina unai. (Na teina waila ta hesana hesau ede Tibeliya Gabwana). ² Na yona kabalu maudoidi ne udiyedi meta bodalakilaki se hemuhemuliwatani, matauwuna ede kabikabi gigigigibwalidi ye ginaulidi taukasikasiyebwa udiyedi wa se kitadiko. ³ Kabo Yesu ye sae kuduli hesau unai, na temenai yona hekahekatao maiyanao se tuli. ⁴ Na Dius yodi Taukiuli Henuwaisinina huyana meta ye hanahanaumako.

⁵ Na Yesu ye kaikewalau meta bodalakilaki ye kitadi se laolaoma hesabana, ede Pilipo ye henamaiyei ye wane, "Haedi kabo pwalawa ta hemaisa na boda ne ta hekaidi?" ⁶ Na yona henamai ta unai meta bena Pilipo ye laukita, na kabina ye katako meta saha kabo ye ginauli.

⁷ Pilipo ye hededebeui ye wane, "Taba moni lakina denali 200* unai pwalawa ta hemaisa, meta nige gonowana kabo tamowai kesega kesega kana teha gagilina mo ye hai."

⁸ Na kabo yona hekahekatao wa hesauna hesana Andeleya, Simona Petelo kana kaha wa, ye hededeau Yesu unai ⁹ ye wane, "Wawaya loheya hesau inai, na pwalawa haligigi yo yama gagilidi labui ede kalinawai. Na idohagi udiyedi kabo bodalakilaki ta ta hekaidi?"

¹⁰ Menai meta lagaulakilaki ye kini na kabatulidi se namwakalili, ede Yesu ye wane, "Kwa hededeau tamowai ne udiyedi na se tulidobi lagau ne unai." Na tautuli ne bodana wa luwadi ne unai meta loheloheyao badodi ede 5,000. ¹¹ Kabo Yesu pwalawa wa ye haidi na ye lautoki Yaubada unai, na ye soiyedi taututuli wa udiyedi. Yo hinage yama wa ye haidi na ye soiyedi. Na yodi nonoyena kadi pwalawa yo yama se haidi, na maudoidi wa kabo kai lakilakina se kai.

¹² Se kaikai ye lau ee kadi siga bogadi wa se sese. Kabo Yesu ye hededeau yona hekahekatao wa udiyedi ye wane, "Kaitole maudoina ne kwa tanogogoi, na tabu kwa gabagabagaibuidi." ¹³ Unai pwalawa haligigi wa taukaidi wa udiyedi kaitole maudoina se tanogogoi, ede bosa badona saudoudoilabui se hemwayaudi. ¹⁴ Na kabikabi gigigigibwalina Yesu ye ginauli tamowai wa se kita ede se wane, "Mamohoi, peloweta ta nayanaya'usei bena kabo ye laoma tanoubu ta unai wa* iya ede teina."

6:7 Denali 200 meta taupaisowa mayadai badodi 200 ye paisowa maisana. Denali kulihemasalahana kabo Maleko 6:37 unai ku hasili.

6:14 Dutelonomi 18:15 ku hasili.

6:31 Mana meta kai Yaubada ye mosemose Isalaela tamowaidi udiyedi huyana balabalagaibu unai se kadau. Hebelu 9:4 ku hasili, kabo unai *mana* hedehededenia ku lobai.

¹⁵ Yesu ye nuwatulobai meta kabo se muyowui bena se hetolo yodi wasawasa, unai ye laugabaedi na ye bom ye sae kuduli wa tehana hesau unai.

Yesu ye laulau Galili Gabwana kewana unai

¹⁶ Ye meimeilahi ede yona hekahekatao se dobi Galili Gabwana unai, ¹⁷ na waga hesau unai se gelu bena se kawasilau Kapelenuma. Ye masilikoi, na Yesu sola nige ye laoma udiyedi. ¹⁸ Yaumai lakilakina ede ye towatowa, unai gabwa wa ye wowoli. ¹⁹ Na se yale se lau keda lohana doha maela haiyona o hasi, na kabo Yesu se kita Gabwa wa kewana unai ye laolaoma waga wa hesabana. Ede se matausikalili. ²⁰ Na ye hededeau udiyedi ye wane, "Tabu kwa matamatausi. Yau Yesu." ²¹ Unai se henuwa bena taba ye gelu waga wa unai, na nige bayaona na waga wa ye dunasae yodi kabalu magaina wa unai.

Yesu iya ede mauli pwalawana

²² Mala ye tom ede boda se laugabae'useidi Galili Gabwana hali tanakawasina ne unai wa se nuwatulobai meta meimeilahi wa unai waga kesega mo se kita menai, na Yesu yona hekahekatao se bom mo waga wa unai se gelu se lau, na Yesu nige maiyadi.

²³ Kabo waga hekadi Tibeliya unai se laoma na se dunasae Guiyau yona lautoki kabaginaulina yo boda pwalawa yodi kabakaina magaina wa dedekanawai.

²⁴ Na huyana boda wa se nuwatulobai meta Yesu maiyanao hekahekatao wa nige menai, ede waga wa udiyedi se gelu na se lau Kapelenuma Yesu se wasenei.

²⁵ Na Gabwa hali tanakawasina wa unai se lobai ede se henamaiyei se wane, "Taulauhekata, kauyana ku laoma?"

²⁶ Yodi henamai wa Yesu ye bui ye wane, "Ya hedede demamohoi kalimiuwai: Kwa wasewaseneigau ta meta nige laulau gigigigibwalidi kwa kitadi wa debadiwai, na pwalawa kwa kaidi na bogamiu se sese wa debadiwai. ²⁷ Tabu kwa paisowa kai pwaspasana mo hesabana, na bena hinage kwa paisowa kai miyatahitahina hesabana. Iya kabo mauli nige kana siga ye leyawa. Teina kai ta kabo Tau Natuna ye leyawa, matauwuna Tamana Yaubada gigibwali ye moseyako kabo gonowana kai ta ye leyawa."

²⁸ Na kabo se henamaiyei se wane, "Idohagi na kabo Yaubada yona paisowa ka ginauli?"

²⁹ Yesu ye hededebeui ye wane, "Yaubada saha ye henuwagomiu bena kwa ginauli ede teina: Yona lauhetamali tamowaina ne kwa sunumaei."

³⁰ Na se henamai'uyo se wane, "Kabikabi gigigigibwalina saha ku ginauli ka kita na unai kabo ka kawamamohoiyego? Saha kabo ku ginauli?" ³¹ Kama kulutubuwao meta balabala wa unai 'mana'* se kai

doha kulikuli tabuna unai se kuliyako se wane, ‘Iya* meta galewa pwalawana ye moseidi se kai.’”*

³² Yesu ye hededelau udiyedi ye wane, “Ya hededemamohoi kalimiuwai: Galewa pwalawana meta Mose iya nige ye leyawa, na Tamagu iya galewa pwalawana mamohoina tauleyawana ede.

³³ Kaiteya galewa ne unai ye dobima na mauli ye mosei tanoubu ta udiyedi, iya meta pwalawa Yaubada unai ye laoma.”

³⁴ Kabo se wane, “Taubada, pwalawa ta bena huya badobado kamai ku haihaiyama.”

³⁵ Ede Yesu ye hededelau udiyedi ye wane, “Yau mauli pwalawana ede. Na kaiteya ye laoma kaliguwai meta taba nige ye hasali, yo kaiteya ye sunuma kaliguwai taba nige gadona ye magu.”³⁶ Na ya hededeyako kalimiuwai meta kabikabi gigigigibwalidi ya ginaulidi wa kwa kitadiko, na iyamo nige kwa kawamamohoiyegau.³⁷ Na kaiteyadi tamagu ye ledima, siya kabu se laoma kaliguwai. Na taulaoma kaliguwai ne, meta taba nige ya subudi.

³⁸ Matauwuna yau galewa ne unai ya dobima, meta nige bena yau yogu nuwatu ya ginauli, na Tamagu tauhetamaligau yona nuwatu mo bena ya ginaulidi.

³⁹ Na tauhetamaligau yona nuwatu ede teina: Kaiteyadi ye ledima kaliguwai, meta tabu hesauna ya hetaukwadalele, na hekasa mayadaina unai maudoidi kabu boita unai ya hetolo’uyoidi.⁴⁰ Na Tamagu yona nuwatu ede bena siya kaiteyadi taukitalau Natuna unai yo se sunumaei, meta mauli nige kana siga kabu se lobai, yo hekasa mayadaina unai kabu ya hetolo’uyoidi.”

⁴¹ Teina unai Dius tauwoyaidi se hetalapili, matauwuna Yesu ye wane, “Yau pwalawa mamohoina ede galewa ne unai ya dobima.”⁴² Ede se wane, “Teina tamowai ta iya meta Yesu, Yosepa natuna, tamana yo sinana meta kabidi ta kata. Na idohagi to ye wane, ‘Yau galewa ne unai ya dobima?’”

⁴³ Yesu ye hededelau udiyedi ye wane, “Saha ya hedededi ta udiyedi tabu kwa hetahetalapili.⁴⁴ Taba nige tamowai hesau ye laomagaibu kaliguwai, na Tamagu tauhetamaligau kabu ye laeyama kaliguwai, na huyagehena ne unai kabu ya hetolo’uyoi.⁴⁵ Doha peloweta hesau ye kuliyako ye wane, ‘Yaubada kabu tamowai maudoidi ye hekatadi.’* Na kaiteyadi se lapulau Tamagu unai yo se nuwatuwatani, kabu se laoma kaliguwai.⁴⁶ Nige tamowai hesau Tamagu ye kita, na iya Yaubada unai ye dobima ne ye bom mo Tamana ye kita.⁴⁷ Ya hededemamohoi kalimiuwai: Kaiteya ye sunuma kaliguwai meta iya mauli nige kana siga ye hai.⁴⁸ Yau mauli pwalawana ede.⁴⁹ Kami kulutubuwao balabala unai wa mana se kai, na iyamo maudoidi se boitageheko.⁵⁰ Na yau pwalawana ede

galewa ne unai ya dobima, na kaiteya pwalawa ta ye kai meta taba nige ye boita.

⁵¹ Yau pwalawa maumaulina ede galewa ne unai ya dobima. Ena tamowai hesau teina pwalawa ta ye kai, mauli nige kana siga kabu ye hai. Teina pwalawa ta iya ede yau bulumagu ta, kabu ya mosegabaei tanoubu ta tamowaidiyao yodi mauli hesabana.”

⁵² Na kabu Dius tamowaidi se hetahetalapili’uyoidi se wane, “Idohagi na kabu teina tamowai ta bulumana ye leyama ta kai?”⁵³ Yesu ye hededelau udiyedi ye wane, “Ya hededemamohoi kalimiuwai: Ena Tau Natuna bulumana nige kwa kai yo kwasinana nige kwa numa, taba nige mauli kwa hai.”⁵⁴ Na kaiteya bulumagu ye kai yo kwasinagu ye numa, iya meta mauli nige kana siga ye hai na huya gehena unai kabu ya hetolo’uyoi.⁵⁵ Matauwuna yau bulumagu ta, iya kai mamohoina yo kwasinagu ta numanuma mamohoina ede.⁵⁶ Na kaiteya bulumagu ye kai yo kwasinagu ye numa, iya kabu ye miyakesegai yau kaliguwai, yo yau kabu ya miya iya kalinawai.

⁵⁷ Tamagu tauhetamaligauma wa, iya mauli wuwuna na iya unai yau ya maumauli, na kaiteya bulumagu ne unai ye kaikai yo kwasinagu ne unai ye numanuma, kabu ye mauli yau debaguwai.

⁵⁸ Na pwalawa ta galewa ne unai ye dobima iya ede yau. Teina pwalawa ta udoikalili, nige doha kami mumugao se kai’usei wa. Siya mana se kai, na iyamo se boita. Na kaiteya teina pwalawa ta ye kai kabu mauli nige sigana ye hai.”

⁵⁹ Yesu hedehedede maudoidi ta ye hedededi huyana Kapelenuma unai sunago kalonawai ye lauhekata.

Yesu yona hekahekatao gwaudi iya se laugabaei

⁶⁰ Yona hekahekatao gwaudi* hedehedede wa se lapui ede se wane, “Teina lauhekata ta ye pilipilikilili. Kaiteya kabu ye lapulobai?”⁶¹ Yesu kabina ye kata meta yona hekahekatao wa se hetahetalapili, ede ye hededelau udiyedi ye wane, “Teina hedehedede ta ye hetausil’olologomiu?”⁶² Na yomi nuwanuwatu kabu doha saha, ena taba Tau Natuna kwa kita ye seuyo yona kabalaoma ne?⁶³ Yaluwa iya mauli tauleyawana ede, buluma nige gonowana mauli ye leyawa. Na hedehedede ya hedehedede kalimiuwai ta, meta Yaluwa mauli tauleyawana unai se laoma na mauli se leyawa.⁶⁴ Na komiu luwamiu ne unai hekadi meta nige se sunumaeigau.” Na huya bagubagunana unai ye laoma meta Yesu kabidi ye katako kaiteyadi kabu nige se sunumaei yo hinage kaiteya kabu kana tauwalohai ede.

⁶⁵ Kabu Yesu ye hedehedede’uyo ye wane, “Tamowai hekadiyo meta nige yodi sunuma, unai ede

6:31 Dius tamowaidi yodi nuwatu meta Mose balabala unai mana ye moseidi kadi kulutubuwao udiyedi.

6:31 Same 78:24 ku hasili.

6:45 Aisaiya 54:13 ku hasili.

6:60 Yesu yona hekahekatao gwaudi: Siya ede Yesu tauhemuhemuliwatanina maudoidi, na lausoisoi ta unai Yowane ye kataidi Yesu yona hekahekatao.

ya hededelaowako kalimiuwai meta nige gonowana tamowai se bom yodi nuwanuwatuyena na se laoma kaliguwai, kana sigana ena Tamana ye talamyeidi kabo se laoma kaliguwai."

⁶⁶ Teina hedehedede ta mulidiwai meta yona hekahekatao gwaudi se kaiyawasi na nige se hemuliwatani'uyoi.

⁶⁷ Kabo Yesu ye hededelau yona hekahekatao saudoudoi-labui wa udiyedi ye wane, "Na komiu hinage kwa henuwa bera kwa laugabaegau?" ⁶⁸ Ede Simona Petelo ye hedebabu ye wane, "Guiau, kabo ka lau kaituya unai? Kowa ku bom mo mauli nige kana siga hedehedede wa kalimwai." ⁶⁹ Ka kawamamohoiyego yo kabim ka kata meta kowa Tabuna Yaubada unai ku laoma."

⁷⁰ Na Yesu ye hedebabu ye wane, "Komiu saudoudoi-labui ta ya kaisunuwaigomiu, na iyamo luwamiu ne unai meta kesega iya Satani yona taupaisowa." ⁷¹ (Yesu meta Simona Isakaliyota natuna Yudasi ye hetahetala. Iya saudoudoi-labui wa hesau, na muliwai kabo iya Yesu kana ye walohai.)

Yesu kana kahao nige yodi sunuma

7 Saha se tubu ta mulidiwai kabo Yesu ye tautakikili Galili magaidiyo udoi'udoi udiyedi. Yona nuwatu bera tabu ye laulau Yudeya, matauwuwna temenai Dius tauwoyaidi iya se nayanaya ei bera kabo se unui. ² Na Dius yodi Gwau Miyaidi Henuwaisinina* huyana ye hanahanauma, ³ ede Yesu kana kahao se hededelau unai se wane, "Kowa taba ku lau Yudeya, na temenai laulau gigigibwalidi kabo ku ginaulidi na yom hekahekatao se kitadi." ⁴ Ena tamowai hesau ye henuwa bera tamowai maudoidi iya kabina se kata, meta saha ye ginaginaulidi ne taba nige ye ginauli wadawadamayena. Ena kowa laulau gigigibwalidi ku ginaginaulidi, bera ku hemasalahalayo na tamowai maudoidi se kitago." ⁵ Na iya kana kahao meta siya nige se kawamamohoiyei.

⁶ Na Yesu ye hededelau udiyedi ye wane, "Yau yogu huya sola nige ye lage bera taba ya lau. Na huya maudoina udiyedi meta komiu gonowana kwa lau." ⁷ Tanoubu ta tamowaidiyo taba nige gonowana se subugomiu, na yau meta se subugau, matauwuwna laulau saha se ginaulidi wa ya hedehedemasalahadi meta laulau ta se yababa." ⁸ Komiu kwa lau gwauyalu ne unai, na yau taba nige ya laowa, matauwuwna yogu huya dudulaina sola nige ye lage."

⁹ Teina hedehedede ta mulidiwai ede Yesu ye miyamiya teha Galili unai. ¹⁰ Iyamo huyana kana kahao wa se laoko gwauyalu ne hesabana, kabo iya

hinage ye lau, na yona lau ne unai meta tamowai nige kabina se kata. ¹¹ Na gwauyalu ne unai Dius tauwoyaidi Yesu se wasewasenei na se henahenamai se wane, "Tamowai wa, iya ede haedi?"

¹² Boda maudoidi iya se hetahetalagadigadiguyei. Hekadi se wane, "Iya tamowai namwanamwana." Na hekadi se wane, "Nigele! Iya boda taulupolupoidi." ¹³ Na iyamo nige tamowai hesau Yesu ye hedehedemasalahalaha boda kalidiwai, matauwuwna ede siya Dius tauwoyaidi wa se matausiyedi.

Gwau Miyaidi Henuwaisinina unai Yesu ye lauhekata

¹⁴ Gwauyalu mayadaidi duwaduwolina unai na kabo Yesu ye mwalaesae numa tabuna bakubakuna unai na ye hetubu ye lauhekata. ¹⁵ Ede Dius tauwoyaidi se siliyata na se wane, "Teina tamowai ta kulikuli tabudi nige se hekata. Na idohagi to kabidi ye katakalili?"

¹⁶ Yesu ye hededelau udiyedi ye wane, "Yogu lauhekata ta nige yau ya bom yogu nuwatu, na tauhetamaligauma yona nuwatu." ¹⁷ Ena tamowai hesau ye henuwa bera Yaubada yona nuwatu ye miyawatani, kabo gonowana yogu hedehedede ta ye nuwatulobaidi meta ya bom yogu lauhekata o Yaubada yona lauhekata. ¹⁸ Ena tamowai hesau ye bom yona nuwanuwatu unai ye hedehedede, meta ye henuwa bera taba tamowai iya se hededetausaei. Na yau yogu nuwatu ede bera tauhetamaligauma wa tamowai se hededetausaei. Unai ya hedehedemamohoi, na nige ya kaikailupolupo.

¹⁹ Mose laugagayo ye leyawa, na nige tamowai hesau luwamiyena laugagayo ta maudoidi ye miyawanatidi. Na ye saha to kwa henuwa bera kwa unuigau?"

²⁰ Boda wa se hedebabu se wane, "Yaluwa yababayabana ye luwigo. Kaituya ye henuwa bera ye unuigo?" ²¹ Yesu ye hededelau udiyedi ye wane, "Laulau gigigibwalina kesega ya ginauli Sabati mayadaina unai na maudoimiu kwa siliyata." ²² Sola pelitome kabikabina kwa nuwatui: Mose pelitome kabikabina ye hekatagomiu, na kabina kwa kata meta nige Mose unai ye laoma, na kada mumugao udiyedi ye laoma. Na komiu Mose yona lauhekata wa kwa ginauliwatanil* meta huya hekadi mayadai Sabati unai kwa hepelitome. ²³ Mayadai Sabati unai tamowai kwa hepelitome, na yomi nuwatu bera tabu Mose yona laugagayo kesega kwa utusi. Na yau meta mayadai Sabati unai tamowai hesau yaluwana yo tauna ya henawanamwadi. Na ye saha to kwa koipiliyegau? ²⁴ Tabu ginauli kadi kao udiyedi kwa kitadi na yomi hekasa kwa ginaginaulidi, na bera

7:2 Gwau Miyaidi Henuwaisinina meta iya ye hemala Dius yodi gwauyalu haiyona saesaedi wa hesau. Teina gwauyalu ta luwanawai meta Dius tamowaidi wine yo olibe kaniyodi se gigidiko wa meta gwauyaladi se gwauyalakesegai. Yo kaiwa lagalagadi udiyedi gwau se ginaulidi na udiyedi se miya. Teina ye hemala kadi mumugao balabalagaibu unai se miya bolimai 40 unai wa henuwaisinina. (Lewitkasi 23:33-36, 39-43; Dutelonomi 16:13-16). Unai Dius tamowaidi gwauyalu kabo se laoma se sae teha Yudeya magaina lakilakina Yelusalema unai, temenai kabo se gwauyalakesegai. Teina gwauyalu ta meta unai kabo mayadai haligigi-haiyona se haidi. Na yodi huyahaina meta Taukiuli Henuwaisinina mulinawai iya ede waikena haligigi-kesega mulidiyena.

7:22 Pelitome laugagayona meta wawaya labalabahauhauna yona mayadai hehaligigi-haiyonana unai se hepelitome. Genese 17:10-14 yo Lewitkasi 12:3 udiyedi ku hasili.

nuwanuwatu mamohoidi mo udiyedi yomi hekasa kwa ginaulidi.”

Dius tamowaidiyao yodi nuwapwanopwano

²⁵ Na Yelusalema tamowaidiyao hekadi se hedede se wane, “Teina tamowai ta meta se wasewasenei bena taba se unui. ²⁶ Na ye laoma ede boda matadiwai ye hedehedede, na idohagi to tauwoyaeda nige saha hesau se ginauli kalinawai? Nuwana kabina se kata meta iya Keliso? ²⁷ Na teina tamowai ta yona kabalaoma meta kabina ka katako. Taba iya Keliso meta yona kabalaoma nige gonowana tamowai hesau kabina ye kata.”

²⁸ Yesu sola numa tabuna bakubakuna wa unai ye laulauhekata na ye kalinalakilaki ye wane, “Komiu yomi nuwatu meta kabigu kwa kata yo yogu kabalaoma hinage kabina kwa katako. Iyamo ya laoma ta meta nige yau ya bom yogu nuwatuwai, na tauhetamaligauma ne meta iya mamohoina. Na iya nige kabina kwa kata, ²⁹ na yau meta kabina ya kata, matawuwuna ede iya unai ya laoma yo iya hinage ye hetamaligauma.”

³⁰ Kabo Yesu bena se kabihekahini, na iyamo nige tamowai hesau ye kabilau unai, matawuwuna yona huya sola nige ye lage. ³¹ Na boda wa luwadi ne unai meta tamowai gwaudi Yesu se sunumaei na se wane, “Ka nuwatui teina tamowai ta meta iya Keliso. Matawuwuna ede tamowai hesau nige gonowana laulau gigigibwalidi ye ginaulidi doha teina tamowai ta.”

Yesu tauhaina se hetamalidi

³² Bodalakilaki wa Yesu yona gigibwali wa se hetahetala, na Paliseya tamowaidiyao yodi hedehedede wa se lapui ede maiyadiyao kaitalasam tauwoyaidi kabu numa tabuna kedana taukitahetetena hekadiyo se hetamalidi se lau bena Yesu se hai na se laeyama kalidiwai.

³³ Yesu yona lauhekata ye tubei ye wane, “Huya kubwakubwa mo yau kabu maiyamiu na kabu ya uyo tauhetamaligauma wa unai. ³⁴ Komiu kabu kwa waseneigau, na taba nige kwa lobaigau; yo komiu nige gonowana kwa laoma yogu kabamiya ne unai.”

³⁵ Dius tauwoyaidi se bom se henahenamai’uyoidi se wane, “Teina tamowai ta kabu haedi ye laulau, unai taba nige ta lobai? Nuwana kabu ye lau kehadao se haimiyamiyaidi Giliki tamowaidiyao luwadiyena wa udiyedi, na menai kabu Giliki tamowaidiyao ye hekatadi? ³⁶ Yona hedehedede ta kaniyodi ede saha, doha ye wane, ‘Komiu kabu kwa waseneigau, na taba nige kwa lobaigau. Yo komiu nige gonowana kwa laoma yogu kabamiya ne unai.’?”

Waila maumaulina bonobonowasina

³⁷ Gwau Miyaidi Henuwaisinina mayadaina gehegehena yo saesaena unai kabu Yesu ye tolo na kalinana lakilakina unai ye wane, “Ena tamowai hesau gadona ye magu, meta bena ye laoma kaliguwai kabu waila ye numa. ³⁸ Doha peloweta hesau kulikuli tabuna unai ye kuliyanu ye wane, ‘Ena kaiteya ye sunuma kaliguwai, kabu iya unai waila maumaulina ye bonobonowasima.’”

³⁹ Teina hedehedede ta “waila maumaulina” meta Yesu Yaluwa Tabuna hedehededeni ye hedehededei. Na kaiteyadi Yesu se sunumaei kabu Yaluwa ne se hai, Huyana ne unai meta Yaluwa wa sola nige se hai, matawuwuna ede Yesu kana kao saesaena mamohoina Yaubada sola nige ye hemasalahi.

Boda wa se hekasa matawuwuna ede Yesu

⁴⁰ Boda wa teina hedehedede ta se lapui ede hekadi se wane, “Mamohoi, teina tamowai ta meta iya Peloweta* wa.”

⁴¹ Hekadi se wane, “Teina Keliso wa”, na hekadi se wane, “Nige. Kabina ka katako meta Keliso taba nige Galili unai ye laoma. ⁴² Na kulikuli tabuna unai ye hemasalahi meta Keliso ne iya wasawasa Dawida kana isimulita hesau na Dawida yona magai Betelehema unai kabu ye laoma.” ⁴³ Unai boda wa luwadiyena meta nuwanuwatu labui, matawuwuna ede Yesu. ⁴⁴ Na boda hesau se henuwa bena se kabihekahini, na iyamo nige tamowai hesau ye kabilau Yesu unai.

Dius tauwoyaidi Yesu nige se sunumaei

⁴⁵ Numa tabuna kedana taukitahetetena wa Yesu yona hedehedede wa se lapuidi ede se uyo taukitahetetena tauwoyaidi yo Paliseya tamowaidiyao wa udiyedi. Kabu tauwoyawoya wa se henamailau udiyedi se wane, “Matawuwuna saha to iya nige kwa hai na kwa woyaiyama?”

⁴⁶ Keda taukitahetetena wa se hedelau udiyedi se wane, “Sola nige tamowai hesau yona hedehedede ka lapui doha iya.”

⁴⁷ Paliseya tamowaidiyao wa se hedelau udiyedi se wane, “Nuwana komiu hinage ye lupohaigomiu?”

⁴⁸ Kabina kwa kata meta kai yo tauwoyawoya saesaedi luwamaiyena nige hesau tamowai me ye sunumaei.

⁴⁹ Na teina boda ta meta Mose yona laugagayo nige kabina se kata, unai Yaubada yona hededeheyababa kabu ye talu kalidiwai.”

⁵⁰ Na Nikodemo—iya nabada wa unai ye lau Yesu ye kita wa, yo iya tauwoyawoya ne kadi kaha hesau—ye hedelau udiyedi ye wane, ⁵¹ “Yoda laugagayo ye hedede meta taba nige tamowai hesau ta hegilugaibui, na bena ta lapulau unai yo saha ye ginauli wa wasana ye hedede ta lapubagunaei, na kabu ta nuwanuwatuheksa.” ⁵² Ede se hedebui se wane,

"Nuwana kowa hinage Galili unai ku laoma? Kulikuli tabuna bena ku hasilinamwanamwaei, na kabo unai ku lobai meta taba nige peloweta hesau Galili unai ye laoma." ⁵³ Na kabo maudoidi wa se dahalaigwaligwali se lau yodi numa.

Waihiu ganaganawalina se woyaiyama Yesu unai

8 Na kabo Yesu ye lau Olibe kudulina unai. ² Na malatomtom gagilina hesauna unai ye uyo numa tabuna bakubakuna wa unai. Temenai tamowai gwaudi se tupagogoima iya unai, ede ye tuli na ye hekatadi.

³ Na laugagayo taulauhekataedi yo Paliseya tamowaidiyo waihiu hesau se woyaiyama. Iya meta se lobai maiyana loheya hesau se ganawali. Na boda matadiwai se hetolo. ⁴ Kabo se hedehedelau Yesu unai se wane, "Taulauhekata, teina waihiu ta meta ka lobai maiyana loheya hesau se ganawali. ⁵ Na Mose yona laugagayo unai ye wane sinesineo doha teina meta bena ta lauwekuidi. Na kowa kabo saha ku hedede?" ⁶ Teina henamai ta se tole meta iya kabalaukitana, na saha ye hedede kalidiwai unai kabo iya se hegilu.

Na Yesu ye dunedobi na nima gigina unai bwatano wa unai ye hetubu ye kulikuli. ⁷ Na se henamai se muyomuyou, ede ye tolo'uyo na ye wane, "Kaiteya nige ba'aya hesau kalimwai kabo weku ku hai na ku tuubagunaei waihiu ne unai." ⁸ Na ye dunedobi ye kulikuli'uyo.

⁹ Waihiu tauhegiluna wa Yesu yona hedehedede se lapui ede se hetubu se dalahai, kesega kesega tautaubadao se baguna ye lau ee maudoidi se dalahaigehe, na Yesu yo waihiu wa se bom se laugabaedi boda wa luwadiyena. ¹⁰ Na kabo Yesu ye dunetolo'uyo, na ye henamailau waihiu wa unai ye wane, "Waihiu, maudoidi wa haedi? Hesau ye hegilugo o nige?"

¹¹ Waihiu wa ye wane, "Guiau, nige hesau." Ede Yesu ye hedehedelau unai ye wane, "Yau hinage nige ya hegilugo. Ku lau na tabu ku ba'aba'aya'uyo."

Yesu iya tanoubu ta malana ede

¹² Na kabo Yesu ye hedehedede'uyo boda wa udiyedi ye wane, "Yau tanoubu ta malana ede. Ena tamowai hesau ye hemuliwatanigau, taba nige masigili unai ye laulau, na iya kabo mauli malana unai ye laulau."

¹³ Paliseya tamowaidiyo se hededebeui se wane, "Yom hedehedede ta udiyedi meta kowa ku bom ku hedehedemasalahau'yoigo, unai yom hedehedede ta meta nige mamohoidi."

¹⁴ Yesu ye hededebeui ye wane, "Mamohoi, yau ya hedehedemasalahau'yoigau, na iyamo hedehededegeu ta meta mamohoidi. Matauwuwuna ede kabina ya kata haedi ya laoma yo hinage haedi kabo ya lau. Na teina nuwanuwatu ta meta komiu nige kabidi kwa kata.

¹⁵ Komiu tamowai yodi sonoga udiyedi kabo tamowai kwa kitahekasaki, na yau meta nige tamowai hesau ya kitahekasaki. ¹⁶ Na ena yau tamowai ya kitahekasaki meta yogu hekasa ne se dudulai, matauwuwuna ede yau nige ya bom ya kitahekasaki, na tamagu tauhetamaligauma wa meta maiyagu. ¹⁷ Na komiu yomi laugagayo unai ye hedehedemasalahau ye wane, 'Tamowai labui nuwatu kesega se hedehedemasalahau na se yaliyei meta hedehedede ne mamohoina.' ¹⁸ Na yau ya bom ya hedehedemasalahau'yoigau yo tamagu tauhetamaligauma wa iya hinage ye hedehedemasalahagau."

¹⁹ Ede se henamaiyei se wane, "Kowa tamam ede haedi?"

Yesu ye hededebeui ye wane, "Komiu nige yau kabigu kwa kata yo hinage tamagu nige kabina kwa kata. Ena taba yau kabigu kwa kata meta hinage tamagu kabina kwa kata."

²⁰ Huyana ne unai Yesu numa tabuna bakubakuna unai na moni kaba'usa'usa kabatolena dedekanawai ye laulauhekata na teina hedehedede ta ye hedede. Na iyamo iya nige se kabihekahini, matauwuwuna ede yona huya meta sola nige ye lage.

Yesu yona boita ye hedehedemasalahau

²¹ Na kabo yona hedehedede wa ye hedede'uyoidi kalidiwai ye wane, "Yau kabo ya laugabaegomiu, na kabo kwa wasewaseneigau, na yomi ba'aya debadiwai kabo kwa mwalo. Yogu kabalau ne meta komiu nige gonowana unai kwa lau."

²² Teina unai Dius tauwoyaidi se henahenamai'uyoidi se wane, "Idohagi, tamowai ta kabo ye bom ye unui'uyoi? Nuwana teina unai ede ye wane, 'Yogu kabalau ne meta komiu nige gonowana unai kwa lau'?"

²³ Kabo Yesu yona hedehedede wa ye tubei ye wane, "Komiu kaiyaulina ta unai kwa laoma na yau galewa ne unai ya laoma. Komiu tanoubu ta unai kwa laoma, na yau nige tanoubu ta unai ya laoma. ²⁴ Ya hedehedeyako kalimiuwai meta yomi ba'aya debadiwai kabo kwa boita. Ena nige kwa kawamamohoieigau meta Yau ede Iya,* mamohoikalili yomi ba'aya debadiwai kabo kwa mwalo."

²⁵ Ede se henamaiyei se wane, "Na kowa meta kaiteya?"

Ye wane, "Yau huya badobado ya hedehedemasalahau'useigau wa. ²⁶ Yau kaliguwai meta hedehedebemiu se bado kabo udiyedi ya hegilugomiu. Na tauhetamaligauma wa meta mamohoina, yo saha ya lapuhaidi kalinawai meta ya hededegabaedi tanoubu tamowaidiyo kalimiuwai."

²⁷ Na iyamo nige se nuwatulobai meta iya Tamana ye hetahetala. ²⁸ Ede Yesu ye wane, "Huyana Tau Natuna kwa lausini, metai kabo kwa kitalobai meta

8:24 Tausonoga gwaudi yodi nuwatu meta teina hedehedede ta Yau ede Iya kaniyona ede, Yau ede Yaubada. Na hisa mo yodi nuwatu meta kaniyona ede, Yau ede Keliso.

Yau ede lya, yo yau nige saha hesau ya bom yogu nuwatu ya lauwatani na ya ginauli, na Tamagu saha ye hekatagau wa kabo ya hedededi.²⁹ Na tauhetamaligauma wa meta iya maiyagu. Iya taba nige ye laugabaegau, matauwuna ede huya badobado laulau sahasahadi iya nuwana se henamwa meta ya ginaulidi.”³⁰ Teina doha Yesu ye hedehedede na tamowai gwaudi iya se sunumaei.

Yesu yona hekahekatao mamohoidiyo

³¹ Kabo Yesu ye hededelau Dius tamowaidi siya tausunumaena wa udiyedi ye wane, “Ena komiu yogu lauhekata ta kwa miyawatanidi, komiu meta yogu hekahekatao mamohoidi,³² na mamohoina kabo kabina kwa kata yo mamohoina ne unai kabo yailihai kwa hai.”

³³ Se hededebui se wane, “Kai Abelahama kana isimulitao, yo sola nige tamowai hesau ye haigai ka hemala yona heyayai tauhaina. Idohagi to kowa ku wane, ‘Komiu kabo yailihai kwa hai?’”³⁴ Yesu ye hedede'uyo ye wane, “Ya hededemamohoi kalimiuwai: Ba'aya tauginaginalidi maudoidi siya meta ba'aya yona heyayai tauhaidi.³⁵ Heyayai tauhaina meta iya nige kana tanuwaga yona numa ne bodana unai taumiyatahitahi, na numa ne tanuwagana natuna loheya meta iya numa ne bodana unai taumiyatahitahi ede.³⁶ Unai, ena Natuna ye yailihagomiu, komiu kabo yailihai mamohoina kwa hai.³⁷ Kabimiu ya kata meta komiu Abelahama kana isimulitao. Iyamo kwa nonohakalili bena kwa koihemwaloigau, matauwuna yogu lauhekata ta meta nige yodi kabamiya nuwamiu ne udiyedi.³⁸ Yau saha ya kita Tamagu unai ede ya hededehemasalahadi kalimiuwai, na komiu tamamiu saha ye hedehedede kalimiuwai wa kwa ginaginaliwananidi.”

Dius tamowaidiyo kadi kao mamohoidi Yesu ye hededehemasalahadi

³⁹ Na se hededelau unai se wane, “Kai tamamai meta Abelahama.” Yesu ye hededebui ye wane, “Ena komiu Abelahama natunao, saha ye ginaulidi wa kabo kwa ginauliwananidi.⁴⁰ Na yau meta mamohoina Yaubada unai ya lapui ede ya hedede kalimiuwai, na iyamo kwa henuwa bena kwa koihemwaloigau. Abelahama nige gonowana Yaubada yona tamowai hesau ye koihemwaloigaibui.⁴¹ Komiu meta tamamiu yona laulau kwa ginaginaliwananidi.”

Ede se hededelau unai se wane, “Kai nige ka tubusaema doha lobalobai, na tamamai kesega mamohoina ede Yaubada.”⁴² Kabo Yesu ye hededelau udiyedi ye wane, “Ena taba Yaubada komiu tamamiu mamohoina, kabo kwa gadosisiyegau. Matauwuna ede yau Yaubada unai ya dobima na inai ya miyamiya. Nige ya bom yogu nuwatu wai ya dobima, na iya ye hetamaligauma.⁴³ Matauwuna saha to yogu hedehedede nige kwa lapulobaidi? Kaniyona ede

yogu lauhekata ta nige kwa henuwadi.⁴⁴ Komiu tamamiu ede Satani, yo yona nuwatu yababayabadi kwa henuwa bena kwa ginauliwananidi. Iya taukai'unu huyabagubaguna unai na ye laoma ee teina, yo iya hinage taukailopolupo, matauwuna ede mamohoina wa nige kalinawai. Huyana ye hededelopolupo, meta iya kana kao mamohoina ye hemahemasalaha, matauwuna ede iya taulaululopolupo, yo laulaulopolupo maudoidi tamadi ede iya.⁴⁵ Na komiu nige kwa kawamamohoiyegau, matauwuna ede yau hedehedede mamohoidi ya hedehededeidi.⁴⁶ Hage, komiu luwamiu ne unai kaiteya gonowana ye hegilugau meta ya ba'aya? Na ena hedehedede mamohoidi ya hedehededeidi, ye saha to nige kwa kawamamohoiyeigau?⁴⁷ Na Yaubada yona tamowai meta saha Yaubada ye hededeli kabo ye lapuidi. Na komiu saha Yaubada ye hededeli meta nige kwa lapuidi, matauwuna ede komiu nige iya yona tamowai.”⁴⁸ Kabo Dius tamowaidiyo wa se hededelau Yesu unai se wane, “Na kai ka hedede ta meta ye dudulai ka wane, kowa Samaliya tamowaina yo yaluwa ybabana hesau ye luu kalimwai.”

Dius tamowaidiyo Yesu nige se kawamamohoiyei

⁴⁹ Yesu ye hededebui ye wane, “Yaluwa ybabana nige kaliguwai, na yau meta Tamagu ya hekasisiyei, na iyamo komiu nige kwa hekasisiyeigau.⁵⁰ Yau nige hedebasaegau ya wasenei, na hesau meta hedebasaegau ne ye henuwa, na iya meta tauhekasa ede.⁵¹ Ya hededemamohoi kalimiuwai: Ena kaiteya yogu hedehedede ta ye miyawatanidi, meta iya taba nige boita ye hekalo.”

⁵² Teina unai Dius tamowaidiyo se hededelau unai se wane, “Teina unai kabim ka kata meta yaluwa ybabana luwam ne unai. Abelahama ye boitako doha hinage peloweta maudoidi, na iyamo ku hedede ku wane, ‘Ena kaiteya yogu hedehedede ta ye miyawatanidi, meta taba nige boita ye hekalo.’⁵³ Na idohagi? Kowa bena ku saekalili na kabo tamamai Abelahama? Iya ye boitako, yo peloweta maudoidi hinage se boitako. Na yom nuwatu meta bena kowa kaiteya?”

⁵⁴ Yesu ye hededebui ye wane, “Ena taba ya bom ya hedebasae'uyoigau, meta yogu hedebasae'uyoigau ne nige kaniyona, na tauhedebasaegau ede Tamagu. Na Tamagu ede kwa hedehedede meta komiu yomi Yaubada.⁵⁵ Na iyamo iya nige kabina kwa kata, na yau kabina ya kata. Yo ena taba ya wane bena iya nige kabina ya kata meta yau taulaululopolupo doha komiu. Yau meta kabina ya kata yo yona hedehedede ya miyawatanidi.⁵⁶ Tamamai Abelahama ye henuwa bena yogu laoma mayadaina ne ye kita, na ye kitayako, ede ye gwauyalakalili.”

⁵⁷ Kabo Dius tamowaidiyo wa se hededelau unai se wane, “Kowa sola nige yom bolimai 50, na idohagi to ku hedede bena Abelahama ku kitayako?”

⁵⁸ Na Yesu ye wane, "Ya hededemamohoi kalimiuwai: Abelahaha sola nige ye tubu na yau meta Yaubada maiyagu." ⁵⁹ Teina debanawai weku se haidi na Yesu bena se lauwekui, na ye taukenokenowadam na numa tabuna wa ye pesagabaei na ye lau.

Yesu taumatagibugibuna matana ye helaladi

9 Huyana Yesu kedawai ye laulau meta tamowai hesau matagibugibuna ye kita. Tamowai ta huyalabasina unai meta matagibugibuna. ² Yona hekahekatao Yesu se henamaiyei se wane, "Tunuwaga, kaiteya yona ba'aya debanawai na tamowai ta matana se gibu? Iya o tamana yo sinana yodi ba'aya debadiwai?"

³ Yesu ye hededebui ye wane, "Teina tamowai ta o tamana yo sinana siya nige yodi ba'aya debadiwai. Na huyalabasina unai meta matagibugibuna, bena unai kabo Yaubada yona kabikabi gigigigibwalina ye hemasalah. ⁴ Tauhetamaligauma yona paisowa mayadaiyena bena ta ginaulidi. Nige bayaona kabo ye masigili, na masigili ne unai nige gonowana tamowai hesau ye paisowa. ⁵ Tanoubu ta unai yogu miya ta unai meta yau tanoubu ta malana ede."

⁶ Yesu ye hedehededegehe ede ye kaisodobi bwatano ne unai na bwatano gagilina ye hebigabiga, na kabo ye hai na ye sausae taumatagibugibu wa matana wa udiyedi. ⁷ Kabo ye hededelau unai ye wane, "Ku lau Silowama wailana kipuna unai matam ne ku deulidi." (Silowama kaniyona ede *hetamali*.) Kabo tamowai wa ye lau matana wa ye deulidi, na ye uyoma meta matana wa se lalako.

⁸ Tamowai wa dedekanaena taumiya tamowaidiyao yo tamowai hekadi, huyabagubagunawai se kitayako meta iya taukaikaibwada, ede se henahenamai'uyoidi se wane, "Tamowai ta, iya lahinaidi ye tutuli na ye kaikaibwada'usi wa o udoi?" ⁹ Na hekadi se wane, "Iya tamowaina ede." Na hekadi se wane, "Nige! Kana kao ne meta doha iya." Na iya ye bom mo ye hedehededehemasalah'uyoi ye wane, "Yau tamowaina ede."

¹⁰ Ede iya se henamaiyei, se wane, "Idohagi na matam ne se lala?"

¹¹ Na ye hededelau udiyedi ye wane, "Tamowai hesau hesana ede Yesu ye kaiso bwatano ne unai, ye hebigabiga kabo ye hai na ye sausae matagu ta udiyedi, na ye hededelaoma ede ya lau Silowama wailana kipuna unai ya deulidi. Unai ya lau matagu ta ya deulidi ede se lala."

¹² Kabo se henamaiyei se wane, "Tamowaina ede haedi?" Na ye wane, "Nige kabina ya kata."

Paliseya tamowaidiyao taunamwanamwa wa se henahenamaiyei

¹³ Kabo huyabagubaguna unai tamowai matana se gibu'usi wa se woyalae Paliseya tamowaidiyao udiyedi. ¹⁴ Mayadaina Yesu bwatano ye hebigabiga na ye sausae tamowai matana udiyedi na se lala wa meta

Sabati unai. ¹⁵ Na Paliseya tamowaidiyao se henamaiyei se wane, "Idohagi na matam ne se lala?" Tamowai wa ye hededebui ye wane, "Bwatano ye hai ye hesau matagu ta udiyedi na ya deulidi, ede se lala."

¹⁶ Paliseya tamowaidi hekadi se wane, "Tamowai ne nige Yaubada unai ye laoma, matauwuna iya mayadai Sabati nige ye hekasisiyei." Na hekadi se wane, "Idohagi to ba'aya tamowaina kabikabi gigigigibwalidi doha teina ye ginaulidi?" Ede menai Paliseya wa se hekasalabuiyedi, hekadi yodi nuwanuwatu udoi, yo hekadi yodi nuwanuwatu udoi.

¹⁷ Kabo Paliseya tamowaidiyao wa tamowai wa se henamaiyei'uyoi se wane, "Tamowai matam ne ye helaladi wa, ku hededehemasalah kalimaiyena meta iya kaiteya! Hage, yom nuwatu saha?" Tamowai wa ye wane, "Iya meta peloweta hesau."

¹⁸ Na mahana ne unai Dius tauwoyaidi wa sola nige se kawamamohoi bena huyabagubaguna unai tamowai ne matana se gibu na muliyena kabo se lala, ede tamana yo sinana se tauwasaidima ¹⁹ na se henamaiyedi se wane, "Mamohoina teina tamowai ta iya natumi? Na komiu kwa hedede bena huyalabasina unai meta matagibugibuna. Na idohagi to matana se lala?"

²⁰ Tamana yo sinana wa se hededebui se wane, "Kabina ka kata meta iya kai natumai, yo hinage huyalabasina unai meta iya matagibugibuna. ²¹ Na idohagi na matana se lala yo kaiteya matana ne ye helaladi meta nige kabina ka kata. Na iya tamowai lakilakina, unai kwa henamaiyei kabo yomiu ye hedehedede." ²² Tamana yo sinana doha teina se hedehedede matauwuna ede Dius tauwoyaidi se matausiyedi. Matauwuna tauwoyawoya wa se hededeyako meta kaiteya Yesu ye hededehemasalah iya Keliso, kabo sunago unai se hepesa. ²³ Teina debanawai ede tamana yo sinana se wane, "Iya tamowai lakilakina, unai hage kwa henamaiyei!"

²⁴ Ede tamowai matana se lalako wa se yoga'uyoiyama na se hededelau unai se wane, "Bena Yaubada ku hekasisiyei na ku hededemamohoi! Kai kabina ka kata meta tamowai wa iya ba'aya tamowaina."

²⁵ Na ye wane, "Yau nige kabina ya kata meta iya ba'aya tamowaina o nige. Na saha kabina ya kata ede huyabagubaguna unai matagu se gibu, na teina huya ta meta matagu se lalako."

²⁶ Ede se henamaiyei se wane, "Saha ye ginauli kalimwai? Idohagi na matam ne ye henamwanamwadi?"

²⁷ Na ye hededebui ye wane, "Teina ta ya hedehedeyako kalimiuwai, na nige kwa lapulau yogu hedehedede wa udiyedi. Matauwuna saha to bena kwa lapu'uyoidi? Kwa henuwa bena kwa hemala iya yona hekahekatao?"

²⁸ Kabo se hededeheyababa se wane, "Kowa teina tamowai ta yona hekahekata, na kai meta Mose yona hekahekatao. ²⁹ Kai kabina ka kata meta

Yaubada ye hedehededelau Mose unai, na teina tamowai ta yona kabalaoma nige kabina ka kata.”

³⁰ Kabo tamowai wa ye hedehededelau udiyedi ye wane, “Idohagi to komiu kwa nuwapwanopwano? Iya matagu ye helaladi, na iyamo nige kabina kwa kata meta haedi ye laoma.³¹ Kita kabina ta kata meta Yaubada nige ye lapulapulau ba'aya tamowaidiyao udiyedi, na ye lapulapulau tautaba'ohuina yo yona nuwatu tauginaulidi udiyedi.³² Huyabagubaguna unai ye laoma ee teina sola nige wasa hesau ta lapui meta tamowai hesau se labasi matagibugibuna na gonowana matana ne tamowai hesau ye kabihelala'uyoidi.³³ Ena taba teina tamowai ta nige Yaubada unai ye laoma, taba nige gonowana kabikabi gigigigibwalidi doha teina ye ginalidi.”

³⁴ Yona hedehedede wa udiyedi ede se wane, “Huyana se labasigo ye laoma ee teina meta kowa yababa tamowaina, na idohagi to bena ku hekatagai?” Ede iya sunago unai se hepesa.

Tauwoyawoya yodi matagibugibu

³⁵ Yesu wasa ye lapui meta tamowai wa sunago unai se hepesa, ede ye lau ye kita na ye henamaiyei ye wane, “Tau Natuna ku sunumaei?”

³⁶ Tamowai wa ye henamai ye wane, “Guizau, Tau Natuna ede kaiteya? Taba ku hekitagau, kabo ya sunumaei.”

³⁷ Yesu ye hedehededelau unai ye wane, “Tamowaina ede ku kitayako. Iya ede teina maidam kwa hedehedede ta.”

³⁸ Tamowai wa ye hedede ye wane, “Guizau, ya sunuma!”, na Yesu ye taba'ohui.

³⁹ Na kabo Yesu ye wane, “Hekasa hesabana ya laoma tanoubu ta unai, bena kaiteyadi matadi se gibu, kabo matadi se lala, na kaiteyadi matadi se lala, kabo matadi se gibu.”

⁴⁰ Paliseya tamowaidi hekadi siya Yesu dedekanawai na yona hedehedede ta se lapui, ede se henamaiyei se wane, “Idohagi? Saha ku hedede? Kai matamai ta nige se gibu.”

⁴¹ Yesu ye hedebabu ye wane, “Taba ena komiu matamiu se gibu, kabo nige yomi ba'aya. Na komiu kwa hedede kwa wane, ‘Matamai se lala,’ unai yomi ba'aya meta sola kalimiuwai.”

Yesu iya taukitaheteteda namwanamwana

10 Yesu yona hedehedede ye tubei ye wane, “Ya hededemamohoi kalimiuwai: Ena tamowai hesau mamoe yawolina ganana nige ye mwalaesae kawakedana unai, na tupwa hesau unai ye mwalaedikwa, meta iya taukabigaibu yo taukaiyahali.”

² Kaiteyana kawakeda ne unai ye mwalaesae iya meta mamoe taukitahetetedi mamohoina ede.³ Kawakeda taukitahetetenka kabo kawakeda guduna ye soke mamoe taukitahetetedi hesabana, yo mamoe ne se

lapulapulau taukitahetetedi ne kalinana unai. Iya yona mamoe hesadi ye kataidi na ye woyahepesadi.

⁴ Huyana yona mamoe ne ye woyahepesadi, meta ye bagunaedi na iya se hemuliwatani, matauwuna iya kalinana kabina se katakalili.⁵ Taba nige tamowai udi se hemuliwatani, na se wasabugabaei, matauwuna ede kalinana nige kabina se kata.”⁶ Teina palabole ta Yesu ye hedegabaei, na kaniyona saha bena ye hekatadi wa meta nige se nuwatulobai.

⁷ Unai Yesu ye hedede'uyo ye wane, “Ya hededemamohoi kalimiuwai meta yau Yaubada yona mamoe yodi kawakeda ede, unai kabo se mwalaesae Yaubada yona mamoe yawolina ganana unai.*⁸ Kaiteyadi se bagunama wa meta siya taukabigaibu yo taukaiyahali, na mamoe ne nige se lapulau udiyedi.⁹ Yau kawakedana ede. Kaiteyadi se laoma yau kaliguwai kabo se lusolalau Yaubada yona basileiya unai na mauli se lobai. Yo yodi kabala maudoina udiyedi kabo Yaubada ye kitahetetedi.

¹⁰ Taukaiyahali ye laoma ye kaiyahali, ye kaiunu yo ye heyababagomiu, na yau ya laoma bena mauli kwa hai. Iya ede mauli namwanamwakalikalilina.¹¹ Yau Yaubada yona mamoe taukitahetetedi namwanamwana ede. Taukitahetetedi namwanamwana ta yona mauli kabo ye mosegabaei yona mamoe hesabadi.

¹² Taupaisowa maisa tauhaihaina meta iya nige mamoe ne taukitahetetedi mamohoina, na huyana kedewanukula hesau ye kita ye laoma mamoe ne hesabadi meta kabo mamoe ne ye wasabugabaei. Na kedewanukula ne kabo mamoe ne ye henakudi, ye kalasidi na ye hetatagwaligwalidi.¹³ Taupaisowa maisa tauhaihaina wa ye wasabu, matauwuna iya taupaisowa mo unai nige ye modekalili mamoe ne udiyedi.

¹⁴ Yau mamoe taukitahetetedi namwanamwana ede, yo yogu mamoe kabidi ya kata yo siya hinage kabigu se kata,¹⁵ doha Tamagu kabigu ye kata yo hinage iya kabina ya kata. Yo yau yogu mauli kabo ya mosegabaei yogu mamoe hesabadi.¹⁶ Yau yogu mamoe hekadiyo hinage, meta siya nige teina yawoi ta unai, na bena taba ya woyaidima kabo hinage se lapulaoma kaliguwai. Kabo se hemala yawoi kesega yo hinage taukitahetetedi kesega.¹⁷ Tamagu ye gadosisiyegau, matauwuna yogu mauli kabo ya mosegabaei bena kabo ya hai'uyoi.¹⁸ Nige gonowana tamowai hesau yogu mauli ye haigabaei, na yau ya bom yogu nuwayaliwai kabo ya mosegabaei. Yau yogu gigibwali unai ya mosegabaei yo yogu gigibwali gonowana kabo ya hai'uyoi. Teina ta meta Tamagu ye hedede bena ya ginali.”

¹⁹ Teina lauhekata ta udiyedi ede Dius tamowaidiyao wa luwadiyena meta nuwanuwatu labui.²⁰ Bodalakilaki se wane, “Yaluwa ybabana ye luu kalinawai, ede ye bwadebwade. Idohagi to ta

lapulapulau unai?" ²¹ Na hekadi se wane, "Taba yaluwa yababana ye luu tamowai unai, teina hedehedede ta nige gonowana ye hededededi. Yo yaluwa yababana nige gonowana taumatagibugibu matana ye helala."

Dius yodi tauwoyawoya Yesu se subu

²² Na kabo Dius yodi Numa Tabuna Hetabu'uyoina Henuwaisinina* Yelusalema unai se ginauli. Tenem huyana ne meta huyagwagwama. ²³ Na Yesu numa tabuna teha hesauna hesana **Solomona yona Logologu** unai ye taitaihile. ²⁴ Na Dius tauwoyaidi Yesu se tolohetakikili na se henamaiyei se wane, "Huya lohana doha saha kabo ku henuwanuwatugai? Ena kowa Keliso, meta ku hedehedemasalah." ²⁵ Yesu ye hededebui ye wane, "Ya hededelaowako kalimiuwai, na nige kwa kawamamohoi. Na saha ya ginaginaulidi tamagu hesanawai, siya se hemasalahagau. ²⁶ Na komiu nige kwa kawamamohoiyeigau, matauwuwna ede komiu nige yau yogu mamoe. ²⁷ Yau yogu mamoe se lapulau kalinagu unai, yo kabidiyo ya kata, yo hinage se hemuliwatanigau. ²⁸ Yau mauli nige kana siga kabo ya moseidi, unai taba nige se lau yababa unai na se boita, yo tamowai hesau nige gonowana nimagu ta unai se haigabaedi. ²⁹ Tamagu meta mamoe ne tauledima ede, iya ye saekalili na kabo tamowai yo ginauli maudoidi. Unai Tamagu nimanawai nige gonowana se haigabaedi. ³⁰ Tamagu maidagu kai meta kesega."

³¹ Na Dius tauwoyaidi wa weku se haidi bena Yesu se lauwekui. ³² Na Yesu ye hededelau udiyedi ye wane, "Yau Tamagu yona kabikabi namwanamwadi gwaudi ya hemasalahadiko kalimiuwai. Na kabikabi sahasahana debanawai bena kwa lauwekuigau ta?"

³³ Dius tauwoyaidi wa se hededebui se wane, "Kai nige bena ginauli namwanamwadi ku ginaulidi ne debadiwai ka lauwekuigo, na matauwuwna ede Yaubada ku hededeheyahayababa. Kowa tamowaimolosi na ku hedede meta kowa Yaubada."

³⁴ Yesu ye hededebui ye wane, "Na yomi kulikuli tabuna unai Yaubada ye hedede ye wane, 'Komiu yaubada.*' ³⁵ Kulikuli tabuna nige ye lupo, na kulikuli ne unai ta hasili meta Yaubada yona hedehedede tauhaii ne ye kataidi siya yaubada. ³⁶ Na yau ya hedede ya wane, yau Yaubada natuna. Na matauwuwna saha to kwa hegilugau meta Yaubada ya hededeheyahayababa? Tamagu ye kaisunuwaigau na

10:22 *Numa Tabuna Hetabu'uyoina Henuwaisinina:* Bolimai 168 o 167 BC meta Antiyokas Epipanesa teha Siliya yodi tau'iyala tamowaidi ye woyaidi na se lau Yelusalema se gilihai na se kitahetete. Na numa tabuna unai buluka se kaitalasamyedi yodi yaubada lakinakina hesana Siyasi unai. Na teina unai numa tabuna wa se hebikikaliliyei Yaubada matanawai. Bolimai haiyona mulidiwai Yudas Makabias Dius yodi iyala tamowaidi ye woyaidi ede Yelusalema se gilihai'uyoi na numa tabuna yo kaitalasam milana wa se hetabu'uyoidi Yaubada unai. Bolimai badobado waikena Disemba unai Dius tamowaidiyo teina gwauyala ta se ginaginauli. Na Gwau Miyaidi Henuwaisinina gehena waikena labui mulidiwai kabo teina gwauyala ta se ginauli yo mayadai haligigi-haiyona unai kabo se gwauyalai. Teina gwauyala ta hesana hesau ede Mala Gwauyalana, matauwuwna Dius tamowaidi kabo yodi lampo gwaudi se gabudi na yodi numa udiyedi gwauyalai ta se gwauyalai. Na kalina Hebelu unai hesana se tole ede Hanuka, kaniyona ede Hetabu'uyoi.

10:34 Same 82 unai ye wane, Yaubada yona tamowai tauwoyaidi ye kataidi siya yaubada, matauwuwna iya ye kaisunuwaidi bena yona tamowai yodi tautolo yo yodi tauhekasa.

11:2 Yowane 12:1-8 ku hasili.

ye hetamaligau ya laoma tanoubu ta unai. ³⁷ Ena yau nige Tamagu yona paisowa ya ginaulidi, tabu kwa kawamamohoieigau. ³⁸ Na ena Tamagu yona paisowa ya ginaulidi, na iyamo nige kwa kawamamohoieigau, takiyede saha ya ginaginaulidi ne udiyedi kwa kawamamohoi. Teina unai kabo kabina kwa kata yo kwa nuwatulobai meta Tamagu iya ede kaliguwai yo yau ede Tamagu kalinawai." ³⁹ Ede se kaipate'uyo bena se kabihekahini, na ye wasabugabaedi.

⁴⁰ Na kabo Yesu ye lau Yolidani sagasagana ye kawasi ye lau teha hesau ne unai, iya ede lahinaiyi Yowane yona kabahebahebabatiso bagubaguna wa, na temenai ye miyamiya. ⁴¹ Na tamowai gwaudi se laoma iya unai. Na se bom yodi se hedehedede se wane, "Yowane nige kabikabi gigigibwalidi ye ginaulidi, na teina tamowai ta hedehededenma maudoidi Yowane ye hedehedemasalahadi wa meta mamohoidi." ⁴² Ede tenem teha ne unai tamowai gwaudi Yesu se sunumaei.

Lasalo yona boita

11 Betaniya tamowaina hesau hesana Lasalo ye kasiyebwa. Betaniya meta ma Maliya ma kana kaha Maleta yodi magai. ² Maliya ta iya ede yausi panepanena tau'inina Guiyau unai, na kuluna unai kaena ne ye saudi wa.* Na iya louna Lasalo ye kasiyebwa. ³ Kabo Maliya ma kana kaha kalina se hetamali ye lau Yesu unai se wane, "Guiyau, tamowai ku gadosisi'usei wa ye kasiyebwa."

⁴ Huyana Yesu wasa wa ye lapui ede ye wane, "Teina kasiyebwa ta taba nige ye lau ee boita, na Yaubada kabo kana kao saesaena mamohoina ye hemasalah, na bena unai Yaubada Natuna kana kao saesaena mamohoina hinage ye hemasalah."

⁵ Yesu iya Maleta ma kana kaha Maliya yo loudi Lasalo ye gadosisiyeidi. ⁶ Iyamo huyana wasa ye lapui meta Lasalo ye kasiyebwa kabo sola mayadai labui ye miya'uyo yona kabamiya wa unai.

⁷ Na kabo Yesu ye hededelau yona hekahekatao wa udiyedi ye wane, "Kwa laoma ta uyo Yudeya."

⁸ Yona hekahekatao wa se wane, "Taulauhekata, lahinaiyi Dius tauwoyaidi bena se lauwekuigo. Idohagi na bena ta uyo temenai?"

⁹ Yesu ye hededebui ye wane, "Mayadai kesega kesega unai mala yona sina meta mahana saudoudoilabui. Ena tamowai hesau mayadai unai ye laulau,

taba nige ye kalabesibesi, matauwuwuna ede tanoubu ta dawayana wa unai ye laulau.¹⁰ Na ena tamowai hesau boniyai unai ye laulau kabo ye kalabesibesi, matauwuwuna ede dawaywa wa nige kalinawai."

¹¹ Teina hedehedede ta mulinawai Yesu ye wane, "Kada kaha Lasalo ede ye kenokeno, na yau ya lau kabo ya hano hetolo."

¹² Yona hekahekatao wa se hededelau unai se wane, "Guiau, ena ye keno, kabo ye namwanamwa'uyo."¹³ Yesu yona hedehedede ne kaniyona ede, meta Lasalo ye boitako, na yona hekahekatao yodi nuwatu meta Yesu ye wane, iya ye kenokeno.

¹⁴ Ede Yesu ye hedehedehedulai ye wane, "Lasalo meta ye boitako.¹⁵ Na komiu debamiuwai meta ya gwauyala. Ye namwakalili ede yau nige temenai. Unai kabo kwa kawamamohoi. Na kwa laoma ta lau."

¹⁶ Ede Tomasi (hesau Didimasi, kaniyona ede godegode) ye hededelau yona hali hekahekatao wa udiyedi ye wane, "Kwa laoma ta lau, kabo iya maiyada ta boita."

Yesu Lasalo ye hetolo'uyo

¹⁷ Na huyana Yesu ye lage ede wasa ye lapui meta Lasalo se toleyako bwayabwaya unai, na mayadai hasi se laoko.¹⁸ Betaniya meta Yelusalema dedekanawai, na kedana lohana meta doha maela labui.¹⁹ Na Dius tamowaidiyo gwaudi Yelusalema unai se laoma Maleta yo Maliya udiyedi bena loudi yona boita nuwayababana wa unai nuwadiyao se hedehetaludi.²⁰ Huyana Maleta wasa ye lapui meta Yesu ye laoma, ede numa wa ye pesagabaei ye lau ye hailobai, na Maliya ye miyamiya.

²¹ Maleta ye hededelau Yesu unai ye wane, "Guiau, taba kowa bena inai, lougu ta taba nige ye boita.²² Na kabina ya kata meta saha ku kaibwadai Yaubada unai, kabo ye leyawa."

²³ Yesu ye hededelau unai ye wane, "Loum ne kabo boita unai ye tolo'uyo."

²⁴ Maleta ye hedebui ye wane, "Kabina ya kata ede huya mulimilitana unai boita tolo'uyona unai kabo ye tolo'uyo."

²⁵ Yesu ye hededelau unai ye wane, "Yau tolo'uyona yo maulina ede. Kaiteya ye sunuma kaliguwai, kabo boita unai ye tolo'uyo na ye mauli.

²⁶ Na kaiteya ye maumauli na ye sunuma kaliguwai, taba nige boita helabuina ye hekalo, na mauli nige kana siga kabo ye hai. Yugu hedehedede ta ku kawamamohoiyei?"

²⁷ Maleta ye hedebui ye wane, "Aa! Guiau, yom hedehedede ne ya kawamamohoiyei. Yo hinage ya kawamamohoi meta kowa Keliso, Yaubada Natuna, iya ede ye dobima tanoubu ta unai."

²⁸ Na teina hedehedede ta mulinawai ede ye uyo numa na kana kaha Maliya ye yogahesuwa na ye wane, "Taulauhekata wa, iya ede teinai na ye henuwa bena ye kitago."²⁹ Maliya hedehedede ta ye lapui ede

ye tolomwayamwayau ye lau Yesu unai.³⁰ Na Yesu sola nige ye lagelau kasa wa unai, iya meta Maleta yona kabahailobaina wa unai.³¹ Dius tamowaidiyo se laoma bena Maliya ma kana kaha nuwadiyao se hedehetaludi wa, meta siya Maliya maiyadi numa wa unai. Na huyana Maliya se kita ye tolomwayamwayau ye pesa ye lau, ede se hemuliwatani. Yodi nuwatu bena kabo ye lau bwayabwaya wa unai ye doudou.

³² Huyana Maliya ye lage Yesu unai na ye kita, ede matana wa unai ye tulibonodobi na ye wane, "Guiau, taba kowa teinai, lougu ta nige gonowana ye boita."

³³ Na Maliya yo tauhemuliwatanina wa Yesu ye kitadi se doudou, meta nuwana ye kamkamnakalili,³⁴ na ye henamaiyedi ye wane, "Haedi iya kwa hekeno?" Se hedebui se wane, "Ku laoma ta lau na kabo ka hekitago."

³⁵ Kabo Yesu ye dou.³⁶ Ede tamowai wa se wane, "Kwa kita ne, iya ye gadosisikaliliyei."³⁷ Na hekadi se bom se hedehedede se wane, "Na teina tamowai ta taumatagibugibu wa matana ye helala. Na idohagi to nige saha hesau ye ginaluli kabo unai Lasalo taba nige ye boita?"

³⁸ Yesu sola ma nuwakamkamnana na ye laoma ye lage bwayabwaya wa unai. Bwayabwaya wa meta weku duhana, na weku lakilakina hesau unai kawamatana wa se buigudui.³⁹ Yesu ye wane, "Buigudu wekuna ne kwa hesigihesuwa."

Na Maliya, iya tauboita wa louna, ye wane, "Guiau, lougu ye boitako na mayadai hasi se laoko, debanawai kabo panena ye yababa."

⁴⁰ Na Yesu ye hededelau unai ye wane, "Nige ku lapui meta ya hedehetako kalimwai, ena taba ku sunuma, Yaubada kana kao saesaena mamohoina kabo ku kita."

⁴¹ Ede weku wa se hesigihesuwa, na Yesu ye kaikewasae galewa ne na ye wane, "Tamagu, ya lautokiyeigo, matauwuwuna ede kowa ku lapulapulaoma kaliguwai.⁴² Kabina ya kata meta kowa huya maudoina ku lapulapulaoma kaliguwai, na teina ya hedehetalaki ta tautolohetakikiligau ta hesabadi, unai kabo se kawamamohoi meta kowa tauhetamaligaua ede."

⁴³ Teina hedehedede ta mulinawai Yesu kalinana lakilakina unai ye yoga ye wane, "Lasalo, ku pesama!"

⁴⁴ Ede tamowai boibotana wa ye pesama, nimana yo kaena meta kaleko tupwadiyao lohalohadi udiyedi se sumadi yo kuluna hinage kaleko hesau unai se suma. Yesu ye hededelau tamowai wa udiyedi ye wane, "Tauna sumadi ne kwa yailihaidi na ye laulau."

Tauwoyawoya yodi hineli bena Yesu se koihemwaloi

⁴⁵ Dius tamowaidiyo Maliya maiyadi taulau wa Yesu yona kabikabi wa se kita ede gwaudi iya se sunumaei.

⁴⁶ Na hekadi se lau Paliseya tamowaidiyo udiyedi, na Yesu saha ye ginaluli wa wasana yodi se hedehedede.⁴⁷ Ede taukaitalasam tauwoyawaidi yo

Paliseya tamowaidi Sunedeli koigogona se heyoga. Se laomagogoi na se henahenamai'uyoidi se wane, "Teina tamowai ta meta kabikabi gigigigibwalidi gwaudi ye ginaulidi. Na saha kabo ta ginauli?"⁴⁸ Ena taba ta kitagabaei doha teina meta tamowai maudoidi kabo iya se sunumaei. Unai kabo Loma tamowaidi* yoda numa tabuna yo yoda basileiya ta se heyababa."

⁴⁹ Na luwadi wa unai hesau hesana ede Kaiyapasi, iya tenem bolimai ne unai meta taukaitalasam saesaena, na ye wane, "Komiu nige saha hesau kabina kwa kata."⁵⁰ Na nuwamiu ne nige se masalaha. Ye namwakalili taba tamowai kesega ye boita tamowai maudoidi hesabadi, na kabotaki basileiya maudoina ta se heyababa."

⁵¹ Kaiyapasi tenem nuwatu ne nige ye hededegeabui, na tenem bolimai ne unai meta iya taukaitalasam saesaena, unai ede ye hededepeeloweta meta Yesu kabo ye boita Dius tamowaidiyao hesabadi.⁵² Na nige bena Dius se bom hesabadi, na Yaubada natunao se tatagwaligwali teha udoi'udoi udiedi wa hinage hesabadi. Teina unai kabo Yaubada natunao maudoidi se hemala boda kesega.

⁵³ Ede tenem mayadai ne unai ye lau meta yodi hineli se ginauli taba idohagi na Yesu kabo se koihemwaloi.⁵⁴ Unai Yesu nige ye taumasalahalau'uyo Dius tamowaidiyao udiedi, na ye dahalai ye lau teha hesau balabalana dedekanawai, na menai magai gagilina hesau hesana Epelaima unai maiyanao hekahekatao wa se miya.

⁵⁵ Na Taukiuli Henuwaisinina huyana ye hanahanauma, ede Dius tamowaidi gwaudi teha udoi'udoi udiedi taumiya se sae Yelusalema bena yodi lauhe'a'a kabikabidi se ginaulibagunaidi, na kabo Taukiuli henuwaisinina.⁵⁶ Na Yesu se wasewasenei, na numa tabuna bakubakuna unai se totolo na se henahenamai'uyoidi se wane, "Kwa nuwatui meta kabo ye laoma gwauyala ta unai o nige?"⁵⁷ Na taukaitalasam tauwoyaidi yo Paliseya tamowaidi meta hedehedede se toleyako tamowai maudoidi udiedi, ena taba hesau Yesu ye kita, kabo ye laoma tauwoyawoya ne ye hekatadi, na kabo Yesu se kabihekahini.

Maliya Yesu kaena ye heyausidi

12 Mayadai haligigi-kesega mo matadi ne unai na kabo Taukiuli Henuwaisinina huyana, na Yesu ye lagelau Betaniya, teina meta Lasalo boita unai ye hetolo'uyoi wa yona magai.² Ede temenai kaikaigogo gagilina se ginauli Yesu hesabana. Maleta meta kadi haitala wa ye kabinonohai, na Lasalo maiyanao Yesu ma kana bodoa wa se kaikaigogoi.³ Na Maliya yausi panepanena pakuna ye hai ede ye ini Yesu kaena ne

udiyedi na kuluna ne unai ye sauhepalidi. Na panena meta numa wa ye laugilihai. Na yausi ne nadi* unai se ginauli, lakina ede lita kesega tehana, na maisana ye lakikalili.

⁴ Na Yudasi Isakaliyota, iya Yesu yona hekahekata wa hesau na iya kabo kana tauwalohai ne, iya ye wane,⁵ "Idohagi to teina yausi panena namwanamwana ta nige ku lokunei, kabo maisana denali 300 ku hai, na monina ne kabo ye lau taudehadeha udiedi?"⁶ Yudasi saha ye hedede ta meta nige taudehadeha ye nuwatukaliliyedi, na matauwuwuna ede iya taukabikabigaibu. Iya meta yodi kabahaisagusagu monina tobwana taukitahetetena, na yona laulau ede moni tobwana ne unai hekadi ye haihaigaibuidi.

⁷ Yesu ye hededebugi ye wane, "Waihiu ne ku kitagabaei! Saha ye ginauli ne meta yau kabo se tolegau bwayabwaya ne unai kabinonohana.⁸ Huya badobado taudehadeha kabo maiyamiyao, na yau meta taba nige huya badobado maiyamu."

⁹ Na Dius tamowaidiyao bodalakilaki wasa se lapui meta Yesu iya ede Betaniya unai. Ede se lau temenai nige bena Yesu ye bom se kita, na Lasalo hinage, iya ede tamowaina ye boita na Yesu ye hetolo'uyoi'usei wa.¹⁰ Unai ede taukaitalasam tauwoyaidi wa yodi hineli se ginauli meta bena kabo Lasalo hinage se koihemwaloi.¹¹ Matauwuwuna Lasalo yona tolo'uyo ne debanawai, Dius bodalakilaki yodi tauwoyawoya wa se laugabaedi na se lau Yesu se sunumaei.

Yesu se hailobai yo se hedebasae Yelusalema unai

¹² Mayadai hesauna kabo Yesu ye lau Yelusalema. Tenem mayadai ne udiedi bodalakilaki teha maudoidi udiedi se laoma na Yelusalema unai se miyamiya, Taukiuli Henuwaisinina hesabana. Boda wa wasana se lapui meta ye laolaoma¹³ ede tutube bagadi se baheidi na se lau se hailobai yo se heyoheyoga se wane,

"Hosana!*

Ka hedebasaeego, kowa Guiyau hesanawai ku laoma.

Ka hedebasaeego, kowa Isalaela yoma wasawasa."

¹⁴ Yesu donki saehauna ye lobai ede ye gelusae unai, doha peloweta hesau ye kuliyaoye wane,

¹⁵ "Yelusalema tamowaidi,* tabu kwa matausi!

Kwa kitalau! Yomi wasawasa wa donki saehauna unai ye tutuli na ye laolaoma." (Sakaliya 9:9)

¹⁶ Na tenem huyana ne unai hekahekatao wa nige se nuwatulobai meta kulikuli ta Yesu hedehededen. Na muliyena, huyana Yesu ye tolo'uyo yo ye sae galewa ne unai na yona hekahekatao wa kana kao saesaena mamohoina se kita, kabo se nuwatulobai

11:48 Tenem huyana ne unai Dius tamowaidiyao siya ede Loma tamowaidiyao yodi kitahetete unai.

12:3 Nadi kaniyona meta Maleko 14:3 unai ka kulihemasalahna na ku hasili.

12:13 Kalina Hebelu unai hedehedede Hosana kaniyona bagubagunana ede, "Ku gilihaigai". Na Yesu yona huya wa unai meta ye hemala hedebasae hedehededen. Unai ede ka kulisai ka wane, "ka hedebasaeego".

12:15 Kalina Giliki bukadi beyabeyadi se bado se kuli se wane "Saiyona natuna waihiu", na kaniyona ede, "Yelusalema tamowaidi".

meta kabikabi maudoidi ta siya ede kulikuli tabudi
udiyedi se kulinonohaidiko wa.

¹⁷ Na huyana Yesu Lasalo ye yogahepesa
bwayabwaya unai yo boita unai ye hetolo'uyoi wa
meta bodalakilaki maiyanao. Na saha ye ginauli wa se
kita meta sola se hewahewasa. ¹⁸ Na tamowai gwaudi
kabikabi gigigibwalina ye ginauli wa wasana se lapui,
ede se lau Yesu se hailobai. ¹⁹ Na Paliseya tamowaidi
se bom yodi se hedehedede se wane, "Sola kwa kita!
Nige gonowana saha hesau kabo ta ginauli kalinawai.
Kaniyona ede tanoubu maudoina iya se
hemuhemuliwatani."

Yesu yona boita ye hedehededei

²⁰ Na tausae Yelusalema Taukiuli Henuwaisinina unai
tautaba'ohu wa luwadi ne unai meta Giliki tamowaidi
hekadi. ²¹ Na siya se lau Pilipo unai, iya meta magai
Betesaida teha Galili ne tamowaina, na se hededelau
unai se wane, "Taubada, ka henuwa bena Yesu ka
kita." ²² Ede Pilipo ye lau Andeleya yona ye
hedehedede, na kabo taudi labui se lau Yesu yona se
hedehedede.

²³ Na Yesu ye hededebui ye wane, "Mahanana wa
ye lageko, Tau Natuna kabo kana kao saesaena
mamohoina ye masalaha. ²⁴ Ya hededemamohoi
kalimiuwai: Ena witi tumana nige ye beku bwatano ne
unai na ye mwaloi, kabo ye miyamiya mo. Na ena ye
bekudobi na ye mwaloi, meta kabo kaniyona gwaudi
ye hetubudi. ²⁵ Na kaiteya yona mauli tanoubu ta unai
ye gadosisiyei, kabo ye kabisapuli. Na kaiteya yona
mauli tanoubu ta unai nige ye gadosisiyei, kabo mauli
nige kana siga ye hai. ²⁶ Ena tamowai hesau ye
henuwa bena yogu ye paisowa, meta bena ye
hemuliwatanigau. Yau haedi ya miya meta yogu
heyayai tauhaina hinage kabo temenai. Na yogu
heyayai tauhaina ne meta kabo Tamagu iya ye
hekasisiyei.

²⁷ Mahana ta unai yau meta nuwagu ta unai ya
hekohekoidada, na kabo saha ya hedede? Taba
gonowana ya kaibwada Tamagu unai ya wane,
'Mahana ta unai ku gilihaigau'? Taba nige. Ya dobima
ta meta bena kamkamna matagu ne unai ya hekalo."

²⁸ Na kabo ye wane, "Tamagu, hesam ku
hesaekaliliyei." Kabo kalina hesau galewa ne unai ye
dobima ye wane, "Yau hesagu ya hesaeyako na kabo
ya hesae'uyoi." ²⁹ Na bodalakilaki temenai se totolo
wa kalina ta se lapui ede yodi nuwatu bena tulutululu.
Na hekadi se wane, "Nuwana anelu hesau ye
hedehedelau Yesu unai." ³⁰ Na Yesu ye hededebui
ye wane, "Tenem kalina ne meta komiu hesabamu,
yau nige. ³¹ Na teina mahana ta unai Yaubada kabo
tanoubu ta ye hekasa, yo tanoubu ta yodi wasawasa*
yona gigibwali kabo ye hetatagwaligwali. ³² Na huyana

tano unai yau se lausinigau, kabo tamowai maudoidi
ya yogagogoidi se laoma kaliguwai."

³³ Yesu ye hedede doha teina meta bena yona
boita kana kao ye hedehedemasalaha.

³⁴ Ede boda wa se henamaiyei se wane, "Kai
laugagayo unai ka lapui meta Keliso kabo ye miya ye
lau ee huya nige kana siga. Na idohagi to ku wane,
'Tau Natuna kabo se lausini'? Na teina Tau Natuna ta
meta kaiteya?"

³⁵ Na kabo Yesu ye hededelau udiyedi ye wane,
"Mala* ta kabo maidamiu kwa miya
huyakubwakubwa mo. Na mala maidamiu ta unai ne
bena kwa laulau, na tabu masigili ye taukasinigomiu.
Na kaiteya masigili unai ye laulau meta nige kabina ye
kata haedi ye laulau. ³⁶ Na mala maidamiu ta unai ne
bena kwa sunumaei, ede kabo kwa hemala mala
natunao." Teina hedehedede ta mulinawai ye
laugabaedi na ye lau ye kenowadamayed.

Dius tamowaidi nige tausunuma hedehedededi

³⁷ Yesu kabikabi gigigibwalidi gwaudi ye ginaulidi
Dius tamowaidiyo matadiwai, na iyamo nige se
kawamamohoiyei. ³⁸ Teina ta meta Aisaiya peloweta
yona hedehedede wa ye hemamohoiyei, doha ye
wane,

"Guiyau, yoda wasa wa kaiteya ye
kawamamohoiyei?

Na kaiteya unai Yaubada yona gigibwali ye
hemasalaha?" (Aisaiya 53:1)

³⁹ Na Dius tamowaidiyo wa nige gonowana se
kawamamohoi, matauwunawa ede teha hesau unai
peloweta wa ye hedede ye wane,

⁴⁰ "Guiyau tamowai matadiyo ye hegibugibudi,
yo nuwadiyo ye hekwailolodi,
unai taba nige matadi udiyedi se kita,
yo taba nige nuwadi udiyedi se nuwatulobai,
yo taba nige nuwadi se buidi na unai kabo ya
henamwanamwadi." (Aisaiya 6:10)

⁴¹ Aisaiya teina ye kulihamasalaha, matauwunawa Yesu
kana kao saesaena mamohoina ye kita, na Yesu
hedehededeni ye hedehededei.

⁴² Na iyamo tamowai gwaudi Yesu se sunumaei,
luwadi ne unai hekadi meta Dius tauwoyaidi. Na
Paliseya tamowaidi debadiwai ede yodi sunuma wa
nige se hemasalaha, kaniyona ede se matausi ena
kabidi se kata kabo sunago unai se hepesadi. ⁴³ Siya
meta tamowai yodi noko kalidiwai ne se
henuwakaliliyei na kabo Yaubada yona noko.

⁴⁴ Na kabo Yesu kalinana lakilakina unai ye wane,
"Kaiteya ye sunumaeigau, meta nige yau ya bom mo
ye sunumaeigau, na hinage tauhetamaligauma wa ye
sunumaei. ⁴⁵ Yo kaiteya ye kitagau, meta
tauhetamaligauma wa ye kita. ⁴⁶ Yau ya dobima
tanoubu ta yona mala, unai kaiteyadi se sunumaeigau
taba nige masigili unai se miya. ⁴⁷ Na ena tamowai

12:31 Tanoubu ta yodi wasawasa iya ede Satani.

12:35 Mala meta Yesu heyahayasonina.

hesau yogu hedehedede ta ye lapuidi na nige ye miyawatanidi, taba nige yau yona ya hekasa. Matauwuwuna yau ya dobima ta nige bena tanoubu ta ya kitaheskasa, na bena ya hemauli.⁴⁸ Tausubugau yo yogu hedehedede nige taukabihekahinidi tauhekasadi nonohana ede ye miya. Hedehedede ya hededediko wa, siya kabo kabahegiludi huyagehena ne unai.⁴⁹ Matauwuwuna yau nige ya bom yogu nuwatu unai ya hedehedede, na Tamagu iya tauhetamaligauma wa ye hekatagau saha kabo ya hedede yo idohagi kabo ya hedededi.⁵⁰ Na kabina ya kata meta yona hedehedede ne kabo mauli nige kana siga ye leyama. Unai teina saha ya hedededi ta meta gonogonowana doha saha Tamagu ye hededeidi kaliguwai wa bena kabo ya hededehemasalahadi."

Yesu yona hekahekatao kaedi ye deulidi

13 Mayadai kesega mo na kabo Taukiuli Henuwaisinina mayadaina, na Yesu kabina ye kata meta yona huya ye lagemako kabo tanoubu ta ye laugabaei na ye seuyo Tamana unai. Yesu yona hekahekatao siya tanoubu ta unai, huya maudoina ye gadosisiyedi, na tenem huyana ne unai meta yona gadosisi lakilakikalilina ye hekitadi.

² Meimeilahi kaina se kabinonohaiyako, yo Satani yona nuwatu meta ye toleyako Yudasi Isakaliyota, Simona natuna unai, iya kabo Yesu kana ye walohai.

³ Na Yesu kabina ye kata meta ginauli maudoidi Tamana ye tolediko iya yona gigibwali unai, yo iya Yaubada unai ye laoma na kabo ye seuyo Yaubada unai.⁴ Ede Yesu kabakaikai hatahatana ye tologabaei, na yona likwakewa luwuluwuna ye haigabaei, na sauwela ye hai ede duwaduwolina wa unai ye pai.*⁵ Na kabo waila ye ini disi hesau unai, na ye hetubu yona hekahekatao kaediyo ye deulidi, na duwaduwolina unai sauwela ye pai wa unai ye saudi.

⁶ Huyana ye laoma Petelo unai, ede Petelo ye hededorlau unai ye wane, "Guizau, kabo kaegu ta hinage ku deulidi?"

⁷ Yesu ye hededebei ye wane, "Saha ya ginaginauli ta sola nige ku nuwatulobai, na mulinawai kabo ku nuwatulobai."

⁸ Petelo ye wane, "Tabu kaegu ta ku deudeulidi."

Yesu ye hededebei ye wane, "Na ena taba nige kaem ne ya deulidi, mamohoi, meta kowa nige gonowana yogu tamowai hesau."

⁹ Petelo ye wane, "Guizau, besi, nige kaegu ta se bom, na nimagu yo kulugu hinage ku deulidi."

¹⁰ Yesu ye hededebei ye wane, "Kaiteya ye duiko meta tauna maudoina ne ye a'ako, unai taba nige ye dui'uyo, na kaena se bom mo taba ye deulidi. Komiu maudoimiu ne kwa a'ako, na kesega mo meta nigele."

¹¹ Yesu kabina ye kata meta kaiteya kabo kana ye walohai, ede ye hedede ye wane, "Komiu maudoimiu ne kwa a'ako, na kesega mo meta nigele."

¹² Yesu kaediyo wa ye deulidi ye gehe, ede yona luwuluwu wa ye luwui'uyo na ye uyo yona kabakaikai wa unai, na ye henamaiyedi ye wane, "Saha ya ginauli ta kwa nuwatulobai e nige?"¹³ Komiu hesagu kwa katai Taulauhekata yo Guizau. Meta ye dudulaikalili. Temeta kagu kao ede.¹⁴ Na ena yau, yomi Guizau yo Taulauhekata, kaemiyao ta ya deulidi, bena komiu hinage kami kahao kaedi kwa deulidi yo siya hinage kaemiu se deulidi.¹⁵ Saha ya ginauli ta meta yomi kabakitahai. Unai saha ya ginauli kalimiuwai ta, hinage bena kwa ginauliwatani.

¹⁶ Ya hededemamohoi kalimiuwai: Heyayai tauhaina nige ye saekalili na kabo kana tanuwaga; yo wasa taulaena nige ye saekalili na kabo tauhetamalina.¹⁷ Na komiu teina nuwatu ta kabidi kwa katako, na ena kwa ginaulidi, meta kabo Yaubada yona kabinamwayena kwa miya.¹⁸ Yau nige komiu maudoimiu ta ya hetahetalagomiu. Kaiteyadi ya kaisunuwaidi meta kabimiu ya kata. Na teina ta meta bena kulikuli tabuna ye hemamohoiyei, doha ye wane, 'Na kaiteya maiyagu pwalawa kesega ka kai, meta kabo ye hemala kagu waiunu.'

(Same 41:9)¹⁹ Teina ta ya hededenonohaidi, na kabo se tubu. Na huyana se tubu, unai kabo kwa kawamamohoi meta Yau ede iya.²⁰ Ya hededemamohoi kalimiuwai: Ena tamowai hesau ya hetamali na se yogaisini meta yau se yogaisinigau. Yo kaiteya ye yogaisinigau meta iya tauhetamaligauma wa ye yogaisini."

Yesu kana tauwalohai ye hededenonohai

²¹ Yesu teina ye hedede na mulinawai nuwana ye pilipili, ede ye hedede ye wane, "Ya hededemamohoi kalimiuwai meta kami kaha hesau kabo kagu ye walohai."²² Yona hekahekatao wa se haibaibaiwai'uyoidi yo nuwadi se dagugu teina meta kaiteya kana hedehedede.²³ Yesu yona hekahekata hesau iya ye gadosisikaliliyei wa meta iya dedekanawai ye kenokeno.²⁴ Ede Simona Petelo nimana unai hekahekata wa ye sikuwatagu na ye hededorlau unai ye wane, "Ku henamaiyei, kaiteya kana hedehedede."

²⁵ Kabo ye duihasalilau* Yesu unai na ye henamaiyei ye wane, "Guizau, kabo kaiteya?"

²⁶ Yesu ye hededebei ye wane, "Teina pwalawa ta kabo ya hedakwa disi ne unai na ya mosei kaiteya unai meta iya tamowaina ede." Na kabo pwalawa tehana wa ye hedakwa na ye mosei Yudasi Isakaliyota, Simona natuna wa unai.²⁷ Huyana Yudasi pwalawa wa ye hai meta Satani ye luu kalinawai. Ede Yesu ye

13:4 Teina unai Yesu kitikitana meta doha Dius yodi heyayai tauhaina hesau.

13:25 Kaikaigogo saesaediyo udiedi Dius tamowaidi nige se tulimolosi na se kaikai, na yodi kaikai huyana kabo hatahatana ne se kenohetakikili. Teina ta nige se keno mamohoi na se kenolisilisi tupwaseuseulidi ne udiedi na nima seuseulidi se bonohetolodi na kuludi ne se tupahkekahini na kabo se kaikai. Yodi kabakaikai hatahatana ne kewana ne nige ye sae.

hededelau unai ye wane, "Saha bena ku ginauli ne ku ginaulimwamwayauyei."

²⁸ Taututuli yodi kabakaikai wa unai nige hesau kabina ye kata idohagi to Yesu doha tenem ye hedede kalinawai. ²⁹ Na hekadi yodi nuwatu bena Yesu yona hedehedede ta kaniyona ede, "Ku lau na saha gwauyala ta unai ta henuwadi kabo ku hemaisadi." Na hekadi yodi nuwatu bena ye lau taudehadeha yodi ye kainauya. Matauwuna Yudasi meta iya yodi moni tobwana taukitahetetena ede. ³⁰ Yudasi pwalawa wa ye kai na mulinawai ede ye pesa ye lau. Na tenem mahanana ne meta ye tauhemasigiliyako.

Laugagayo hauhauna

³¹ Yudasi ye laoko, na Yesu ye wane, "Yaubada Tau Natuna kana kao saesaena mamohoina bena ye hemasalah, yo saha kabo ye tubu Tau Natuna kalinawai ne, meta unai kabo Yaubada kana kao saesaena mamohoina ye hemasalah. ³² Natuna Yaubada kana kao saesaena mamohoina ye hemasalahahahegehe, kabo Yaubada yona kabikabi unai hinage Natuna kana kao saesaena mamohoina ye hemasalah, na taba nige ye pahili.*

³³ Natuguwao, huyakubwakubwa mo yau maiyamu kabo ta miya. Na komiu kabo kwa wasewaseneigau. Na Dius tauwoyaidi meta yodi ya hedehedede, na komiu hinage teina yomiu ya hedehedede: Yau yogu kabalau ne meta komiu taba nige gonowana unai kwa lau.

³⁴ Laugagayo hauhauna teina ya leyawa bena kwa haigadogadosis'iuyoigomiu. Doha yau ya gadosisiyeigomiu, unai komiu bena kwa haigadogadosis'iuyoigomiu. ³⁵ Ena komiu kwa haigadogadosis'iuyoigomiu, kabo tamowai maudoidi kabina se kata meta komiu yau yogu hekahekatao."

Yesu Petelo yona uhala ye hededenonohai

³⁶ Simona Petelo Yesu ye henamaiyei ye wane, "Guiau, kowa kabo haedi ku lau?" Yesu ye hedede, ye wane, "Yogu kabalau ne meta teina mahana ta unai nige gonowana ku hemuliwatanigau, na muliwi kabo ku hemuliwatanigau." ³⁷ Petelo ye henamaiyei ye wane, "Guiau, idohagi to teina mahana ta unai taba nige gonowana ya hemuliwatanigo? Yau meta ya nonohako kabo ya boita kowa hesabam." ³⁸ Na kabo Yesu ye hedede, ye wane, "Mamohoi, kabo ku boita yau hesabagu? Ya hededemamohoi kalimwai, meta teina boniyai ta unai pwaole hakiyana sola taba nige ye dou, na kabo ku uhalaiegau ma haiyona."

Yesu meta kedana unai ta lau ta lage Yaubada yona tehawai

14 "Tabu kwa nuwadubu, Yaubada kwa sunumaei yo yau hinage kwa sunumaeigau. ² Tamagu yona numa unai meta dahala gwaudi. Ena taba teina

ta nige mamohoi, meta nige gonowana ya hedede bena ya lau temenai kabo yomi dahala ya kabinonohaidi. ³ Na ena ya lau yomi dahala ya kabinonohaidi, kabo hinage ya uyoma ya haigomiu, na yau haedi yogu kabamiya meta komiu hinage kabo temenai. ⁴ Yo idohagi kabo kwa lau magaina ne unai meta kedana kabina kwa katako."

⁵ Tomasi ye hededelau Yesu unai ye wane, "Guiau, yom kabalau ne nige kabina ka kata. Idohagi kabo kedana kabina ka kata?"

⁶ Yesu ye hedede, ye wane, "Yau kedana ede, yo mamohoina ede yo maulina ede. Nige gonowana hesau ye bom ye lau Tamagu unai, na yau ya bom mo kedana ede. ⁷ Ena taba mamohoi komiu kabigu kwa kata, komiu hinage tamagu kabo kabina kwa kata. Teina mayadai ta unai ye lau ne meta iya kabina kwa kata yo hinage kwa kitayako."

⁸ Pilipo ye wane, "Guiau, taba tamam ku hekitagai, na kabo takiyede."

⁹ Yesu ye hedede, ye wane, "Pilipo, huyalohaloha yau maiyamu ta miyamiya. Na idohagi to nige kabigu kwa kata? Kaiteya ye kitagau meta Tamagu ye kita. Na idohagi to ku wane, 'Taba tamam ku hekitagai'?

¹⁰ Kana kao doha nige ku kawamamohoi meta yau ede Tamagu unai, yo Tamagu ede yau kaliguwai. Hedehe dede ya hedehedede nige yau ya bom yogu hedehedede, na Tamagu kaliguwai ye miya ta meta iya yona paisowa ne ye ginaulidi ede. ¹¹ Bena kwa kawamamohoi meta yau ede Tamagu unai, yo Tamagu ede yau kaliguwai. Ena nige gonowana yogu hedehedede ta kwa kawamamohoi yedi, takiyede, na kabikabi gigigigibwalidi ya ginaulidiko wa debadiwai kwa kawamamohoiyeigau. ¹² Ya hededemamohoi kalimuwai: Kaiteya ye sunuma kaliguwai kabo saha ya ginaulidiko wa hinage ye ginaulidi. Yo kabikabi hekadi ye ginaulidi kabo se saekalili na kabo saha yau ya ginaulidi wa. Matauwuna ede yau meta ya laulau Tamagu unai. ¹³ Na saha kwa kaibwadai yau hesaguwai, kabo ya ginaulidi. Tenem unai kabo Tamagu hedebasaena ya helaki. ¹⁴ Mamohoi, yau hesaguwai ginauli saha kwa kaibwadai, kabo ya ginaulidi.

Yaluwa Tabuna hedede hesunumana

¹⁵ Ena kwa gadosisiyegau, bena yogu laugagayo kwa kawakabiyedi. ¹⁶ Na yau kabo Tamagu ya kaibwadai na kami sagu hesau kabo ye hetamaliyawa, na iya kabo maiyamu ye lau ee huya nige kana siga. ¹⁷ Iya ede hedehedede mamohoina Yaluwana. Tanoubu ta tamowaidiyo nige gonowana iya se hai, matauwuna ede nige se kita yo nige kabina se kata. Na komiu iya kabina kwa kata, matauwuna ede iya maiyamu na huya matada ne unai kabo nuwamie ne unai ye miya. ¹⁸ Yau taba nige ya laugabaegomiu doha dabudabule, na kabo ya uyoma kalimuwai. ¹⁹ Huya

13:32 Teina hedehedede ta, *Yaubada kabo yona kabikabi unai hinage Natuna kana kao saesaena mamohoina ye hemasalah, kaniyona ede huyana Yesu kabo ye uyo Tamana unai meta yona kabaloina saesaena wa ye mose'uyoi kalinawai.* (Yowane 17:5)

kubwakubwa mo na mulinawai tanoubu ta kabo taba nige se kitagau, na komiu kabo kwa kitagau. Yau ya mauli, unai komiu hinage kabo kwa mauli.²⁰ Tenem mayadaina ne unai* komiu kabo kwa nuwatulobai meta yau ede Tamagu unai, yo komiu ede yau kaliguwai, yo yau ede komiu kalimiuwai.²¹ Kaiteya yogu laugagayo ye hai yo ye kawakabiyei meta iya taugadosisiyegau ede. Na kaiteya ye gadosisiyegau, Tamagu kabo iya ye gadosisiyei, yo yau hinage kabo ya gadosisiyei yo ya hemasalahagau iya kalinawai."

²² Na kabo Yudasi (iya nige Yudasi Isakaliyota) ye wane, "Guiyau, matauwuna saha to bena ku hemasalahago kai ka bom kalimaiwai na nige bena tanoubu maudoina kalidiwai?"²³ Na Yesu ye hededebui ye wane, "Ena tamowai hesau ye gadosisiyeigau, iya kabo yogu lauhekata ta ye kawakabiyedi. Tamagu kabo ye gadosisiyei, yo Tamagu maiyagu kabo ka laoma iya maiyamai ka miya.²⁴ Na kaiteya nige ye gadosisiyeigau, taba nige yogu lauhekata ta ye kawakabiyedi. Na teina lauhekata ta yau nige yogu, na Tamagu iya tauhetamaligauma wa yona lauhekata.

²⁵ Yau teina sola ma miyagu maidamiu ta na ginauli maudoidi ta ya hedededi kalimiuwai.²⁶ Na yau hesaguwai Tamagu kabo kami sagu ye hetamaliyawa. Iya ede Yaluwa Tabuna. Iya kabo ginauli maudoidi udiyedi ye hekatagomiu yo ginauli maudoidi ya hededekido wa kabo nuwamiu ne udiyedi ye henuhenuwaisinidi.²⁷ Nuwadaumwali ya tole kalimiuwai, yogu nuwadaumwali ta ya leyawa. Yau nuwadaumwali ya leyawa ta nige doha tanoubu ye leyawa ne. Tabu nuwamiyao kwa hephilipilidi yo kwa matausi.

²⁸ Saha ya hedededi wa komiu kwa lapuidiko doha ya wane, 'Ya laugabaegomiu, na kabo ya uyoma kalimiuwai.' Ena taba kwa gadosisiyegau, kabo kwa gwauyala meta ya laulau Tamagu unai, matauwuna iya ye saekalili na kabo yau.²⁹ Saha kabo se tubu meta ya hededenonohaidiko kalimiuwai. Na huyana se tubu kabo kwa kawamamohoi.³⁰ Yau taba nige gonowana ya hedehededekalili kalimiuwai, matauwuna ede tanoubu ta taukitahetetena ye laolaoma. Iya nige yona gigibwali gonowana bena kabo ye saedikwaigau.³¹ Na tanoubu maudoina bena kabina se kata meta yau Tamagu ya gadosisiyei, unai ede Tamagu saha ye hedededi wa ya ginauliwatanidi.

Kwa laoma, ta pesa ta lau."

Yesu wine mamohoina ede

15 "Yau wine mamohoina ede, na Tamagu iya wine ta taukitahetetena.² Ena laga hesau kaliguwai na nige ye kaniyo meta kabo ye bolihai. Na laga kanikaniyodi ne ye boliyawasidi kabo se kaniyo namwanamwa.³ Na komiu kwa a'ako yogu

hedehededede ya hedededi kalimiuwai wa debadiwai.

⁴ Kwa miyatahitahi kaliguwai, na kabo ya miyatahitahi kalimiuwai. Taba laga hesau ye miyasuwala, meta taba nige kaniyona. Na bena ye miya wine ne unai, kabo ye kaniyo. Gonogonowa doha komiu bena kwa miyatahitahi kaliguwai kabo kwa kaniyo.⁵ Yau winena ede na komiu meta laganao. Ena tamowai hesau ye miyatahitahi kaliguwai na yau iya unai, kabo ye kaniyo namwanamwakalili. Ena nige kwa patu kaliguwai, meta taba nige kwa kaniyo.⁶ Ena tamowai hesau nige ye miyatahitahi kaliguwai, iya meta kabo doha wine lagana se gabaeihesuwala na ye pog. Wine lagadi pogipogidi ne kabo se tanogogoidi na se gabalaedi kaiwa kalakalasina unai se kalasi.⁷ Ena komiu kwa miyatahitahi kaliguwai yo yogu hedehededede se miya kalimiuwai, meta saha kwa henuwadi na kwa kaibwadaidi, Tamagu kabo ye lediwa.⁸ Ena komiu kwa kaniyonamwanamwa, unai kabo kwa hemasalah'a'uyoigomiu meta komiu yogu hekahekatao mamohoidi. Teina unai kabo Tamagu hedebasae lakilakina ye hai.

⁹ Tamagu ye gadosisiyegau, gonogonowan doha yau hinage ya gadosisiyegomiu. Bena yogu gadosisi ne unai kwa miyatahitahi.¹⁰ Ena komiu yogu laugagayo ta kwa kawakabiyedi, komiu kabo yogu gadosisi ne unai kwa miyatahitahi, doha hinage yau tamagu yona laugagayo ya kawakabiyedi na yona gadosisi ne unai ya miyatahitahi.¹¹ Teina hedehededede ta ya hedededi kalimiuwai matauwuna ya henuwa bena yogu gwauyala kabo ye miya kalimiuwai na yomi gwauyala ne meta kabo ye lakikalili.¹² yogu laugagayo ede teina: Bena kwa haigadogadosisi'uyoigomiu doha ya gadosisiyegomiu ta.¹³ Gadosisi lakilikakalilina kabahemasalahana meta bena taba tamowai hesau ye boita kehanao hesabadi.¹⁴ Ena yogu hedehededede ta kwa ginauliwatanidi, meta komiu kehaguwao mamohoidi.¹⁵ Yau taba nige ya kata'uyoigomiu yogu heyayai tauhaidi, matauwuna ede heyayai tauhaina kana tanuwaga saha ye ginaginalidi meta nige kabina ye kata. Na ya kataigomiu kehaguwao, matauwuna ede ginauli maudoidi Tamagu unai ya lapuidi wa meta ya hemasalahadiko kalimiuwai.¹⁶ Komiu nige kwa kaisunuwaigau, na yau ya kaisunuwaigomiu, bena kwa lau kaniyomiu kwa toledi, na kaniyomiu ne kabo se miyahai. Yo ya kaisunuwaigomiu bena saha kwa kaibwadai yau hesaguwai ne, Tamagu kabo ye leyawa.¹⁷ Teina ta yau yogu laugagayo ede: Bena komiu kwa haigadogadosisi'uyoigomiu."

Tanoubu ta yodi hewaiunu hekahekatao udiyedi

¹⁸ Na Yesu yona hedehededede wa ye tubei ye wane, "Ena tanoubu tamowaidiyo ta se subugomiu, kabo kwa nuwatui meta yau se sububagunaegauko.¹⁹ Ena taba komiu tanoubu ta yona, kabo ye

14:20 Tausonoga hekadi yodi nuwatu meta teina hedehededede ta tenem mayadaina ne unai kaniyona ede, Yesu yona boita tolo'uyona mayadaina.

gadosisiyegomiu doha iya yona mamohoidi. Na komiu meta nige tanoubu ta yona, na tanoubu ta unai ya kaisunuwaigomiu. Debanawai tanoubu ta ye subugomiu.²⁰ Hedehedede ya hedededi kalimiuwai wa bena kwa nuwanuwatuidi, doha ya wane, ‘Heyayai tauhaina meta nige ye saekalili na kabo kana tanuwaga.’ Ena se hekamkamnagau, meta komiu hinage kabo se hekamkamnagomiu. Ena yogu lauhekata se kawakabiyedi, hinage komiu yomi lauhekata kabo se kawakabiyedi.²¹ Yau hesagu debanawai kabikabi ne kabo se ginaulidi kalimiuwai, matauwuwna ede tauhetamaligauma nige kabina se kata.²² Taba ena nige ya dobima yo ya hededorlau kalidiwai, siya yodi ba’aya taba nige giluna kalidiwai. Na ya dobima yo ya hededorlau kalidiwai, ede siya nige gonowana yodi ba’aya ne se kaihalei.²³ Na kaiteya ye subugau, iya hinage Tamagu ye subu.²⁴ Yau kabikabi gigigibwalidi ya ginaulidi doha nige tamowai hesau gonowana ye ginaulidi. Na ena taba nige ya ginaulidi kalidiwai, kabo siya yodi ba’aya taba nige giluna kalidiwai. Na kabikabi gigigibwalidi ta se kitadiko, iyamo yau yo Tamagu se subugai.²⁵ Na se subugau, ede Dawida saha ye kuli yodi kulikului tabudi udiyedi wa meta se hemamohoiei, doha ye wane, ‘Siya yodi subugau ne meta nige kaniyona.’

(Same 35:19; Same 69:4)

²⁶ Yau kabo kami sagu Tamagu unai wa ya hetamaliyama kalimiuwai. Iya ede hedehedede mamohoina Yaluwana, kabo Tamagu unai ye dobima. Iya kabo kagu kao maudoina tauhemasalahana.²⁷ Na komiu hinage bena kwa hededorhemasalahagau tamowai kalidiwai, matauwuwna yogu paisowa huyahetubuna unai ye laoma teina meta komiu maidaguwo.

16 Teina ginauli maudoidi ta ya hededorlau kalimiuwai, kabo taba nige kwa kalabesibesi.

² Dius tamowaidi kabo sunago udiyedi se hepesagomiu. Yo hinage huyana ede ye laolaoma kabo se koihemwaloigomiu na laulau ta tauginaulina meta kabo yodi nuwatu bena Yaubada yona paisowa se ginaginali.³ Na ginauli yababadi ta se ginaulidi, matauwuwna ede Tamagu yo yau nige kabimai se kata.⁴ Teina nuwatu ta ya hededorlau kalimiuwai, na huyana se tubu kabo kwa nuwatulobai meta ya hededorlau kalimiuwai. Huya bagubagunana unai ye laoma ee teina meta teina nuwatu ta nige ya hededorlau kalimiuwai, matauwuwna yau ede sola maidamiu.”

Yaluwa Tabuna yona paisowa

⁵ Kabo Yesu ye wane, “Nige bayaona kabo ya laugabaegomiu na ya lau tauhetamaligauma wa unai, na iyamo komiu nige hesau bena ye henamaiyeigau ye wane, ‘Kowa kabo haedi ku laulau?’⁶ Kwa nuwadubukalili, matauwuwna ede teina nuwatu ta ya hededorlau kalimiuwai.⁷ Na yau meta hedehedede mamohoina ya hededorlau: Bena ya laugabaegomiu ta

meta komiu yomi namwanamwa hesabana. Taba yau nige ya laugabaegomiu, kami sagu meta taba nige ye laoma. Na ena yau ya lau, kabo kabo sagu ne ya hetamaliyama.⁸ Huyana iya ye laoma kabo tamowai maudoidi tanoubu ta unai yodi laupwano ye hemasalahadi, meta kalidiwai ba’aya nuwatulobaina, miyamiya dudulaina nuwatulobaina, yo Yaubada tanoubu ta kabo yona hekasana nuwatulobaina udiyedi se laupwano.

⁹ Yodi ba’aya unai kabo ye hemasalahadi meta kalidiwai yodi ba’aya mamohoina ede nige se kawamamohoiyegau.¹⁰ Miyamiya dudulaina unai kabo ye hemasalahadi kalidiwai meta yau ya bom miyamiya dudulaina tamowaina ede, matauwuwna ede yau ya laulau Tamagu unai, yo taba nige gonowana kwa kita’uyoigau.¹¹ Yo Yaubada yona hekasana unai kabo ye hemasalahadi kalidiwai meta Yaubada kabo hinage tamowai ye hekasadi, matauwuwna ede tanoubu ta yona wasawasa ye hegilononohaiyako.

¹² Yau kaliguwai nuwanuwatu se bado bena kabo ya hededorlau kalimiuwai. Na se badokalili, unai nige gonowana maudoidi kwa nuwatuhekahnidi.¹³ Na huyana Hedehedede Mamohoina Yaluwana ye laoma, iya kabo hedehedede mamohoidi maudoidi udiyedi ye henuwatulobaigomiu. Iya taba nige ye bom yona nuwatuwai ye hedehedede, na saha Yaubada unai ye lapuidi kabo ye hededorlau, yo saha kabo se tubu matada ne udiyedi ye hekatagomiu.¹⁴ Saha ya hededorlau Hedehedede Mamohoina Yaluwana kalinawai, kabo ye hemasalahadi kalimiuwai. Tenem unai kabo hedebasaegu ye helaki.¹⁵ Ginali maudoidi Tamagu kalinawai ne meta yau yogu. Tenem unai ede ya wane, ‘Yaluwa wa yogu hedehedede kabo ye haidi, na ye hemasalahadi kalimiuwai.’

Nuwadubu ye bui ye hemala gwauyala

¹⁶ Na Yesu yona hedehedede wa ye tubei ye wane, “Huyakubwakubwa mo mulinawai taba nige kwa kitagau, yo huyakubwakubwa mo na mulinawai kabo kwa kita’uyoigau.”

¹⁷ Yona hekahekatao hekadiyo se henahenamai’uyoidi se wane, “Teina yona hedehedede ta kaniyodi saha? Doha ye wane, ‘Huya kubwakubwa mo mulinawai taba nige kwa kitagau, yo huyakubwakubwa mo na mulinawai kabo kwa kita’uyoigau.’ Yo hinage ye wane, ‘Matauwuwna ya laulau Tamagu unai.’”¹⁸ Siya sola se henahenamai’uyoidi se wane, “Teina hedehedede ta ‘Huya kubwakubwa mo’ meta kaniyona ede saha? Saha ye hedehedede ne nige ka nuwatulobaidi.”

¹⁹ Yesu ye kitadi meta se henuwa bena se henamaiyei ede ye wane, “Kabina ya kata meta yogu hedehedede ta kwa hetahteladi, doha ya wane, ‘Huya kubwakubwa mo mulinawai taba nige kwa kitagau, yo huyakubwakubwa mo na mulinawai kabo

kwa kita'uyoigau.' Yo kwa henuwa kaniyona bena kabina kwa kata.²⁰ Ya hededemamohoi kalimiuwai: Kabo kwa dou yo kwa nuwadubu, na tanoubu ta tamowaidiyao kabo se gwauyala. Komiu kabo kwa nuwadubukalili, na iyamo yomi nuwadubukalili ne kabo ye bui na ye hemala yomi gwauyala.²¹ Waihiu diyadiyakana bena ye labalaba meta kabo ye kamkamnakalili, matauwuna yona labalaba mahanana ye lage. Na huyana natuna ye labasi meta yona kamkamna wa ye nuwaluluhiyei, matauwuna ede natuna wa ye labasiyamako tanoubu ta unai. Teina ta meta ye hemala yona gwauyala.²² Doha hinage komiu: Teina ta meta yomi nuwadubulakilaki huyana. Na huyana ya kita'uyoigomiu kabo kwa gwauyala, na yomi gwauyala ne taba nige hesau ye haigabaei kalimiuwai.²³ Tenem mayadaina ne unai komiu taba nige saha hesau kwa kaibwadai'uyoi kaliguwai.* Ya hededemamohoi kalimiuwai: Saha kwa kaibwadai Tamagu unai yau hesaguwai kabo ye leyawa.²⁴ Na ye laoma ee teina, komiu sola nige saha hesau kwa kaibwadai yau hesaguwai. Kwa kaibwada Yaubada unai, kabo kwa hai, unai kabo kwa gwauyalakalili.

²⁵ Ye laoma ee teina hedehedede palabole udiyedi ya hedede kalimiuwai. Na mayadaina ede ye laolaoma unai taba nige ya hededepalabole'uyo, na unai kabo Tamagu ya hedehemahesalahamamohoiyei kalimiuwai.²⁶ Tenem mayadaina ne unai yau hesaguwai kabo kwa kaibwada. Nige ya wane kabo yau ya kaibwada Tamagu unai komiu hesabamiu.

²⁷ Taba nige! Tamagu iya ye gadosisiyeigomiu, matauwuna ede komiu kwa gadosisiyeigau yo kwa kawamamohoi meta yau Yaubada unai ya laoma.

²⁸ Mamohoikalili, yau Yaubada unai ya laoma, na ya laomako tanoubu ta unai. Na tanoubu ta kabo ya laugabaei ya uyo Tamagu unai."

²⁹ Kabo Yesu yona hekahekatao wa se wane, "Teina yom hedehedede ta meta se masalahakalili, nige doha palabole udiyedi ku hedehedede.³⁰ Na ka nuwatulobai meta kowa ginauli maudoidi kabidi ku katakalili. Unai nige gonowana kai taba bena henamai hesau unai ka henamaiyeigo. Teina debanawai ka kawamamohoi meta kowa mamohoi Yaubada unai ku laoma."

³¹ Yesu ye hededelau udiyedi ye wane, "Na kabotaki kwa kawamamohoi!³² Na huyana ede ye laolaoma, na iya ede ye lagemako, na unai kabo kwa tatagwaligwali, hesau hesau ye lau yona kabamiya unai. Kabo kwa laugabaeigau na yau ya bom. Na iyamo yau nige ya bom, na Tamagu meta iya ede maidagu.³³ Teina nuwanuwatu ta ya hedededi kalimiuwai, unai kabo nuwadaumwali kwa hai yau

kaliguwai. Tanoubu ta unai komiu kabo pilipili kwa hekalodi. Na nuwamu se bayao! Matauwuna yau tanoubu ta wasawasana ya saedikwaiyako."

Yesu ye bom yona ye kaibwada

17 Teina hedehedede ta mulidiwai Yesu ye kaikewasae galewa ne unai na ye tapwalolo ye wane,

"Tamagu, huyana wa ye lagemako. Natum kana kao saesaena mamohoina ku hemasalaha, na unai kabo Natum hinage kam kao saesaena mamohoina ye hemasalaha.² Kowa gigibwali ku leyama, unai ya hemala tamowai maudoidi kadi tanuwaga. Kaniyona ede mauli nige kana siga bena kabo ya moseidi tamowai maudoidi ku ledima wa kalidiwai.

³ Teina meta mauli nige kana siga ede: Kowa ku bom Yaubada mamohoina yo yau, Yesu Keliso, yom hetahetamali tamowaina, bena kabida se kata.⁴ Paisowa ku ledima wa ya ginaulihegehediko. Na teina paisowa ta udiyedi kam kao saesaena mamohoina ya hemasalaha tanoubu ta unai.⁵ Huyana tanoubu sola nige ye tubu, meta yau maidam na yogu kabaloina saesaena wa kaliguwai. Unai ya kaibwadaigo huyana ya lage kowa kalimwai bena yogu kabaloina saesaena wa ku hai'uyoiyama kaliguwai.

Yesu yona hekahekatao yodi ye kaibwada

⁶ Tamagu, kowa meta ya hedehemahesalahagoko tamowai udiyedi. Siya ede kowa yom, tanoubu ta unai ku gilihaidi na ku ledima kaliguwai wa. Kowa ku ledima kaliguwai na yom hedehedede wa se kawakabiyeidi.⁷ Na kabina se kata meta ginauli maudoidi ku ledima wa, kowa kalimwai se laoma.

⁸ Matauwuna hedehedede ku ledima wa ya moseidi kalidiwai na se haidi. Yo kabina se katakalili meta kowa kalimwai ya dobima yo se kawamamohoi meta kowa ku hetamaligauma.

⁹ Siya yodi yau ya tapwalolo ta. Nige tanoubu ta maudoina yodi ya tapwalolo, na siya kaiteyadi ku ledima wa yodi, matauwuna ede siya kowa yom.¹⁰ Siya maudoidi kaliguwai ne kowa yom, yo maudoidi kalimwai ne meta yau yogu. Na yodi miyamiya ne udiyedi kagu kao saesaena mamohoina se hemasalaha tamowai kalidiwai.

¹¹ Yau kabo tanoubu ta ya laugabaei, na ya laolaowa kalimwai, na siya meta kabo sola tanoubu ta unai se miyamiya. Tamagu, kowa tabuna. Hesam ku leyama wa meta ye gigibwali. Na ya kaibwadaigo bena yodi ku laugudugudu

16:23 Teina hedehedede ta nige ye masalahakalili kalina Giliki unai. Na tausonoga gwaudi yodi nuwatu meta hedehedede ta kaniyona ede "taba nige saha hesau kwa henamaiyeigau", matauwuna Yaluwa Tabuna kabo ye hekatadi. Na tausonoga hekadiyo yodi nuwatu meta hedehedede ta kaniyona ede "taba nige saha hesau kwa kaibwadai'uyoi kaliguwai", meta ye patu namwanamwa lausoisoi 23 yo 24 udiyedi.

hesam gigibwalina ne unai, to se nuwakesega
doha kowa yo yau. ¹² Huyana yau maiyadi meta
yababa udiyedi ya tolotaunidi yo ya
kitahetetenamwanamwaedi hesa ku leyama wa
unai. Nige hesau ye tauwadam, na iya
hekamkamna tauhekalona ne ye bom mo. Teina
unai kabu kulikuli tabuna wa ye hemamohoiei.
¹³ Yau meta ya laolaowa kalimwai, na sola
tanoubu ta unai ma miyagu, na teina nuwatu ta
ya hedehedeli kalidiwai, na bena yogu
gwauyalalakilaki unai se miya. ¹⁴ Yau yom
hedehedede wa ya mosediko kalidiwai, na
tanoubu tamowaidi meta siya se subudi,
matauwuwuna siya nige tanoubu ta yona doha
yau nige tanoubu ta yona. ¹⁵ Yau nige ya
kaibwadaigo bena tanoubu ta unai ku
haigabaedi, na ya kaibwadaigo bena
tauyababa* yona gigibwali unai kowa ku
lauguduguduidi. ¹⁶ Siya nige tanoubu ta yona,
doha yau nige tanoubu ta yona. ¹⁷ Yom
hedehedede mamohoina unai ku
hemwayaunamwanamwaedi, unai bena siya
yodi mauli se mosegabaeimamohoiyedi
kalimwai. ¹⁸ Na kowa meta ku hetamaligau ya
dobima tanoubu ta, unai yau hinage ya
hetamalidi se lau tanoubu ta unai. ¹⁹ Siya
debadiwai ede yau ya mosegabaei'uyoigau kowa
kalimwai, unai bena siya kabu hinage se
mosegabaei'uyoidi kowa Yaubada Mamohoina
kalimwai.

Yesu tausunumaena maudoidi yodi ye kaibwada

²⁰ Tamagu, yogu kaibwada ta nige yogu hekahekatao se bom hesabadi, na hinage wasa ta yodi hewasana unai na kaiteyadi se kawamamohoieigau meta yodi ya kaibwada.

²¹ Na ya kaibwadaigo meta maudoidi kabu se nuwakesega, doha kowa ede kaliguwai yo yau ede kalimwai. Siya hinage bena kalidawai, unai tanoubu maudoidi kabu se kawamamohoi meta kowa ku hetamaligauma. ²² Yogu kabaloina saesaena gigibwalina maudoina ku haiyama wa ya hekawaleai kalidiwai. Tenem unai bena siya se nuwakesega doha kita meta kesega. ²³ Ede yau kalidiwai yo kowa ede kaliguwai. Taba siya se nuwakesegamamohoi, na unai bena tanoubu maudoina kabina se kata meta kowa ku hetamaligauma, yo ku gadosisiyedi gonogonowana doha yau ku gadosisiyeigau.

²⁴ Tamagu, ya henuwa bena tamowai ku ledima wa maidaguwao yogu kabamiya ne unai, to yogu kabaloina saesaena wa se kita. Yogu kabaloina saesaena wa ku leyama, matauwuwuna ku gadosisibagunaegau na kabu tanoubu ta ye tubu. ²⁵ Tamagu, kowa ku dudulaikalili. Tanoubu

ta kowa nige kabim se kata, na yau kabim ya kata, yo siya tausunumaegau kabina se kata meta kowa ku hetamaligauma. ²⁶ Ye laoma teina ede kam kao ya hemasalahalaha kalidiwai, na sola kabu ya hemahemasalahalaha'uyoigo kalidiwai, na unai ede bena se haigadogadosisi'uyoidi doha kowa ku gadosisiyeigau, yo yau kabu kalidiwai."

Yesu se kabihekahini

18 Huyana Yesu ye tapwalologehe maiyana hekahekatao se dahalai na Kidilona gonuna unai se taukawasi se lau teha hesau unai. Na temenai meta olibe yawana hesau, ede maiyana hekahekatao wa se lulau unai.

² Yudas iya Yesu kana tauwalohai wa meta tenem teha ne kabina ye kata, matawuwuna ede Yesu maiyana hekahekatao huya hekadi temenai se laolaomagogoi. ³ Ede ye laoma na tau'i yala bodadi yo taukaitalasam tauwoyaidi yo Paliseya yodi taupaisowa hekadi maiyanao. Na osili, lampa yo kaba'i yala gogodi se baheidi, na ye woyaidi se lau se lage tenem olibe yawana ne unai.

⁴ Ginauli maudoidi kabu se tubu Yesu kalinawai ne kabidi ye katako, ede ye lau na ye henamaiyedi ye wane, "Kaiteya hesabana kwa laoma?"

⁵ Se hededebui se wane, "Yesu Nasaleta tamowaina wa."

Yesu ye wane, "Yau tamowaina ede." Na Yesu kana tauwalohai Yudasi meta menai maiyanao se totolo.

⁶ Huyana Yesu ye wane, "Yau tamowaina ede," taulaoma wa se mulisigisigi yo se gulidobi bwatano wa unai.

⁷ Yesu ye henamai'uyoidi ye wane, "Kaiteya hesabana kwa laoma?"

Ede se wane, "Yesu Nasaleta tamowaina wa."

⁸ Yesu ye wane, "Ya hededeyako kalimiuwai meta yau tamowaina ede. Ena yau ya bom kwa wasewaseneigau, yogu tamowai ta kwa hetamalidi se lau." ⁹ Teina ye tubu meta iya yona hedehedede wa ye hemamohoiyei, doha ye wane, "Tamowai ku ledima wa ya kitahetetenamwanamwaedi na nige hesau ye tauwadam."

¹⁰ Na Simona Petelo iya yona kelepa kalinawai ye lausini ede taukaitalasam saesaena yona heyayai tauhaina beyatutuna ye boli'utusi. Heyayai tauhaina wa hesana ede Malakasi. ¹¹ Kabo Yesu ye hededelau Petelo unai ye wane, "Yom kelepa ne ku tole'uyoi kabahaina ne unai! Matawuwuna ede kamkamna kaputina Tamagu ye leyama ta taba unai ya numa."

Yesu se woyalaei Anase unai

¹² Na kabo tau'iyala bodadi maiyadi kadi tanuwaga yo
Diis tauwoyaidi yodi taupaisowa wa Yesu se hai yo
nimana se paidi. ¹³ Na bagubaguna meta se woyalaei
Kaiyapasi bwasiyana Anase unai. Kaiyapasi iya

taukaitalasam saesaena tenem bolimaina ne unai.
¹⁴ Na iya ede ye hededelau Dius tauwoyaidi udiyedi ye wane, "Ye namwakalili taba tamowai kesega ye boita tamowai maudoida hesabada."

Petelo yona uhala bagubagunana

¹⁵ Simona Petelo yo hekahekata hesau Yesu se hemuliwatani. Na hekahekata hesau wa Yesu ye hemuliwatani se mwalaes taukitalasam saesaena yona bakubaku ne unai, matauwuna taukitalasam saesaena wa* tenem hekahekata ne kabina ye kata.

¹⁶ Na Petelo meta dagela ne unai ye nayanaya, ede hekahekata hesau wa iya taukitalasam saesaena kabina ye kata'usi wa ye uyo kawakeda wa na ye hededelau kawakeda taukitahetetena waihiuna kalinawai bena taba Petelo ye mwalaes.

¹⁷ Waihiu kawakeda ye kitahetete wa Petelo ye henamaiyei ye wane, "Na kowa hinage Yesu yona hekahekata hesau?"

Iya ye hededebui ye wane, "Yau nige."

¹⁸ Huyana ne meta huyagwagwama, ede heyayai tauhaldi hekadi yo tauwoyawoya yodi taupaisowa wa kaiwa se yuhi na se tolohetakikili se kaikaimwaiga. Na Petelo hinage ye tololau ede maiyadi se kaimwaiga.

Taukitalasam saesaena bagubagunana wa Yesu ye henamaiyei

¹⁹ Na kabo taukitalasam saesaena* Yesu yona hekahekatao yo yona lauhekata debadiwai ye henamaibuibui.

²⁰ Ede Yesu ye hededebui ye wane, "Yau huya badobado sunago yo numa tabuna udiyedi ya laulauhekata. Menai yoda tamowai gwaudi se laolaomagogoi, na ya laulauguguyamasalah tamowai maudoidi kalidiwai. Nige ginauli hesau ya hededewadawadamyei. ²¹ Idochagi to ku henamaiyeigau? Yugu hedehedede taulapuidi ne ku henamaiyedi. Yugu hedehedede meta kabidi se katakalili."

²² Na taukitalasam saesaena wa yona taupaisowa hesau Yesu dedekanawai ye totolo na yona hededebui wa ye lapui ede nimanawai ye laupapali, na ye wane, "Idochagi to taukitalasam saesaena unai ku hedede doha teina?"

²³ Yesu ye hededebui ye wane, "Ena taba hedehedede ta ya hedede ne unai ya laupwano, yugu laupwano saha bena ku hedehedemasalah. Na taba saha ya hedededi ne mamohoi, ye saha to ku laupapaligau?" ²⁴ Yesu meta nimana sola ma paipaidi, na Anase iya ye hetamalilae taukitalasam saesaena Kaiyapasi unai.

Petelo yona uhala helabuina yo hehaiyonana

²⁵ Simona Petelo ye tolo na ye kaikaimwaiga, na taukaimwaiga hekadi wa se henamaiyei se wane, "Kowa hinage yona hekahekatao wa hesauna?"

Petelo ye uhala ye wane, "Yau nige."

²⁶ Na tamowai beyana Petelo ye boli'utusil'usei wa kehana hesau iya hinage taukitalasam saesaena yona heyayai tauhaina, ye hededebayao ye wane, "Ya nuwatu meta kowa ya kitago Yesu maiyam olibe yawana ne unai." ²⁷ Na Petelo ye uhala'uyo, na mahanana ne unai meta pwaole hakiyana ye dou.

Yesu Pilato matanawai ye tolo

²⁸ Na kabo Dius tauwoyaidi wa Yesu maiyadi Kayapasi yona numa se pesagabaei na se lau Loma yodi gabana yona kabaloina numana lakilakina unai. Mala ye tom na malatomtom gagilina unai, na Dius tauwoyaidi nige se mwalaes Loma yodi gabana yona numa wa unai, matauwuna Dius yodi laugagayo meta ena se mwalaes numa ne unai kabo ye hebikidi Yaubada matanawai. Na nige se mwalaes, matauwuna ede se henuwa bena taukiuli kaina se kai. ²⁹ Ede Pilato ye pesa ye laoma kalidiwai na ye henamaiyedi ye wane, "Yababa saha unai teina tamowai ta kwa hegil?"

³⁰ Na se wane, "Ena taba iya nige laugagayo hesau ye utusi, taba nige ka woyaiyama kalimwai."

³¹ Pilato ye hededelau udiyedi ye wane, "Kwa hai na kabo yomi laugagayo ne unai kwa bom kwa hekasa."

Diis tauwoyaidi wa se hededelau unai se wane, "Komiu Loma tamowaidi yomi laugagayo kwa tole meta kai nige gonowana tamowai hesau ka heboita."

³² Teina ye tubu ta meta Yesu yona boita kana kao ye hedehedemasalahayako wa ye laoma ye hemamohoioyei.*

³³ Na kabo Pilato ye mwalaeseuyo yona kabaloina numana lakilakina wa unai na Yesu ye yoganei ye lau unai na ye henamaiyei ye wane, "Kowa Dius tamowaidi yodi wasawasa?"

³⁴ Yesu ye henamailau unai ye wane, "Teina ta kowa ku bom yom henamai, o tamowai hekadi se hedehedemasalahagauko kowa kalimwai?"

³⁵ Pilato ye hededebui ye wane, "Yau nige Dius tamowaina. Yom tamowai yo taukitalasam tauwoyaidi se woyaigo na kwa laoma kaliguwai. Yababa saha ku ginauli?"

³⁶ Yesu ye wane, "Yau yugu basileiya ne nige tanoubu ta yona. Ena taba tanoubu ta yona, tauhemuliwanigau maudoidi ne kabo yugu se laugudugudu, na Dius tamowaidi ne taba nige gonowana se haigau. Na yugu basileiya ne meta iya teha hesau yona."

18:15 Iya ede Anase. Kaiyapasi tenem bolimai ne unai iya taukitalasam saesaena (lausoisoi 13 ku hasili). Na Anase meta iya taukitalasam saesaena bagubagunana, na sola hesa ne ye kabikabihekahini na Yesu se woyaiae unai. Iya teinai Yesu ye henamaibuibui. (Yowane 18:19 yo 18:24, Luka 3:2, Apostolo yodi paisowa bukana 4:5)

18:19 Kaiyapasi hedehedemasalahana lausoisoi 15 unai ku hasili.

18:32 Loma tamowaidi siya se bom mo yodi dudulai bena tamowai se hesataulo.

³⁷ Na Pilato ye hededelau iya unai, ye wane, "Unai kowa meta wasawasa!"

Yesu ye hededebui ye wane, "Kowa ku hedededudulai meta yau wasawasa. Mamohoikalili se labasigau yo ya dobima tanoubu ta unai bera hedehedede mamohoina ya hemasalaham tamowai udiyedi. Na kaiteyadi hedehedede mamohoina se henuwa, kabo se lapulaoma kaliguwai."

³⁸ Pilato ye henamaiyei ye wane, "Hedehedede mamohoina ne meta saha?" Teina unai ye pesa ye lau Dius udiyedi na ye wane, "Nige yababa saha hesau iya unai ya lobai." ³⁹ Na komiu yomi laulau meta bolimai badobado taukiuli henuwaisinina huyana unai kabo numatutugudu unai taumiya tamowaina hesau kwa kaibwadai bera ya yailigabaei. Unai, hage kwa henuwa bera Dius yodi wasawasa wa ya yailigabaei?"

⁴⁰ Na maudoidi se yogahilakilaki se wane, "Nige, iya nige! Balabasi iya ku yailigabaeiyama ede." Na Balabasi iya meta Loma gabemani unai tauhaikabi tamowaina.

Se hekasa meta Yesu kabo se hesataulo

19 Na kabo Pilato Yesu ye hai ye moselaei tau'iyala udiyedi na wipi unai se sapiheyababakaliliyei.

² Na kabo maimaina gwaligwalina se heihepo'opo'o doha kolona na se tole Yesu kuluna unai, yo kwama pulupululuna* se hai se heluwui. ³ Na se sae kalinawai na se talatalawasiyei se wane, "O Dius yodi wasawasa, ka hedebasaego." Yo nimadiwai se laupapali.

⁴ Pilato ye pesa'uyo na ye hededelau Dius tauwoyaidi wa udiyedi ye wane, "Hage, kabo ya woyaiyama na kwa kita, iya meta nige yababa hesau unai ya lobai." ⁵ Na Yesu kabo ye pesama, na maimaina gwaligwalina se hei hepo'opo'o wa kuluna ne unai yo tauna ne unai meta kwama pulupululuna. Ede Pilato ye hededelau udiyedi ye wane, "Tamowai wa iya ede teina!"

⁶ Huyana taukitalasam tauwoyaidi yo yodi taupaisowa lakilakidi Yesu se kita meta se yogahilakilaki se wane, "Ku hesataulo! Ku hesatauloyawa!"

Na Pilato ye hededelau udiyedi ye wane, "Komiu kwa hai na kwa hesataulo. Yau nige kabahegiluna hesau ya lobai."

⁷ Na Dius tauwoyaidi se hededebui se wane, "Kai meta yoma laugagayo hesau, na laugagayo ne debanawai iya taba ye boita, matauwuuna ede ye hedede meta bera iya Yaubada natuna."

⁸ Huyana Pilato teina hedehedede ta ye lapui meta ye matausikalili. ⁹ Kabo ye mwalaeseuyo numa

lakilakina wa unai, na iya Yesu ye henamaiyei ye wane, "Kowa haedi ku laoma?" Na Yesu nige kalinana. ¹⁰ Ede Pilato ye henamai'uyo ye wane, "Idohagi to nige kalinam? Nige kabina ku kata meta yau yugu gigibwali gonowana kabo ya yailihaiigo o ya hesataulogo?"

¹¹ Yesu ye hededebui ye wane, "Yau yom tanuwaga gigibwalina ta unai ya miyamiya matauwuuna ede yom gigibwali ne Yaubada ye leyawa. Unai tamowai ne* ye mosegabaeigau kalimwai ta, iya yona yababa ye lakikalili na kabo kowa."

¹² Teina hedehedede ta unai ede Pilato ye kaipatekalili bera Yesu ye yailigabaei, na Dius tauwoyaidi se yogalau unai se wane, "Ena taba teina tamowai ta ku yailigabaei meta kowa nige Sisa yona taupaisowa namwanamwana. Teina tamowai ta ye hedede bera iya wasawasa, na teina hedehedede ta ye hemasalaham meta Sisa unai ye haikabi."

¹³ Pilato teina hedehedede ta ye lapui ede Yesu ye woyahepesadobiyei hekasa kabaginaulina bakubakuna unai, na ye tuli hekasa kabaginaulina kabatulina unai. Teha ta hesana kalina Alamaiki unai ede Gabata,* kaniyona ede weku unai se matui.

¹⁴ Teina saha se tubu ta meta Taukiuli kaina kabinonohana mayadaina mayamayadailakina unai. Kabo Pilato ye hededelau Dius tauwoyaidi wa udiyedi ye wane, "Yomi wasawasa wa iya ede teina."

¹⁵ Na siya se yogalau unai se wane, "Ku laehesuwala! Ku laehesuwalyawa! Ku hesataulo."

Pilato ye henamaiyei ye wane, "Kwa henuwa bera yomi wasawasa ne ya hesataulo?"

Taukitalasam tauwoyaidi se yogabui se wane, "Yoma wasawasa kesega ede Sisa! Kai nige yoma wasawasa hesau!"

¹⁶ Na kabo Pilato Yesu ye moselaei tau'iyala tamowaidi kalidiwai bera se hesataulo.

Yesu se hesataulo

Ede Yesu se woyaesi se laei. ¹⁷ Na Yesu kana sataulo ye bom ye bahei na ye lau tupwa hesauna unai hesana ede Mwayalu Magaina unai. Kalina Alamaiki unai se wane, Golagota. ¹⁸ Temenai Yesu yo tamowai labui maiyanao se hesataulodi. Yesu se heduwaduwali na teha tutuna unai hesau yo teha seuseulina unai hesau.

¹⁹ Pilato hededehemasalaham kubwakubwana ye kuli na se tutuhepatu sataulo wa kewanawai, ye kuli ye wane, "Yesu Nasaleta Tamowaina, Dius Tamowaidi Yodi Wasawasa." ²⁰ Dius tamowaidi gwaudi kulikuli wa gonowana se hasili, matauwuuna ede yodi kabahesataulona ne meta magai lakilakina wa dedekanawai. Na hededehemasalaham wa meta kalina

19:2 Kalekona ne kana kao mamohoina meta ta wane *purple*. Na kaniyona ede wasawasa kabakitalobaina hekiheokino. Na kalinada unai nige *purple*, unai *pulupululuna* ta hepaisowa.

19:11 Tausonoga gwaudi yodi nuwatu meta teina tamowaina ede Kayapasi.

19:13 Tehana ta unai meta bwatano ne unai weku udiyedi se gwauhekasanamwanamwai na ye hemala matuna. Na hekasa kabaginaulina kabatulina meta unai se tole.

Alamaiki, Leteni yo Giliki udiyedi ye kuli. ²¹ Na Dius yodi taukaitalasam tauwoyaidi se hededelau Pilato unai se wane, "Tabu ku kuli ku wane, 'Dius tamowaidi yodi wasawasa,' na taba ku kuli ku wane, teina tamowai ta ye hedede ye wane, 'Yau Dius tamowaidi yodi wasawasa.'

²² Na Pilato ye hededebui ye wane, "Saha ya kuli ne, meta temeta ya kuli ede!"

²³ Yesu se hesataulo, na kabo tau'iyala tamowaidi wa taudi hasi, siya kana kwama se haldi na se bolidi na se soiyedi se bom mo kalidiwai, na kana likwaguni kwamana wa nige se boli, matauwuna teina kwama ta meta kewana unai ye dobi guni ne meta se halukesegai mo, nige kababoditubeina hesau. ²⁴ Ede tau'iyala wa se bom se hedehedede se wane, "Tabu kwama ta ta iga'igali. Ta tole na ta kaiheyai kabo kaiteya ye hai." Teina ye tubu ta meta kulikuli tabuna ye hemamohoiyei doha ye wane,

"Yogu kwama se soiyedi kalidiwai,
yo yogu likwaguni kwamana daisi unai se
kaiheyai." (*Same 22:18*)

Na teina laulau ta ede tau'iyala tamowaidi wa se ginaulidi.

²⁵ Yesu yona sataulo dedekanawai meta iya sinana, sinana kana kaha, Maliya iya Kolopasi mwanena yo Maliya Magadala waihiuna se totolo. ²⁶ Huyana Yesu ye kitadobi na sinana ye kita yo yona hekahekata ye gadogadosisi'lusei wa dedekana unai ye totolo, ede ye hededelau sinana wa unai ye wane, "Sinebada! Temeta me kowa natum." ²⁷ Na yona hekahekata wa unai ye wane, "Kowa sinam ede temeta." Tenem huyana ne unai ye lau meta yona hekahekata wa Yesu sinana wa ye woyai ye laei yona numa na ye kitahetete.

Yesu yona boita

²⁸ Na Yesu kabina ye kata meta yona paisowa maudoidi wa ye hegehediko. Ede ye wane, "Yau gadogu ye magu." (*Same 69:21*) Na teina unai kulikuli tabuna kabo ye hemamohoiyei. ²⁹ Waina maisana gagilina ma pakuna meta temenai, ede tau'iyala hesau balo ye hai ye hedakwa waina wa unai na hisopa* lagana unai balo wa ye gwalihekahini na ye helelesae Yesu kawana ne unai. ³⁰ Yesu waina wa ye numa, na kabo ye wane, "Yogu paisowa maudoidi wa ya hegehediko." Na kabo kuluna ye laudobiyei na yawasina ye gehe.

³¹ Na tenem meta Dius yodi Sabati kabinonohana mayadaina wa unai, yo mayadai hesauna ne kabo Sabati. Na tenem mayadaina ne meta mayadai saesaena. Na Dius tauwoyaidi nige se henuwa bena sinale ne se kabakabasi sataulo ne udiyedi ye lau ee

Sabati ye lobai. Ede Pilato se kaibwadai na tamowai wa kaedi sera se yatugodudi yo sinaledi ne se haigabaedi. ³² Ede tau'iyala tamowaidi se lau tamowai labui Yesu maiyanao se hesataulodi wa kaedi se yatugodudi. ³³ Na huyana se lau Yesu unai na se kita meta ye boitako, ede nige kaena wa se yatugodudi. ³⁴ Na tau'iyala tamowaina hesau wamali unai Yesu lisilisina ye gwalilapai, na kwasina yo waila se didipesama.

³⁵ Yau wasa ta taukulina na teina saha se tubu ta ya kitadi na ya kulihemasalahadi. Na saha ya kulihemasalahadi ta meta mamohoidi. Kabina ya kata meta ya hededemamohoi. Na ya kulihemasalahadi bena komiu hinage unai kabo kwa kawamamohoi. ³⁶ Teina saha se tubu ta bena kulikuli tabuna se hemamohoiyei, doha ye wane, "Nige siyadana hesau kabo se yatugodu."

(*Esodo 12:46, Numela 9:12, yo Same 34:20*) ³⁷ Yo kulikuli tabuna teha hesau unai ye wane, "Iya lisilisina se gwalilapai wa, kabo se kitalau unai." (*Sakaliya 12:10*)

Yesu se tole bwayabwaya unai

³⁸ Teina saha se tubu ta mulidiwai, Yosepa, iya Alematiya tamowaina, ye kaibwadai Pilato unai bena Yesu sinalena ye hai. Yosepa meta iya Yesu tauhemuliwatanina wadawadamna hesau na nige ye hemasalahayoi, matauwuna ede Dius tauwoyaidi hekadiyo wa ye matausiyedi. Pilato yona yali wa unai ede Yosepa ye lau Yesu sinalena ye hai, ³⁹ iya maiyan Nikodemo. Na Nikodemo, iya ede boniyaiyena Yesu taukaitaumanaena wa, iya meta yausi panepanena* ye bahei, polohena doha 33 kilo. ⁴⁰ Siya taudi labui Yesu sinalena wa se hai se heyausi na kaleko posiposina tupwadi lohalohadi udiyedi se suma. Teina ta meta Dius tamowaidi yodi toletoletau kabikabidi.

⁴¹ Yesu yodi kabahesataulona wa dedekanawai meta koya hesau, na unai bwayabwaya* hauhauna sola nige tamowai hesau unai se tole. ⁴² Tenem mayadaina ne Dius yodi Sabati kabinonohana mayadaina yo bwayabwaya wa kabahesataulona wa dedekanawai, ede temenai Yesu se tole.

Yesu ye tolo'uyo

20 Sabati hesauna mayadaina bagubagunana unai, malatomtom gagilina sola ma masimasigilina, kabo Maliya Magadala waihiuna ye lau bwayabwaya wa na ye kita meta kana gudu wekuna wa se hesighesuwalayako. ² Ede ye heloi ye lau Simona Petelo yo hekahekata hesauna Yesu iya ye gadosisi'lusei wa udiyedi na yodi ye hedehedede ye wane, "Guiau sinalena wa bwayabwaya wa unai se haiyako na nige kabina ka kata* haedi se toleyako!"

19:29 Hisopa kaniyona meta Hebelu 9:19 unai ka kulihemasalahku hasili.

19:39 Dius tamowaidi mulo yo aloi se kililidi. Teina ginauli labui panedi namwanamwadi paudadi se hebwalidi na se hepaisowadi toletoletau udiyedi, to taba nige sinale panena ye masalah.

19:41 Dius yodi bwayabwaya meta weku duhad se tadinamwanamwaedi.

20:2 Nige ye bom ye lau, matauwuna sola ma masimasigilina.

³ Kabo Petelo yo hekahekata hesauna wa se heloi se lau bwayabwaya wa unai. ⁴ Taudi labui se heloi na hekahekata hesauna wa Petelo ye heloigabaei na ye lagebaguna bwayabwaya wa unai. ⁵ Ye dunedobi ye kitalau kaleko posiposidi tupwadi lohalohadi wa ye kitadi se bawabawa, na nige ye lusae kalo ne. ⁶ Na Simona Petelo ye mulitama wa ye lage meta ye lusae kalo wa yo suma kaleko posiposidi tupwadi lohalohadi wa ye kitadi se bawabawa, ⁷ yo hinage Yesu kuluna kana suma kalekona wa ye kita meta nokunokuna, na sinale kana suma kaleko tupwadi lohalohadi wa tupwa hesau unai na kuluna kana suma wa hinage tupwa hesau unai. ⁸ Na kabo hekahekata hesauna taulagebaguna wa hinage ye lusae bwayabwaya wa unai. Na ginauli maudoidi wa ye kitadi ede ye kawamamohoi. ⁹ Na siya sola nige kulikuli tabuna se nuwatulobai meta Yesu kabo boita unai ye tolo'uyo.

Yesu ye taumasalahha Maliya Magadala waihiuna unai

¹⁰ Kabo hekahekatao wa se uyo yodi numa. ¹¹ Na Maliya iya bwayabwaya wa dagelana unai ye totolo na ye doudou. Iya ye doudou na ye dune ye kitalau bwayabwaya kalona wa unai, ¹² na anelu labui ye kitadi. Kadi kwama posiposidi, na se tutuli Yesu yodi kabahekenona wa unai, hesau kulubawa unai ye tuli na hesau kaegigi unai ye tuli.

¹³ Maliya se henamaiyei se wane, "Waihiu, matauwuwuna saha to ku doudou?"

Maliya ye wane, "Yogu guiyau se hai se laeyako, na nige kabina ya kata haedi se tole." ¹⁴ Teina hedehedede ta mulina ne unai Maliya ye tolobui, meta Yesu ye kita ye totolo, na nige ye nuwatulobai meta iya Yesu.

¹⁵ Yesu ye wane, "Waihiu, saha sabina ku doudou? Yo kaiteya ku wasewasenei?" Maliya yona nuwatu bena koya taupaisowaina, ede ye wane, "Taubada, ena ku hai ku tolehesuwalayako meta taba ku hedehedemasalaha haedi ku toleyako, na kabo gonowana ya lau ya hai."

¹⁶ Yesu ye heddedelau unai ye wane, "Maliya." Ede Maliya ye kitalau Yesu unai na ye wane, "Laboni!" Kalina Alamaiki unai kaniyona ede taulauhekata.

¹⁷ Yesu ye heddedelau unai ye wane, "Tabu ku kabikabilaoma kaliguwai, matauwuwuna yau sola nige ya sae tamagu unai. Na ku lau kagu kahao yodi ku hedehedede meta yau ya seuseuyo Tamagu iya ede Tamamiu, yo yogu Yaubada iya ede hinage yomi Yaubada unai." ¹⁸ Maliya Magadala waihiuna ye lau ede hekahekatao wa yodi ye hedehedede ye wane, "Guiyau wa ya kita!" Yo saha Yesu ye heddededi kalinawai wa hinage ye heddededi.

Yesu ye taumasalahha yona hekahekatao udiyedi

¹⁹ Tenem mayadai bagubagunana ne unai na boniyaina unai kabo hekahekatao wa se tupagogoi numa hesau unai na kawakedana se gudui,

matauwuwuna ede Dius tauwoyaidi se matausiyedi. Na Yesu ye laoma ede luwadi wa unai ye tolo na ye wane, "Nuwamu se talu!"

²⁰ Ye hedede, na mulinawai kabo nimana yo lisilisina wa ye hekitadi. Yona hekahekatao wa yodi guiyau se kita meta se gwauyalakalili.

²¹ Yesu ye hedehedede'uyo ye wane, "Nuwamu se talu! Yau Tamagu ye hetamaligauma, unai komiu hinage kabo ya hetamaligomiu." ²² Na kabo ye yahuwalau udiyedi na ye wane, "Yaluwa Tabuna kwa hai. ²³ Ena tamowai hesau yona ba'aya kwa nuwatugabaei, kabo nuwatugabae ne ye hai, na ena tamowai hesau yona ba'aya nige kwa nuwatugabaei, taba nige nuwatugabae ne ye hai."

Yesu ye taumasalahha Tomasi unai

²⁴ Na Tomasi, hesana hesau Didimasi yo iya saudoudoi labui wa hesauna, huyana Yesu ye taumasalahha wa iya nige maiyadi. ²⁵ Ede hekahekatao hekadi wa se heddedelau unai se wane, "Kai Guiyau ka kita!"

Na Tomasi ye heddedelau hekahekatao hekadiyo wa udiyedi ye wane, "Ena yau nige nimana udiyedi pawati gaidi ne ya kitadi, yo nimagigigu nige ya tole pawati gaidi ne udiyedi, yo nimagu nige ya tole iya lisilisina gaina ne unai, meta taba nige ya kawamamohoi."

²⁶ Sabati kesega mulinawai, hekahekatao wa numa wa unai se tupagogoi'uyo na Tomasi meta maiyadi. Keda wa se guduyako, iyamo Yesu ye laoma luwadi wa unai ye tolo na ye wane, "Nuwamu se talu!" ²⁷ Kabo ye heddedelau Tomasi unai ye wane, "Nimagigim ne inai ku tole, na nimagu gaidi ta ku kabitonogidi. Yo nimam ne ku heleleyama na lisilisigu ta unai ku kabi. Na tabu ku nuwalabulabui na ku sunuma mo."

²⁸ Tomasi ye heddedelau unai ye wane, "Kowa yogu Guiyau yo yogu Yaubada."

²⁹ Ede Yesu ye heddedelau unai ye wane, "Ku kitagau, na unai ede ku kawamamohoi. Kaiteyadi nige se kitagau na iyamo se kawamamohoi, meta kabo Yaubada yona kabinamwaena se miya."

³⁰ Yesu kabikabi gigigibwalidi gwaudi ye ginaulidi yona hekahekatao wa matadiwai, na teina buka ta unai nige maudoidi ya kulidi. ³¹ Na saha ya kulidi ta, udiyedi bena kabo kwa kawamamohoi meta Yesu iya Keliso, iya Yaubada natuna. Na yomi sunuma debadiwai kabo iya hesanawai mauli kwa hai.

Yesu ye taumasalahha yona hekahekatao udiyedi gabwa dedekanawai

21 Teina saha se tubu wa mulidiwai Yesu ye taumasalah'a'uyo yona hekahekatao wa udiyedi Tibeliya Gabwana dedekanawai. Na yona masamasalahha wa ede doha teina: ² Simona Petelo, Tomasi (hesana hesau ede Didimasi), Natanaela (iya meta magai Kana teha Galili ne tamowaina), Sabedi natunao yo hekahekatao labui hinage maudoidi meta se miyagogoi. ³ Na Simona Petelo ye heddedelau

udiyedi ye wane, "Yau bena ya lau ya yama." Na siya se wane, "Ta lau ta yama!" Ede se dobi se lau yodi waga unai se gelu, na tenem boniyaina ne unai meta se yamakasaya.

⁴ Malatomtom gagilina kabo Yesu nagali wa unai ye totolo, na yona hekahekatao wa nige se kitalobai.

⁵ Yesu ye yogadobi udiyedi ye wane, "Natuguwao, yama e nige?" Na se hedede'bui se wane, "Nige saha hesau ina!" ⁶ Ye wane, "Yomi hinaya ne kwa gabalaei waga teha kateyani unai, kabo yama hekadi kwa hekonadi." Na hinaya wa se gabaei meta nige gonowana se tabeisini, matauwuwuna ede yama wa meta se badokalili.

⁷ Na hekahekata Yesu iya ye gadosikaliliyei'usei wa ye hededelau Petelo unai ye wane, "Iya Guiyaunem!" Huyana Simona Petelo ye lapui meta tenem ne Guiyau, na iya meta taugaibuna, ede yona likwakewa kalekona ye hai ye likwa na ye kausihiei na ununa ye hesabwayahisi kana dagilolo unai, na ye kamposidobi gabwa unai. ⁸ Na hekahekatao hekadi waga unai wa se hemuliwatani, na hinaya ma yamana wa se niuli se sae, matauwuwuna ede siya nagali wa dedekanawai, lohana meta doha nima kalana 50.* ⁹ Na huyana se lage nagali wa unai meta kaiwa ye kalakalasi se kita. Unai yama, yo dedekanawai meta pwalawa hinage.

¹⁰ Yesu ye hededelau udiyedi ye wane, "Yama kwa galaidi wa hekadi kwa baheidima." ¹¹ Ede Simona Petelo ye gelusae na hinaya wa ye tabeisae salagomgom wa unai. Hinaya wa meta yama lakilakidi se hemwayau badodi ede 153. Yama wa se badokalili, na iyamo hinaya wa nige se pulisi. ¹² Yesu ye hededelau udiyedi ye wane, "Kwa laoma kwa kaikai!" Na hekahekatao wa nige se nuwabayao bena se henamaiyei se wane, "Kowa kaiteya?" Matauwuwuna kabina se kata meta iya yodi Guiyau wa. ¹³ Yesu ye laoma pwalawa ye haidi na kadi ye moseidi yo hinage yama wa ye haidi na kadi ye moseidi. ¹⁴ Yesu yona tolo'uyo na mulinawai teina ta meta huya hehaiyonana ye taumasalah yona hekahekatao udiyedi.

Yesu Petelo ye hetolo'uyo yona paisowa unai

¹⁵ Se kaikaigehe kabo Yesu ye hededelau Simona Petelo unai ye wane, "Simona, Yowane natuna, kowa mamohoi ku gadosikaliliyeigau, na kabo kam kahao ta?"

Petelo ye wane, "Mamohoi, Guiyau, kabina ku kata meta ya gadosisiyeigo."

Kabo Yesu ye wane, "Yogu mamoe ne ku hekaidi."

i

^{21:8} Kalina Giliki unai nowoina ne meta kubita handele labui, meta 90 mita o kala 50.

^{21:18} Teina hedehedede ta kabo ye hekalekogo, na hedehedede ta kalina Giliki unai meta nuwanuwatudi meta labui. Bagubagunana ede, kabo ye hekalekogo, na helabuina ede kabo ye paigo.

¹⁶ Yesu ye hedede'uyo ye wane, "Simona, Yowane natuna, kowa mamohoi ku gadosisiyeigau?"

Iya ye hedede'bui ye wane, "Mamohoi, Guiyau, kabina ku kata meta ya gadosisiyeigo."

Yesu ye wane, "Yogu mamoe ku kitahetetedi."

¹⁷ Hehaiyonana unai Yesu ye wane, "Simona, Yowane natuna, kowa ku gadosisiyeigau?"

Petelo nuwana ye kamkamna matauwuwuna ma haiyona meta Yesu iya ye henamaiyei ye wane, "Kowa ku gadosisiyeigau?", na ye wane, "Guiyau! Ginauli maudoidi kabidi ku kata; yo kabina ku katakalili meta ya gadosisiyeigo."

Yesu ye wane, "Yogu mamoe ku hekaidi. ¹⁸ Ya hedede'mamohoi kalimwai: Yom huyahewali unai meta ku bom ku hekalekogo na ku bom yom nuwatu udiyedi ku sae ku dobi. Na yom huyatautaubada unai kabo nimam ku lausinidi na ku heleledi, na tamowai hesau kabo ye hekalekogo* na ye woyalaeigo kabalau nige ku henuwa ne unai." ¹⁹ Teina unai Yesu ye hedede'hemasalah meta idohagi kabo Petelo ye boita, na yona boita ne unai kabo hedebasae lakilakina ye mosei Yaubada unai. Na kabo Yesu ye wane, "Ku hemuliwatanigau!"

Yowane hedehededen

²⁰ Na Petelo ye kitabui na hekahekata Yesu iya ye gadosi'iusei wa ye kita ye hemuhemuliwatanidi. (Teina hekahekata ta iya kaiteya ye duihasalilau Yesu unai huyakaikaigogo wa unai, na ye wane, "Guiyau, kabo kaiteya kam ye walohai?") ²¹ Yona kitana wa unai ede Yesu ye henamaiyei ye wane, "Guiyau, na iya kabo idohagi?"

²² Yesu ye hededelau unai ye wane, "Ena ya henuwa bena ye miyamiya ye lau ee kana siga ya uyoma, tabu ku nuwanuwatulau unai. Na kowa bena ku hemuliwatanigau." ²³ Teina unai ede wasalupolupo ye tadada ye lau kadi kahao se lapui meta bena teina hekahekata ta taba nige ye boita. Iyamo Yesu nige ye wane taba nige ye boita, na ye wane, "Ena ya henuwa ye miyamiya ye lau ee kana siga ya uyoma, tabu ku nuwanuwatulau unai."

²⁴ Teina hekahekata ta, iya ede yau. Ginauli maudoidi ta ya hedede'hemasalahadi yo ya kulidobiyedi. Na kabina ta kata meta yogu hedehedede ta mamohoidi.

²⁵ Yesu meta ginauli gwaudi hekadi hinage ye ginaulidi. Ena ginauli maudoidi ta se kulidobiyedi, ya nuwatuui meta tanoubu maudoina ta unai buka ta nige kabagwaugogoidi.

Apostolo yodi paisowa

Buka ta hededehemasalahana

Teina buka ta taukulina Lukasi, na ye kulilae tamowai hesau hesana Teopilo unai. Lukasi yona buka hesau meta ewaneliya, na temenai ye kulihemasalahna meta Yesu yona mauli unai saha ye tubutubu wa ye kitahekasa na kabo ewaneliya wa ye kuli. Teina buka ta meta yona ewaneliya ye tubei. Yesu yona tolo'uyo mulina ne unai ye hetubu, na kabo ye hededehemasalahna idohagi ekalesiya bodadi Yaluwa Tabuna se hai na idohagina se tada, Yelusalema yo Antiyoka yo Loma basileiyana tehana hekadiyo udiyedi na ye lau ee Paulo apostolo ye lage Loma magaina lakilakina unai.

Nuwanuwatuna saesaedi

1. Yesu ye seuyo galewa (1:1-26)
2. Yaluwa Tabuna ye taluma ekalesiya udiyedi na dubu ye laki ye lau Yelusalema unai (2:1-6:7)
3. Setepano se unui (6:8-8:3)
4. Pilipo ye lauguguya dagela tamowaidiyao udiyedi (8:4-40)
5. Saulo ye nuwabui (9:1-31)
6. Petelo yo tamowai hekadiyo yodi paisowa Yudeya yo hinage dagela tamowaidiyao udiyedi (9:32-12:25)
7. Paulo yona lauwasi kadauna bagubagunana (13:1-14:28)
8. Yelusalema unai dubu babadadiyo taunuwabui dagela tamowaidiyao udiyedi yodi se hineli, yodi sunuma kabikabina bena doha saha (15:1-35)
9. Paulo yona lauwasi kadauna helabuina (15:36-18:22)
10. Paulo yona lauwasi kadauna hehaiyonana (18:23-21:16)
11. Yelusalema unai Paulo se hewaiunu na se na se helauhetala, na kabo se lae Sisaliya unai se helauhetala (21:17-26:32)
12. Paulo yona kadau ye lau Loma magaina lakilakina yo yona miya Loma unai (27:1-28:31)

1 Taubada Teopilo, yogu buka bagubagunana unai ginauli maudoidi Yesu ye ginaulidi yo ye lauhekataedi wa ya kulidobiyediko, meta huyana Yesu yona paisowa ye hetubu² ye lau ee mayadaina Yaubada iya ye hai na ye sae galewa. Sola nige ye sae galewa, na Yaluwa Tabuna yona gigibwaliyena hededeheasanapu ye mosedi yona kaisunuwa tamowaidiyao udiyedi, siya ede yona apostolo.*

Yesu Apostolo kadi hedede hesanapu ye mosedi
³ Yona boita mulina ne unai Yesu ye taumasalahna yona apostolo udiyedi na kabikabi udoi'udo iye hemamohoiei meta boita unai ye tolo'uyo. Mayadai 40 solasoladi ne unai ye tautaumasalahna udiyedi na Yaubada yona basileiya hedehededena ye hedehededei.

⁴ Huya hesau se lagegogoi na yodi kaikaigogo luwana ne unai ye hededelau udiyedi ye wane, "Sola tabu Yelusalema kwa laulaugabaei, na kwa nayanaya ye lau ee tamagu yona hededehegesunuma kainauyana ye leyawa kalimiuyena. Doha yau hinage yomiu ya hedehededeko,⁵ meta Yowane waila unai ye hebahebabatiso, na mayadai hisa mo kabo Yaubada Yaluwa Tabuna unai ye hebabatisoigomiu."

⁶ Huya hesau kabo Yesu yona apostolo maiyanao yodi lagegogoi gegegehena Olibe kudulina unai* na se henamaiyei, "Guiau, teina mayadai ta unai gonowana ku hemala Isalaela yoma wasawasa, doha beyabeyana yoma wasawasa bagubagunadi?"⁷ Na Yesu yodi bui ye mosei ye wane, "Mayadaina yo mahana meta komiu nige gonowana kabina kwa kata, na tamagu yona gigibwaliyena ye hineliyako.⁸ Na Yaluwa Tabuna yona huyadobima unai kabo yona gigibwaliyena ye hebayaogomiu. Na komiu kabo tauwasduwaiyeigau Yelusalema unai, yo Yudeya yo Samaliya udiyedi, yo tanoubu teha maudoina udiyedi."

Yesu ye sae galewa
⁹ Yesu yona hedehedede wa ye hedededi na Yaubada iya ye hai na matadiyena ye sae galewa, na yada unai ye tauwadam.¹⁰ Iya ye laoko na sola se kaikaikewasae. Nige bayaona na tamowai labui kadi kwama posiposidi se taumasalahna udiyedi¹¹ na se wane, "Galili tamowaidi, idohagi to temetai kwa totolo na kwa kaikaikewasae yada ne unai? Yaubada Yesu ye hai ye saeko galewa, na kabo ye dobi'uyoma doha yona saesae galewa ne."

1:2 Apostolo kaniyona labui: Yesu yona hetahetamali tamowaina yo tauwasduwai.

1:6 Yodi koigogo wa magaina kabina ta kata matauwuwuna lausoiso 12 unai Luka kabo ye hededehemasalahna siya Olibe koyana se laugabaei.

Mataiyasi se kaisunuwai Yudasi lauhedamaina

¹² Na kabo apostolo wa Olibe kudulina se laugabaei se uyo Yelusalema, meta nige kedaloha.* ¹³ Yodi kabamiya numana unai se lage kabo se mwalaesae numa wa heisi helabuina unai. Teina hesadiyao ede: Petelo, Yowane, Yamesi, Andeleya, Pilipo, Tomasi, Batolomaiyo, Mataiyo, Yamesi Alepaiya natuna, Simona Tauhaikabi* yo Yuda Yamesi natuna.

¹⁴ Maudoidi ne nuwadi kesega na huya maudoina se miyagogoi na se tapwatapwalolo, na sinesineo hekadi maiyadiyao, yo Maliya Yesu sinana, yo hinage Yesu kana kahao.

¹⁵ Tenem mayadaidi ne udijedi kabo yodi koigogo hesau unai taukawamamohoi badodi 120 laomagogoi, kabo Petelo ye tolo na ye hedehedede ¹⁶ ye wane, "Kagu kahao, huyana ye lohakalili na Yaluwa Tabuna nuwatu ye mosei Dawida unai na ye hedede meta Yudasi kabo Yesu tauhaina ye woyaidi. Na Yudasi hedehedede wa ye ginalui. ¹⁷ Iya meta kada kaha hesau yo tauhaisagusagu yoda paisowa ta unai. ¹⁸ Na iyamo yababa wa ye ginalui. Na yababa wa maisana monina ye hai na unai tano hesau ye hemaisa. Temenai ye beku ede bogana ye talupulisi na sinaena ye tatapesa. ¹⁹ Yelusalema unai taumiya maudoidi wasana wa se lapui ede tano wa hesana se tole Akeledama, kaniyona ede 'kwasina tanona'.* ²⁰ Same bukana unai Dawida ye kuliyako,

'Taba yona numa ne nige tamowaina,
yo nige gonowana hesau unai ye miya',

(Same 69:25)

yo hinage,

'Yona paisowa kabo tamowai hesau ye hai.'

(Same 109:8)

²¹ Unai taba tamowai hesau ta kaisunuwai.

Tamowaina ne bena maiyada huya maudoina Guiyau Yesu maiyada ta sae yo ta dobi, ²² meta huyana Yowane Yesu ye hebabatisoi unai ye hetubu ye lau ee Yaubada Yesu ye hai ye sae galewa. Kabo iya yo kita ta hemala Yesu yona tolo'uyo tauhededehemasalahana."

²³ Kabo tamowai labui se hetolodi ede Yosepa hesana hesau Basabasi (yo hinage se katai Diyasisati), yo Mataiyasi, ²⁴ na se tapwalolo se wane, "Guiyau, tamowai maudoidi nuwadi kabidi ku katakalili. Unai tamowai labui ta udijedi kaiteya ku kaisunuwai na ku hemasalahayama. ²⁵ To iya ye hemala apostolo hesau Yudasi lauhedamaina, matauwunna ede Yudasi yona

1:12 Keda wa lohana Luka ye hedehedehemasala meta Sabati laugagayona ye hedede meta gonowana keda wa se laui. Yoda nowonowoyiena meta 1.1 kilomita.

1:13 *Tauhaikabi* ne meta boda hesau Isalaela unai hesana. Yodi nuwatu bena Isalaela se bom se kitahetete'uyoidi. Unai Loma tamowaidiyao maiyadiyao se haihaikabi. Huyana Simona sola nige ye patulau Yesu unai, iya hinage kadi boda hesau. Unai iya hesana se tole *Simona Tauhaikabi*.

1:19 Yudasi yona boita wasana meta Mataiyo 27:3-10 unai ta hasili. Ye gadosoha ede tano wa ye heyababa na Dius tamowaidi nige gonowadi unai se miyamiya.

1:26 Yodi kaisunuwa wa se ginalui meta tamowai hesadi se kulidi weku udijedi, na se usaidi higuhiq unai, na se nukui. Yaubada yona kaimasi tamowaina hesana kabo ye beku.

2:1 *Pentekosi* meta Dius yodi mayadai lakilakina hesau. Mayadaina ne unai Yaubada se lautokiyei kadi kai hesabana. *Pentekosi* kaniyona ede *mayadai* 50, iya ede Taukiuli Henuwaisinina mayadaina mulina ne unai. Pentekosi mayadaina unai bodalakilaki Yelusalema unai se bawabawa.

2:5 *Dius tamowaidiyao* kaniyona ede *Abelahaha kana isimulita*, yo hinage ta wane Yaubada kana bodoa iya ye kaimasiyedi wa. Yodi kabakita meta yodi tatao maudoidi ma gagilidi se hepelitomedi. Dius wa tanoubu maudoina tehana udoi'udoi udijedi se miyamiya.

paisowa ye laugabaei, na ye lauko yona kababawa unai." ²⁶ Unai tamowai labui wa se kaisunuwa* ede kaisunuwa wa ye lau Mataiyasi ye hai. Unai kabo iya apostolo saudoudoi-kesega (11) wa kadi kaha hesau.

Yaluwa Tabuna yona huyalaoma mayadaina

2 Na kabo Pentekosi mayadaina ne unai* meta taukawamamohoi maudoidi se lagegogoi numa kesega unai. ² Makesega na dagugu lakilakina galewa ne unai ye dobima doha yaumailakilaki ye lotalu. Yodi kabamiya numana wa meta dagugu ye hemwayau.

³ Na ginalui hesau se kita kana kao doha kaiwa pulupululuna ye dobima na ye tatagwaligwali ede ye talu tamowai kesega kesega unai. ⁴ Na Yaluwa Tabuna maudoidi wa ye hemwayaudi na yona gigibwaliyena se hetubu kalina udoi'udoi udijedi se hedehedede.

⁵ Na Pentekosi mayadaina hesabana ede tanoubu teha udoi'udoi udijedi Dius tamowaidiyao* se laoma Yelusalema, meta siya yodi laugagayo taumiyawatanidi ma nuwamaudoidi. ⁶ Huyana dagugu wa se lapui meta bodalakilaki se lagegogoi na tausunuma yodi hedehedede se lapulapuidi meta se nuwapwanopwano, matauwunna ede taulaoma maudoidi kalinadi udoi'udoi udijedi se hedehedede. ⁷ Siliyata yo nuwapwanopwanoyena se wane, "Teina tauhedededede ta Galili tamowaidiyao. ⁸ Idohagi to maudoida ta lapulobai meta kalinada mamohoidi udijedi se hedehedede? ⁹ Kita meta Patiya, Mediya yo Elama, Mesopotamiya, Yudeya yo Kapadosiya, Pontasi yo Eisiya, ¹⁰ Pilidiya, Pampiliya yo Aikupito tamowaidiyao. Hekadiyo Libiya tehana Sailini dedekanaena se laoma. Hekadi meta taumana Loma unai se laoma, ¹¹ siya meta Dius yo hinage dagela tamowaidiyao se nuwabui na se patulau Dius bodadi udijedi. Na hekadi meta Kiliti bwanabwanaluwana yo Alabiya tamowaidiyao. Na iyamo yodi hedehedede ta lapuidi meta kalinada udijedi Yaubada yona laulau namwanamwadi se hedehedehemasalahadi." ¹² Na se noko, yo nuwadi se pwanopwano, na se bom se henahenamai'uyoidi, "Teina meta kaniyona ede saha?"

¹³ Na hekadiyo meta taukawamamohoi wa se talatalawasiyedi se wane, "Tamowai ta nuwana se numa yauyaule!"

Petelo yona hedehedede Pentekosi mayadaina wa unai

14 Na kabo apostolo saudoudoi-kesega wa se tolo na kalina lakilakiyena Petelo ye hedehedede ye wane, "Yogu hali Dius, yo Yelusalema unai taumiya, kwa lapulapui na ginauli maudoidi ta kaniyodi kabo ya hedehedehemasalahadi. **15** Teina tamowai ta meta nige se numayauyaule matauwuna ede teina ta meta sola ma malatomtomna. **16** Saha se masalaha kwa kitadi ta meta peloweta Yoela ye hededediko,

17 'Yaubada ye wane, "Mayadai gehegehediyo udiyedi kabo yaluwagu ya inidobiyei tamowai maudoidi udiyedi.

Natumiyo loheloheyao yo sinesineo kabo se hededepeloweta.*

Yomi hewahewaliyo kabo tautau tabudi se kitadi. Yomi tautaubadao meta kabo kenosuwai tabudiyao se kenosuwaiyedi.

18 Yo hinage kabo yaluwagu ya inidobiyei yogu heyayai tauginaulidi tatao yo sinesineo udiyedi na kabo se hededepeloweta.

19-20 Yada ne unai kabo laulau gigigibwalidi se masalaha.

Mahana kabo ye masigili, na nawalai kabo ye bui doha kwasina.

Na kaiaulina unai kabo hekihekinoi se masalaha, meta kwasina, kaiwa, yo kasu lakilakina.

Mulina ne unai Guiyau yona mayadai wasawasana yo namanamalina kabo ye lage.

21 Na kaiteyadi se yogasae Guiyau unai, meta kabo ye gilihaidi." ' " (Yoela 2:28-32)

22 Petelo yona hedehedede wa ye tubei ye wane, "Isalaela tamowaidiyao, kwa lapulapui! Komiu kabina kwa kata meta Yesu Nasaleta tamowaina laulau gigigibwalidi* ye ginaulidi kalimiuyena. Laulau wa udiyedi Yaubada ye hemasalah yo ye hemamohoiyeyi meta iya Yesu ye hetamaliyama. **23** Teina tamowai ta meta Yaubada ye hineli yo ye kaisunuwanonohaiyako na ye mosegabaei kalimiuyena. Na komiu yomi nuwatuyena dagela tamowaidiyao kwa haidi na maidamiyao kwa hesataulo, na ye boita. **24** Na Yaubada iya ye gilihai boita unai na ye hetolo'uyoi, matauwuna boita nige gonowana Yesu ye kabihekahini. **25** Dawida hinage Yesu hedehededenye hedehedede ye wane,

'Huya maudoina Guiyau ya kitakita.

Iya nimatutuguyena, unai nige gonowana ya matausi.

26 Unai nuwagu ye namwakalili, na ya hedehedede meta ma gwauyalagu,

yo taugu ta kabo hinage sunuma yo nuwabayao unai ye miya,

27 matauwuwuna nige gonowana yaluwagu ta ku nuwagabaei boita magaina unai, yo nige gonowana yom tamowai tabuna ku nuwagabaei na bwayabwayaena ye pwasa.

28 Mauli kedana wa ku hekitagauko, na yau dedekam yena, kabo ku hegwaualakaliliyeigau.' (Same 16:8-11)

29 Kagu kahao, kabina ta katakalili meta kada kulutubu Dawida ye boita na se tole, na mayadai ta unai bwayabwayana ede yoda magai ta unai.

30 Dawida meta peloweta, na kabina ye kata Yaubada saha ye hedehedehesunuma yo ye kaigwala, meta kana isimulita tamowaina hesau kabo ye hemala wasawasa doha iya. **31** Ginauli saha kabo se tubu Dawida matana ne unai wa ye kitadi, na Keliso yona tolo'uyo hedehededenye hedede meta Yaubada nige iya ye nuwagabaei tauboiboita yodi magai* unai, yo tauna nige se pwasa bwayabwayaena. **32** Yaubada Yesu ye hetolo'uyoi boita unai, na kai maudoimai meta tauhemamohoiyena ede. **33** Na iya ye seuyoko Yaubada nimatutunaena ye tuli, na tamana yona hedehedehesunuma Yaluwa Tabuna ye hai. Na teina saha kwa kita yo kwa lapui ta, meta Yesu Yaluwa Tabuna ne ye inidobiyeiyama kalimaiyena. **34** Na Dawida meta nige ye sae galewa, na iyamo ye hedede ye wane,

'Guiyau Yaubada ye hededelau yogu guiyau unai, "Nimatutuguyena ku tuli,

35 ye lau ee kam waiunu ya toledi kaem guninaena, se hemala kaem kabatoledi.'" (Same 11:0:1)

36 Unai, Isalaela tamowaidiyao maudoimiu bena kwa nuwatulobainamwanamwai meta Yesu kwa hesataulo'usei wa meta Yaubada ye kaisunuwaei iya Guiyau yo Keliso.*

37 Hedehedede wa se lapuidi ede se nuwagwali na se henamai Petelo yo apostolo hekadiyo wa udiyedi se wane, "Kama kahao, saha kabo ka ginauli?" **38** Kabo Petelo ye hededelau udiyedi ye wane, "Kesega kesega bena ku nuwabui yo ka hebabatisoigo Yesu Keliso hesanaena, unai kabo Yaubada yom yababa ye nuwatugabaei, yo yona kainauya Yaluwana Tabuna kabo ku hai. **39** Teina hedehedehesunuma ta Yaubada ye haiyawa komiu yo natumiyo yo dagela tamowaidi, yo kaiteyadi siya hinage Guiyau yoda Yaubada kabo ye yoganedi meta siya yodi."

40 Na kabo Petelo hedehedede hekadiyo udiyedi ye guguyaidi ye wane, "Kwa nuwabui yo Yesu kwa sunumaei, kabo teina tamowai yababayabadiyao ta udiyedi ye gilihaigomiu." **41** Mayadaina ne unai meta

2:17 Hedehedepeloweta kaniyona ede Yaubada yona nuwatu ye mosei tamowai hesau unai, na kabo ye hedehedehemasalah.

2:22 Laulau gigibwalidi ta meta kulikuli beyabeyadi wa udiyedi hedehedede haiyona udiyedi se kulihemasalah. Na hedehedede haiyona ne meta kabikabi kesekesegadi se hetahetaladi. Bagubagunana ye kitalau gigibwali unai, iya ede laulau gigigibwalina. Helabuina kaniyona ede taukaikewai wa se nokokalili. Yo hehailayonana kaniyona ede hekihekinoi.

2:31 Tauboiboita yodi magai kaniyona ede tauboiboita yaluvaluwadi yodi kabamiya, kalinadaena hesana ede Biula.

2:36 Keliso kaniyona meta Yaubada yona kaisunuwa tamowaina, iya ede tamowai maudoidi taugilihaiyo tausaguidi, yo iya meta tamowaina Dius tamowaidi se nayanaya'eusei wa.

bodalakilaki Petelo yona hedehedede wa unai se kawamamohoi na siya se hebabatisoidi, na badodi ede 3,000 se lusae ekalesiya bodana unai.⁴² Se patulau taukawamamohoi wa udiyedi na se hebodakesega. Se lapulapui apostolo yodi lauhekata wa udiyedi yo se koikoigogoi, yo Guiyau yona kaikaigogo henuwaisinina unai se kaikaigogo, yo se tapwatapwalologogoi.

Taukawamamohoi se hebodakesega

⁴³ Apostolo wa laulau gigigibwalidi yo hekihekinoi kadi kao udoi'udoi se ginaulidi. Unai tamowai maudoidi Yaubada se matausiyei yo se hededetausaei.⁴⁴ Taukawamamohoi wa se lagelagegogoi na yodi gogo se kaikainauya'uyoidi.⁴⁵ Yodi gogo yo yodi tano hekadiyo se lokunegabaedi na monidiyao se haidi na kadi boda wa unai tamowai hekadiyao se saguidi.⁴⁶ Mayadai kesega kesega se lagelagegogoi numa tabuna bakubakuna unai. Yo hinage yodi numa udiyedi Guiyau yona kaikaigogo henuwaisinina se ginauli, yo se kaikaigogo ma gwaugwauyaladi yo ma nuwadobidobidi,⁴⁷ yo Yaubada se hedehedebasaei. Na boda maudoidi taukawamamohoi wa se kitahenamwadi. Na mayadai maudoina Guiyau tamowai ye gilihai na ye tolelaedi ekalesiya bodana wa unai.

Petelo taubunibuni hesau ye henamwanamwa

3 Mayadai hesau meimeilahi yona tehaena tapwalolo mahanagan ne unai* Petelo yo Yowane se lau numa tabuna unai.² Na numa tabuna kawamatana hesana "Keda namwanamwana" unai meta taubunibuni hesau. Iya sinana ye labasi meta bunibunina, na mayadai maudoina tamowai ta se baheiyama se hetuli kawamata wa unai na ye kaikaibwadamoni taumwalamwalaе wa udiyedi.³ Huyana Petelo yo Yowane bena se mwalaе na ye kitadi ede hinage udiyedi ye kaibwadamoni.⁴ Taudi labui wa se kitalau iya unai, na Petelo ye wane, "Sola ku kitalaoma kai kalimaiyena."⁵ Ede tamowai wa ye kitalau udiyedi, na yona nuwatu bena kabo yona kainauya saha hesau se mosei.⁶ Na Petelo ye hedehedelau unai ye wane, "Yau nige moni hesau kaliguyena, na saha kaliguyena ta meta kabo ya leyawa. Yesu Keliso Nasaleta tamowaina hesanaena ya hededenowa, ku tolo na ku laulau."⁷ Na Petelo ye kabilau tamowai wa nimatutuna unai na ye kabihetolo. Mahanagan ne unai kaena tubeidiyao wa se bayao,⁸ ede ye tolomwamwayau na ye hetubu ye laulau. Na maiyadi se lusae numa tabuna wa unai ye laulau yo ye kamkamposi na Yaubada ye hedehedebasae.⁹ Na boda wa iya se kita ye laulau yo Yaubada ye hedehedebasaei¹⁰ na se kitalobai meta iya taukaibwada numa tabuna kawamatana unai ye tutuli wa, meta se siliyata yo se nokokalili.

Petelo ye hedehedelau boda wa udiyedi

¹¹ Na kabo taubunibunina se henamwanamwa'usei wa Petelo yo Yowane maidanao se hanimakabi na numa tabuna wa unai se pesa se lau teha hesauna hesana **Solomona yona Logologu** unai. Na boda maudoidi saha se tubu wa se kita yo wasana se lapui ede se siliyata na se heloigogoi se lau udiyedi.

¹² Petelo ye kitadi ede ye hedehedelau udiyedi ye wane, "Isalaela tamowaidiyao, idohagi to kwa siliyatikalili? Yo idohagi to kwa kaikewaigai kana kao doha ka bom yoma gigibwali yo yoma namwa debanaena tamowai ta ye laulau.

¹³ Abelahama, Isako, Yakobo yo kada kulutubu maudoidi yodi Yaubada yona taupaisowa Yesu ye lausini na kabatuli namanamalina unai ye tuli. Huyana Yesu sola tanoubu ta unai meta komiu iya kwa mosegabaei na se unuhemwaloi. Pilato ye henuwa bena ye yailigabaei, na komiu kwa hedede meta Yesu nige kwa henuwa.¹⁴ Tamowai tabuna yo namwanamwana kwa subu na kwa kaibwada bena taba taukaikaiunu wa ye yailigabaei.¹⁵ Mauli wuwuna tamowaina kwa unui, na boita unai Yaubada iya ye hetolo'uyoi, na tauhemamohoiyena ede kai.

¹⁶ Tamowai maiyada ta totolo ta kwa kitalobai meta iya taubunibunina wa. Na Yesu iya ye hebayao matauwuwuna ede Yesu ka sunumaei. Mamohoi, yoma sunuma Yesu unai debanaena tamowai ta ye namwanamwa matamiyuenya.

¹⁷ Na kehaguwao, kabina ya kata meta komiu yo tauwoyaigomiu Yesu nige kabina kwa kata meta iya Keliso ede, unai iya kwa unui.¹⁸ Na teina laulau ta udiyedi meta Yaubada kalinana peloweta se hededenonohaidiko wa se laoma se mamohoi, doha ye wane Keliso meta kabo ye kamkamna.¹⁹ Unai taba kwa nuwabui na kwa lau Yaubada unai, na yomi yababa kabo ye deuligabaedi yo yaluwamu iye hehauhau²⁰ na yona kaisunuwa tamowaina Keliso ye hetamali ye uyowa kalimiyuenya, tamowaina ede Yesu.²¹ Na Yesu sola kabo ye miya galewa ne unai kana siga Yaubada ye hetubu bena ginauli maudoidi ye hehauhau'uyoidi, doha beyabeyana ye hedehedehesunuma yona peloweta tabudiyao yodi hedehedede udiyedi.²² Doha peloweta Mose ye hedede ye wane, 'Guiyau Yaubada kabo luwamiyuenya peloweta hesau ye kaisunuwi doha yau. Kwa lapulapulau yona hedehedede maudoidi udiyedi!

²³ Ena kowa kaiteya nige ku lapulapulau peloweta ne unai meta kabo Yaubada yona tamowai luwadiyena ye boligabaeo na ye tolehesuwalakaliyego.'

(Dutelonomi 18:15, 18, 19) ²⁴ Yo hinage Samuwela unai ye hetubu ye laoma meta peloweta maudoidi ginauli sahasahadi se tubutubu mayadai ta udiyedi meta se hededebagunaaidiko.²⁵ Yo hinage Yaubada yona talam ye ginauli na ye hedehedehesunuma Abelahama unai ye wane, 'Kam isimulita kabo tanoubu ta tamowaidiyao

yodi kabanamwa.' (*Genese 22:18; 26:4*) Peloweta yodi hedehedede wa yo Yaubada yo Abelahama yodi talam wa kaniyodi tauhaidi ede komiu kadi isimulita.

²⁶ Huyana Yaubada yona heyayai tauhaina ye hetolo meta ye hetamalibagunaiyawa komiu Dius tamowaidiyao kalimiuyena na unai ye henuwa bera ye hededenamwagomiu yo ye saguigomiu bera yomi miyamiya kwa buidi na yomi laulau yababayababadi kwa hekaiyawasidi."

Petelo yo Yowane Sunedeli unai se helauhetaladi

4 Petelo yo Yowane sola ma hedehedededi boda wa udiyedi na taukaitalasam hekadi yo numa tabuna yona polisi kadi tanuwaga yo Sadusiya tamowaidiyao hekadi se lage. ² Se koipilikilili matauwuna apostolo labui wa se lauguguya na se lauhekata tamowai wa udiyedi meta Yesu boita unai ye tolo'uyoko, yo tauboibooita kabo hinage boita unai se tolo'uyo. ³ Se haidi, na mahana ye laoko ede se toledi numatutuguduyenya ye lau ee mala ye tom. ⁴ Na iyamo Petelo yona lauguguya wa taulapui tamowaidiyao gwaudi meta se kawamamohoi. Na loheloheyao taukawamamohoi maudoidi badodi ye sae ede nuwana 5,000 ye lobai.

⁵ Mala wa ye tom meta Dius tauwoyaidi yo tamowai lakilakidiyo yo laugagayo taulauhekataena tamowaidi se lagegogoi Yelusalema unai.* ⁶ Luwadi ne unai meta taukaitalasam saesaena Anase, yo Kaiyapasi, Yowane, Alekisenda yo taukaitalasam saesaena kehanao tatao hekadiyo. ⁷ Se hedede meta Petelo yo Yowane se woyaidima na se hetolodi duwaduwali wa unai, na se henahenamaiyedi se wane, "Kaiteya yona gigibwali yo hesana unai laulau ta kwa ginauli?" ⁸ Yaluwa Tabuna Petelo ye hesibasiba ede ye hededebui ye wane, "Tauwoyawoya yo babadoo! ⁹ Kwa henamaiyegai laulau namwanamwana ka ginauli taubunibuni wa debanaena. Na kwa henuwa bera kabina kwa kata idohagi na ye namwanamwa. ¹⁰ Unai bera ya hemasalahi kalimiuyena yo Isalaela maudoidi udiyedi: Tamowai ta matamiuyena ye totolo ta, iya Yesu Keliso Nasaleta tamowaina yona gigibwaliyena ye namwanamwa. Yesu meta kwa hesataulo na ye boita, na Yaubada iya ye hetolo'uyoi boita unai. ¹¹ Na kulikuli tabuna unai Yesu hedehededeni ta hasili ye wane,

'Iya meta duu komiu taukabinuma kwa subu na kwa tolehesuwala wa,
na iyamo iya duu salibebe yo numa tauhebayaona
ede.* (*Same 118:22*)

¹² Nige tamowai hesau gonowana ye hemaulida, matauwuna kaiyaulina ta unai Yaubada nige hesa hesau ye leyama unai kabo gonowana ye gilihaida."

¹³ Tauwoyawoya wa Petelo yo Yowane se kitadi se hedehedede ma nuwabayaodi, yo hinage kabina se kata meta siya tamowai gaibu nige se sonoga, meta se siliyata. Na se nuwatulobai meta taudi labui wa Yesu tauhemuliwatanina. ¹⁴ Na nige gonowana saha hesau se hedede, matauwuna ede tamowai se henamwanamwa'usei wa Petelo yo Yowane maiyadi se totolo. ¹⁵ Na se hededelau udiyedi Sunedeli numana wa se pesagabaei se lau dagela, na kabo se bom se koitalaliu ¹⁶ se wane, "Kabo saha ta ginauli tatao ta udiyedi? Yelusalema maudoina unai meta laulaugigibwali saesaena se ginauli wa kabina se katako, na nige gonowana ta uhlaei. ¹⁷ Na sunuma ta hedehededeni bera ta hekaiyawasi tabu ye laki ye lau boda udiyedi. Unai kabo ta hededebayao yodi labui ta udiyedi tabu Yesu hesanaena se hedehedede'uyo tamowai hesau unai."

¹⁸ Na kabo se yoganei'uyoidima na se hededelau udiyedi bera tabu Yesu hesanaena se hedehedede yo se laulauhekata. ¹⁹ Na Petelo yo Yowane se hedede se wane, "Komiu kwa bom kwa hineli saha ye dudulai Yaubada matanaena, yomi hedehedede ta ka lauwatani o Yaubada? Taba Yaubada mo ka kawakabiyei! ²⁰ Unai nige gonowana ka mwanomwanou, na ginauli namwanamwadi ka kitadi yo ka lapuidi wa kabo ka hededehemasalahadi." ²¹ Na kabo tatao lakilakidiyo wa apostolo wa se hededehehematausidi na se hetamalidi se lau. Na nige keda hesau se lobai taba unai kabo se hekamkamnadi, matauwuna laulau saha ye tubu wa unai ede tamowai maudoidi Yaubada se hedehedebasaei. ²² Yodi hedehedebasae kaniyona ede laulau gigigigibwalina wa unai taubunibunina se henamwanamwa'usei wa yona bolimai meta 40 ye laugabaeiyako.

Taukawamamohoi yodi tapwalolo

²³ Huyana Petelo yo Yowane se hededegabaedi ede se uyo kadi boda wa udiyedi, na taukaitalasam tauwoyaidi yo tamowai lakilakidiyo yodi hedehedede wa se hededehemasalahadi udiyedi. ²⁴ Na wasa wa se lapui ede taukawamamohoi maudoidi ma nuwakesegadi se tapwalologogoi se wane, "Guiau saesaekalilina, kowa galewa, tanoubu, gabwa, yo ginauli maudoidi tauginaulidi. ²⁵ Yaluwa Tabuna yona hekata unai yom heyayai tauhaina kama kulutubu Dawida ye hedede ye wane,

'Idohagi to dagela tamowaidiyao se koipilikilili,
yo boda lakilakidiyo nuwanuwatu yababayababadi
se koitalaliugaibuidi?

²⁶ Tanoubu wasawasadiyao se nonoha,
yo tauwoyawoya se lagegogoi
bera Guiayu se lului

4:5 Taulagegogoi wa siya ede Sunedeli.

4:11 Isalaela tamowaidiyao weku udiyedi se kabinuma, unai lausoisoit a kana kao mamohoina ede doha teina: *Iya kabakabinuma wekuna ede, na komiu taukabinuma kwa subu na kwa tolehesuwala. Iyamo iya weku saesaekalilina numakabi unai.*

yo se haikabi yona kaisunuwa tamowaina* unai.'
(Same 2:1-2)

²⁷ Ye mamohoikalili, Heloda yo Pontius Pilato, yo Isalaela yo dagela tamowaidiyao maudoidi se tupagogoi magai ta unai bena yom heyayai tauhaina tabuna Yesu unai se haikabi. Iya ede yom kaisunuwa tamowaina. ²⁸ Saha se ginauli wa meta yom gigibwaliyena beyabeyana ku hinelinonohaiyako meta kabo ye tubu. ²⁹ Unai ede ka kaibwadaigo, Guiyau, bena yodi hedehededehemahematausi wa ku nuwatuidi na yom taupaisowa ta ku hebayaodi bena wasam se duwai ma nuwabayaodi. ³⁰ Nimam ku heleledobiyeiyama na ku hegigibwalidi to taukasikasiyebwa se henamwanamwadi yo laulau gigigibwalidi se ginaulidi yom heyayai tauhaina tabuna Yesu hesanaena."

³¹ Tapwalolo wa ye gehe meta yodi kabakoigogo numana wa ye nukunuku na Yaluwa Tabuna ye hemwayaudi, na kabo se lau Yaubada wasana se duwai ma nuwabayaodi.

Taukawamamohoi se haihaisagusagu'uyoidi

³² Taukawamamohoi maudoidi wa nuwadi kesega. Yodi gogo wa udiyedi meta se haihaisagusagu'uyoidi, na nige hesau ye hedede bena ye bom mo yona gogo. ³³ Na apostolo wa Guiyau Yesu yona tolo'uyo boita unai wasana se hedehededehemasalahma ma gigibwalidi. Na Yaubada yona kabinamwa meta taukawamamohoi maudoidi wa udiyedi.

³⁴ Taukawamamohoi wa udiyedi nige hesau ye deha, matauwuna ede kaiteyadi yodi tano yo numa, meta se lokuneidi ³⁵ na monidiyao wa se baheidima na se mosedi apostolo wa udiyedi, kabo se soiyedi kaiteyadi se deha wa udiyedi.

³⁶ Taukainauya hesau meta Yosepa. Iya Lewi kana isimulita hesau, Saipulusi bwanabwanaluwana unai ye laoma. Na apostolo wa hesana se tole ede Banaba, kaniyona ede tauhedehededehebayao. ³⁷ Iya yona tano hesau ye lokunegabaei na monina wa ye baheyama na ye mosegabaei apostolo wa udiyedi.

Ananiya yo Sapila se kailupolupo

5 Ekalesiya bodadi wa luwadiyena tamowai hesau hesana Ananiya, yo mwanena Sapila. Siya hinage yodi tano tehana se lokunegabaei. ² Mwanena maiyana yodi nuwatu kesega ede monina tehana se kabinuwahi na kabitolena wa se baheyama se mosei apostolo wa udiyedi. Ede Ananiya ye lau Petelo unai na ye hedede bena moni maudoina ye baheyamako. ³ Na Petelo ye wane, "Ananiya, idohagi to Satani nuwam ne ye hemwayau, na Yaluwa Tabuna ku lupoi bena moni maudoina ede ku baheyama ta, na iyamo moni wa tehana ede ku kabinuwahiyako. ⁴ Tano ne meta kowa yom, na yom nuwatuyena ku lokunei. Ku

lokunei na monina ne hinage kowa yom, ku kabihekahini o ku kainauyaei. Idohagi to nuwam yena ku hineli na ku kailupolupo ku hedede bena moni maudoina ku baheyama ta? Nige tamowai udiyedi ku kailupolupo, na Yaubada unai." ⁵⁻⁶ Hedehedede wa ye lapui ede ye gulidobi meta ye boita. Na kabo hewahewaliyo hekadi se laoma ede sinalena wa se suma na se lau se tole bwayabwaya unai.* Wasa wa taulapuina maudoidi meta se siliyata yo se matausi.

⁷ Awa haiyona mulidiyena kabo Sapila ye mwalaesaema, na mwanena wa unai saha ye tubu meta nige kabina ye kata. ⁸ Na Petelo ye henamaiyei ye wane, "Yogu ku hedehedede, teina te kowa yo mwanem yomi tano wa maisana kwa hai wa lakina ede?" Ye talam ye wane, "Aa, teina lakina ede."

⁹ Petelo ye wane, "Ye saha to kowa yo mwanem nuwamiu kesega na Guiyau Yaluwana kwa lupoi? Mahana te unai meta mwanem wa tautolena siya ede kawakeda ne unai, kowa hinage kabo se bahelaego."

¹⁰ Mahanana ne unai ye gulidobi Petelo matana wa unai na ye boita. Hewahewaliyo wa se mwalaesaema na se kita meta ye boitako, ede se bahehepesalae na mwanena dedekanaena se tole. ¹¹ Na saha ye tubu wa unai meta taukawamamohoi yo wasana taulapuina maudoidi hinage se matausikalili.

Apostolo wa taukasikasiyebwa se henamwanamwadi

¹² Apostolo wa laulau gigibwali hekihekinoidiyao se ginaulidi se badokalili tamowai luwadiyena. Taukawamamohoi maudoidi se lagelagegogoi numa tabuna tehana hesau hesana **Solomona yona logologu** unai. ¹³ Magai tamowaidiyao maudoidi meta se kitahlenamwakaliliyedi, iyamo nige hesau ye nuwabayao bena taba ye lusae boda wa luwadiyena, matauwuna Dius yodi tauwoyawoya wa se matausiyedi. ¹⁴ Na iyamo bodalakilaki, sinesineo yo tatao, se kawamamohoi Guiyau unai, ede se patulau taukawamamohoi bodadi wa udiyedi.

¹⁵ Apostolo wa yodi paisowa debanaena ede Yelusalema tamowaidiyao yodi taukasikasiyebwa se baheidima keda wa udiyedi se hekenodi diyadiyali yo dam udiyedi. Se henuwa bena Petelo ye henamwanamwadi, o taba Petelo ye laulau na logologuna tautauna ye kabikitadi na se namwanamwa. ¹⁶ Yo hinage magai hekadiyo Yelusalema dedekanaena udiyedi boda se laoma, yodi taukasikasiyebwa se baheidima yo kaiteyadi se kamkamna yaluwa yababayababadi udiyedi, meta maudoidi se namwanamwa.

Apostolo wa se hewaiunudi yo se hekamkamnadi

¹⁷ Na Taukaitalasam saesaena ma kana bodoa Sadusiya tamowaidiyao, siya se kaikalomagigilikilili.

4:26 Yaubada yona *kaisunuwa tamowaina* ede Keliso.

5:5-6 Huyadi ne unai tauboiboita se heyausidi yo kaleko unai se sumadi, na se lau se toledi kabatoletoletau duhadu udiyedi.

¹⁸ Ede apostolo wa se haidi se toledi numatutuguduyena. ¹⁹ Na boniyaina ne unai Guiyau yona anelu hesau numatutugudu wa kamwasadiyao ye sokedi na apostolo wa ye woyahepesadi na ye wane, ²⁰ "Kwa lau kwa mwalaesae numa tabuna bakubakuna ne unai kwa tolo na mauli hauhauna wasana maudoina kwa duwai tamowai udiyedi."

²¹ Mala ye tom kabo apostolo wa se mwalaesae numa tabuna bakubakuna wa unai se tolo na se hetubu se lauguguya. Na taukitalasam saesaena ma kana bodo se lage Sunedeli numana unai. Ede Sunedeli tamowaidiyao yo Isalaela yodi babadao maudoidi se yogagogoidi. Na kabo wasa se hetamalilaei bena apostolo wa se woyaiddima. ²² Na numa tabuna yona polisi se lau numatutugudu wa unai meta apostolo wa se dahalaiko, ede se uyoma kadi tanuwaga yo taukitalasam tauwoyaidi yodi se hedehedede ²³ se wane, "Numatutugudu wa guduguduna, yo taukitakitahetetena se totolo, na keda wa ka soke meta nige tamowai hesau ka kita." ²⁴ Numa tabuna yona polisi kadi tanuwaga yo taukitalasam tauwoyaidi wa wasa wa se lapui meta se nuwapwanopwano yo se nuwanuwatu saha kabo ye tubu.

²⁵ Na kabo tamowai hesau ye laoma ede ye wane, "Numatutugudu wa unai tamowai kwa guduidi wa, meta siya ede numa tabuna ne unai se laulauguguya boda wa udiyedi!" ²⁶ Ede polisi wa kadi tanuwaga wa maiyadi se lau apostolo wa se woyaiddima, na nige se kabihenayaidi, matauwuwuna ede se matausi tamowai wa udiyedi madai se hekalawekudi.

²⁷ Apostolo wa se woyaiddima Sunedeli unai se hetolodi na taukitalasam saesaena wa ye henamaiyedi ye wane, ²⁸ "Ka laugagayoigomiu bema tabu Yesu hesana unai kwa laulauhekata, na iyamo yomi lauhekata wa Yelusalema ye hemwayauyako. Yo hinage tamowai ne yona boita giluna bema kwa tole kalimaiyena."

²⁹ Petelo yo apostolo wa se wane, "Nige gonowana tamowai ka kawakabiyedi, na Yaubada mo ka kawakabiyei. ³⁰ Komiu Yesu kwa hekabasi sataulo unai na ye boita, na boitaena tamadao yodi Yaubada iya ye hetolo'uyoi. ³¹ Yaubada iya ye hai na ye tole nimatuutuuna unai. Ye hemala wasawasa yo tauhemahemauli, bema Isalaela ye saguidi na se nuwabui na yodi yababa kabo Yaubada ye nuwatugabaedi. ³² Ginauli ta tauhemamohoyedi ede kai yo hinage Yaluwa Tabuna. Iya ede Yaubada yona kainauya taukawakabiyena udiyedi."

³³ Hedehedede wa se lapui ede se koipilikalili na se henuwa bema se koihemwaloidi. ³⁴ Na Sunedeli unai Paliseya tamowaina hesau hesana Gamaliyela, iya meta laugagayo taulauhekataena saesaena hesau

tamowai maudoidi se hekasisikaliyi. Iya ye tolo na ye hedede bema mahana kubwakubwa mo tatao ne se hepesadi dagela ne unai. ³⁵ Na kabo ye hetubu ye hedehedede, ye wane, "Isalaela tataodi, bema kwa nuwanuwatanamwanamwa saha bema kwa ginauli tatao ne udiyedi. ³⁶ Bolimai hisa se lauko Tudasi ye taumasalahna ye hedede bema iya tamowai lakilakina hesau, ede tamowai badodi 400 se hemuliwatani. Na Loma yodi tau'yala* iya se unui, na tauhemuliwatani wa se hailauyedi. Ede yona woyawoya wa nige kaniyona. ³⁷ Iya mulinaena, hasiliyawasi huyana ne unai, Yudasi Galili tamowaina ye tolosaema na boda ye woyaiddi bema Loma tamowaidiyao se iyalaidi. Na iya hinage se unui, na tauhemuliwatani wa hinage se hailauyedi. ³⁸ Unai ya hekatagomiu: Tabu saha hesau kwa ginauli taulauhetala ne udiyedi. Kwa kabigabaedi na se lau. Taba yodi nuwatu yo yodi paisowa ne tamowai gaibu hesau yona nuwatu, kabo ye kaiyawasi. ³⁹ Na ena Yaubada unai ye laoma, meta nige gonowana kwa hekaiyawasidi, na ena kwa hekaiyawasidi meta komiu Yaubada unai tauhaikabi."

Yona hedehedede wa se lauwatani ⁴⁰ na apostolo wa se yoganedi se mwalaesae. Na se hedelau yodi taupaisowa udiyedi na se pidilidi. Na kabo hedehedede bayabayaona se mosedi tabu huya hesau Yesu hesanaena se lauguguya'uyo. Na kabo se kabigabaedi na se lau.

⁴¹ Apostolo wa Sunedeli unai se dahalai ma gwaugwauyaladi, matauwuwuna Yaubada ye kitahenamwadi na Yesu hesanaena se kamkamna.

⁴² Mayadai badobado numa tabuna bakubakuna unai yo hinage taukawamamohoi yodi numa udiyedi yodi lauhekata wa nige ye kaiyawasi yo wasa namwanamwana se duwaduwai meta Yesu iya Yaubada yona kaisunuwa tamowaina* ede.

Apostolo tausaguidi haligigi-labui se kaisunuwaidi

6 Mayadaidi ne udiyedi tauhemuliwatani kadi boda wa ye laki ye lau. Luwadiyena, hekadiyo meta Dius tamowaidiyao taukalina Giliki,* yo hekadiyo siya taukalina Hebelu. Mayadai kesega kesega meta kai se giyagiyahi, na taukalina Giliki yodi wabuwabu wa se soisoihemulidi. Unai taukalina Giliki wa se hetalapili taukalina Hebelu wa udiyedi. ² Ede apostolo saudoudoi-labui wa tauhemuliwatani maudoidi se yogagogoidi na se wane, "Nige ye namwa bema Yaubada kalinana paisowana ka hekaiyawasi na ka kitalau kai giyahina unai. ³ Unai, kagu kahao, bodamiu ta udiyedi tamowai haligigi-labui kwa kaisunuwaidi, siya meta bema tamowai maudoina yodi hekasisi tamowaidiyao, yo tamowai sibasibadiyao, yo hinage Yaluwa Tabuna ye hemwayaudi. Paisowa ne kabo ka

5:36 Huyadi ne unai ye lau apostolo yodi huya mulina ne unai, Loma tamowaidiyao Isalaela magaina se laugilihia. Isalaela maudoidi Loma yodi laugagayo nige se henuwa.

5:42 Yaubada yona kaisunuwa tamowaina meta Keliso kaniyona ede.

6:1 Kalina Suau unai se wane Heleni.

moselaei udiyedi,⁴ na kai apostolo kabo ka kitalau tapwalolo yo wasaduwai mo unai.”

⁵ Boda maudoina apostolo yodi nuwatu wa se kawanamwanamwaei. Unai ede Setepano se kaisunuwaei, iya tausunumabayao yo Yaluwa Tabuna ye hemwayau; na kabo Pilipo, Polokolas, Nikenowa, Timona, Palamenas, yo Nikolasi. Na Nikolasi iya Antiyoka tamowaina nabada wa unai ye nuwabui ye hemala Dius.⁶ Kabo tamowai wa se laedima apostolo wa udiyedi, na nimadi se tolesaedi kewadiyena na yodi se tapwalolo.

⁷ Kabo Yaubada wasana wa ye laki ye lau, na Yelusalema unai Yesu tauhemuliwatanina bodana wa ye laki ye lau, yo hinage taukitalasam bodana lakilakina Yesu se sunumaei yo se kawakabiyei.

Dius tamowaidiyo hekadi Setepano maiyadi se haikawayagala

⁸ Na Yaubada yona kainaya ye mosei Setepano unai meta ye hegigibwali, ede laulau gigigibwalidi* ye ginaulidi boda luwadiyena.⁹ Na tamowai hekadi maidadi Setepano se haikawayagala, siya meta sunago* hesau tamowaidiyo, na sunago wa hesana ede “Yailihai Tamowaidiyo”. Tauhaikawayagala wa yodi kabalaoma ede Sailini yo Alesandiliya yo teha Silisiya yo teha Eisiya.¹⁰ Yodi haikawayagala wa unai nige gonowana Setepano se saedikwai matawuwuna ede Yaluwa Tabuna ye hesibasiba.

¹¹ Kabo nuwatu wadawadamyena tamowai hekadiyo se nuwakoidi bena kabo se hedede se wane, “Setepano yona hedehedede ka lapui meta Mose yo Yaubada ye hededeheyababadi.”¹² Na kabo boda yo yodi tamowai lakilakidiyo, yo hinage laugagayo taulauhekataena nuwadiyao se hesaedi, na Setepano se kabihekahini na se woyaiyama Sunedeli unai.¹³ Na tamowai hekadiyo se woyaидима na hedeheddedelopulo maudoidi se hedededi, se wane, “Teina tamowai ta meta huya maudoina numa tabuna yo hinage Mose yona laugagayo ye hedehededeheyababadi.”¹⁴ Matawuwuna ede yona hedehedede ka lapui meta ye wane Yesu Nasaleta tamowaina kabo numa tabuna ta ye hetatagwaligwali na kabikabi beyabeyadi Mose ye haidima wa kabo ye buidi.”¹⁵ Na Sunedeli yona koigogo wa unai taututuli wa se kaikewadudulai Setepano se kita, na kana kao wa se kita meta doha anelu.

Setepano yona hedehedede Sunedeli unai

7 Na taukitalasam saesaena Setepano ye henamaiyei, “Teina hedehedede ta* meta mamohoi?”² Na Setepano ye wane, “Kagu kahao yo tamaguwao, kwa lapulapui. Yoda Yaubada namanamalina ye taumasalahaka kada kulutubu Abelahama unai huyana sola ye miyamiya Mesopotamiya unai, nige sola ye dahalai ye lau Halana.³ Yaubada ye hededenonoha ye wane meta Abelahama kana isimulita kabo se lau tamowai hekadiyo yodi magai unai se miya na menai kabo se hemala laolaoma. Temenai kabo se hemala magai ne tamowaidiyo yodi taupaisowatahitahi na se kabihenayaldi bolimai 400.⁷ Na kabo Yaubada yona hedehedede ye tubei ye wane, ‘Magai ne tamowaidiyo kabo ya hekamkamnadi, na mulina ne unai kabo kam isimulita magai ne se laugabaei na se laoma teina teha ta unai kabo se taba'ohu kaliguwai.’⁸ Na kabo pelitome* ye mosei Abelahama, meta yodi talam wa* se hemamohoiyei. Na kabo Abelahama natuna Isako ye labasi, na mayadai haligigi-haiyona mulina ne unai ye hepelitome. Na kabo Isako iya natuna Yakobo ye labasi, na iya natunao ede tamadao* saudoudoi-labui, na maudoidi se hepelitomedi.

⁹ Yakobo natunao wa kadi kaha Yosepa se kaikalomagigiliyei na se lokunegabaei ye lau Aikupito na ye hemala yodi heyayai tauhaina. Na Yaubada meta iya maiyana¹⁰ na ye gilihay yona pilipili maudoidi udiyedi, yo hinage ye hesonoga. Ede Palao Aikupito yodi wasawasa Yosepa ye tolesae ye hemala Aikupito maudoina yo hinage wasawasa wa yona kabamiya numadiyao namwanamwadi maudoidi* kadi tanuwaga.

¹¹ Na kabo hasahasali ye tubu Aikupito yo Kanana udiyedi meta kamkamna lakilakina, na tamadao meta nige gonowana kai se lobai.¹² Na Yakobo wasa ye lapui meta Aikupito unai sola kai maudoina, ede kada kulutubu iya natunao ye hetamalidi se lau menai bena

6:8 Lausoisoi ta unai kulikulina mamohoina Luka ye kulidi wa meta *kabanoko yo hekihekinoi saesaedi ye ginaulidi*, na kalina Saliba toletolena ye pilipili yo nige ye masalahakalili, unai *laulau gigigibwalidi* mo ta hepahepaisowa.

6:9 *Sunago* meta Dius yodi kabakoikoigogo yo tapwalolo numana.

7:1 *Hedehedede* wa iya ede hedehedede Apostolo 6:13-14 unai ta hasili wa.

7:4 Abelahama yona magai mamohoina meta Ulu teha Mesopotamiya unai.

7:8 *Pelitome* meta loheya dahina teuna se bolihai.

7:8 Yodi talam wasana meta Genese 17 unai ta hasili.

7:8 *Tamadao* kaniyona ede *kada kulutubu*, siya ede Yakobo natunao saudoudoi-labui.

7:10 Numa wa Palao mwanenao yo natunao yo yona taupaisowa yodi kabamiya magaina.

kai se hemaisa. ¹³ Yodi huyakaitaumana helabuina unai Yosepa ye hededehehemasalah'uyoi kalidiyena meta iya kadi kaha. Menai kabo Palao Yosepa kana bodoao kabidi ye kata. ¹⁴ Na kabo Yosepa kalina ye hetamali tamana Yakobo yo kana bodoao maudoidi se laoma Aikupito, badodi meta 75. ¹⁵ Ede Yakobo ma kana bodoao se lau Aikupito unai se miya. Temenai Yakobo ye boita, na kabo tamadao hinage se boita. ¹⁶ Tauboita wa sinaledyao se baheidi se uyo Sekema magaina unai. Temenai, Abelahama beyabeyana Hamala natunao udiyedi duha hesau ye hemaisa, yona bwayabwaya. Unai kabo se toledi.”*

¹⁷ Na kabo Setepano ye hedehedede ye wane, “Mayadaina ye hanahanau Yaubada yona hededehehesunuma Abelahama unai kabo ye hemamohoiyei meta kabo tano ye mosei kana isimulita udiyedi, ede kada boda Aikupito unai wa meta ye laki ye lau. ¹⁸ Na kabo wasawasa hesau ye tolo Aikupito ye kitahetete. Na iya meta nige Yosepa kabina ye kata. ¹⁹ Teina wasawasa ta kada bodoao wa ye lupoidi yo ye hekamkamnadi, na ye lauhelilidi natudiyo labahauhaudi numa dageladi udiyedi se toledi na bena kabo unai se boita.

²⁰ Huyana ne unai Mose se labasi,* na iya meta wawaya namwanamwana Yaubada matanaena. Nawalai haiyona udiyedi tamana yona numaena se kitahetete. ²¹ Huyana Mose se tolehesuwala dagelaena Palao natuna sine ye lobai na ye hai ye kabihielaki ye hemala natuna. ²² Mose meta Aikupito yodi sonoga yo yodi sibasiba maudoidi se hekata na ye haidi, na ye hemala taukulukulu namwanamwana.

²³ Huyana Mose yona bolimai 40, meta yona hineli ye ginauli bena yona hali Isalaela tamowainayao ye kitadi. ²⁴ Mayadaina ne unai Mose matanaena Aikupito tamowaina hesau ye tolo na Isalaela tamowaina ye kabihienayai. Ede ye gilihai na Aikupito tamowaina wa ye koihemwaloi. ²⁵ Mose yona nuwatu bena kana bodoao wa kabo se kitalobai meta Yaubada iya ye hepaisowa na kabo ye gilihai. Iyamo nige se kitalobai.

²⁶ Mayadai hesauna kabo Isalaela tamowaidi labui ye kitadi se haihaikabi, ede ye hededelau udiyedi bena nuwadi ye hedehedetaludi ye wane, ‘Tatao, teina ta ma kam kaha. Tabu kwa hewahawaiunu'uyoigomiu!’ ²⁷ Na hesauna, kana kaha ye kabihienayai'usei wa, Mose ye kabitepanei na ye hededelau unai ye wane, ‘Kaiteya ye hetologo kama tanuwaga yo tautolehedudulaigai?’ ²⁸ Bena ku koihemwaloigau, doha lahi Aikupito tamowaina ku koihemwaloi wa?’ (*Esodo 2:14*)²⁹ Mose hedehedede wa ye lapui ede ye wasabu na Aikupito ye laugabaei

ye lau Midiyana unai ye miyamiya, meta ye hemala laolaoma. Menai ye tawasola na natunao loheloheyao labui ye labasidi.

³⁰ Bolimai 40 se lau, na Mose meta balabala hesau unai Sinai kudulina dedekanaena. Na anelu ye taumasalahi kaiwa hesau unai, na kana kao doha kaiwa ye kalapululu. ³¹ Mose ye siliyata saha ye kita wa unai. Ye sigilau dedekana wa unai bena ye kitinanwanamwaei, na Yaubada kalinana ye lapui ye wane, ³² ‘Yau meta kam kulutubu yodi Yaubada, Abelahama, Isako, yo Yakobo yodi Yaubada.’ Mose ye matausi yo ye tabutabubu, na nige ye henuwa ye kaikewalau. ³³ Na Guiyau wa ye hededelau unai ye wane, ‘Kam sendolo ne ku haigabaedi, matauwuna ede teina meta tano tabuna. ³⁴ Kagu bodoao ya kitadi meta se kamkamnakalili Aikupito unai. Yodi dou ya lapuidi na ya dobima bena ya gilihai. Unai, Mose, kabo ya hetamaligo ku uyo Aikupito.’

³⁵ Mose iya tamowaina ede Isalaela tamowaidi se hedehedehesuwala se wane, ‘Kaiteya ye hetologo kama tanuwaga yo tautolehedudulaigai?’ Na Yaubada yona anelu ye taumasalahi kaiwa kalakalasina wa unai, na Mose ye hetamali ye uyo Isalaela bodadi kadi tanuwaga yo taugilihai. ³⁶ Iya Aikupito unai Isalaela bodana wa ye woyahaidi, meta laulau gigigibwalidaf ye ginaulidi Aikupito unai yo Gabwa Pulupululuna unai yo hinage balabalaena bolimai 40 luwadiyena.

³⁷ Teina Mose ta, iya ede tamowaina ye hedehedehemasalahi Isalaela udiyedi ye wane, ‘Yaubada kabo peloweta hesau ye hetamaliyama doha yau. Iya meta kada boda ta unai kabo ye tubu saema.’ (*Dutelonomi 18:15*)³⁸ Yo iya tamadao bodadi maiyadi se miya balabalagaibuyena, yo hinage anelu maiyana se hedehedede Sinai kudulina unai. Anelu wa hedehedede maumaulina ye mosei Mose unai bena kabo ye hekawadima kalidaena.

³⁹ Na kada kulutubu nige se henuwa Mose se kawakabiyei, na iya se subu na nuwadi se uyo Aikupito. ⁴⁰ Ede se hededelau Aloni unai se wane, ‘Yoda yaubada ku ginaulidi kabo se kedabagunaida, matauwuna teina Mose ta Aikupito unai ye woyahaida ta, nige kabina ta kata saha ye tubu kalinawai.’ (*Esodo 32:1*)⁴¹ Mayadaiyao ne udiyedi koitau se ginauli kana kao doha bulumakau natuna, na unai se kaitalasam, yo nimadi wa unai saha se ginauli wa meta unai se gwauyalakalili. ⁴² Ede Yaubada ye miyasuwaedi, na ye mosegabaedi na mahana, nawalai, yo kipwala udiyedi se taba'ohu. Doha peloweta yodi buka unai se kulihemasalahayako:

7:16 Setepano hedehedede labui ne ye tolekesegaidi. Sekema unai Yakobo tano hesau ye hemaisa Hamala natunao udiyedi (*Genese 33:19*). Na Abelahama Hebelona unai duha hesau ye hemaisa Epelona Hito tamowaina unai, bena yona bwayabwaya (*Genese 23:15-18*). Setepano yona hedehedede taulapuina wa wasa maudoina kabina se katako, yo hinage kabina se kata meta Yakobo se tole Abelahama yodi kabatolena duhana unai (*Genese 50:13*), na Yosepa se tole Sekema unai. (*Yosuwa 24:30*)

7:20-29 Esodo 1-2

7:36 Buka unai kulikuli a meta *kabanoko yo hekihekinoi*, kaniyona ede *laulau gigigibwalidi*.

'Isalaela tamowaidi, balabalaena kwa sae kwa dobi bolimai 40,

na yau kaliguyena kwa kaitalasam e nige?

43 Moleki yona kabataba'ohu* kwa lausini, yo yomi yaubada Lepani* yona kipwala hinage; meta koitau kwa bom kwa ginaulidi bena kwa taba'ohu udiyedi.

Unai kabo ya hetamaligomiu kwa lau Babeloniya unai kabo kwa miya.' (Emosi 5:25-27)

44 Balabalaena tamadao yodi kabalau maudoina unai meta Yaubada kabataba'ohuina tentina se bahei maiyadi. Kabataba'ohu wa Mose ye ginauli meta tautau Yaubada ye hekita wa unai ye ginauliwatani. **45** Na tamadao Yaubada kabataba'ohuina wa se bahei na Yosuwa ye woyaidi se laoma inai na tano ta tamowaidiyao Yaubada ye henakuhepesadi na siya tano ta se hai. Na Yaubada kabataba'ohuina wa inai se hepaisowa ye lau ee Dawida yona huyaena. **46** Na Dawida meta Yaubada yona nuwanamwa tamowaina, na ye kaibwada Yaubada unai taba ye talam na Yakobo yona Yaubada* yona kabamiya numana ye ginauli. **47** Na numa wa tauginaulina ede Solomona.

48 Na iyamo Yaubada saesaekalilina taba nige tatao nimadiyena numa se ginauli unai ye miya. Doha peloweta ye hedehedyako ye wane (Aisaiya 66:1-2):

49 'Yaubada ye hedede ye wane,

"Yogu kabatuli ede galewa,
na kaegu kabatolena ede tanoubu.

Unai numa sahasahana bena ku ginauli yogu kabamiya?

Yo haedi bena yogu kabakaiyawasi?

50 Matauwuna ginauli maudoidi ta tauginaulidi ede yau." '

51 Kabo Setepano yona hedehedede wa ye tubei ye wane, "Komiu nuwamu se kwailolokalili! Nuwamu yo beyamu nige kwa hepelitomedi. Komiu doha tamamiyo wa: Huya maudoina Yaluwa Tabuna nige kwa modelau unai. **52** Tamamiyo wa meta kaiteya peloweta nige se hewaiunu yo se kabihenayai? Yo hinage Taulaulaudululaina Tamowaina yona laoma tauhededehemasalahana tamowaidiyao se unuhemwaloidi. Na komiu hinage Keliso kana kwa walohai na kwa unuhemwaloi. **53** Komiu Yaubada yona laugagayo tauhaina ede. Anelu udiyedi ye laoma, na nige kwa kawakabiyei."

54 Setepano yona hedehedede wa unai Sunedeli numana unai taumiya wa se koipilikalili na kadi kao se heyababadi. **55** Na Yaluwa Tabuna Setepano ye hemwayau, na ye kaikewasae galewa ne meta Yaubada yona namanamali ye kita, yo Yesu ye totolo

Yaubada nimatutuna wa unai. **56** Na ye wane, "Kwa kaikewasae, galewa kamwasana wa ye tasoke, na Tau Natuna ya kita ye totolo Yaubada nimatutuna ne unai."

57 Yona hedehedede wa unai se yogahi gudugudui na beyadiyao se kabiguduguduidi. Na maudoidi nuwadi kesega se heloi se lau hesabana **58** na se tabehepesalaei magai wa dagelana unai, na se hetubu Setepano se hekalaweku. Na taulauhegilulupolupo wa kadi kwama se haigabaedi na se toledi hewali hesau hesana Saulo kaena wa unai.

59 Tatao wa Setepano se hekahekalaweku na ye tapwalolo, "Guiyau Yesu, yaluwagu ta ku hai!" **60** Kabo ye tulibono na kalina lakilakiyena ye wane, "Guiyau, tatao ta yodi yababa ta unai tabu ku hegiludi." Na ye gulidobi ede ye boita.

8 Na Saulo Setepano yona boita ye kawanamwanamwaei.

Dius yodi tauwoyawoya taukawamamohoi wa se kabihenayaidi

Mayadaina ne unai Dius tamowaidiyao se hetubu taukawamamohoi wa Yelusalema unai se hekamkamnadi.* Ede maudoidi se wasabugwaligwali se lau Yudeya yo Samaliya magaidi udiyedi, na apostolo wa se bom mo se bawabawa. **2** Na tausunuma namwanamwadi hekadi se laoma Setepano se bahei se lau se toletoletau yo sabina se dou.

3 Na Saulo taukawamamohoi bodadi wa ye hetubu ye kabihenayaidi. Ye lau numa kesega kesega unai tatao yo sinesineo ye tabehepesadi na numatutugudu unai ye toledi.

Pilipo ye lauguguya Samaliya unai

4 Taukawamamohoi Yelusalema se wasabugabaei wa Yesu wasana se duwaduwai yodi kabalauyen. **5** Na Pilipo ye dobi magai lakilakina Samaliya unai, na wasa ye hedehedehemasalah meta Yesu Yaubada yona kaisunuwa tamowaina* ede. **6** Boda wa laulau gigigibwalidi ye ginaulidi se kitadi ede se lapulapuinamwanamwa yona hedehedede wa unai. **7** Tamowai gaudi udiyedi yaluwa yababayababadi se pesa na se douyogayogahi, yo hinage tamowai bunibunidi se bado se namwanamwa. **8** Unai magai maudoina se gwaulyalakalili.

Simona taubalau wasana

9 Tamowai hesau hesana Simona Samaliya unai ye bawabawa. Iya taukobakoba hesau, na tamowai maudoidi iya se nokoei. Na ye bom ye

7:43 Moleki meta Kanana tamowaidi yodi yaubada hesau. Yodi taba'ohuina kana kao ede koitauna yona numa gagilina se ginauli na diyadiyali unai se bahei.

7:43 Lepani hinage yaubadalupolupo hesau, meta Aikupito tamowaidiyao unai se tabataba'ohu.

7:46 Yakobo yona Yaubada meta Yaubada kesegana iya ede Dawida ye kaibwada unai na yona kabamiya numana ye ginauli.

8:1 Taukawamamohoi siya ede Dius tamowaidiyao Yesu tausunumaena, na tauhekamkamnadi ede Dius hekadiyo nige Yesu tausunumaena. Ede ekalesia se wasabugwaligwali.

8:5 Yaubada yona kaisunuwa tamowaina: hinage ta hedede ta wane Keliso.

hededehehsae'uyoi bena iya tamowai lakilakina hesau.
10 Samaliya tamowaidi maudoidi yodi nuwatu se lau iya unai, hekadi tamowai gaibu, hekadi tamowai saesaekalilidi, na se hedede se wane, "Iya meta Yaubada yona gigibwali, iya ede ta wane gigibwali lakilakina." **11** Huya lohalohakalili yona laulau gigigigibwalidi debadiyena se noko, unai se hemuhemuliwatani.

12 Na huyana Pilipo Yaubada yona basileiya yo Yesu hesana wasana namwanamwana ye hedehededei kabo sinesineo yo tatao wa se kawamamohoiei, na kabo Pilipo ye hebabatisoidi. **13** Simona hinage ye kawamamohoiei ede ye babatiso. Na kabo Pilipo ye hemuhemuliwatani, na Pilipo laulau gigigigibwalidi* ye ginaulidi ye kitadi meta ye nokokalili.

14 Kabo apostolo Yelusalema unai wasa wa se lapui meta Samaliya tamowaidi Yaubada wasana wa se kawamamohoiei, ede Petelo yo Yowane se hetamalidi se lau kalidiyena. **15** Apostolo labui wa se lage magai wa unai, ede taukawamamohoiei wa yodi se tapwalolo bena Yaluwa Tabuna wa kabo se hai. **16** Kaniyona ede Yaluwa Tabuna sola nige ye dobima kalidiyena, na Guiyau Yesu mo hesanaena se babatiso. **17** Petelo yo Yowane se tapwalolo ye gehe, kabo nimadi se tolesaedi taukawamamohoiei wa udiyedi, ede Yaluwa Tabuna se hai.

18 Na Simona kabo apostolo wa ye kitadi nimadi se tolesaedi tamowai wa kuludi wa udiyedi na Yaluwa Tabuna se hai, ede ye hedehedelau apostolo wa udiyedi bena kabo gigibwali wa ye hemaisa moniyena, **19** na ye wane, "Hinage gigibwali ne kwa haiyama, na kabo nimagu ta ya tolesae tamowai kewadi ne udiyedi na Yaluwa Tabuna se hai." **20** Na Petelo ye wane, "Idohagi to yom nuwatu bena Yaubada yona kainauya moni unai ku hemaisa. Unai yom moni ne ku hai na ye namwa mo ku mwalo! **21** Nige yom tupwa hesau teina paisowa ta unai, matauwuwuna ede Yaubada matanaena nuwam ne nige ye dudulai. **22** Ku nuwabui yo yom nuwatu yababana ne ku hekaiyawasi, na Yaubada unai ku tapwalolo taba yom nuwatu yababana wa ye nuwatugabaei. **23** Na ya kitago meta kaikalomagigili ye nuhuligo, yo yababa ye kabihekahnigo." **24** Ede Simona ye hedehedelau Petelo yo Yowane udiyedi ye wane, "Yogu kwa kaibwada Guiyau unai, na ginauli saha kwa hetahetaladi wa kabo taba nige se tubu kaliguyena."

25 Kabo Petelo yo Yowane Guiyau wasana se guguyai yo se hededehemasalaha magai lakilakina Samaliya unai, na huyana se gehe kabo se dahalai se

uyo Yelusalema, na yodi kabalaunya Yaubada wasana se duwai magai hekadiyo udiyedi Samaliya tehana unai.

Pilipo ye wasaduwai Itiyopiya tamowaina unai

26 Cabo Guiyau yona anelu hesau ye hedehedelau Pilipo unai ye wane, "Ku lau tupwa yawana balabala wa unai na keda ye lau Yelusalema unai na ye dobi Gasa ku lobai."

27 Unai Pilipo ye dahalai ye lau. Keda wa unai Itiyopiya tamowaina hesau ye lobai. Iya meta yunika,* na iya tamowai lakilakina yo gigigigibwalina hesau, Itiyopiya yodi wasawasa sinena Kendeisi* yona moni yo gogo hekadi taukitahetetedi. Ye lau Yelusalema unai Yaubada ye taba'ohui, **28** na ye uyo'uyo yona magai, meta yona kalyota* unai ye gelu ye laulau na peloweta Aisaiya yona buka ye hasihasili.

29 Na Yaluwa Pilipo yona ye hedehedede ye wane, "Ku lau tenem kalyota ne dedekana ne unai." **30** Ede Pilipo ye heloisae kalyota wa unai, na tamowai wa kalinana ye lapui peloweta Aisaiya yona buka ye hasihasili. Ede ye henamai ye wane, "Saha ku hasihasili ne nuwam ne unai ye masalah?" **31** Na tamowai wa ye wane, "Idohagi na kabo kabina ya kata? Kabo kaiteya ye hededehebasibagau?" Ede Pilipo ye kaibwadai na ye mwalaesae kalyota wa unai maiyana se tuli. **32** Na buka ye hasili wa ede teina (Aisaiya 53:7-8):

Iya se woyai se laei se unui doha mamoe,*
 na ye mwanomwanou doha mamoe natuna ye
 mwanomwanou na wiyanse bolihi, nige saha
 ye hedede.

33 Iya se toledobiyei,
 nige yona dudulai hesau se mosei.
 Nige kana isimulita hesau,
 matauwuwuna yona mauli tanoubu ta unai se
 hekaiyawasi.

34 Yunika wa ye henamai Pilipo unai ye wane, "Taba gonowana yogu ku hedehedede? Aisaiya meta iya ye bom ye hetahetala'uyoi o tamowai hesau?" **35** Na Pilipo Aisaiya yona kulikuli wa unai ye hetubu na Yesu wasana namwanamwana yona ye hedehedede.

36-37 Yodi kabalau wa unai waila kipuna hesau unai se lage. Ede yunika wa ye hedehedede ye wane, "Waila ede teina. Taba gonowana ku hebabatisoigau?"*

38 Ede yunika wa ye hedede kalyota wa se hekaiyawasi. Na se dobi waila wa unai ede Pilipo iya

8:13 Kalina Giliki unai Luka ye kuli ede *hekikekinoi yo gigibwali*.

8:27 *Yunika*: Beyabeyana Aikupito yo Alabiya yodi teha unai wasawasa mwanediyao taukitahetetedi tatao meta nigwanigwa tauhaidi tabu natudiyao. Yunika hekadiyo yodi paisowa gigibwalidi se mosedi, doha hinage wasa ta unai ta hasili. Na Dius meta laulau ne nige se ginaginalui matauwuwuna laugagayo, yo yunika nige gonowadi se lusae numa tabuna yo Dius yodi tapwalolo maudoina unai. Kalina Suau unai se kuli *eunauka*, na Dimdim unai ede *eunuch*.

8:27 *Kendeisi* nige waihui ne hesana, na kaniyona mamohoina ede *Itiyopiya yodi wasawasa sinena*. Dimdim unai se kuli *Candace*, na Suau unai se kuli *Kanaki*.

8:28 Dimdim unai ta wane *chariot*, meta kabakadau hosi ye tabetabei keda lakilakidi udiyedi.

8:32 *Mamoe* yodi laulau doha teina: Huyana mamoe hesau se laei bena kabo wiyanse boli o se unui meta nige gonowana ye koipili.

ye hebabatisoi.³⁹ Waila wa unai se gayosae ede Guiyau Yaluwana Pilipo ye woyahesuwala. Yunika wa Pilipo nige ye kita'uyoi, na iyamo yona kabalau wa unai meta ma gwaugwauyalana.

⁴⁰ Na Pilipo ye bom ye taumasalahha Asotasi unai na ye dahalai'uyo Sisaliya hesabana na yona kabalau wa unai Yesu wasana namwanamwana ye wasaduwai magai wa udiyedi. Ye lauguguya ye lau ee Sisaliya unai ye lage.

Saulo ye nuwabui

9 Yelusalema unai Saulo sola Guiyau tauhemuliwatanina wa ye hedehedehemahematausidi bena ye koihemwaloidi. Ye lau taukaitalasam saesaena unai² na ye hededelau taba yona talam ye ginauli na leta ye kuli na ye mosei Saulo kabo ye laei Damaseko Dius tamowaidiyao ye hekitadi, na ena menai Guiyau tausunumaena hekadi ye lobaidi meta kabo ye haidi ye laedi Yelusalema na ye toledi numatutugudu unai.

³ Saulo ye dahalai ye lau Damaseko hesabana. Magai wa ye hanahanawui, na makesega mala lakilakina galewa ne unai ye sinadobima Saulo kewana ne unai.⁴ Ede Saulo ye gulidobi bwatano wa unai na kalina hesau ye lapui ye wane, "Saulo! Saulo! Idohagi to ku hekamkamnagau ta?"⁵ Saulo ye wane, "Guiyau, kowa kaiteya?" Na kalina wa ye hedehedede'uyo ye wane, "Yau ede Yesu ku hekamkamnagau ta."⁶ Ku tolo na ku lau Damaseko, unai kabo tamowai hesau ye hededelaowa saha bena kabo ku ginauli."

⁷ Saulo kana bodoa wa se siliyatikalili na nige gonowana saha hesau se hedehedede, matauwuwuna kalina wa daguguna se lapui na tamowaina nige se kita.⁸ Saulo se kabihetolo na matana ye helaladi, iyamo nige gonowana saha hesau ye kita. Ede se kabinimai na se woyai se lau Damaseko.⁹ Menai mayadai haiyona unai nige gonowana saha hesau ye kita, nige kai ye kai, yo nige waila ye numa.

¹⁰ Damaseko unai Yesu tauhemuliwatanina hesau hesana Ananiya. Kenosuwaiyena Guiyau ye hedehedelau unai ye wane, "Ananiya!" Na Ananiya ye wane, "Guiyau, yau ede teina."¹¹ Na Guiyau ye wane, "Ku tolo Keda Dudulaina unai ku lau Yudasi yona numa na menai kabo Tasusi tamowaina hesau hesana Saulo ku kita. Iya ede menai ye tapwatapwalolo.¹² Saulo yona tapwaloloyena na tautau hesau ya hekita meta tamowai hesau hesana Ananiya kabo ye lau iya unai na nimana ye tolesaedi kewana ne unai, kabo matana wa se namwanamwa'uyo."¹³ Na Ananiya ye wane, "Guiyau,

tamowai se bado udiyedi hedehedede ya lapuidi meta teina tamowai ta Yelusalema unai laulau yababayababadi udoi'udoi ye ginaulidi Guiyau yom tamowai* kalidiyena.¹⁴ Na taukaitalasam tauwoyawoya udiyedi gigibwali ye hai na ye laoma Damaseko bena Guiyau hesam yena tauyogayogasaewa* maudoidi kabo ye haidi na ye toledi numatutugudu unai."¹⁵ Guiyau ye hedehedelau Ananiya unai ye wane, "Ku lau, matauwuwuna ede yau yogu kaisunuwa tamowaina ede iya, kabo wasagu ta ye laei dagela tamowaidiyao yo yodi wasawasa udiyedi, yo hinage Isalaela tamowaidiyao udiyedi.¹⁶ Na iya kabo ya hekita meta hesagu ta debanaena kabo ye kamkamna."

¹⁷ Ede Ananiya ye lau Yuda yona numa unai ye mwalaes na nimana ye tolesaedi Saulo kewanaena na ye wane, "Kagu kaha Saulo! Guiyau Yesu, yom laoma wa unai ye taumasalahha kalimyena wa, iya ye hetamaligau ya laoma kalimwai ta, kabo matam ta se namwanamwa'uyo yo hinage Yaluwa Tabuna kabo ye hemwayaugo."¹⁸ Mahanana ne unai ginauli hesau kana kao doha yama konahidi Saulo matana wa udiyedi se bekuhai, na gonowana ye kaikewa'uyo. Ede ye tolo na ye babatiso.¹⁹ Ye kaikai kabo yona bayao ye hai'uyoi.

Saulo Damaseko yo Yelusalema unai

Kabo Damaseko unai Yesu tauhemuliwatanina wa maidadi Saulo se miya mayadai hisa,²⁰ na Saulo ye hetubu ye lauguguya sunago udiyedi ye wane, "Yesu meta iya Yaubada natuna."²¹ Taulapulapui maudoidi wa se siliyata yo se nuwapwanopwano na se wane, "Teina tamowai ta meta Yelusalema unai taukawamamohoi Yesu unai ye kabikabihenayaidi, yo hinage ye laoma inai bena Yesu tauhemuliwatanina ye haidi na ye laedi taukaitalasam tauwoyaidi udiyedi."

²² Na Saulo yona guguya ye bayao ye lau, na ye hedehedemasalahananamwanamwaei meta Yesu iya Yaubada yona kaisunuwa tamowaina.* Ede Dius Damaseko unai taumiya wa nuwadiyao se pwanopwano na nige gonowana kalinana se bui.

²³ Saulo ye babawa huyalohaloha, na kabo Dius tamowaidiyao se koitalaliu bena iya se koihemwaloi.

²⁴ Na iya yodi talaliu wasana ye lapui. Mayadai yo boniyai magai wa kedadiyao se kaikaikewaguduidi bena unai kabo Saulo se unuhemwaloi.²⁵ Ede boniyai hesau unai Saulo tauhemuliwatanina hekadiyo se hedehedelau Saulo unai bosaena ye gelu na magai wa ganana windona unai se hedalolodobiyei na ye dahalai ye lau Yelusalema.

²⁶ Saulo ye lage Yelusalema na ye kaipate bena ye lusae tauhemuliwatanai wa udiyedi, iyamo se matausei

8:36-37 Lausoisoi 37 kulikuli beyabeyadiyao maudoidi udiyedi nige se kuli, na hisahisadi mo se kuli: *Na Pilipo ye wane, "Ena ku kawamamohoi nuwam maudoina, kabo ku babatiso."* Ede yunika wa ye wane, "Ya kawamamohoi meta Yesu Keliso iya Yaubada natuna."

9:13 Guiyau yona tamowai meta siya tauhemuliwatanai, Dimdim unai se wane saint.

9:14 Guiyau hesanaena tauyogayogasaewa meta hinage ta wane taukawamamohoi.

9:22 Iya ede Keliso.

matauwuwuna ede nige se kawamamohoiyei meta iya tauhemuliwatani hesau.²⁷ Na Banaba Saulo ye woyaiyama apostolo wa udiyedi yo ye hededeheemasalahalaha kalidiyena meta Damaseko kedana unai Saulo Guiyau ye kita yo Guiyau ye hededelau Saulo unai. Yo hinage ye hededeheemasalahalaha meta Damaseko unai Yesu hesanaena ye lauguguya ma nuwabayaona.²⁸ Ede Saulo maiyadi se miya. Na Yelusalema magaina maudoina ye tauhetakikili, na Guiyau hesanaena ye laulauguguya.²⁹ Yo hinage Dius hekadi taukalina Gililika maiyanao se haikawayagala. Na se koitalaliu bena se koihemwaloi.³⁰ Na taukawamamohoi hedehedede wa se lapui ede se woyai se laei Sisaliya na menai se hetamali ye lau yona magai Tasusi.

³¹ Kabo Yudeya, Galili yo Samaliya udiyedi ekalesiya meta nuwadiyao se talu na daumwaliyena se miya. Yaubada yodi sunuma wa ye hebayaodi. Na Guiayu matausina unai se miya yo Yaluwa Tabuna ye henuwabayaodi, ede kadi boda wa ye laki ye lau.

Petelo Eneyasi ye henamwanamwa

³² Na Petelo ye taihile ye lau teha maudoina udiyedi taukawamamohoi ye kaitaumanaidi. Yona taihile wa unai ye lage magai hesau hesana Lida, unai Guiyau yona tamowai* ye kitadi. ³³ Na temenai tamowai hesau bunibunina ye lobai hesana ede Eneyasi. Bolimai haligigi-haiyona (8) unai nige gonowana yona kabakeno ye pesagabaei. ³⁴ Petelo ye hededelau Eneyasi unai ye wane, “Yesu Keliso ye henamwanamwago. Ku tolo na yom kabakeno ne ku gwaugogoi.” Mahanana ne unai ye namwanamwa. ³⁵ Unai boda maudoidi Lida yo Salona udiyedi taumiya Eneyasi se kita ede se kawamamohoi Guiyau unai.

Petelo Dolekasi ye hetolo'uyoi boita unai

36 Yopa unai tauhemuliwatani sinena hesau hesana ede Tabita (kalina Giliki unai ta wane Dolekasi).^{*} Huya maudoina yona laulau se namwa tamowai udiyedi yo taudehadeha ye sagukaliliyedi.³⁷ Na ye kasiyebwa ede ye boita. Na sinalena wa se deuli na se tole numa wa heisi helabuina bilina hesau unai.

38 Lida meta Yopa dedekanaena. Na tauhemuliwatani wa wasa se lapui meta Petelo iya Lida unai, ede tatao labui se hetamalidi se lau Petelo unai se wane, "Ku laoma ta laumwamwayau!"³⁹ Ede Petelo maiyadi se lau se lage meta se woyaei se sae bili wa unai. Na wabuwabu hekadi Petelo se tolohetakikili na se

doudou yo kadi kwama yo kaleko hekadi Dolekasi yeginaulidi wa se hekita.

⁴⁰ Petelo maudoidi wa ye hetamalidi bili wa se pesagabaei, na ye tulibono yo ye tapwalolo. Kabo ye kaikewalau Dolekasi unai na ye wane, "Tabita, ku tolo!", na sinebada wa matana ye helaladi na Petelo ye kita ede ye tolo na ye tuli. ⁴¹ Kabo Petelo ye kabilau nimana wa unai na ye kabihetolo, na ye yoga taukawamamohoi yo wabuwabu wa se mwalaes na se kita meta Dolekasi boita unai ye tolo'uyoko. ⁴² Yopa unai taumiya maudoidi wasa wa se lapui meta se kawamamohoi Guiyau unai, na hekadiyo nige se kawamamohoi. ⁴³ Na Petelo kabu Yopa unai ye miya, Simona yona numa unai. Simona kana paisowa ede suisui dahidiyao se kopadi na se mosedi iya ye he'a'adi yo ye kabinonohaidi.

Koniliyasi Petelo ye yoganei

10 Sisaliya unai tamowai hesau hesana Koniliyasi.

10 Iya meta Loma yodi tau'iyala bodana Italiya unai taulaoma udiyedi sentuliyo* hesau.² Koniliysi yo yona numa tamowaidiyao Yaubada se hekasisiyei ma nuwakohihaidi. Yona kaikainauya se lakikalili taudehadeha udiyedi, na ye tapwatapwalolo Yaubada unai.³ Mayadai hesau meimeilahi yona tehaena* Koniliysi yona nuwanuwatu unai Yaubada tautau hesau ye hemasalaha unai, meta Yaubada yona anelu hesau ye taumasalaha na ye wane, "Koniliysi!"⁴ Na Koniliysi ye kitalau anelu wa unai meta ye matausi na ye wane, "Guuyau, idohagi?" Anelu wa ye wane, "Yom kainauya taudehadeha udiyedi yo yom tapwalolo se hemala kabahenuhenuwaisini Yaubada matanaena.⁵ Unai tatao hekadi ku hetamalidi se lau Yopa unai tamowai hesau hesana Simona Petelo se woyaiyama.⁶ Iya maiyana heliyam Simona se miya. Simona hesauna ne meta suisui dahidi taupaisowaidi,* na yona numa meta gabwa dedekanaena."

⁷ Anelu wa ye dahalai, kabo Koniliyasi yona tau'iyala tamowaina, iya meta tausaguina yo Yaubada tausunumaena hesau, yo hinage yona heyayai tauhaidi labui ye yoganeidi. ⁸ Saha se tubu wa yodi ye hedehedede na ye hetamalidi se lau Yopa.

Petelo tautau tabuna ye kita

⁹ Mayadai helabuina mayamayadailakiyena tatao wa Yopa se hanahanawui. Mahanana ne unai Petelo ye mwalaesae numa kewana ne unai* ye tapwalolo.

9:32 Guiyau yona tamowai meta siya tauhemuliwatani yo tamowai tabudiyao.

9:36 Tabita meta kalina Alamaiki. Tabita yo Dolekasi kaniyodi kesega, iya ede Dimdim unai ta hedede *gazelle*, meta suisui hesau taukaikailagau, na kana kao ye namwakalili, doha *deer* o gouti lakilakina.

10:1 Sentuliy meta tau'iyala badodi 100 ye woyawoaydi. Loma yodi tau'iyala maudoidi se heboda hegahegagilidi: Tatao badodi 6,000 meta hesadi se katai *legiyona* (legion). Legiyona hinage se heboda hegahegagilidi, meta tatao badodi 600 hesadi se katai *kohoti* (cohort), na yodi tauwoyawoya ede *iyala kapinana* (commander). Na kohoti udiyedi meta boda 6, tamowaidiyao badodi ede 100, na boda kesega kesega tauwoyawoaydi hesana ede *sentuliy* (centurion).

10:3 Meimelaiha yona tehaena meta 3:00 PM. Iya ede Dius yodi huyatapwalolo mahanana (Apostolo 3:1 ku hasil).

10:6 Simona kana paisowa wasana meta Apostolo 9:43 unai ku hasili.

10:9 Dius yodi numa kewadiyao meta tabatabadi. Huyana numa se ginauli meta hinage kana kaikope se ginauli dagelana unai ye lau ye sae numa kewana ne unai.

¹⁰ Na ye hasali ede ye kaibwada bena kana kai se mosei na ye kai. Kai wa se kabikabinonohai na Yaluwa Tabuna Petelo ye taukasini. ¹¹ Ede tautau tabuna ye kita meta galewa ye tasoke na ginauli hesau kana kao doha kabobo lakilakina isu hasi ne unai se kabi na se hedalolodobiyeiyama tanoubu ta hesabana.

¹² Luwana ne unai meta mwata yo manuwa yo hinage suisui kaekaediyo hasi kadi kao udoi'udoi. ¹³ Na kalina hesau ye hededelau unai ye wane, "Petelo, ku tolo, suisui ta ku koihemwaloidi, ku ligadi na ku kaidi."

¹⁴ Na Petelo ye wane, "Taba nige, Guiyau! Yogo mauliyena sola nige suisui bidabidana yo siusiuna hesau ya kai."* ¹⁵ Na kalina wa ye hedehedede'uyo ye wane, "Saha Yaubada ye he'a'adiko meta tabu ku kawayabayababaedi." ¹⁶ Hedehedede wa ye tubu ma haiyona, na kabo kabobo wa se tabehai ye seuyo galewa.

¹⁷ Petelo sola ye nuwanuwatu tautau wa kaniyona ede saha, na Koniliyasi tamowai ye hetamalidi wa Simona yona numa se lobai ede se lage numa wa kawamatana unai. ¹⁸ Na se yogasae na se henamai se wane, "Simona hesana hesau ede Petelo teina numa ta unai ye miyamiya?"

¹⁹ Petelo sola ma nuwanuwatuna, na Yaluwa Tabuna ye hededelau unai ye wane, "Simona, tatao haiyona se wasewaseneigo. ²⁰ Ku pesa ku dobi na tabu ku laulaukwatakwata, na maiyamwao kwa lau, matauwuwuna ede yau ya hetamalidima."

²¹ Petelo ye pesa ye dobi na ye hededelau udiyedi ye wane, "Tamowai kwa wasewasenei wa, iya ede yau. Na saha hesabana kwa laoma?"

²² Se wane, "Sentuliyo Koniliyasi ye hetamaligai ka laoma hesabam. Iya meta tamowai namwanamwana Yaubada tauhekasisiyena, yo Dius tamowaidi maudoidi se kitahenamwakaliliyei. Yaubada yona anelu hesau ye hededelau Koniliyasi unai bena taba ye yoganego na ku lau yona numa unai, na bena saha ku hedehedeli na ye lapuidi." ²³ Ede Petelo tamowai wa ye yogaisinidi.

Petelo Koniliyasi ye kaitaumanai

Mala ye tom ede Petelo maiyadi se dahalai se lau, na Yopa unai taukawamamohoi hekadiyo se hemuliwatanidi. ²⁴ Na mayadai helabuina wa unai se lage Sisaliya. Na Koniliyasi kehanao yo kana kahao hekadiyo ye yogagogoidi na yona numa unai Petelo se nayanayai. ²⁵ Petelo ye lage ede Koniliyasi ye laoma ye hailobai, na ye tulibono yo ye taba'ohu Petelo unai. ²⁶ Na Petelo ye kabilau ye kabihetolo na ye wane, "Ku tolo, yau meta tamowai doha kowa."

²⁷ Petelo maiyana Koniliyasi se hedehedede na se mwälai numa kalona wa unai meta bodalakilaki temenai. ²⁸ Na Petelo ye hededelau udiyedi ye wane,

"Komiu kabina kwa katakalili kai Dius yoma laugagayo meta nige gonowana dagela tamowaidi ka kaitaumanaidi yo maiyamai ka hebodakesega. Na Yaubada ye hekatagau meta tabu tamowai hesau ya kawayabayababaei. ²⁹ Unai huyana wasa ku hetamaliyawa meta nige ya laukwatakwata. Na bena ya henamaiyeigo matauwuwuna saha to ku yoganeigau ya laoma ta."

³⁰ Ede Koniliyasi ye wane, "Mayadai hasi se lauko huyana ne unai yogo numaena ya tapwatapwalolo meimeilahi yona tehaena, na makesega tamowai hesau kana kwama namanamalina ye taumasalaha matagu wa unai ye totolo ³¹ na ye wane, 'Koniliyasi! Yom tapwalolo wa Yaubada ye lapuidi yo yom kaikainauya taudehadeha udiyedi wa ye kitadiko.

³² Unai tamowai hesau ku hetamali ye lau Yopa bena Simona hesana hesau ede Petelo ye woyaiyama. Iya ede ye miyamiya Simona suisui dahidi taupaisowaidi yona numa unai. Yona numa ne meta gabwa dedekanaena.* ³³ Ede kalina ya hetamalimwamwayauyeiyawa hesabam, na ye namwakalili to ku laoma. Mahana te unai meta maudoimai Yaubada matanaena, na ginauli saha Guiyau ye hedehedeli kalimyena bena ku hedehedeli ka lapuidi."

³⁴ Kabo Petelo ye hetubu ye hedehedede ye wane, "Mamohoi ya nuwatulobai meta Yaubada nige ye gadosisihineli. ³⁵ Teha udoi'udoi udiyedi tautaba'ohu Yaubada unai yo yodi laulau se dudulai meta ye henuwadi. ³⁶ Wasa namwanamwana Yaubada ye hetamaliyama Isalaela tamowaidiyao udiyedi wa kabina kwa katako, meta nuwadaumwali kedana ede Yesu Keliso. Iya meta tamowai maudoidi yodi guiyau. ³⁷ Yowane kabina kwa kata meta babatiso hedehededeni ye hedehededei. Yo yona huyalauhekata ye lau ye gehe mulina ne unai ginauli sahasaha se tubu Galili yo Yudeya maudoina unai hinage kabina kwa kata: ³⁸ Idohagi Yaubada Yesu Nasaleta tamowaina ye hemwayau Yaluwa Tabuna yo gigibwali unai, yo idohagi Yesu ye takikili na laulau namwanamwadi ye ginaulidi yo tamowai Satani yona gigibwali unai taukamkamna wa ye henamwanamwadi, matauwuwuna Yaubada iya maiyana.

³⁹ Sahasaha ye ginaulidi Dius yodi tano yo Yelusalema unai tauhemamohoiyedi ede kai. Se hekabasi kaiwaena* na se koihemwaloi, ⁴⁰ na mayadai hehaiyonana unai Yaubada iya ye hetolo'uyo boita unai na ye hetaumasalaha. ⁴¹ Nige ye taumasalaha tamowai maudoidi udiyedi, na Yaubada yona kaisunuwa tamowaidiyao siya se bom mo iya se kita yo se hemamohoiyei. Tamowaidiyao ede kai, yona tolo'uyo mulina ne unai iya maiyamai ka numa

10:14 *Suisui bidabidadi yo siusuidi* Petelo ye hetaladi ta, siya ede suisui Mose yona laugagayo unai ye laugagayoidi wa, nige gonowana Dius se kaikaidi. Na ena se kaidi, kabo se bida na nige gonowana se lau numa tabuna unai se taba'ohu. Suisui bidadi wa ede mwata, puwaka, yama nige konahidi, kumakala, kedewa, yo suisui hekadiyo hinage.

10:39 *Kaiwa* ta iya ede sataulo.

yo ka kaikaigogoi.⁴² Na ye hededelaoma bena ka lauguguya tamowai udiyedi yo bena ka hemamohoiyei meta iya Yaubada yona kaisunuwa tamowaina bena tausilasila wa yo tauboiboita tauhinelidi yo tautolehekasadi.⁴³ Peloweta maudoidi se hedehedemasalaha meta Yesu taukawamamohoiyeina maudoidi kabo yodi yababa ye nuwatugabaedi iya hesanaena.”

⁴⁴ Petelo sola ma hedehededen, na Yaluwa Tabuna ye taludobi wasa wa taulapuina maudoidi udiyedi.⁴⁵ Dius tamowaidiyao siya taukawamamohoi Petelo maiyanao se laoma wa se siliyata meta Yaubada yona kainauya Yaluwa Tabuna hinage ye inidobiyei dagela tamowaidi udiyedi,⁴⁶ matauwunna ede se lapui meta Yaluwa yona hekataena kalina udoi'udoi* udiyedi se hedehedede yo Yaubada se hedehedebasaei. Kabo Petelo ye hededelau yona hali Dius wa udiyedi ye wane,⁴⁷ “Yaluwa Tabuna se haiyako gonogonowana doha kita. Unai nige gonowana tamowai hesau ye hededenuwahidi tabu babatiso waila unai se haihai.”⁴⁸ Ede ye hedede se hebabatisodi Yesu Keliso hesanaena. Na kabo Petelo se kaibwadai maiyadi se miya mayadai hisa.

Petelo yona paisowa wa ye hedehedemasalahadi Yelusalema unai

11 Apostolo yo taukawamamohoi hekadi Yudeya unai taumiya wasa se lapui meta dagela tamowaidi hinage Yaubada wasana se hai.² Na huyana Petelo ye seuyo Yelusalema meta taukawamamohoi hekadi, siya pelitome tauhaidi, maidadi Petelo se haikawayagala³ se wane, “Kowa idohagi to ku lau dagela tamowaidiyao udiyedi na yodi numaena maidamwao kwa kaikai.”

⁴ Na Petelo ye hetubu ginauli maudoidi ye hedehedemasalahananamwanamwaedi kalidiyena, ye wane,⁵ “Magai Yopa unai ya tapwatapwalolo na Yaluwa ye taukasinigau, ede tautau tabuna hesau ya kita. Ginauli lakilakina hesau ya kita kana kao doha kabobo lakilakina, isu hasi ne unai se kabi na galewa ne unai se hedalolodobiyeiyama kaliguwai.⁶ Ya kitalau luwana ne unai meta suisui kaekaediyo hasi kadi kao udoi'udoi, suisui kaikaikasidiyao, yo hinage mwata yo manuwa ya kitadi.⁷ Na kabo kalina hesau ya lapui ye hedehedelaoma ye wane, ‘Petelo, ku tolo. Ku kohemwaloidi ku ligadi na ku kaidi.’

⁸ Ya hededebui ya wane, ‘Taba nige, Guiyau! Yugu maulyena sola nige suisui bidabidana yo siusiuna hesau ya kai.’

⁹ Kalina wa galewa ne unai ye hedehedede'uyo ye wane, ‘Saha Yaubada ye he'l'adiko meta tabu ku kawayabayababaedi.’¹⁰ Hedehedede wa ye tubu ma haiyona, na kabo kabobo wa se tabehai ye seuyo galewa.

¹¹ Mahanana ne unai tamowai haiyona Sisaliya unai se hetamalidima se laoma ee se lage yogu kabamiya numana wa unai.¹² Na Yaluwa Tabuna ye hededelaoma kaliguyena bena tabu ya laukwatakwata na maiyaguwao ka lau. Na teina kada kahao haligigikesega ta hinage maidamaiyao ka lau, na taudi haiyona wa tauhetamalidima yona numa unai ka mwalae.¹³ Na yomai ye hedehedede idohagi anelu hesau ye taumasalaha yona numa ne unai na ye wane, ‘Kalina ku hetamali ye lau Yopa, Simona hesana hesau ede Petelo, iya bena ye laoma.¹⁴ Iya kabo yom wasa ye leyawa, unai kabo kowa yo kam bodao maudoidi mauli kwa lobai.’

¹⁵ Ya hetubu ya hedehedede, na Yaluwa Tabuna ye taludobi udiyedi, doha huya bagubagunana unai ye laoma kalidawai wa.¹⁶ Na kabo Guiyau yona hedehedede wa nuwaguyena ye sae, doha ye wane, ‘Yowane waila unai ye hebahebabatiso, na komiu kabo Yaluwa Tabuna unai kwa babatiso.’
(Apostolo 1:5)¹⁷ Unai, ena Yaubada yona kainauya ye mosei dagela tamowaidiyao udiyedi doha ede kita taukawamamohoi Guiyau Yesu Keliso unai, meta yau kaiteya na bena Yaubada yona paisowa ya gudugudui?”

¹⁸ Hedehedede wa se lapui meta yodi haikawayagala wa se hekaiyawasi, na Yaubada se hedebasaei se wane, “Ye masalah meta Yaubada yona talam ye ginauli meta dagela tamowaidi hinage gonowana se nuwabui yo se mauli.”

Ekalesiya Antiyoka unai

¹⁹ Huyana Setepano se hekalaweku mulina ne unai hewahewaiunu ye tubu, ede taukawamamohoi wa se hailauyedi. Na hekadi se lau Penisiya, hekadi Saipulusi, yo hekadi se lau Antiyoka, na Yesu wasana se duwai Dius mo udiyedi.²⁰ Na hekadiyo, siya Saipulusi yo Sailini tamowaidiyao, se lau Antiyoka na se hetubu Giliki tamowaidiyao udiyedi hinage Guiyau Yesu wasana namwanamwana se lauguguyaesi.

²¹ Guiyau yona gigibwali wa maiyadi, ede bodalakilaki se kawamamohoi yo se nuwabui Guiyau unai.

²² Saha ye tubu wasana wa ye lau ekalesiya Yelusalema unai se lapui. Ede Banaba se hetamali ye lau Antiyoka.²³⁻²⁴ Iya meta tamowai namwanamwana. Yaluwa Tabuna iya ye hemwayau, yo yona sunuma ye bayao. Ye lage na ye kitalobaidi meta Yaubada ye hemaulidiko, ede ye gwauyala na ye hededehebayaodi bena se tolabayao ma nuwakohihaidi. Na bodalakilaki se patulau Guiyau unai.

²⁵ Na Banaba ye lau Tasusi bena Saulo ye loyai,

²⁶ na ye lobai ede ye woyai se lau Antiyoka. Na bolimai kesega menai se miya na ekalesiya boda lakilakina maiyadiyao se koikoigogo na se hekatadi.

Na Antiyoka unai se hetubu kabo Guiyau tauhemuliwatanina hesadi se katai Kilihiyani.*

²⁷ Huyadi ne unai peloweta hekadiyo Yelusalema unai se dobima Antiyoka. ²⁸ Hesauna hesana Agabasi ye tolo na Yaluwa Tabuna yona gigibwaliyena ye hededenonohai meta hasahasali lakilakina kabo ye tubu Loma yodi kabaloina magaidiyo udiyedi. Hasahasali ne ye tubu meta wasawasa Kolodiyasi yona huyaloina unai. ²⁹⁻³⁰ Hasahasali huyana wa unai tauhemuliwatani Antiyoka unai yodi nuwatu se ginauli bena heledi taukawamamohoi Yudeya unai taumiya se saguidi. Na kesega kesega yona bayaoyena saha ye lobai meta yona kainauya ye tole. Kabo Banaba yo Saulo se hetamalidi na kainauya wa se bahelaei Yelusalema na se mosegabaei ekalesiya yodi tamowai lakilakidiyo udiyedi.

Anelu hesau Petelo ye woyahepesa numatutugudu unai

12 Huyana ne unai Heloda wasawasa ekalesiya tamowaidiyo hekadiyo ye haidi bena kabo ye hekamkamnadi. ² Ye hededelau yona tau'iyala udiyedi na Yowane kana kaha Yamesi se koihemwaloi kelepa unai. ³ Ye kita meta saha ye ginauli wa Dius tamowaidiyo se kitahenamwa, ede hinage Petelo ye hai. Yona huyahaina meta Pwalawa nige Yistina henuwaisinina unai. ⁴ Na Petelo ye pai na ye tole numatutugudu unai. Na tau'iyala boda hasi ye hetolodi, yo udiyedi tatao hasi hasi, na iya se kitakitahetete. Heloda yona nuwatu bena Taukiuli henuwaisinina mulina ne unai Petelo ye woyahepesa na ye helauhetala boda matadiyena. ⁵ Unai Petelo numatutugudu unai ye miyamiya, na ekalesiya wa yona se tapwatapwalolo Yaubada unai ma nuwakohihaidi.

⁶ Sola nige lauhetala mayadaina ye lage, na boniyaina ne unai meta Petelo nimana labui ne seni udiyedi se paidi na iyala tamowaidiyo labui duwaduwalidiyena ye kenokeno, yo hinage iyala tamowaidiyo hekadi bili wa kedana se tologudu.

⁷ Makesega kabo Guiyau yona anelu ye taumasalahna, na mala ye sina bili wa unai. Anelu wa Petelo lisilisina ye koitaguna ye hanói, ye wane, "Ku tolomwamwayau!" Ede Petelo nimana udiyedi seni wa se bekuhai. ⁸ Na anelu wa ye hededelau unai ye wane, "Kam dagilolo me ku paimomosi yo kam buti ku likwadi!" Na Petelo ye ginauliwatanidi. Kabo anelu wa ye wane, "Kam kwama ku likwa, na ku hemuliwatanigau." ⁹ Petelo anelu wa ye hemuliwatanina na numatutugudu wa se pesagabaei. Na saha ye tubutubu wa yona nuwatu bena tautau gaibu ye kita, na nige mamohoina. ¹⁰ Na keda bagubagunana yo helabuina taukitahetetedi wa se laugabaei ede keda ye lau magai wa meta kedaguduna bayabayaona unai

se lage. Na ye bom ye tasoke ede se pesa na se sigilau, kabo anelu wa ye tauwadam.

¹¹ Kabo saha ye tubu wa Petelo nuwana wa unai ye sae, na ye wane, "Kabo ya nuwatulobai meta mamohoi Guiyau yona anelu ye hetamaliyama na ye gilihaigau Heloda yona gigibwali yo Dius tamowaidiyo yodi nuwatu yababadi maudoidi udiyedi."

¹² Mulina ne unai ede ye lau Yowane sinana Maliya yona numa unai. Yowane hesana hesau se katai Maleko. Na numa wa unai bodalakilaki se lagegogoi na se tapwatapwalolo. ¹³ Petelo numa ganana guduna wa unai ye koikoi ede heyayai tauhaina sinena hesau hesana Loda ye lau keda wa unai na ye henamai ye wane, "Kowa kaiteya?" ¹⁴ Na Petelo kalinana wa ye lapulobai meta ye gwauyalakalili, ede keda wa nige ye soke, na ye heloi ye uyo tamowai hekadi wa yodi ye hedehedede ye wane, "Petelo ede dagela ne unai!"

¹⁵ Na se hededelau waihiu wa unai se wane, "Ku yauyaulekalili!" Na iyamo ye hedehedede'uyo ye wane, "Ya hededemamohoi!" Kabo se wane, "Nuwana Petelo yona anelu meta."

¹⁶ Na Petelo sola ma koikoina. Keda wa se soke ede iya se kita meta se siliyata. ¹⁷ Na Petelo nimana ye lausini ede se mwanou. Na kabo yodi ye hedehedede idohagi Guiyau yona woyawoyahepesana numatutugudu wa unai. Na ye wane, "Saha ye tubu ta bena Yamesi* yo kada kahao hekadiyo yodi kwa hedehedede." Na kabo ye dahalai ye lau teha hesau.

¹⁸ Mala ye tom meta nuwapwanopwano lakilakina tau'iyala tamowaidiyo wa udiyedi matauwuwuna Petelo unai saha ye tubu wa nige kabina se kata. ¹⁹ Na Heloda ye hedede meta se loyanamwanamwaei, iyamo nige gonowana Petelo se lobai. Unai taukitakitahetetenwa ye henamaibuibuidi, na ye hedede meta kabo se koihemwaloidi.

Heloda yona boita

Muliyyena Heloda Yudeya ye laugabaei ye lau Sisaliya unai ye miya.

²⁰ Heloda meta Taiya yo Sidona tamowaidiyo ye koikoipiliyedi. Na magai labui wa tamowaidiyo se hebodakesega na se kaipate bena Heloda se kita na se kaibwadai bena nuwadaumwali unai se miya, matauwuwuna kadi kai wa iya yona kabaloina unai se laolaoma. Na se lau Heloda yona taupaisowa lakilakina Balastasi se kita ede ye saguidi na mayadai ye tole kabo se lau wasawasa wa se kita.

²¹ Yodi kaisunuwa mayadaina wa unai Heloda kana kwama wasawasadi ye likwadi na yona kabatuli unai ye tuli, na ye hedehedelau magai labui wa tamowaidiyo udiyedi. ²² Kabo kalina lakilakiyena se hedede yogayogahi se wane, "Teina ta meta yaubada hesau, na nige tamowai gaibu!" ²³ Mahanana ne unai

11:26 *Kilihiyani* meta kalina Giliki, na kaniyona ede *Keliso tamowaina*, o *Keliso gagilina*, matauwuwuna yodi laulau wa gonogonowana doha Keliso wa. Na kalina Saliba unai ta wane *ekalesiya*.

12:17 *Yamesi* ta, iya Yesu kana kaha mamohoina.

Guiau yona anelu Heloda ye koiheguli na mwatamwata se kai na ye mwaloi, matauwuuna nige Yaubada ye hekasisiyei.

²⁴ Na huya maudoina Yaubada wasana wa ye laki ye lau.

²⁵ Banaba yo Saulo yodi paisowa Yelusalema unai ye gehe ede maiyadi Yowane hesana hesau Maleko se uyo Antiyoka.

Banaba yo Saulo se hetamalidi se lau

13 Antiyoka unai ekalesiya luwadi wa unai peloweta yo taulauhekata hekadiyo:

Banaba,
Saulo,
Simiyona, iya se katai Duba,*
Lusiyasi Sailini tamowaina,
yo Manaen, iya Heloda wasawasa maiyana se tubusae.

² Huyana se tabataba'ohu Guiayu unai yo se kaikahudi meta Yaluwa Tabuna ye wane, "Yogu kaisunuwa tamowaidiyo Banaba yo Saulo kwa hetamalidi se lau na yogu paisowa ya moseidiko wa se ginauli." ³ Se kaihudi yo yodi se tapwalolo na nimadi se tolesaedi taudi labui wa udiyedi na se hetamalidi se lau.

Saipulusi unai

⁴ Yaluwa Tabuna Banaba yo Saulo ye hetamalidi ede se dahalai se dobi Selusiya na se gelu se lau Saipulusi bwanabwanaluwana unai. ⁵ Na Yowane* meta maiyadi na yodi paisowaena ye saguidi. Se lage Saipulusi magaina hesau hesana Salamisi, na Yaubada wasana se wasaduwaiyei Dius yodi sunago udiyedi.

⁶ Taudi haiyona wa kabo bwanabwanaluwa maudoina se tauhetakikili ye lau ee se lage Paposi.* Temenai meta Dius tamowaina hesau se lobai hesana ede Bala-Yesu. Iya meta taukobakoba yo pelowetalupolupo, ⁷ yo hinage gabana Segiusi Paulo maiyana se miya. Gabana wa iya tausonoga hesau. Ye henuwa bena Yaubada wasana ye lapui, unai yona taupaisowa hesau ye hetamali ye lau Banaba yo Saulo hesabadi. ⁸ Na Elimasi—hesa te meta Bala-Yesu hesana kalina Giliki unai, kaniyona ede taukobakoba—ye hededeguduguduidi yo ye kaipate bena gabana ye hekaiyawasi tabu Yesu ye kawamamohoeyei. ⁹ Na Saulo, meta kalina Giliki unai hesana ede Paulo, Yaluwa Tabuna iya ye hemwayau ede ye kaikewadudulai Elimasi unai na ye wane, ¹⁰ "Kowa Satani natuna, yo laulaududulai maudoidi tauhewaiunudi. Laulaulupolupo maudoidi kalimyena se mwawayu. Idohagi to nige ku kaiyawasi na Guiayu

yonu nuwatu dudulaidi ku toletolebuidi? ¹¹ Unai Guiayu kabo ye hekamkamnago, na matam ne ye hegibudi mahana kubwakubwa, meta nige gonowana mahana dawayana ku kita." Mahanana ne unai matana se kamumu nige gonowana saha hesau ye kita, na ye kabikabidada taba tamowai hesau ye kabilobai to nimana ne unai ye kabi na ye woyai.

¹² Na gabana ye nokokalili Guiayu hedehededenwa unai, na saha ye tubu wa ye kita, ede ye kawamamohoi.

Antiyoka Pisidiya magaina unai

¹³ Paulo ma kana kahao Paposi unai se gelu se lau Pega Pampiliya unai. Menai, Yowane Maleko ye laugabaedi na ye uyo Yelusalema. ¹⁴ Na Banaba yo Paulo Pega unai se dahalai na se luwu se sae Antiyoka Pisidiya magaina hesau unai. Na Sabatiyena kabo se mwalaes Antiyoka yodi sunago unai na se tuli. ¹⁵ Na tamowai hekadiyo se tolo na Mose yona laugagayo yo peloweta yodi buka se hasilidi ye gehe ede sunago taukitahetetena wa yodi taupaisowa se hetamali ye lau Paulo yo Banaba udiyedi na ye wane, "Ena yomi hedehedaisagusagu hesau tatao ta udiyedi, gonowana kabo kwa hedehedede."

¹⁶ Unai Paulo ye tolo na nimana ye lausini na kabo ye hedehedede ye wane, "Isalaela tamowaidiyo yo komiu dagela tamowaidiyo Yaubada tauhekasisiyeina, kwa lapulapui. ¹⁷ Kita Isalaela tamowaidiyo yoda Yaubada, iya tamadao* ye kaisunuwaidi. Na huyana kadi isimilitao siya laolaoma Aikupito unai, Yaubada ye kitahetetedi ede kadi boda ye tadada. Na yona gigibwaliyena Aikupito unai ye woyahepesadi ¹⁸ na bolimai 40 balabala wa unai yodi laulau yababayabadi ye nuwakasini. ¹⁹ Kanana unai meta basileiya haligigi-labui tamowaidiyo ye unuhemwaloidi na yodi tano ye mosei yona tamowai wa udiyedi. ²⁰ Saha se tubutubu ta meta bolimai badona 450.

Mulina ne unai kabo Yaubada yodi tauhineli* ye mosedi ye lau ee Samuwela yona huyapeloweta. ²¹ Na kabo se kaibwada bena yodi wasawasa, ede Yaubada Saulo ye mosedi, Kisa natuna, iya meta Beniyamina kana isimilita hesau, na ye woyaidi bolimai 40,* ²² kabo Yaubada Saulo ye haigabaei. Mulina ne unai Dawida ye kaisunuwaei ye hemala yodi wasawasa. Yaubada Dawida ye hedehedemasalahya ye wane, 'Ya kita meta Dawida Yese natuna iya tamowai namwanamwana yau ya henuwa ede. Yogu nuwatu maudoidi kabo ye ginaulidi.'

²³ Dawida kana isimilita hesau Yaubada ye kaisunuwai bena Isalaela taugilihaidi, iya ede Yesu.

13:1 Dimdim bukadi hesa ta se kuli *Niger*, kaniyona ede *duba*. Unai hesana se tole *Duba*. Nuwana Simiyona dahina ye *duba*.

13:5 Yowane hesana hesau meta Maleko, Apostolo 12:12 unai ku hasili.

13:6 Paposi magaina meta Saipulusi tehadobina ne unai.

13:17 Tamadao kaniyona ede *kada kulutubu*, siya ede Abelahama yo Isako yo Yakobo ma natunao wa.

13:20 Tauhineli ne wasana ta hasili Tauhineli Bukadi (Judges) unai. Siya meta Isalaela yodi tauwoyawoya Joshua yona boita mulina ne unai na ye lau ee Samuwela yona huyapeloweta.

13:21 Saulo wasana ta hasili 1 Samuwela 8 unai ye hetubu ye lau ee 2 Samuwela 1.

Teina unai Yaubada yona hededehehesunuma ye hemamohoeyei.

²⁴ Sola nige Yesu ye laoma na Yowane Babatiso ye lauguguya Isalaela tamowaidiyao udiyedi bera se nuwabui yo se babatiso. ²⁵ Na huyana Yowane yona paisowa yona paisowa bera ye gehe kabo ye wane, ‘Yomi nuwatu bera yau kaiteya? Yau nige tamowaina kwa nayanayai’usei wa.* Na iya meta muliguyena kabo ye laoma, na yau nige gonowagu taba kana buti mainadi ya yailidi.’*

²⁶ Kagu kahao, komiu Abelahama natunao yo hinage komiu dagela tamowaidiyao Yaubada unai tautaba’ohu, bera kwa lapulapui, kabihemauli wasana ta meta ye laoma kalidawai. ²⁷ Tamowai maudoidi Yelusalema unai taumiya yo yodi tauwoyawoya nige se nuwatulobai meta Yesu ede Yaubada yona kaisunuwa tamowaina, na iyamo peloweta yodi hedehedede Sabati kesega kesega udiyedi se hashasilidi wa se hemamohoiyedi na iya se hegilu yo se hekamkamna. ²⁸ Nige kana mata hesau se lobai kabo unai se unui, na iyamo se kaibwada Pilato unai taba Yesu ye talamgabaei na ye boita. ²⁹ Yesu hedehededenia maudoidi peloweta se kulidi wa se hemamohoihegehedie, kabo sataulo unai se haigabaei na se tole bwayabwayaena. ³⁰ Na boita unai Yaubada Yesu ye hetolo’uyoi ³¹ na mayadai 40* solasoladi ne unai ye tautumasalah kaiteyadi iya maiyanao Galili unai tausaema Yelusalema wa udiyedi. Unai siya tauhemamohoing ede kada boda Isalaela udiyedi.

³² Na kai yoma laoma inai meta wasa namwanamwana ta ka leyawa kalimiuyena: Yaubada yona hededehehesunuma kama kulutubu udiyedi wa ³³ ye hemamohoeyei kadi isimulita kita kalidaena meta Yesu ye hetolo’uyoi boita unai. Doha Same helabuina unai se kuli,

‘Kowa natugu,

mayadai ta unai ya hemala tamam.’ (*Same 2:7*)

³⁴ Yaubada yona hededehehesunuma meta boita unai kabo ye tolo’uyo nige gonowana ye pwasa bwayabwayaena. Hedehedede ta buka tabuna unai ye hededeyako, ye wane,

‘Yogu henamwa tabudiyao yo mamohoidiyao ya hededehehesunumadi Dawida unai wa kabo ya lediwa kalimiuyena.’ (*Aisaiya 55:3*)

³⁵ Na Same hesau unai ye hemasalah ye wane, ‘Nige gonowana yom tamowai tabuna ye pwasa bwayabwayaena.’ (*Same 16:10*)

³⁶ Teina ta meta nige Dawida hedehededenia, matauwuna ede Dawida yona huyaena Yaubada yona nuwatu maudoina ye ginali ye gehe kabo ye boita, na kana kulutubu bwayabwayadi unai se tole na

tauna wa ye pwasa. ³⁷ Na tamowai Yaubada ye hetolo’uyoi boita unai wa, iya tauna nige ye pwasa.

³⁸ Unai, kagu kahao, ya henuwa bera kabina kwa kata meta Yesu debanaena ede ka wasaduwaiyei kalimiuyena meta Yaubada yababa ye nuwatugabaedi.

³⁹ Mose yona laugagayo nige gonowana yoda yababa ye haigabaedi. Na kaiteyadi se kawamamohoi iya unai meta ye dudulai na nige kabahegiluna hesau. ⁴⁰ Unai, bera kwa kitakitanamwanamwana saha peloweta se hedehededei wa tabu se tubu kalimiuyena:

⁴¹ ‘Komiu tautatalawasi, kwa kitakanamwanamwana, kabo kwa siliyata na kwa boita, matauwuna yomi huyaena kabo ya hekamkamnagomiu, na taba tamowai hesau yogu nuwatu ta ye hedehedemasalah ka kalimiuyena, meta nige gonowana kwa kawamamohoiyei.’” (*Habakuku 1:5*)

⁴² Sunago wa unai Paulo yo Banaba se dahadahalai na tamowai wa se wane, “Ka henuwa bera Sabati hesau taba kwa uyoma hedehedede ta hekadiyo kwa hedede’uyoidi.” ⁴³ Koigogo wa ye gehe kabo Dius bodadiyao yo dagela tamowaidiyao Yaubada taukawamamohoiyena maiyadiyao se lau. Na Paulo yo Banaba boda wa se nuwakoidi bera Yaubada yona katekamkamna unai se miyakesegai.

⁴⁴ Sabati hesau unai magai wa bodana se lagegogoi bera Guiyau wasana se lapui, na hisahisadi mo se miyasuwala. ⁴⁵ Huyana Dius tamowaidiyao boda wa se kitadi meta se kaikalomagigili na Paulo se hededeheyababa yo saha ye hedede wa se kawalupolupoei.

⁴⁶ Na Paulo yo Banaba se hedehedebayao se wane, “Komiu Dius tamowaidiyao, ye namwa mo Yaubada wasana namwanamwana ta yomiu ka hedehedebaguna. Iyamo nige kwa henuwa, na kwa bom kwa toledobiyei’uyoigomiu na mauli nige kana siga kwa laukwatakwtatei. Unai kabo ka lau dagela tamowaidiyao udiyedi. ⁴⁷ Matauwuna Guiyau yoma ye hedehedekyo ye wane,

‘Ya tolego dagela tamowaidiyao yodi daway, kalimyena kabo tanoubu tehana maudoina mauli nige kana se lobai.’” (*Aisaiya 49:6*)

⁴⁸ Dagela tamowaidiyao hedehedede wa se lapui meta se gwauyala yo Yaubada kalinana wa se nokoei yo se kawanamwanamwaei. Na kaiteyadi Yaubada ye kaisunuwaidi bera mauli nige kana siga tauhaina, meta siya se kawamamohoi.

⁴⁹ Na Yaubada wasana wa Antiyoka tehana maudoina ye hetakikili. ⁵⁰ Na Dius tamowaidiyao wa se tolo ede magai wa unai sinesinebadao saesaedi Yaubada tausunumaena yo magai wa babadadiyao se henuwasaedi na Paulo yo Banaba se hekamkamnadi

^{13:25} Tamowaina Yowane ye hetala ta iya ede Keliso Isalaela tamowaidi se nayanayai’usei wa.

^{13:25} Hedehedede ta meta Maleko 1:7 unai ku hasili.

^{13:31} Kalina Giliki unai se kuli *mayadai se bado*, na mayadai lohadia kulahegasalah na tabu ta nuwapwanopwano. Mayadai lohadia meta Apostolo 1:3 unai ta hasili ede mayadai wa badodi 40.

na se hetamalidi magai wa tehana maudoina se laugabaei.⁵¹ Ede Paulo yo Banaba kaedi mukalidi se koinihinhiyedi,* na magai wa se laugabaei se lau Ikoniya.⁵² Na Antiyoka Pisidiya magaina unai tauhemuliwatani wa Yaluwa Tabuna ye hemwayaudi yo se gwauyalakalili.

Ikoniya unai

14 Ikoniya unai hinage Paulo yo Banaba se lau Dius yodi sunago unai na yodi hedehedede wa se namwakalili, ede Dius yo dagela tamowaidiyao* meta bodalakilaki se kawamamohoi.² Na Dius hekadiyo wa, siya nige taukawamamohoi Yesu unai, kabo se tolo na magai unai taumiya dagela tamowaidi se henuwasaedi na taukawamamohoi Yesu unai wa se koipiliyedi.³ Na apostolo wa menai se bawa huyalohaloha na Guiyau wasana se duwai ma nuwabayaodi. Na Guiyau yona katekamkamna wasana wa ye hemamohoieyi meta gigibwali ye mosei udifyedi na laulau gigigibwalidi se ginaulidi.⁴ Na Ikoniya tamowaidiyao maudoidi wa se bom se hebodalabuiyedi, ede hekadi se lau Dius na hekadi se lau apostolo wa udifyedi.⁵ Na dagela tamowaidiyao hekadi yo Dius tamowaidiyao yodi tauwoyawoya maiyadiyao nuwatu se ginauli bena Paulo yo Banaba se hekamkamnadi yo se hekalawekudi.⁶ Na taudi labui yodi koitalaliu wa wasana se lapui ede se wasabu se lau Likeoniya magaidiyao Listila yo Debi udifyedi. Na magaidiyao wa maudoina se tauhetakikili⁷ na wasa namwanamwana se laulauguguyai.

Listila yo Debi udifyedi

⁸ Na Listila unai tamowai hesau sinana ye labasi meta kaeyabayababana nige gonowana ye laulau.⁹ Ye tutuli na ye lapulapui Paulo yona lauguguya wa unai. Paulo ye kitalau unai ede ye kitalobai meta Yesu ye sunumaei gonowana kabo ye henamwanamwa.¹⁰ Na kalinalakilakiyena ye hedelau unai ye wane, "Ku tolo!" Ede tamowai wa ye tolomwamwayau na ye hetubu ye laulau.

¹¹ Paulo saha ye ginauli wa boda wa se kita meta se yogahi na kalina Likeoniya unai se hedehedede se wane, "Yoda yaubadao wa se hemala doha tamowaimolosi na se dobima kalidaena!"¹² Banaba hesana se tole Suus,* na Paulo Hemesi,* matauwuwna ede iya meta tauhededede.¹³ Suus yona numa tabuna meta magai wa ganana dagelana ne unai. Yona taukaitasam bulumakau ye woyaidima yo pasa heiheigogoidiyao ye baheidima magai wa kawamatana unai na boda wa maiyanao se henuwa bena yodi kaitasam se ginaulidi apostolo wa udifyedi.

¹⁴ Banaba yo Paulo wasa wa se lapui meta yodi kaleko se pulisidi na se heloi se dobi ede se lulau boda wa udifyedi na se yogahi se wane,¹⁵ "Kama bodo, idohagi to doha teina kwa ginauli? Kai meta tamowai gaibu doha komiu. Na wasa namwanamwana ka leyama yo ka hededelaowa bena yomi laulau nige kaniyodi ta kwa tolehesuwaladi na kwa nuwabui Yaubada maumaulina unai. Galewa yo tanoubu yo gabwa yo hinage ginauli maudoidi udifyedi se bawa, ginauli maudoidi ta tauginaulidi ede iya.

¹⁶ Beyabeyana meta boda maudoina ye kabigabaedi na se bom nuwadi se lauwatanidi.¹⁷ Na iyamo kabahemasalahana tanoubu ta unai, meta yona kabinamwa ye hekitada, iya ede galewa ne unai nabu ye hetaluyama na yomi koya ye hekinidi, yo kai ye haidiwa na nuwamiu ye henamwadi."¹⁸ Hedehedede ta udifyedi se kaipatebayaokalili boda wa udifyedi, ede se hekaiyawasidi tabu se kaikaitalasamlau kalidiyena.

¹⁹ Kabo Dius tamowaidiyao hekadi Antiyoka yo Ikoniya unai se laoma ede boda wa se nuwakoidi na Paulo se hekalaweku, na yodi nuwatu bena ye boitako, ede magai wa unai se niulihepesa se lae dagela.²⁰ Na tauhemuliwatani wa se laoma Paulo se tolohetakikili, na ye tolo ede ye uyo magai wa unai. Mala ye tom kabo Paulo yo Banaba se lau Debi.

Paulo yo Banaba se uyo yodi kadau kabahetubuna magaina wa unai

²¹ Debi unai Paulo yo Banaba wasa namwanamwana se lauguguyaei, na tauhemuliwatani bodalakilaki se haidi. Na mulina ne unai se uyo Listila, Ikoniya yo Antiyoka teha Pisidiya unai²² na magai maudoidi udifyedi tauhemuliwatani wa se hededehebayaodi bena yodi sunuma se tolekesegai Yaubada unai, se wane, "Pilipili yo yababa udoi'udoi udifyedi ta kamkamna, na kabo ta lusae Yaubada yona basileiya unai."²³ Na kabo dubu kesega kesega udifyedi Guiyau tausunumaena tamowaidiyao hekadi se kaisunuwaidi yodi tauwoyawoya, na se kaihudi yo yodi se tapwalolo Guiyau unai kabo ye kitahetetedi.²⁴ Kabo Pisidiya se laugabaei se uyo Pampiliya.²⁵ Wasa namwanamwana wa Pega unai se lauguguyaei na kabo se lau Ataliya.

²⁶ Ataliya unai se gelu se seuyo Antiyoka teha Siliya magaina wa. Huyana Antiyoka unai yodi kadau wa se hetubu meta ekalesiya tauwoyaidi Paulo yo Banaba yodi se tapwalolo Yaubada unai bena kabo ye kitahetetedi na kabo se lau paisowa wa se ginauli, ye lau ye gehe ede se seuyoma.

²⁷ Se lage Antiyoka unai, kabo ekalesiya bodadi wa se yogagogoidima na paisowa maudoidi Yaubada yona gigibwaliyena se ginaulidi wa se hededehemasalahadi, yo idohagi sunuma kedana ye

13:51 Kaedi mukalidi se koinihinhiyedi, iya ede hekiheokino meta magai wa tamowaidiyao Yaubada wasana nige se henuwa, na giluna maudoina ede se bom kalidiyena.

14:1 Dagela tamowaidiyao ta siya meta Yaubada taukawamamohoiyena na sunago unai se tapwatwapalolo.

14:12 Suus meta Giliki yodi yaubada saesaena hesana. Dimdim unai hesana se kuli Zeus.

14:12 Hemesi (Dimdim unai Hermes) meta Giliki yodi yaubada hesana. Iya kana paisowa ede tautauwasa.

soke dagela tamowaidiyao udiyedi na se kawamamohoi.²⁸ Na menai tauhemuliwatani wa maiyadiyao se miya huyalohaloha.

Dubu babadadiyao se koigogo Yelusalema unai
15 Paulo yo Banaba sola Antiyoka unai na tamowai hekadi Yudeya unai se laoma na se hetubu se lauhekata ekalesiya wa udiyedi se wane, "Nige gonowana Yaubada ye gilihaigomiu kana siga pelitome kwa hai Mose yona kabikabi unai."² Na yodi lauhekata wa unai Paulo yo Banaba tamowai wa maiyadiyao se haikawayagalakalili. Debanaena ekalesiya Antiyoka unai Paulo yo Banaba maiyadiyao taukawamamohoi hekadiyo se kaisunuwaidi bena se lau Yelusalema apostolo yo tamowai lakilakidiyao se henamaiyedi.

³ Dubu wa ye hetamalidi se lau Yelusalema ede yodi lau ne unai Penisiya yo Samaliya magaideyao udiyedi ekalesiya yodi se hedehedede meta dagela tamowaidiyao se nuwabui. Na wasa wa se lapui ede se gwauyalakalili.

⁴ Huyana se lage Yelusalema kabo dubu tamowaidiyao, apostolo yo tamowai lakilakidi se hailobaidi, na paisowa maudoidi Yaubada yona gigibwaliyena se ginaulidi wa se hedehedemasalahadi. ⁵ Kabo taukawamamohoi hekadi, siya Paliseya kadi boda, se tolo na se wane, "Dagela tamowaidi ne taba se pelitome yo Mose yona laugagayo se miyawatanidi."

⁶ Ede apostolo yo tamowai lakilakidiyao se lagegogoi na pilipili wa se hetalahedudulai. ⁷ Se hedehedede huyalohaloha, na kabo Petelo ye tolo ede ye wane, "Kagu kahao, kabina kwa kata meta luwamu ne unai beyabeyana Yaubada ye kaisunuwaigau kabo dagela tamowaidiyao udiyedi wasa namwanamwana ya lauguguyaei se lapui na se kawamamohoi. ⁸ Yaubada, iya tamowai nuwadiyao kabidi taukata, meta dagela tamowaidi ye haidi na Yaluwa Tabuna ye mosedi gonogonowana doha ye leyama kita kalidaena. ⁹ Iya nige ye hinelidi, siya yo kita gonogonowada. Na yodi sunuma debanaena nuwadi ye deulihe'a'adi. ¹⁰ Unai, idohagi to Yaubada kwa laukita na bena tauhemuliwatani wa Mose yona laugagayo polohena kwa hebaheidi? Taba nige! Polohe ta kada kulutubu yo kita nige gonowada ta bahei. ¹¹ Na ta kawamamohoi meta yoda Guiyau Yesu yona kabinamwa unai mauli ta lobai, gonogonowana doha siya."

¹² Kabo boda wa se mwanou na se lapulapui Paulo yo Banaba udiyedi na se hedehedede idohagi Yaubada yona gigibwali unai laulau gigigigibwalidi hekihekinoidi se ginaulidi dagela tamowaidiyao udiyedi. ¹³ Se hedehededegehe ede Yamesi ye tolo na ye wane, "Kagu kahao, kwa lapulapui. ¹⁴ Petelo ye

hedehedemasalahayako idohagi Yaubada huya bagubagunana unai dagela tamowaidiyao ye nuwatuidi na udiyedi hekadi ye haidi yona tamowai.

15 Na Petelo yona hedehedede ta meta peloweta yodi hedehedede unai se hemamohoeyei, doha se kulinonohaiyako se wane:

¹⁶ 'Mulyena kabo ya uyoma Dawida yona numa ye gulì wa ya hetolo'uyoi.

Ye tatagwaligwali wa kabo ya ginauli yo ya hebbayao'uyoi.

¹⁷ Debanaena kabo tamowai hekadiyo bena Guiyau se loyai, yo dagela tamowaidiyao kaiteyadi hesagu ya mosedi bena Guiyau se wasenei.

Teina ta meta Guiyau kalinana. Iya ginauli maudoidi ta tauginaulidi,

¹⁸ doha ye hedehedemasalahadiko nabada wa unai.' (Emosi 5:11; Aisaiya 45:21)

¹⁹ Na Yamesi yona hedehedede wa ye tubei ye wane, "Unai yogu hineli ede teina: Dagela tamowaidiyao se nuwabui Yaubada unai, tabu ta henuwapilipilidi Mose yona laugagayo maudoina unai. ²⁰ Na taba ta kulikulilau udiyedi bena laugagayo hisahisadi mo se lauwatanidi, meta tabu koitau kaitalasamdi kaidiyo se kaikaidi, ganaganawali* tabu se miyamiyedi, ena suisui gadona se sipwakiki na ye mwaloi meta tabu se kaikai, yo suisui kwasinadiyao tabu se numanumadi. ²¹ Ye namwa mo laugagayo ta se lauwatanidi, matauwuwuna ede huya bagubagunana unai ye laoma yoda huya ta unai Sabati kesega kesega Mose yona laugagayo se hasihasili yo se lauguguyaei magai maudoidi yodi sunago udiyedi."

Dubu babadadiyao wasa se kulilaei Antiyoka

²² Kabo apostolo yo tamowai lakilakidiyao maiyadiyao dubu maudoina wa se hineli bena se bom yodi tamowai hekadi se kaisunuwaidi na se hetamalidi maiyadi Paulo yo Banaba se lau Antiyoka. Tamowai labui se kaisunuwaidi ede Yudas (hesana hesau ede Basabasi) yo Sailasi, siya meta tauwoyawoya taukawamamohoi luwadiyena. ²³ Na leta se kuli na se mosei udiyedi, se wane,

"Kai kami kahao apostolo yo tamowai lakilakidiyao yomiu ka kulikuli.

Yoma lautoki ka leyawa dagela tamowaidi tausunuma Antiyoka, Siliya yo Silisiya udiyedi taumiya kalimiyena.

²⁴ Ka lapui meta tamowai hekadiyo kalimaiyena se laowa na yodi hedehedede wa unai nuwamu se hephilipilidi. Tamowai ta kai nige ka hetamalidiwa, na se bom yodi nuwatuyena se laowa. ²⁵ Unai maudoimai yoma talam ka ginauli

15:20 Ganawali: Hedehedede ta meta laulau labui ye sumagogoidi: Ena maitawasola ye lau nige mwanena unai, yo ena hewali yo hasala nige tawatasoladi se kenokesega. Hedehedemasalahana buka ta gehena ne unai ku hasili.

na tamowai hekadiyo ka kaisunuwaidi na ka hetamalidiwa yoma gadosisi tamowaidiyao Banaba yo Paulo maiyadiyo. ²⁶ Taudi labui ta yodi mauli se talamgabaei yoda Guiyau Yesu Keliso yona paisowa debanaena. ²⁷ Yoma kaisunuwa tamowaidiyao ede Yudasi yo Sailasi. Ka hetamalidiwa kabo kawadiyena wasa ka kulikuli ta hedehededeni yomiu se hedehedede. ²⁸ Yaluwa Tabuna yona nuwatu yo kai yoma nuwatu meta tabu polohe hagahagadi ka hebahebaheigomiu, na ye namwa mo taba laugagayo lakilakidiyo kwa miyawatanidi: ²⁹ Tabu koitau kaitalasamdi kaidiyao kwa kaikaidi; tabu suisui kwasinadiyao kwa numanumadi; tabu suisui gadona se sipwakiki na ye mwaloi kwa kaikai; yo tabu kwa ganaganawali.* Taba laugagayo ta kwa miyawatanidi meta ye namwa.

Kaiyoni."

³⁰ Na se dahalai se dobi Antiyoka, na kabo ekalesiya bodadi se yogagogoidima na leta wa se moselaei udiyedi. ³¹ Ekalesiya bodana leta wa se hasili na ye henuwabayaodi, ede se gwauyalakalili. ³² Yudasi yo Sailasi siya meta hinage peloweta. Yodi hedehaisagusagu maudoidi udiyedi ekalesiya bodana wa se hebayaodi.

³³⁻³⁴ Mayadai hisa se lau, na kabo taukawamamohoi wa Yudasi yo Sailasi se lautokiyeidi na se hetamalidi ma nuwadaumwalidi na se uyo tauhetamalidima wa udiyedi.* ³⁵ Na Paulo yo Banaba Antiyoka unai se miyamiya na siya maiyadiyo tamowai hekadi Guiyau wasana se lauhekataei yo se laulauguguyaesi.

Paulo yo Banaba se hebodalabuiyei

³⁶ Yodi bawa Antiyoka unai wa mayadai hisa se lau na kabo Paulo ye hededelau Banaba unai ye wane, "Taba yoda kadautakikili helabuina ta ginauli. Ta uyo lahinaidi Guiyau wasana yoda kabalauguguyaena magaidiyao wa udiyedi, na kada kahao wa ta kitadi."

³⁷ Banaba ye talam na ye henuwa bena Yowane maiyadi, hesana hesau ede Maleko. ³⁸ Na Paulo ye nuwatui nige ye namwa taba iya maiyadi, matauwuna lahinaidi Pampiliya unai nige ye saguidi, yodi paisowa wa sola ye laulau na ye laugabaedi. ³⁹ Se haikawayagalakalili ede se hebodalabuiyei. Banaba Maleko ye hai, ede maidana se gelu se lau Saipulusi, ⁴⁰ na Paulo yona kaisunuwa tamowaina ede Sailasi. Antiyoka unai taukawamamohoi wa Paulo yo Sailasi yodi se tapwalolo bena Guiyau ye kitahetetedi, na

kabo se dahalai ⁴¹ se lau Siliya yo Silisiya magaidiyao udiyedi ekalesiya bodadiyao wa se hededehebayaodi.

Timoti ye hetubu ye paisowa Paulo yo Sailasi maidanao

16 Se lau Debi, na kabo se lage Listila. Temenai Yesu tauhemuliwatanina hesau hesana Timoti. Iya sinana meta Dius sinena yo Yesu taukawamamohoiyena hesau, na tamana meta Giliki tamowaina. ² Taukawamamohoi hekadi Listila yo Ikoniya udiyedi Timoti se kawanamwanamwaei. ³ Paulo ye henuwa Timoti bena maiyadi se lau se kadau, ede Timoti ye hepelitome, matauwuna Dius tamowaidiyao tenem teha ne unai taumiya Timoti tamana kabina se kata iya meta Giliki tamowaina na natuna wa huyana ma gagilina nige ye hepelitome.*

⁴ Se dahalai se lau magai lakilakidiyo maudoidi wa udiyedi, na apostolo yo dubu babadadiyao Yelusalema unai yodi hineli leta unai se kuli wa se hededegabaedi taukawamamohoi wa udiyedi bena se kawakabiyedi. ⁵ Unai ekalesiya tamowaidiyao wa yodi sunuma unai se bayao, yo mayadai badobado kadi boda wa ye laki ye lau.

Yaubada Paulo ye yoganei bena se lau Masedoniya

⁶ Paulo ma kana kahao se kadau se lau Pilidiya yo Galatiya magaidiyao udiyedi, matauwuna Yaluwa Tabuna ye hekatadi taba nige se lau se wasaduwai Eisiya unai. ⁷ Se lage teha Misiya unai na se henuwa bena se sae teha Bitiniya, na Yesu Yaluwana ye hekatadi tabu se sae temenai. ⁸ Unai se uyo Misiya na se lau se dobi Tolowasi magaina.* ⁹ Yodi huyalage Tolowasi unai boniyaina ne unai Paulo yona nuwanuwatu unai Yaubada tautau hesau ye hemasalahua unai meta Masedoniya tamowaina hesau ye kita ye totolo na ye hededelau Paulo unai ye kaibwada ye wane, "Ku laoma Masedoniya na ku saguigai." ¹⁰ Unai ka* nuwatulobai meta Yaubada ye yoganegai bena ka lau Masedoniya Yesu wasana namwanamwana ka wasaduwaiyei udiyedi. Ede ka kabinonohai na bena ka gelu.

Pilipi unai Lidiya ye nuwabui

¹¹ Tolowasi unai ka gelu na ka dudulai ka lau Samoteles. Na mayadai helabuina unai kabo ka lage Niyapolis. ¹² Temenai waga wa ka pesagabaei na ka yona ka lau Pilipi. Pilipi meta magai lakilakina Loma tamowaidiyao se hetubu, yo Loma yodi kabatanuwaga magaina Masedoniya tehana ne unai.

Temenai ka miya mayadai hisa, ¹³ na Sabatiyena magai wa ka pesagabaei ka lau sagasaga

15:29 Ganawali hededehemasalahana kabo lausoisoi 20 hededehemasalahana unai ku hasili.

15:33-34 Kulikuli beyabeyadi hisahisadi mo lausoisoi 34 hinage se kuli: *Na Sailasi yona nuwatu ye ginauli bena ye babawa Antiyoka unai.*

16:3 Dius tamowaidi Timoti se kitalobai meta iya Dius tamowaina hesau, sinana debanaena. Dius yodi hali Dius nige se pelitome meta se kitadobidoibeidi yo nige se lapulau udiyedi. Na Paulo yona laulau meta magai maudoidi udiyedi kabo se bagunalau Dius yodi sunago udiyedi se lauguguya. Unai Timoti ye hepelitome.

16:8 Tolowasi meta magai lakilakina gabwa dedekanaena, teha Misiya unai.

16:10 Buka te taukulina Luka *ka* ye kuli meta ta nuwatulobai Tolowasi unai Luka Paulo ye hailobai na maiyana se kadau se lau Pilipi.

dedekanaena. Yoma nuwatu meta tenem teha ne unai kabo Dius tamowaidiyao yodi kabatapwatapwalolo. Ka lobai ede ka tulidobi na ka hetubu ka hedehedelau sinesineo hekadi se lagegogoima wa udiyedi.

¹⁴ Taulapulapui wa hesau hesana ede Lidiya, iya meta Taiyatila waihiuna. Kana paisowa ede kaleko namwanamwadi taulokulokunedi. Lidiya meta Yaubada taukaihelahuina,* na Yaubada iya nuwana ye hemasalah, ede ye lapulapuinamwanamwa yo ye kawamamohoi Paulo yona lauguguya wa unai. ¹⁵ Iya ma kana bodoa ka hebabatisoidi, na kabo ye kaibwadaigai bena ka lau yona numa, ye wane, "Ena kwa kawamamohoiyegau yau Guiyau tausunumaena, kabo kwa laoma yogu numa unai kwa miya." Ye kaibwadaigai ede ka lau yona numa wa unai ka miya.

Paulo yo Sailasi numatutugudu unai

¹⁶ Mayadai hesau ka laulau kabatapwalolo magaina wa unai na heyayai tauhaina waihiuna hesau ye lobaigai. Yaluwa yababana waihiu ne unai ye luwu na ye hesonoga, na kana paisowa ede saha sola nige se tubu meta ye hedehedehedehemasalahadi. Na paisowa ne unai kana tanuwagao yodi moni lakilakina ye ginauli. ¹⁷ Waihiu wa ye hemuhemuliwatanigai na ye heyoheyoga ma kalina lakilakina ye wane, "Teina tamowai ta Yaubada saesaekalilina yona taupaisowa. Siya kabo se hedehedelawa kalimiuyena idohagi na kabo mauli kwa lobai." ¹⁸ Mayadai maudoina waihiu wa yona hedehedede kesekesegana. Unai Paulo ye tausi'ololo yo ye kouyalayalakalili, ede ye hedelau yaluwa yabababana wa unai ye wane, "Yesu Keliso hesanaena ya hedehelawa, waihiu ta ku pesagabaei." Mahanana ne unai yaluwa yabababana waihiu wa ye laugabaei.

¹⁹ Waihiu wa kana tanuwagao wa se nuwatulobai meta yodi gogo kabahaidi kamwasana se heyababa, unai Paulo yo Sailasi se haidi se laedi kabalokulokune unai, gabemani tamowaidiyao udiyedi bena se helauhetaladi. ²⁰ Na kabo se hedelau tautolehedudulai tamowaidiyao udiyedi se wane, "Teina Dius tamowaidiyao ta debadiyena yoda magai ta tamowaidiyao maudoidi se hetalagegagega! ²¹ Siya laulau se lauhekataedi ta meta kita Loma tamowaidiyao yoda laugagayo unai nige gonowana ta kawanamwanamwaedi yo ta ginaulidi!"

²² Bodalakilaki waihiu kana tanuwagao wa se saguidi na Paulo yo Sailasi se hegiludi, unai tautolehedudulai tamowaidiyao se hedede kadi luwuluwu se haigabaisinasinakalaedi na se sapidi. ²³ Se sapidi ye gehe kabo se laedi numatutugudu unai se toledi na se hedelau numatutugudu wa taukitahetetena unai bena ye kitahetetenamwanamwaedi na tabu se wasawasabu. ²⁴ Ede Paulo yo Sailasi ye haidi

numatutugudu luwamolosina unai ye toledi na kaedi se senihekahinilaedi kaiwa tehadiyao polopolohedi udiyedi.

²⁵ Boniyai duwaduwalina unai se tapwalolo yo se wanawana yo Yaubada se hedehedebasae, na numatutugudu wa unai kadi kahao wa meta se lapulapui. ²⁶ Mahanana ne unai mwanikuniku lakilakina, na numatutugudu wa yona kabatolo ye nukunuku. Makesega keda gududi maudoidi se tasoke na numa wa unai tamowai maudoidi kaedi yo nimadi senidiyao se bekuhai. ²⁷ Numatutugudu taukitahetetena wa ye kenosiliyatama na ye kitadobi meta keda gududiyao wa se tasokeko, ede ye siliyatakalili na yona nuwatu meta Paulo ma kana kahao wa se wasabuko. Unai yona kelepa ye hai bena ye bom ye unuhemwalo'iuyo! ²⁸ Na Paulo ye yogalau iya unai ye wane, "Tabu ku unu'unuhemwalo'iuyoigo! Kai maudoimai ede teinai!" ²⁹ Ede numatutugudu taukitahetetena wa ye yoga ede osili se baheiyma na ye dobi, na ma matausina ye tulibono Paulo yo Sailasi talanuwadi wa unai. ³⁰ Na kabo ye woyahepesadi na ye henamaiyedi ye wane, "Tautaubadao, taba saha ya ginauli kabo ya mauli?" ³¹ Se hedelau iya unai se wane, "Guiyau Yesu ku kawamamohoiyei yo ku sunumaei na kabo ku mauli, kowa yo yom numa tamowaidiyao maudoidi hinage." ³² Na kabo Paulo yo Sailasi Guiyau wasana se hedehedehemasalahadi iya yo yona numa tamowaidiyao wa udiyedi. ³³ Boniyaina ne unai ye haidi ye laedi, taudi gaidiyao wa ye deulidi, na kabo Paulo yo Sailasi numatutugudu taukitahetetena wa yo yona numa tamowaidiyao maudoidi se hebabatisoidi. ³⁴ Kabo Paulo yo Sailasi ye woyalaedi yona numa unai na kai ye moseidi se kai. Iya yo yona numa tamowaidiyao maudoidi wa se gwauyalakalili, matawuwuna se nuwabui yo Yaubada se kawamamohoiyei.

³⁵ Mala ye tom kabo tautolehedudulai tamowaidiyao wa yodi taupaisowa se hetamalidi se lau numatutugudu taukitahetetena wa unai se hedelau kabo Paulo yo Sailasi ye hepesadi.

³⁶ Numatutugudu taukitahetetena wa Paulo yona ye hedehedede ye wane, "Tautolehedudulai tamowaidiyao wa se hedede meta kabo ya yailigabaegomiu. Unai kabo kwa pesa na daumwaliyena kwa lau." ³⁷ Na Paulo ye hedelau tautolehedudulai yodi taupaisowa wa udiyedi ye wane, "Kai meta Loma yodi laugagayo logulogunaena taumiya. Unai nige gonowana se sapigai boda matadiyena yo se tolegai numatutugudu unai, na nige kama mata hesau se lobai. Na bena wadawadamayena se hetamaligai ka lau. Taba nige! Siya taba se laoma na se woyahepesagai!"

³⁸ Tautolehedudulai tamowaidiyao yodi taupaisowa wa se uyoma se hedelau udiyedi meta Paulo yo

16:14 Yaubada taukaihelahuina kaniyona ede iya dagela sinena, na ye nuwabuiko Yaubada ye kaihelahui gonogonowana doha Dius tamowaidiyao.

Sailasi Loma yodi laugagayo logologunaena taumiya. Hedechedede wa se lapui meta se siliyatakalili.³⁹ Unai se laoma Paulo yo Sailasi udiyedi yodi hededehehudulai se ginauli ye gehe kabo se woyahepesadi se laedi na se hededebigabigalau udiyedi taba magai ne se laugabaei.⁴⁰ Na Paulo yo Sailasi se lau Lidiya yona numa unai na taukawamamohoi hekadi wa se kitadi ede se hededehebayao'uyoidi, na kabo se dahalai se lau.

Paulo yo Sailasi Tesalonika unai

17 Se dahalai ede se lau Ampipolisi. Na mala ye tom kabo se lau Apoloniya se laugabae, na kabo se lau Tesalonika unai se lage. Temenai meta Dius yodi sunago hesau.² Paulo yona miyamiya unai mayadai Sabati haiyona udiyedi ye lau sunago wa unai ye mwalaе, na Dius tamowaidiyao maidanao kulikuli tabudi kaniyodi wa se hedehededeidi.³ Ye hededehemasalah meta Yaubada yona hineli unai Keliso ye kamkamna yo ye tolo'uyo, yo ye wane, "Yesu ya hetahetala'usei ta, iya ede Keliso."⁴ Dius tamowaidi hekadi nuwadiyao se haldi, yo Giliki tamowaidiyao siya Yaubada taukaihelahuina yo sinesinebadao lakilakidi gwaudi hinage se patulau Paulo yo Sailasi udiyedi.

⁵ Na Dius tamowaidiyao wa Paulo yo Sailasi se kaikalomagigiliyedi. Unai taulaulaugaibu yo tauwalobabayao hekadi se yogagogoidima, na se kabiboda yo magai tamowaidiyao maudoidi se hekoipilidi. Kabo se lau Yasona yona numa unai Paulo yo Sailasi se wasenedi bena se woyaidima boda wa udiyedi.⁶ Na nige se lobaidi ede Yasona yo taukawamamohoi tamowaidiyao hekadi se tabekokokokolidi se laedi magai wa taukitahetetena lakilakidiyao udiyedi, na se heyoheyoga se wane, "Paulo yo Sailasi tanoubu maudoina tamowaidiyao se hekouyalayaladiko yo hinage se laomako inai,⁷ na Yasona iya tauhemiyadi ede. Teina maudoidi ta siya Sisa yona laugagayo tau'utusina matauwuwuna se wane tamowai hesau meta iya wasawasa, hesana ede Yesu."⁸ Hedechedede wa se lapui ede boda wa yo magai taukitahetetena tamowaidiyao wa meta se kouyalayalakalili⁹ na se hedede Yasona ma kana kahao wa moni lakilakina se tole kabahematausidi,* na kabo se kabigabaedi se lau.

Paulo yo Sailasi Beleya unai

¹⁰ Boniyaina ne unai taukawamamohoi wa Paulo yo Sailasi se hetamalidi se lau Beleya. Se lage menai kabo se lau Dius yodi sunago unai se lauguguya.¹¹ Na Dius tamowaidiyao Beleya unai taumiya wa meta se lapulapuwanamwakanwakanlili Paulo yo Sailasi udiyedi, na kabo siya Tesalonika unai taumiya wa. Mayadai maudoina unai kulikuli tabudiyao se kitahekasadi, Paulo yo Sailasi saha se lauguguya ei wa meta mamohoi o nige.¹² Na se lobai meta yodi lauguguya wa mamohoina, unai Dius tamowaidiyao gwaudi Yesu se kawamamohoiyei, yo Giliki tamowaidiyao sinesineo hekahekasisidi yo hinage Giliki tatao hekadi.

¹³ Na Dius Tesalonika unai taumiya wa wasa se lapui meta Paulo ede Beleya unai Yaubada wasana ye laulauguguya ei. Unai kabo se laoma boda maudoidi wa se henuwasaedi bena Paulo se hewaiunu.¹⁴ Unai taukawamamohoi tamowaidiyao wa kadi kahao hekadiyo maiyadi Paulo se hetamalidi se dobi gabwa. Na Sailasi yo Timoti meta Beleya unai se miyamiya.

¹⁵ Na taudobi wa se lulage se dobi na waga hesau unai se gelu se lau Ateni. Ateni unai se lage kabo Paulo ye hedelalau maidanao taulau wa udiyedi bena taba se uyo na Sailasi yo Timoti se hetamalimwamwayauyedi se laoma iya unai.

Paulo Ateni unai

¹⁶ Paulo Ateni unai kana kahao wa ye nayanayaidi, na ye kita meta magai wa unai koitau ye badokalili, ede ye nuwayababakalili.¹⁷ Unai ye lau Dius yodi sunago unai ye hedehedelau Dius yo dagela tamowaidiyao Yaubada taukaihelauina udiyedi; yo hinage mayadai maudoina ye lau kabalokulokune unai na ye hedehedelau tautupagogo wa udiyedi,¹⁸ meta Yesu yo yona tolo'uyo wasana namwanamwana ye wasaduwaiyei. Unai tausonoga tamowaidiyao Paulo maiyanao se hedehedede yo yodi kawamamohoi wa se hetala. Tausonoga wa meta boda labui tamowaidiyao. Hekadi ede Epikulasi kana bodao, yo hekadi Sitoiko bodadiyao.* Hekadi se wane, "Teina tauhedededegaibu ta saha bena ye lauhekataei?" Na hekadi se wane, "Teina kana kao doha magai hekadi yaubadadiyao* lauhekatadi unai bena ye hekatada."¹⁹ Ede Paulo se hai se laei Aliyopagasi* unai na se hedelalau unai se wane, "Taba gonowana yom lauhekata hauhauna wa ku hedehedehemasalah kalimaiyena.²⁰ Matauwuwuna yom hedehedede hauaudi te ka lapuidi, unai ka henuwa bena kaniyodi

17:9 Moni lakilakina wa meta kabahemahematausi. Ena Yasona ma kana kahao pilipili hesau se ginauli, kabo gabemani moni wa se kabihekahini, na ena daumwaliyena se miyamiya, kabo moni ne se hai'uyoi.

17:18 Epikulasi ma kana bodao se hedede meta tanoubu ta ye bom ye tubu, nige tauginaulina. Yo hinage se wane, taba tamowai hesau ye boita, kabo yaluwana hinage ye boita. Unai tamowai yona mauli namwanamwana ede huya maudoina se bom yodi gadosisi mo se laulauwatanidi yo ye gwaugwauyala mo. Sitoiko bodadiyao hinage se hedede meta tamowai yona huyaboita unai yaluwana hinage ye boita. Na iyamo se hedede meta tamowai bena yona nuwatu mo ye lauwatan, na tauna yona kamkamna yo yona namwa taba nige ye modei. Kaniyona ede tamowai nuwana bena iya tauna ye tanuwagadi.

17:18 Yodi nuwatu meta *Tolo'uyo* hinage yaubada hesau hesana.

17:19 Aliyopagasi kaniyona ede *Alesi yona kuduli*. Alesi meta Giliki yodi yaubada hesau, iyala yo tulutululu tanuwagadi. Kuduli wa unai meta tausonoga tamowaidiyao Ateni unai taumiya wa yodi kabakoikoigogo numana. Na yodi koigogo hinage hesana se katai Aliyopagasi.

kabidi ka kata.”²¹ Ateni tamowaidiyao maudoidi yo magai hekadi tamowaidiyao menai taumiya mayadai maudoina kadi paisowa ede hedehedede hauhaudi se lapulapuidi yo udiyedi se hedehedede.

²² Na Paulo ye tolo yodi koigogo wa unai na ye hedelalau udiyedi ye wane, “Ateni tataodiyao! Ya kita meta yomi taba’ohu unai kwa taubigakalili.²³ Yugu taihile unai yomi kabataba’ohu ginaulidi ya kaikewaidi na kabakaitalasam hesau ya kita unai teina kulikuli ta ye masalah:**YE LAU YAUBADA NIGE KABINA KA KATA UNAI.**

KATA UNAI. Na saha kwa taba’ohui ta nige kabina kwa kata unai kabo ya hedehedemasalah kalimiuyena.

²⁴ Yaubada kaiyaulina yo ginauli maudoidi tauginaulidi, iya galewa yo tanoubu Guiyauna. Unai numa tamowai nimadiyena se ginaulidi iya nige udiyedi ye miyamiya.²⁵ Yo tamowai nige gonowana iya se sagui matauwuuna iya nige ginauli hesau unai ye deha, na iya tamowai maudoidi yodi mauli yo yawasidi yo ginauli maudoidi ye moseidi.²⁶ Tamowai kesega ye ginaulibagunai, na unai boda udoi’udoi ye ginaulidi, na siya bena tanoubu maudoina se miyahemwayau. Na yodi huya yo yodi teha ye hinelidi udiyedi bena se miya.²⁷ Yaubada ginauli maudoidi ta ye ginaulidi na ye henuwa tamowai bena iya se wasenei na yodi kaikaipate unai bena iya se lobai, matauwuuna iya maudoida dedekadaena.²⁸ Doha hinage yomi taukulikuli hekadiyo se hedede se wane, ‘Iya unai ta miya yo ta sae ta dobi yo ta maumauli.’ Yo hinage se wane, ‘Kita iya natunao.’²⁹ Mamohoi, kita Yaubada natunao. Unai taba nige ta nuwatui meta Yaubada kana kao doha koitau tamowai yodi sonogaena se ginauli gole o siluba o weku unai.

³⁰ Beyabeyana tamowai wa Yaubada nige kabina se kata na iyamo yodi nuwapwanopwano wa unai Yaubada nige saha hesau ye ginauli. Na teina huya ta unai ye hedelalau teha maudoidi tamowaidiyao maudoidi udiyedi bena se nuwabui.³¹ Matauwuuna mayadai ye toleyako unai kabo yona kaisunuwa tamowaina tanoubu maudoina ye hinelidi, na yona hineli ne kabo dudulai unai. Teina ye hemamohoiyei tamowai maudoidi udiyedi matauwuuna Yesu boita unai ye hetolo’uyo!

³² Tauboiboita yodi tolo’uyo hedehededenwa se lapui ede hekadiyo Paulo se talatalawasiyei, na hekadiyo se wane, “Ka henuwa bena huya hesau hedehedede ta ku hedede’uyo ka lapui.”³³ Na teina unai kabo Paulo koigogo wa ye laugabaei.³⁴ Na tamowai hekadi se patulau Paulo unai na Yesu se kawamamohoiyei. Kadi boda wa unai Daiyanisiysi, iya meta Aliyopagasi unai taukoikoigogo wa tamowaina hesau, yo hinage waihiu hesau hesana Damalisi, yo hinage tamowai hekadi.

Paulo Kolinito unai

18 Na kabo Paulo Ateni ye laugabaei na ye lau Kolinito. ² Temenai Dius tamowaina hesau hesana Akuila. Iya Pontasi tamowaina, na beyabeyana ye lau Italiya magaina lakilakina Loma unai ye miya. Na Loma kadi tanuwaga saesaena sisa Kolodiyasi ye hedede meta Dius tamowaidiyao maudoidi Loma se dahalaegabaei. Unai Akuila ma mwanena Pilisila se lau Kolinito unai se miya. Nige bayaona na Paulo ye lage, na yona taihile unai ye lobaidi.³ Akuila ma mwanena kadi paisowa ede tenti* se laulauginauli, na Paulo hinage paisowa wa kabina ye kata. Unai maiyanao se miya na se paisowagogoi.⁴ Na Sabati maudoina Paulo ye lau Dius yodi sunago unai, na Dius yo Giliki tamowaidiyao maiyanao se hedehedede, na Paulo ye kaipate bena Yesu kabina se kata yo se sunumaei.

⁵ Na huyana Sailasi yo Timoti Masedoniya unai se laoma, kabo Paulo tentiginauli paisowana wa ye hekaiyawasi na huya maudoina ye laulauguguya. Dius tamowaidiyao udiyedi ye hedehedemasalah meta Yesu iya Keliso ede.⁶ Ye lau ee Dius tamowaidiyao wa Paulo se hewaiunu yo se kawalupolupoi, kabo kana kaleko ye koinihinihiyeidi, na ye hedelalau udiyedi ye wane, “Kwasinamu giluna komiu kwa bom kalimiuyena! Yau nige kagu gilu hesau. Unai kabo ya laugabaegomiu na ya lau dagela tamowaidiyao udiyedi ya lauguguya.”⁷ Na kabo Paulo sunago wa unai ye pesa na ye lau Titiyas Diyasitasi yona numa unai ye lauguguya. Iya meta Yaubada taukaihelahuina hesau, na yona numa wa meta Dius yodi sunago dedekanaena.⁸ Na Dius yodi sunago tanuwagana hesana Kilipasi ma kana bodoa maudoidi se kawamamohoi Guiyau unai. Yo hinage Kolinito tamowaidiyao gwaudi Yesu wasana se lapui yo se kawamamohoiyei, ede Paulo ma kana kahao tamowai wa se hebabatisoidi.

⁹ Boniyai hesau unai Paulo yona nuwanuwatu unai Yaubada tautau hesau ye hemasalah unai, meta Guiyau ye hedelalau iya unai ye wane, “Tabu ku matausi, na yom lauguguya ne bena ye laulau! Tabu ku mwanomwanou,¹⁰ matauwuuna yau ede maidam. Nige gonowana tamowai hesau ye hewaiunugo yo ye hekamkamnago. Kana kao ede magai ta unai yogu tamowai se bado.”¹¹ Na bolimai kesega yo tehana Paulo Kolinito unai ye miya, na huya maudoina Yaubada yona hedehedede unai tamowai wa ye hekatadi.

¹² Huyana wa unai Galiyo yona huyatanuwaga Akaiya* unai. Na Dius tamowaidiyao se hebodakesega na Paulo se hewaiunu, na se hai se laei Galiyo yona kabahelahelauhetala unai.¹³ Na se hegilu se wane, “Teina tamowai ta boda ye hekatadi

18:3 Tenti meta tautaitaihile yodi numa, kaleko yo suisui dahidi udiyedi se bodidi. Kaikaiwa se hetolodi na tenti se tolesini kewadi unai, na mainaena se momosihkahinidi.

18:12 Akaiya meta basileiya tehana hesana, na Kolinito ede Akaiya magaina lakilakina hesau.

Yaubada taba'ohuina kabikabina hauhauna unai, meta laugagayo ye utusi."

¹⁴ Paulo bena kabo ye hedehedede, na Galiyo ye hedelau Dius tamowaidiyao wa udiyedi ye wane, "Dius tamowaidiyao! Taba tamowai ta laulau yababana o yababa lakilakina hesau ye ginauli, kabo gonowana ya lapulau yomi hetalapili ta unai." ¹⁵ Na iyamo hedehedede kaniyodi yo tamowai hesadiyao yo yomi laugagayo debadiyena kwa haikawayagala ta, unai komiu kwa bom kwa tolehedudulai'uyoigomiu. Yau taba nige nuwatu ta ya tolehedudulaidi." ¹⁶ Kabo ye hedede kabalauhetala numana wa unai se hepesadi.

¹⁷ Na kabo boda maudoidi Dius yodi sunago tanuwagana Sostenisi se hai na se bibigwadagwadai kabalauhetala numana kawamatana wa unai. Na Galiyo nige ye modelau udiyedi.

Paulo ye uyo Antiyoka na kabo yona kadau hehaiyonana ye hetubu

¹⁸ Na Paulo sola ye miyamiya Kolinito unai huyalohaloha. Na kabo kana kahao wa ye laugabaedi na Pilisila yo Akuila maiyanao se dobi Senkiliya. Temenai Paulo yona hedehedede kaigwala ye ginauliyako wa debanaena ede iya kuluna wa se yaligabae.* Na kabo se gelu bena se lau Siliya. ¹⁹ Yodi kadau wa unai Epeso unai se duna, ede Pilisila yo Akuila temenai se miya. Na Paulo meta mayadai hisa mo menai ye miya.

Yona miya wa unai Paulo ye lau sunago unai na Dius tamowaidiyao maiyanao se hedehedede. ²⁰ Na se kaibwada bena maiyadi se babawa, na nige ye henuwa. ²¹ Na yona huyagelu mayadaina unai ye hedelau udiyedi ye wane, "Ena Yaubada yona nuwatuyena, kabo ya uyoma." Na kabo wagaena ye gelu na Epeso ye laugabaei.

²² Se kadau se lau ee Sisaliya unai se duna. Na Paulo ye pesa ye sae Yelusalema unai ekalesiya bodadi ye hailobaidi. Na kabo ye dobi Antiyoka.

²³ Antiyoka unai mayadai hisa ye miya, na kabo ye dahalai'uyo ye lau Galatiya yo Pilidiya magaidiyao ye kaitaumanaidi na Yesu tauhemuliwatanina maudoidi wa ye hededehebayaodi.

Pilisila yo Akuila Apolosa se hekatanamwanamwae
²⁴ Huyana Paulo sola ma kadauna, na Alesandiliya tamowaina hesau hesana Apolosa ye laoma Epeso. Iya Dius tamowaina tausonoga hesau, na kulikuli tabudi kabidi ye katakalili, ²⁵ yo Guiyau wasana hinage kabina ye kata. Ye hedehedede ma nuwakohihaina yo Yesu wasana ye lauhekatanamwanamwaei. Na iyamo

Yowane yona hebahebabatiso mo kabina ye kata, na babatiso Yesu hesanaena nigele. ²⁶ Iya ye hetubu ye hedehedede ma nuwabayaona sunago unai. Na Pilisila yo Akuila yona hedehedede wa se lapui ede se kaibwadai ye lau yodi numa unai, na Yesu wasana unai se hededehasahasai na se hekatanamwanamwaei idohagi Yaubada tamowai ye hemaulidi.*

²⁷ Huya hesau kabo Apolosa ye henuwa bena ye lau Akaiya, tausunuma bena ye saguidi. Ede tausunuma Epeso unai iya se hededehebayao na leta se kuli ye lau tauhemuliwatanai Akaiya unai taumiya wa udiyedi, bena iya se hailobai. Ye lage ede taukawamamohoi ye sagukaliliyedi. ²⁸ Meta tamowai maudoidi matadiyena ye hededehebayaokalili Dius tamowaidiyao udiyedi na kulikuli tabudi udiyedi ye hemamohoeyei meta Yesu iya Keliso ede.

Paulo Epeso unai

19 Huyana Apolosa Kolinito unai ye babawa, kabo Paulo Pilidiya ye laugabaei na ye dobi Epeso unai ye lage. Temenai tauhemuliwatanai hekadi ye lobaidi ² na ye henamaiyedi ye wane, "Huyana kwa kawamamohoi, Yaluwa Tabuna kwa hai, o nige?" Na se wane, "Nige! Yaluwa Tabuna nige kabina ka kata, yo sola nige wasana ka lapui." ³ Unai Paulo ye wane, "Na babatiso sahasahana unai se hebabatisoigomiu?" Se wane, "Yowane yona hebahebabatiso." ⁴ Na Paulo ye wane, "Yowane yona hebahebabatiso meta nuwabui babatisona. Iya ye hedelau boda wa udiyedi meta tamowai hesau kabo ye mulitama, bena iya unai se kawamamohoi. Tamowaina ede Yesu."

⁵ Hedehedede wa se lapui ede Paulo ye hebabatisoidi Guiyau Yesu hesanaena. ⁶ Na huyana Paulo nimana wa ye tolesae kuludi wa udiyedi meta Yaluwa Tabuna ye hemwayaudi, na kalina udoi'udoi udiyedi se hedehedede,* yo hinage Yaubada yona nuwatu ye mosedi na se hededehemasalahadi.* ⁷ Na taubabatiso wa nuwana badodi ede saudoudoi-labui.

⁸ Nawalai haiyona Paulo ye laulau sunago unai na ma nuwabayaona ye laulauguguya. Na maiyanao se hedehedede yo Yaubada yona basileiya se hetahetala, na ye kaipate bena se nuwabui na Yesu se kawamamohoeyei. ⁹ Na hekadiyo se nuwakwailolokalili, na nige se henuwa bena se kawamamohoeyei, na boda matadiyena Guiyau wasana se hededeheyababaei. Unai Paulo sunago wa ye laugabaei, na tauhemuliwatanai maidanao se lau Tailenasi yona kabalauhekata numana unai se koikoigogoi. Na mayadai badobado taulaoma

18:18 Hedehedede kaigwala Paulo ye ginauli wa meta nige kabina ta kata kauyana yo matauwuna saha to ye ginauli. Paulo yona huyaena, taba tamowai hesau ye kaibotia na Yaubada ye sagui yo ye gilihai, kabo tamowai wa ye kaigwala, meta ye hineli kabo huyakubwakubu o huyalohaloha ye mose'uyoi Yaubada unai. Huya wa kana siga ye gehe, kabo kuluna ye yaligabae. Apostolo 21:23 unai hinage hededehemasalahai hesau.

18:26 Kalina Giliki unai Luka ye kuli meta keda ye lau Yaubada unai se hekata.

19:6 Kalina udoi'udoi meta hinage gonowana ta bui ta wane kalina Yaluwa Tabuna ye moseidi.

19:6 Iya ede se hededepeeloweta.

maiyanao se hedehedede. ¹⁰ Teina paisowa te ye lau ee bolimai labui. Na Dius yo Giliki tamowaidi maudoidi teha Eisiya unai taumiya Guiyau wasana se lapui.

Siba natunao Yesu hesana se hepaisowagaibui

¹¹ Yaubada Paulo ye hepaisowa na laulau gigigibwalikalilidi ye ginaulidi, ¹² ede hinage Paulo yona hagesi yo kaleko hekadi ye hepaisowadiko wa se haidi se laedi taukasikasiyebwa udiyedi se hesaudi, ede se namwanamwa, yo hinage yaluwa yababayababadi tamowai se pesagabaedi.

¹³ Dius tamowaidiyao hekadi kadi paisowa se lau magai hekadi udiyedi yaluwa yababayababadi tamowai se luwuidi wa se hededehepesadi, na se kaipate bena Guiyau Yesu hesana se hepaisowa, na se wane, “Paulo Yesu ye lauguguyaei wa, iya hesanaena ya hededelaowa: Tamowai ta ku pesagabaei!”

¹⁴ Boda wa luwadiyena meta Siba natunao tatao haligigi-labui. Tamadi meta Dius yodi taukitalasam tauwoyaidi hesau. Taudi haligigi-labui ta tenem kabikabi ne se hepahepaisowa. ¹⁵ Na huya hesau yaluwa yababayabana ye hededelau udiyedi ye wane, “Yesu kabina ya kata, yo hinage Paulo kabina ya kata, na komiu meta kaiteyadi?” ¹⁶ Na tamowai wa ye tolo ede Siba natunao haligigi-labui wa ye luluidi na yodi bayao ye saedikwaidi yo ye bibiheyababakaliliyedi, na numa wa unai se heloipesa ma kadi gai yo ma taugaibudi. ¹⁷ Na wasa wa ye lau Dius yo Giliki tamowaidiyao taumiya Epeso unai na se lapui, meta se matausikalikalili, yo Guiyau Yesu se hededetausaei.

¹⁸ Taunuwbuihauhau wa gwaudi se tolo boda matadiyena na yodi yababa se hededehehemasalahadi. ¹⁹ Na hekadi kukula tauhepahepaisowadi kadi kukula bukadiyao se baheidima na boda wa matadiyena se gabudi. Buka wa maisadiyao se tolegogoidi meta maisadi lakina ede moni siluba 50,000.* ²⁰ Teina doha yo Guiyau yona gigibwali unai iya wasana ye laki ye lau yo ye bayao.

Paulo yona kadau hinelina

²¹ Ginauli saha se tubutubu ta mulidiyena Yaluwa Tabuna Paulo ye hekata bena ye lau Masedoniya yo Akaiya, na kabo ye uyo Yelusalema. Na ye wane, “Yaubada ye henuwa meta kabo hinage ya lau Loma.” ²² Na kabo tausaguina labui Timoti yo Elastasi ye hetamalidi se baguna se lau Masedoniya, na iya sola ye miya huyakubwakubwa teha Eisiya unai.

Epeso unai boda se hetalagegagega

²³ Na huyana ne unai pilipili lakilakina hesau ye tubu Epeso unai Guiyau wasana debanaena. ²⁴ Pilipili wa Dimitiliyasi unai ye tubu. Iya meta siluba paisowana

ye ginaginauli, yo hinage yona taupusapusa tamowaidiyao meta se bado. Epeso unai meta Giliki yodi yaubada Atemisi yona numa tabuna. Na Dimitiliyasi maiyana taupaisowa kadi paisowa ede silubaena numa gagigagilidi se laulauginaulidi kadi kao doha numa tabuna wa, na se lokuneidi, meta unai moni lakilakina se haihai.

²⁵ Dimitiliyasi yona taupaisowa ye yogagogoidima, yo siluba taupaisowaina hekadi hinage, na ye wane, “Tatao, kabina kwa kata meta teina yoda paisowa ta unai moni yo gogo lakilakidi ta haihaidi. ²⁶ Na Paulo kwa kita yo wasana kwa lapuiyako meta ye wane, ‘Tamowai nimadiyena yaubada se ginaulidi meta siya nige yaubada mamohoi.’ Unai bodalakilaki se nuwabui yo Paulo se hemuliwatani, yoda magai ta Epeso unai, yo hinage teha Eisiya maudoina unai.

²⁷ Na yona yababa meta teha haiyona unai: Yoda nimapaipaisowa ta hesana namwanamwana ta kabo ye gehe, yo yoda yaubada saesaena Atemisi yona numa tabuna hekasisina tamowai kalidiyena kabo ye gehe, yo hinage Atemisi teha Eisiya yo tanoubu maudoina se kaihelahui ta yona wasawasa kabo se kitadobidobikaliliyei.”

²⁸ Hedechedede wa se lapui ede se koipilikalili na ma kalina lakilakidi se heyoheyoga se wane, “Kita Epeso yoda yaubada Atemisi meta ye saekalikalili!”

²⁹ Nige bayaona na magai wa tamowaidi maudoidi meta se hetalagegagegakalili. Boda wa Gaiyasi yo Alistakasi siya Masedoniya tamowaidiyao Paulo maidanao se laoma wa se kabihekahnidi na se woyaidi se laedi konseti kabakaikewa numana unai.

³⁰ Paulo ye henuwa bena ye lau na boda wa matadiyena ye tolo na ye hedehedelau udiyedi, na tauhemuliwatani tamowaidiyao hekadiyo se hededehekaiyawasi. ³¹ Yo hinage magai ne babadadiyao hekadi siya Paulo kehanao wasa se hetamalilaei iya unai se kaibwada bena tabu ye laulau konseti kabakaikewa unai. Ede Paulo nige ye lau.

³² Konseti kabakaikewa numana unai bodalakilaki wa meta se nuwapwanopwano. Hekadiyo se yogahisae se wane doha teina, yo hinage tamowai hekadiyo ginauli hekadi hesabadi se yogayogahi, na boda wa luwanaena tamowai se bado meta nige kabina se kata matauwuna saha to se laomagogoi.

³³ Dius tamowaidiyao wa Alekisenda se hededelau unai taba ye sae boda wa matadiyena ye tolo bena pilipili ta ye hededehehedulai meta nige Dius kadi gilu hesau. Ye tolo na nimana ye lausinidi na ye koiyedi bena taba boda wa se mwanou, na ye kaipate bena ye hededelau udiyedi. ³⁴ Na boda wa se kitalobai meta iya Dius tamowaina hesau, ede se koipilikalili na mahana lohaloha unai se yogayogahigogoi ma kalina lakilakidi se wane, “Atemisi ye saekalili!”*

19:19 Moni siluba 50,000 lakina meta 5,000,000 Kina ye saedikwai.

19:34 Yodi hedehedede wa kaniyona mamohoina meta teina: “Kai Epeso yoda yaubada Atemisi meta iya ye bom ye saekalili!”, meta kalina Giliki unai hedehedede kubwakubwana. Unai kalina Saliba unai bena hinage musamusana ye kubwa matauwuna se yogayogahi.

³⁵ Na kabo magai ne kadi tanuwaga lakilakina hesau boda wa ye hededehekaiyawasidi na ye wane, "Epeso tamowaidiyao! Tanoubu maudoina kabina se kata meta kita Epeso Atemisi yona numa tabuna yo koitauna galewa ne unai ye bekudobima wa taukitahetetena ede." ³⁶ Na saha kwa hetala'usei ta meta taba nige hesau ye uhalaei o ye nuwapwanopwanoei. Unai tabu kwa modekalili teina saha kwa lapui ta unai, yo tabu saha hesau yababana kwa ginaginalui. ³⁷ Teina tamowai ta kwa woyaidima inai ta meta nige numa tabuna unai saha hesau se kaiwahali, yo siya yoda yaubada nige se hededeheyababa. ³⁸ Ena Dimitiliyasi yo yona tapusapusa tamowaidi se henuwa bena tamowai hesau se hegilu, meta taba se laei tautolehedudulai udiyedi, kabo se hinelihekasa kaiteya yona dudulai. ³⁹ Na ena ginalui hesau bena kwa hedudulai, meta kwa lau magai tamowaidi yodi koigogo unai, na kabo se tolehedudulai. ⁴⁰ Yoda hetalagegagega ta debanaena ya matausikalili, matauwuwuna Loma kadi tanuwaga ena taba ye lapui meta kabo se haida yo se hekamkamnada. Na ena taba se henamaiyeda kada mata wuwuna saha, meta nige gonowana saha hesau ta hedede." ⁴¹ Yona hedehedede gehena wa unai boda wa ye hetamaligwaligwalidi.

Paulo ye lau Masedoniya yo Akaiya udiyedi taukawamamohoi wa ye hededehebayaodi, na ye uyo Tolowasi

20 Huyana hetalagegagega wa ye gehe kabo Paulo tauhemuliwatani wa ye yogagogoidi na ye hededehebayaodi, na kabo ye laukaiyoniyedi na ye dahalai ye lau Masedoniya. ² Masedoniya tehana maudoina ye tauhetakikili, na tausunuma tamowaidiyao wa ye hededehebayaodi, na kabo ye kadau ye dobi teha Giliki. ³ Temenai ye miya nawalai haiyona, na kabo ye kabinonoha na bena ye gelu ye lau Siliya. Na ye lapui meta Dius tamowaidiyao se koitalaliu bena kabo se unui, ede nuwana ye hineli'uyoi bena ye seuyo Masedoniya. ⁴ Paulo tauhemuliwatanina kadau ta unai, siya ede teina: Sopatelo meta Pilusi natuna, iya Beleya tamowaina; Alistaksi yo Sikandas Tesalonika tamowaidiyao; Timoti; Gaiyasi Debi tamowaina; yo Tikikasi yo Tolopimasi siya teha Eisiya tamowaidiyao. ⁵ Teina tamowai ta se baguna se lau Tolowasi unai se nayanayaigai.* ⁶ Na kai Pilipi unai ka miya, na Pwalawa Nige Yistina Henuwaisinina mulinaena kabo ka gelu. Na mayadai haligigi ka kadauyei, kabo ka duna Tolowasi unai kama kahao wa ka lobaidi, ede temenai ka miya mayadai haligigi-labui.

Yutikas boita unai ye tolo'uyo

⁷ Yoma miya Tolowasi unai mayadaina gehegehenana meta Sabati,* na meimeilahina ne unai ka laomagogoi numa hesau unai bena Guiyau yona kaikaigogo henuwaisinina ka hai. Na Paulo ye lauguguya tamowai wa udiyedi, na ye hedehedede ye lau ee boniyai duwaduwalina, matauwuwuna mala ye tom kabo ye dahalai'uyo. ⁸ Numa wa heisina hehaiyonana yoma kabakoigogo bilina unai meta lampa gaudi se gabudi na se kalakalasi. ⁹ Na bili wa windona unai hewali hesau ye tutuli hesana ede Yutikas. Paulo ye hedehedede ye lau ee hewali wa matana ye kenokeno ede ye keno. Na ye kenomwaloi ede ye beku ye dobi bwatano wa unai ye talu. Na se dobi se hai wa meta ye boitako. ¹⁰ Paulo ye pesa ye dobi ede ye gulidobi hewali wa unai na kewanaena ye sapwali, na kabo ye hededelau tamowai wa udiyedi ye wane, "Tabu kwa nuwadubu! Hewali ta ye silasilawa, nige ye boita." ¹¹ Na kabo Paulo maidanao tamowai wa se mwalaes se seuyo bili wa unai na Paulo pwalawa ye hai ye kesi na maudoidi se kaikaigogo. Na ye hedehedede ye lau ee mala ye tom kabo ye lautokiyedi na ye laugabaedi. ¹² Na hewali wa ye namwanamwa, unai nuwadi se talu na se lau magai.

Epeso dubu babadadiyao Paulo ye laukaiyoniyedi

¹³ Tolowasi unai Paulo yona hineli ye ginalui meta ye bom ye yona ye lau Asosi, na kai meta wagaena ka gelu ka baguna ka lau magai wa unai iya ka nayai.

¹⁴ Asosi unai ye lobaigai ede ka usaei na ka lau Mitilini. ¹⁵ Mayadai helabuina Mitilini unai ka gelu ka lau Kaiyosi bwanabwanaluwana ka laugabaei, na mayadai hesauna unai meta Samosi unai ka duna ka kaiyawasi. Na mayadai hehasina unai Miletusi unai ka duna. ¹⁶ Paulo ye nuwatuhekasanonohaiyako meta taba nige Epeso unai se duna, matauwuwuna meta nige ye henuwa mahana ye gabaei teha Eisiya ne unai, na ye henuwa bena ye laumwamwayau ye lau Yelusalema na kabo Pentekosi mayadaina henuwaisinina.

¹⁷ Miletusi unai Paulo wasa ye hetamalisaei Epeso, bena dubu babadadiyao se dobima na maiyadi se hedehedede. ¹⁸ Se dobima Paulo se hailobai na kabo ye hededelau udiyedi ye wane, "Huya bagubaguna yogu lage teha Eisiya ta unai ye laoma ee teina mayadai ta unai meta yogu paipaisowa maudoidi kabidi kwa katako. ¹⁹ Guiyau yona paisowa ta ya ginalui ma nuwabobidobigu yo ma matasulugu. Na laukita ya hekalodi meta Dius tamowaidiyao hekadi se koitalaliu bena se unuigau. ²⁰ Yo hinage kabina kwa katako meta ma nuwabayaogu kabasaguigomiu Guiyau wasana ta ya lauguguyaei boda matadiyena yo numa kesega kesega udiyedi. ²¹ Huya maudoina ya hededelau Dius yo Giliki tamowaidiyao udiyedi bena

20:5 Luka ye kuli *kai* gonogonowana doha Apostolo 16:10 unai. Kaniyona ede iya hinage Paulo maiyana se miyamiya Pilipi unai na kabo se dahalai se kadau.

20:7 *Sabati* ta meta Dius yodi huyakaiyawasi mayadaina, iya ede yoda Satade.

taba se nuwabui yo se patulau Yaubada unai yo
Guiau Yesu se sunumaei.

²² Na Yaluwa Tabuna yona lauheliligau ta unai kabo ya lau Yelusalema, na nige kabina ya kata menai kabo saha ye tubu kaliguyena. ²³ Na yogu kabalau magaidi lakilakidiyo maudoidi udiyedi meta Yaluwa Tabuna ye hekatagauko kabo Yelusalema unai se tolegau numatutugudu unai yo se hekamkamnagau. ²⁴ Na iyamo yogu mauli meta nige ya modei, na Guiau Yesu paisowa ye haiyama ta taba ya hegehe. Na paisowana ede meta Guiau yona katekamkamna yo yona gadosisi wasana hededehehemasalahana tamowai maudoidi udiyedi.

²⁵ Teina huya ta kabina ya kata meta taba nige kwa kita'uyoigau, na komiu ede tamowaidiyo Guiau yona basileiya wasana ya lauguguyaeyako kalimiuyena. ²⁶ Teina unai ya hededelaowa maudoimiu kalimiuyena: Ena kaiteya ye boita na ye lau kaiwa kalakalasina unai, giluna meta yau nige kaliguwai, ²⁷ matauwuna yau nige ya matausi yo nige ya talutolo, na Guiau yona nuwatu maudoidi meta ya hededehehemasalahadiko kalimiuyena. ²⁸ Unai kwa kitahetete'uyoigomiu yo hinage Yaubada yona mamoe yawoina* kwa kitahetetedi. Yaluwa Tabuna ye hetologomiu komiu tauwoyawoya, unai Yaubada yona ekalesiya bodadiyo iya kwasinana unai ye hemaisahaidiko wa kwa kitahetetedi. ²⁹ Kabina ya katakalili meta yau ya laugabaeigomiu ta mulina ne unai kabo taulauhekatalupolupo doha kedewa kaikaiklasidiyo se laoma luwamiuyena, na Yaubada yona mamoe yawoina kabo se hetatagwaligwalidi. ³⁰ Yo hinage bodamiu ta unai kabo tamowai hekadi se tolosaema na hedehededelupolupo se ginaulidi bena Yaubada yona tamowai se woyahesuwaladi. ³¹ Unai bena matamiu se nega yo kwa kitanamwanamwakalili! Bena kwa nuwanuwatui meta bolimai haiyona udiyedi nige ya kaiyawasi na boniyai yo mayadai ya hedehededehasahasagomiu ma matasulugu.

³² Unai Yaubada nimanaena ya tolegomiu. Yona katekamkamna yo yona gadosisi wasana bena kwa nuwanuwatui. Wasa wa gonowana ye hebayaogomiu yo yona kainauya* ye mosehekawa kalimiuyena doha hinage ye mosei yona tamowai* maudoidi udiyedi.

³³ Yau sola nige tamowai hesau yona moni o yona gogo gole o siluba, yo kana kaleko ya henuwa na ya haigaibui. ³⁴ Komiu maudoimiu kabina kwa kata meta yau nimagu ta unai ya paisowa, na paisowa ya ginaulidi ta meta udiyedi yau yo kagu kahao ya saguigai. ³⁵ Ginauli maudoidi ya ginaulidi ta udiyedi ya

hekatagomiu meta bena kwa paisowabayao na deha tamowaidiyo kwa saguidi. Ginauli ta kwa ginaulidi na Guiau Yesu yona hedehedede kwa nuwanuwatuidi, doha ye wane, ‘Ta kaikainauya meta laulau namwanamwana, na kabo kainauya ta haidi.’”*

³⁶ Paulo ye hedehededegehe kabo maiyanao se tulibono na ye tapwalolo. ³⁷ Ye tapwalologehe kabo se haitalagadoi yo se sumtai na se dou. ³⁸ Saha ye henuwayababakaliliyeidi meta Paulo yona hedehedede ye wane, “Taba nige kwa kita'uyoigau.” Na kabo maiyanao se laulaugogoi se dobi waga.

21 Epeso yodi dubu babadadiyao wa ka laukaiyoniyedi na kabo ka gelu ka kuke ka dudulai ka lau Kosa bwanabwanaluwana unai. Mala ye tom kabo ka lau Lodosi na kabo ka lau Patala.

² Menai waga hesau ka lobai ye laulau Penisiya ede unai ka gelukawa na ka kuke ka lau. ³ Saipulusi bwanabwanaluwana ka kitasaei teha seuseulimai ne unai na ka laugabaei ka lau teha Siliya, na Taiya unai ka duna, iya ede waga wa kana kai'usa gogodiyao kabahepesadi magaina. ⁴ Taukawamamohoi hekadi ka lobaidi ede menai maidamaiyao ka miya mayadai haligigi-labui. Na Yaluwa Tabuna tamowai wa ye hekatadi ede Paulo se kaibwadai bena tabu ye laulau Yelusalema.

⁵ Yoma miya mayadaina gehegehena wa unai tauhemuliwatani wa ma mwanediyo yo natudiyo maidamaiyao ka dobi kabagelu wa gadowanu unai ka lulage, ede nagali wa unai ka tulibono na ka tapwalolo. ⁶ Mulina ne unai ka laulautoki'uyoigai yo ka laukaiyon, kabo ka dobi waga wa unai ka gelu, na siya se seuyo yodi magai.

⁷ Taiya ka laugabaei na ka lau Tolemaisi unai ka duna. Taukawamamohoi menai taumiya wa ka hailobaidi na maidamaiyao ka miya mayadai kesega.

⁸ Mala ye tom ede ka gelu'uyo ka lau Sisaliya. Menai Pilipi taulaulauguguya* yona numaena ka miya. Iya meta Yelusalema unai tamowai haligigi-labui se kaisunuwai'useidi wa kadi kaha hesauna.* ⁹ Iya natunao sinesineo hasi nuwanuwasupudiyo. Siya meta se hedehededepeeloweta.

¹⁰ Mayadai hisa menai ka miya na yoma miya wa unai tamowai hesau hesana Agabasi Yudeya unai ye dobima kalimaiyena, iya meta peloweta hesau. ¹¹ Iya kabo Paulo kana dagilolo ye hai na ye bom kaena yo nimana ye pai'uyoidi na kabo ye wane, “Yaluwa Tabuna ye hededelaoma ye wane, ‘Dius tamowaidiyo Yelusalema unai dagilolo ta tanuwagana kabo se pai doha teina na se mosegabaei dagela tamowaidiyo udiyedi.’” ¹² Hedehedede wa ye

20:28 Mamoe yawoina iya ede ekalesiya bodadiyo heyaheyasonina; Act 20:29 unai hinage.

20:32 Kainauya ta meta Yaubada yona hedehedesunuma maudoidi yona tamowai udiyedi, doha mauli nige kana siga, Yaluwa Tabuna, yababa nuwatugabaei, galewa, yo yona henamwa maudoina.

20:32 Yaubada yona tamowai meta kalina Giliki unai kanionya ede tamowai Yaubada ye he'a'adi na se dudulai iya matanaena.

20:35 Yesu yona hedehedede ta kulibuna ye pilipili. Meta hinage gonowana ta kulibui ta wane, Taukaikainauya kabo namwa ye lobai, na kabo kainauya tauhaina. Ewaneliya bukana hasi udiyedi Yesu yona hedehedede ta nige se kuli.

21:8 Pilipi taulaulauguguya wasana ta hasili Apostolo 8:4-40 unai.

21:8 Wasana ku hasili Apostolo 6:1-7.

hedede na ka lapui, unai magai wa unai taukawamomohoi tamowaidiyao hekadi maidamaiyao Paulo ka hededenuwahi tabu ye saesae Yelusalema.¹³ Na Paulo ye hededelaoma ye wane, "Saha douna kwa doudou ta? Yomi dou ta unai yau nuwagu ta kwa hebasabasa, na ya nonohakaliliklo bena se paigau yo taba hinage Yelusalema unai se unuhemwaloigau Guiyau Yesu debanaena."¹⁴ Na nige gonowamai ka nuwakoi na ka hededenuwahi, unai ka wane, "Besi, na Guiyau yona nuwatu mo ta lauwatani."

¹⁵ Yoma miya menai mayadaidi wa se gehe ede ka kabinonoha na ka sae Yelusalema.¹⁶ Tauhemuliwatani hekadi Sisaliya unai maidamaiyao ka sae, na se woiaigai ka lau Menasona yona numa unai ka miyamiya. Iya meta Saipulusi bwanabwanaluwana tamowaina, yo hinage tauhemuliwatani bagubagunana hesau.

Paulo ye lage Yelusalema unai

¹⁷ Yoma huyalage Yelusalema unai taukawamamohoi maudoidi se hailobaigai ma gwaugwauyaladi.¹⁸ Mala ye tom kabo Paulo maidamai ka lau Yamesi ka kaitaumanai, na dubu babadadiyao maudoidi meta hinage se laomagogoi menai.¹⁹ Paulo ye lautokiyeidi, na kabo yona paisowa yo saha Yaubada ye ginaulidi dagela tamowaidiyao udiyedi wa wasadi maudoidi ye heddededi dubu babadadiyao wa udiyedi.

²⁰ Hedechedede wa se lapui ede se noko yo Yaubada se hedebasae. Na se hededelau Paulo unai se wane, "Kama kaha! Ku kita, Dius tamowaidiyao bodalakilaki se kawamamohoi Yesu wasana unai, na maudoidi meta Mose yona laugagayo udiyedi se kitalaukalili yo se miyawatanikaliliyedi.²¹ Na wasalupolupo se lapui meta yom paisowa wa unai Dius maudoidi dagela magaidiyao udiyedi taumiya ku hededelau udiyedi meta tabu se kitalau Mose yona laugagayo unai, yo tabu natudiyao loheloheyao se hepehepelitomedi, yo tabu Dius kada kulutubu kabikabidi maudoidi se miyamiyawatanidi.²² Taba kabim se kata meta kowa ede inai, kabo saha ta ginauli?²³ Unai kai yoma nuwatu ede teina: Tamowai hasi ede inai siya yodi kaigwala huyana wa se gehe.*²⁴ Maidamwao kwa lau numa tabuna ne unai na lauhe'a'a kabikabidi kwa ginaulidi. Na ginauli saha kabo se hepaisowadi ne ku hemaisadi, na kabo kuludiyo wa se yaligabaedi. Teina unai kabo tamowai maudoidi se kitago yo kabim se kata meta kowa hinage Dius yoda laugagayo ta ku miyawatanidi na saha se lapuiyako wa meta nige mamohoina.²⁵ Na dagela tamowaidiyao siya taukawamamohoi yodi ka kulikuliko na ka hededelau udiyedi ka wane meta nige Mose yona laugagayo

maudoina bena se lauwatani, na laugagayo hisahisadi mo: Ena kai se kaitalasamyedi koitau udiyedi tabu se kaikaidi, tabu kwasina se numanuma, suisui gadona se sipwakiki na ye mwaloit tabu se kaikai, yo hinage ganaganawali* tabu se miyamiyaidi."²⁶ Yodi nuwatu wa Paulo ye kawanamwanamwaei, unai mala ye tom ede se hetubu lauhe'a'a kabikabina se ginauli. Na kabo ye mwalaesae numa tabuna wa unai na taukaitalasam wa udiyedi ye hededehehemasalah meta mayadai saha unai kabo taudi hasi wa yodi lauhe'a'a mayadaidi se gehe na yodi kaitalasam se baheidima na se gabudi.

²⁷ Yodi lauhe'a'a mayadaidi haligigi-labui sola nige se gehe, na Dius tamowaidiyao hekadiyo teha Eisiya unai se laoma. Siya Paulo numa tabuna wa unai se kita ede boda se henuwasaedi na iya se kabihekahini.²⁸ Na se heyoheyoga kalina lakilakiyena se wane, "Isalaela tamowaidi maudoimiu, kwa saguigai! Teina tamowai ta meta teha maudoina udiyedi ye hededeheyababada, yo ye hededelau tamowai maudoidi udiyedi meta bena Dius yoda laugagayo tabu se miyawatanidi, yo yoda numa tabuna ta ye hededeheyababada. Yo hinage Giliki tamowaidi ye woiaidima numa tabuna ta unai na teha tabuna ta ye hebikikaliliye!"²⁹ Matauwunua huya hesau unai Epeso tamowaina hesau hesana Tolopimasi, iya meta dagela tamowaina, maidana Paulo se kitadi se taitaihilelabulabui. Unai se nuwatugaibui meta bena Paulo tamowai ta ye woyahemwalaeyako numa tabuna ne unai.

³⁰ Yelusalema tamowaidi maudoidi Paulo se kouyalayalakaliliyei. Unai se laomagogoi numa tabuna wa unai na Paulo se tabehepesa, na kabo numa tabuna yona polisi gana gududiyao wa se guduidi.

³¹ Paulo se biteligwadagwaduae na se kaipate bena se kohemwaloi. Na wasa wa ye lau Loma yodi tau'iyala kapinana* ye lapui meta Yelusalema unai hetalagegaggega ye lakikalili.³² Unai tau'iyala hekadiyo yo yodi sentuliyo ye haidi na maidanao se heloigogoi se dobi tauhetalagegaggega bodadiyao wa udiyedi. Boda wa maudoidi tau'iyala tamowaidi ma kadi tanuwaga se kitadi ede Paulo se kabigabaei.

³³ Iyala kapinana wa Paulo ye hai na ye hededelau yona tau'iyala tamowaidiyao wa udiyedi na seni labui udiyedi iya se pai. Na kabo boda wa ye henamaiyedi ye wane, "Teina tamowai ta kaiteya, yo saha yababana ye ginauli?"³⁴ Boda wa luwadiyena tamowai hekadi ginauli hesau se heyoheyogaei, na hekadi ginauli hesau se heyoheyogaei, na iyala kapinana wa nige gonowana hedehedede mamohoina ye lapulobai, matauwunua ede

21:23 *Kaigwala* wa hesana ede Nasilaiti kaigwalana, meta taukaigwala ye bom yona talam ye ginauli meta ye mose'uyoi Yaubada unai. Kaigwala huyana ye gehe kabo he'a'a kaitalasamna ye ginauli yo kuluna se yaligaba. Nasilaiti kaigwalana laugagayona Numela 6 unai ta lobai. Apostolo 18:18 unai Paulo hinage yona kaigwala hesau wasana ku hasili.

21:25 *Ganawali* meta laulau labui ye sumagogoidi: Ena maitawasola ye lau nige mwanena unai, yo ena hewali yo hasala nige tawataswasoladi se kenokesega.

21:31 *Iyala kapinana* kana paisowa hedehededenku hasili Apostolo 10:1 yona hededehehemasalah unai.

hetalagegagega wa ye lakikalili. Unai ye hededelau yona iyala tamowaidiyao udiyedi bena Paulo se laei yodi kabamiya numana wa unai.³⁵ Se lage kaba'utu'utusae wa unai na boda wa yodi kabi wa ye saekalili ede iyala tamowaidiyao wa Paulo se lausini na se bahei se saei.³⁶ Tauhemuliwatanidi bodana maudoidi wa se yogayogahilau ma kalina lakilakidi se wane, "Kwa koihemwaloi!"

³⁷ Tau'iyala tamowaidiyao wa bena kabo Paulo se bahehemwalee numa wa unai, na kalina Giliki unai ye wane: "Iyala kapinana, gonowana taba saha hesau ya hedede kalimyena?" Na iyala kapinana wa ye siliyata na ye hededelau unai ye wane, "Giliki kalinadi kabina ku kata?³⁸ Kowa nuwana Aikupito tamowaina, e nige? Lahinaidi iyala ku hetubu yo hinage taukaikaiunu tamowaidiyao badodi 4,000 ku woyahaidi kwa lau balabalaena kwa miya?"³⁹ Na Paulo ye hededebui ye wane, "Yau meta Dius tamowaina, na yogu magai Tasusi teha Silisiya unai meta tamowai maudoidi kabina se kata. Na taba gonowana ya hedehedelau tamowai ta udiyedi?"⁴⁰ Iyala kapinana wa Paulo yona nuwatu wa ye kawanamwanamwaei, unai Paulo se hetolodobiyei kaba'utu'utusae wa unai, na nimanaena tamowai wa ye koihekaiyawasidi, tabu se gegagega. Ede maudoidi wa se mwanou, na kabo kalina Hebelu unai ye hedehedelau udiyedi.

22 Paulo ye wane, "Tamaguwao yo kagu kahao, kwa lapulapuinamwanamwa na ginauli saha se tubu wa bena ya hedehedehemasalahadi."² Na boda wa se lapulapui meta Paulo kalina Hebelu unai ye hedehedede ede se mwanou na se lapulapui. Na Paulo ye wane,³ "Yau meta Dius tamowaina, teha Silisiya magaina hesau hesana Tasis unai se labasigau, na Yelusalema unai ya lakilaki. Kada kulutubu yodi laugagayo udiyedi Gamaliela ye hekatanamwanamwaegau. Huyana ne unai Yaubada yona paisowa ya ginauli ma nuwakohihaigu gonogonowana doha komiu wau teina mayadai ta.⁴ Yesu Keliso tauhemuliwatanina ya hekamkamnadi yo ya unuhemwaloidi. Tatao yo sinesineo ya paidi yo ya toledi numatutugudu unai.⁵ Taukaitalasam saesaena yo Dius babadadiyo bodadi meta gonowana se hemamohoiyei, matauwuna hinage leta se haidima na ya baheidi ya lau kadi kahao Damaseko unai taumiya udiyedi, na ya dahalai bena kabo menai tamowai ya paidi na ya laedima Yelusalema, na ka toledi numatutugudu unai.

⁶ Ya laulau Damaseko ya hanahanawui mayamayadailakiyena, na kabo galewa ne unai mala lakilakina ye sinadobima kaliguyena.⁷ Meta ya gulidobi bwatano ne unai, na kalina hesau ya lapui ye hedehedeloma kaliguwai ye wane, 'Saulo! Saulo! Idohagi to ku hekamkamnakaliliyeigau ta.'⁸ Na ya wane, 'Kowa kaiteya, Guiyau?' Na kabo kalina wa ye wane, 'Yau Yesu Nasaleta tauna, yau ede ku

hekamkamnagau ta.'⁹ Na kagu kahao maidaguwa wa mala wa dawayana se kita, na kaiteya maidagu ka hedehedede wa meta nige kalinana se lapui.¹⁰ Na ya henamai ya wane, 'Guiyau, saha kabo ya ginauli?' Na Guiyau ye hedehedeloma ye wane, 'Ku tolo na ku lau Damaseko. Temenai kabo tamowai hesau kam paisowa ye hedede kabo saha ku ginaulidi.'¹¹ Kagu kahao maidaguwa wa se kabinimaigau na se woyaigau ka lau Damaseko. Matauwuna ede mala wa dawayana matagu wa ye heyababadi.

¹² Damaseko unai tamowai hesau hesana Ananiya ye kitagau. Iya meta laugagayo taulauwataninamwanamwaena yo hinage Dius tamowaidiyao menai taumiya meta iya se kitahenamwa.¹³ Na dedekagu wa unai ye tolo na ye wane, 'Kagu kaha Saulo, matam ku helala!' Na mahanana ne unai matagu wa se lala'uyo, na gonowana ya kaikewa'uyo na Ananiya ya kita.¹⁴ Na kabo ye hedehedeloma ye wane, 'Kada kulutubu yodi Yaubada ye kaisunuwaigo bena yona nuwatu kabidi ku kata, yo keda wa unai Dudulai Tamowaina* ku kita yo yona hedehedede kawana unai ku lapuidi.¹⁵ Kowa kabo saha ku kitadi yo ku lapuidi wa tauhededehemasalahadi teha maudoina tamowaidiyao udiyedi.¹⁶ Unai saha ku nayanayai, ku lau ku babatiso na Yesu ku sunumaei na yom yababa ye deuligabaedi.¹⁷ Na kabo ya uyo Yelusalema, na mayadai hesau ya lau numa tabuna unai ya tapwatapwalolo na Yaluwa Tabuna ye taukasinigau,¹⁸ na tautau hesau ye hekitagau meta Guiyau ye hedehedeloma kaliguwai ye wane, 'Mwamwayau, Yelusalema ku laugabaei, matauwuna ede yom hedehedehemasalahagau ta taba nige se kawamamohoiyedi.'¹⁹ Na ya wane, 'Guiyau, tamowai ta kabigu se katakalili meta ya lau sunago maudoidi udiyedi na taukawamamohoiyego ya haidi ya sapidi yo ya toledi numatutuguduyena.²⁰ Yo hinage kabigu se kata meta huyana tauhededehemasalahago Setepano se koihemwaloi meta yau maiyadi yo ya talam, na taukohemwaloina wa kadi luwuluwu ya kitakitahetetedi.²¹ Na kabo Guiyau ye hedehedeloma kaliguyena ye wane, 'Nige! Yelusalema ku laugabaei, na kabo ya hetamaligo ku lau kedaloha dagela tamowaidiyao ne kalidiyena.'

²² Boda wa se lapulau Paulo yona hedehedede wa unai ye laoma ee ye wane bena Guiyau iya ye hetamali dagela tamowaidiyao udiyedi. Hedehedede wa se lapui ede se kouyalayalakalili na se yogahilakilaki sae se wane, "Teina tamowai ta nige gonowana taba ye maumauli! Kwa laeihesuwala na kwa koihemwaloi!"

²³ Na boda wa Paulo se yogayogahiyei yo kadi luwuluwu se haigabaedi na nagali se kabigagaloidi na se hesulusaedi.²⁴ Kabo iyala kapinana wa ye hedede bena Paulo se woyahemwalee numa wa unai na se

sapi yo se henamaiyei kana mata saha to boda wa ma kouyalayaladi na se yogayogahiyei.²⁵ Paulo se paihekahnilarui duu hesau unai bena kabo se sapi, na ye hedelau sentuliyo temenai tautotolo wa unai ye wane, "Ku nuwatui ye dudulai meta Loma yona laugagayo logulogunaena taumiya tamowaina hesau, ena nige kana mata hesau kwa lobai, na kabo kwa sapigaibui?"²⁶ Sentuliyo wa Paulo yona hedehedede wa ye lapui ede ye lau kana tanuwaga wa unai ye hedelau ye wane, "Saha kabo ku ginauli? Teina tamowai ta meta iya Loma yona laugagayo logulogunaena taumiya tamowaina hesau."²⁷ Iyala kapinana wa ye lau Paulo ye henamaiyei ye wane, "Mamohoi kowa Loma yona laugagayo logulogunaena taumiya hesau?" Na Paulo ye talam ye wane, "Aa, iya ede."²⁸ Iyala kapinana wa ye wane, "Yau meta moni lakilakina ya tole Loma taukitahetetena tamowaidiyao udiyedi na kabo se talamyeigau ya hemala Loma yona laugagayo logulogunaena taumiya tamowaina hesau." Na Paulo ye wane, "Yau meta sinagu yo tamagu Loma yona kitahetete yo yona laugagayo logulogunaena se miya na unai se labasigau."²⁹ Ede tamowai bena kabo Paulo se pidili yo se henahenamaiyei wa se sigisuwala. Na iyala kapinana wa ye siliyata yo ye matausikalili, matauwuwuna ede Loma yona laugagayo logulogunaena taumiya tamowaina hesau ye senigaibui.

³⁰ Mala ye tom kabo iyala kapinana wa bena Paulo kana mata mamohoina ye loyanei, idohagi to Dius tamowaidiyao se hegilu. Unai ye hedede nimana mainadi se yailigabaedi, na kabo ye hedede Dius yodi taukaitalasam tauwoyaidi yo Sunedeli tamowaidiyao maudoidi se laomagogoi na kabo Paulo se woyaiyama matadiyena ye tolo.

23 Paulo ye kitadudulailau Sunedeli bodadi udiyedi na ye wane, "Kagu kahao, ya nuwatui yogu miya yo yogu paisowa ta Yaubada matanaena ye dudulai yo ye namwa, ye laoma ee teina mayadai ta unai."² Yona hedehedede wa unai ede taukaitalasam saesaena Ananiya ye hedelau kana kahao Paulo dedekanaena tautotolo wa udiyedi ede kawana wa nimadiyena se koigudugudui.³ Paulo ye hedelau Ananiya unai ye wane, "Kowa meta taukailupolupo mamohoi, unai Yaubada kabo ye hekamkamnago. Yom kabatuli me unai ku tuli na Mose yona laugagayo unai bena ku tolehedudulaigau, na kowa meta laugagayo ta ku utusikaliliyi matauwuwuna ede ku hedede na kam kahao kawagu ta se koigudugudui."⁴ Na Paulo dedekanaena tautotolo wa se hedelau unai se wane, "Idohagi to Yaubada yona taukaitalasam saesaena ku dilamatai?"⁵ Paulo ye hedelau udiyedi ye wane, "Kagu kahao, nige kabina ya kata meta iya taukaitalasam saesaena; doha kulikuli tabuna unai ye wane, 'Tabu tauwoyawoya tamowaina hesau ku hededeheyaheyababa.'"

(Esodo 22:28)

⁶ Na Paulo ye nuwatulobai meta Dius babadadiyao bodadi wa unai meta hekadi Sadusiya yo hekadi Paliseya. Unai ye hedelakilaki ye wane, "Yau tamagu meta Paliseya tamowaina, na yau hinage Paliseya tamowaina hesau. Na yau kwa helauhetagalau ta matauwuwuna ede yogu sunuma yo yogu kawamamohoi meta tauboiboita kabo se tolo'uyo."⁷ Yona hedehedede wa unai ede haikawayagala ye tubu Paliseya yo Sadusiya bodadi wa udiyedi, ede boda wa se hekoilabuiyei.⁸ Kaniyona ede Sadusiya bodadi se wane, taba nige tauboiboita se tolo'uyo, nige anelu, yo hinage nige yaluyaluwa, na siya Paliseya bodadi meta se wane tauboiboita kabo se tolo'uyo, yo hinage anelu yo yaluyaluwa meta mamohoi.

⁹ Na haikawayagalalakilaki ye tubu na laugagayo taulauhekataena hekadi siya Paliseya se tolo na se hedebayao se wane, "Tamowai ta unai nige yababa hesau ka lobai. Taba yalua yo anelu hesau Yaubada yona nuwatuyena ye hedelau tamowai ta unai tabu ta haihaikawayagala unai."¹⁰ Haikawayagala wa ye lakalili na Paulo se tabetabei'usei, ede iyala kapinana wa ye matausikalili madai Paulo se tabehemwaloi, unai ede ye hedelau yona tau'iyala tamowaidiyao wa udiyedi na se dobi Paulo se gilihia se laei yodi kabamiya numana wa unai.

¹¹ Boniyaina wa unai, kenosuwayaiyena Paulo Guiyau ye kita dedekana wa unai ye totolo na ye hedehedelau unai ye wane, "Paulo, tabu ku matausi, na ku nuwabayao! Yelusalema unai ku hedehemmasalahagau, na gonogonowana doha kabo hinage Loma unai ku hedehemmasalahagau."

Diis tamowaidiyao hekadi se koitalaliu bena Paulo se unuhemwaloi

¹² Mala ye tom kabo Diis tamowaidiyao hekadi se laomagogoi na se koitalaliuwadawadam na se hedehedekaiwala se wane, "Taba nige kai ta kai yo waila ta numa kana sigana ee Paulo ta koihemwaloi."

¹³ Badodiyao ede tatao-labui-se-mate (40) yo hinage kadi kahao hekadi maidadiyao.¹⁴ Maudoidi se lau taukaitalasam tauwoyaidi yo Diis babadadiyao udiyedi na se wane, "Ka kaigwalako meta taba nige kai ka kai yo waila ka numa, kana siga ee Paulo ka koihemwaloi."¹⁵ Unai komiu yo Sunedeli maudoina maidamiyao kwa lau iyala kapinana kwa lupoi na kabo Paulo ye leyawa bena kabo kana mata kwa wasenamwanamwaei. Na kai kabo keda ne unai ka nayai na yona laoma ne unai kabo ka koihemwaloi."

¹⁶ Yodi koitalaliu wa Paulo louna natuna ye lapui ede ye lau tau'iyala yodi kabamiya numana wa unai na yona bada wa yona ye hedehedede.¹⁷ Ede Paulo sentuliyo hesau ye yoganeiyama na ye hedelau unai ye wane, "Teina hewali ta nuwatu hesau iya unai. Ku woyalaei iyala kapinana unai, na hewali ta kabo yona nuwatu ye hedehemmasalahna ye lapui."¹⁸ Se lau ede sentuliyo wa ye hedelau kana tanuwaga

unai ye wane, "Paulo, iya numatutugudu unai taumiya wa, ye hedededelaoma ede hewali ta ya woyaiyama bena nuwatu hesau ye hededehehemasalahi kalimwai."

¹⁹ Iyala kapinana wa hewali wa nimana ye kabi na ye woyahesuwala na ye henamaiyei ye wane, "Nuwatu saha bena ku hedede kaliguwai?" ²⁰ Hewali wa ye wane, "Dius tamowaidiyao se koitalaliuko meta kabo se lupoigo na bena Paulo kabo ku hetamalidobiyei Sunedeli unai bena kana mata se wasenamwanamwaei. ²¹ Yodi nuwatu ta meta nige mamohoina, matauwuna ede tamowai badodi tatao-labui-se-mate yo hedadi hinage se nonohako yo se hedede kaigwalako meta taba nige se kaikai yo waila se numa kana siga Paulo se koihemwaloi. Siya meta se nonohako, na se nayanaya mo kalimyena bena ku talamyei." ²² Iyala kapinana wa ye hedededelau hewali wa unai ye wane, "Tabu tamowai hesau unai ku hedededelau meta yodi nuwatu ta ku hedede yako kaliguyena!" Na kabo hewali wa ye hetamali ye lau.

²³ Na kabo sentuliyo labui ye yoganeidima na ye wane, "Tau'iyala tamowaidiyao badodi 200 kwa haidi, yo hinage hosi taugeludi badodi 70, yo taukabiwamali badodi 200, se kabinonoha na boniyai 9 kiloki kabo kwa dahalai kwa lau Sisaliya. ²⁴ Paulo yona kabagelu hosidi kwa kabinonohaidi na unai kabo kwa laei gabana Peliki* unai. Na Paulo kwa kitahetetenamwanamwaei." ²⁵ Na kabo gabana Peliki yona leta ye kuli ye wane,

²⁶ "Yau Kolodiyasi Lisiyasi, ya kulikulilaowa kowa Peliki kalimwai: Yauwedolakilaki yogu wasawasa.

²⁷ Teina tamowai ta meta Dius tamowaidiyao se hai na bena se koihemwaloi, na yau yo yogu iyala tamowaidiyao ka dobi ede ka gilihai, matauwuna ede hedehededenya ya lapui meta iya Loma yona laugagayo logulogunaena taumiya tamowaina hesau.

²⁸ Na ya henuwa bena kabina ya kata yababa saha ye ginauli to bena se koihemwaloi ne, unai ka laei Sunedeli unai na kana mata ka wasenei. ²⁹ Ya lobai meta Dius yodi laugagayo debanaena tamowai ta se hai, na nige kana mata hesau ya lobai unai taba se koihemwaloi o se tole numatutuguduyena. ³⁰ Na hedehedede ya lapui meta tamowai ta se koitalaliuyei bena kabo se koihemwaloi, unai ede ya hetamalimwamwayauyei ye laowa kalimwai, yo ya hedede meta tauhegiluna tamowaidiyao bena hinage se laowa na kadi mata saha se hedede hehemasalahadi kalimwai. Yaubedo yo kaiyon."

³¹ Unai tau'iyala tamowaidiyao meta iyala kapinana wa yona hedehedede wa se lauwatani na boniyaina ne unai Paulo maiyadi se lau ee magai hesau hesana Antipatilisi unai se lage. ³² Mala ye tom kabo hosi

23:24 Gabana Peliki meta teha Yudeya ye kitakitahetetedi.

23:35 Numa wa meta beyabeyana wasawasa Heloda Lakilakina ye hetolo yona kabamiya. Yona boita mulina ne unai kabo natunao wa numa wa nige unai se miya, ede Loma yodi tauwoyavoya se hepahepaisowa huyana se babawa Sisaliya unai.

24:6-7 Kulikuli beyabeyadi maudoidi kalina Giliki unai se kulikulidi meta nige udiyedi lausoiso 7, na hisahisadi mo lausoiso 7 yo 8

tupwana se kuli: "Unai ka hai bena ka helauhetala,⁷ na iyala kapinana Lisiyasi ye laoma ede kalimaiyei tamowai ta ye hai na ye hetamali dobiyeiyama kalimwai.⁸ Na tauhegiluna hinage ye hedededelau udiyedi bena se dobima."

taugeludi wa maiyadi Paulo se lau Sisaliya na hedadi wa se uyo Yelusalema. ³³ Se lage Sisaliya unai ede leta wa yo Paulo se moselaedi gabana Peliki unai. ³⁴ Leta wa ye hasili na Paulo ye henamaiyei ye wane, "Kowa kaiteya teha unai ku laoma?" Na Paulo ye wane, "Yau teha Silisiya tamowaina." ³⁵ Na ye hedededelau Paulo unai ye wane, "Tauhegilugo se laoma kabo kowa yo siya kwa lauhetala na ya lapulapui." Kabo ye hedede Paulo se laei Heloda numa ye ginauli wa unai* se tole na se kitahetetenamwanamwaei.

Paulo yo tauhegiluna wa Peliki matanaena se lauhetala

24 Mayadai haligigi mulidiyena kabo taukaitalasam saesaena Ananiya yo Dius babadadiyao hedadi yo yodi tauhedededesonoga tamowaina Tetalusyi maiyadi se dobi Sisaliya gabana Peliki unai, na Paulo kabahegiluna hedeheddededi maudoidi se hedeheddededi. ² Yodi koigogo wa unai Paulo se yoganeiyama kana hedehedede wa Tetalusyi ye hedehededi ye wane, "Yauwedolakilaki Peliki! Yom woyawoya sibasibadi ta udiyedi meta miyadaudaumwali yo namwanamwa ka lobaidi yoma magai ta tehanao maudoidi udiyedi. ³ Yom hineli namwanamwadiyao ta udiyedi kowa hekasisim ye lakikalili, unai ka lautokikaliliyeigo. ⁴ Nige ka henuwa bena ka hemodekaliliyeigo, na taba mahana kubwakubwana mo unai ku lapulaoma yoma hedehedede ta unai. ⁵ Teina tamowai ta ka lobai meta iya Dius tamowaidiyao teha maudoidi udiyedi yodi miya tauhephilipilina yo kadi hetalagegagega taukabihaina, yo hinage Nasaleta tamowaina hesau tauhemuliwatanina bodana tauwoyaina hesau ede iya. ⁶⁻⁷ Yo hinage dagela tamowaidi ye woyahemwalaedi Dius yodi Yaubada kabataba'ohuina numana unai, ede numa tabuna wa ye hebiki. Unai iya ka hai.* ⁸ Taba iya ku henamaiyei kabo yoma kabahegiluna hedeheddededi maudoidi ye hedede hehemasalahadi kalimwai."

⁹ Kabakoigogo wa unai Dius tamowaidiyao maudoidi se talam na se hedehedegogoi se wane, "Teina hedehedede maudoidi ta meta mamohoidi."

¹⁰ Unai gabana wa nimanaena Paulo ye koihai ede ye tolo na ye hedehedede ye wane, "Yauwedolakilaki Peliki! Kabina ya kata meta bolimai lohaloha teha Yudeya tamowaidiyao yodi lauhetala kowa taulapuhekasadi yo tautolehedudulaidi. Unai ma nuwabayaogu ya bom yogu ya tolo na ya hedehedede. ¹¹ Lahinaidi ya sae Yelusalema na yogu nuwatu bena numa tabuna unai ya taba'ohu Yaubada unai. yogu huyalage mayadaina meta gonowana ku

hemamohoiyei. Mayadaina ne unai ye laoma teina meta mayadai saudoudoi-labui (12) mo ta laugabaedi. ¹² Tauhegilugau ta nige sola se kitagau numa tabuna unai tamowai hesau maidagu ka haikawayagala, yo sunago udiyedi o magai lakilakina maudoina ne unai nige boda kadi hetalagegagega ya ginauli. ¹³ Yodi kabahegilugau hedeheddededi maudoidi ta meta nige yodi kabahemamohoiyedi. ¹⁴ Na ginauli kesega se hedede wa meta mamohoi: Kama kulutubu yodi Yaubada yogu taba'ohuina unai meta Yesu tauhemuliwatanina yodi kabikabi yo yodi laulau ya hemuhemuliwatanidi. Kabikabi yo laulau ta se hedede meta nige se dudulai. Na yau meta hinage Dius yoma laugagayo yo Peloweta yodi kulikuli maudoidi ya kawamamohoiyedi. ¹⁵ Yaubaba ya sunumaei yo ya kawamamohoikaliliyei meta tausunuma yo nige tausunuma kabo boita unai ye hetolo'uyoidi, doha hinage teina tamowaidi ta Yaubaba se sunumaei yo se kawamamohoiyei. ¹⁶ Unai ya kaipate bena yogu nuwanuwatu yo yogu miyamiya ya miyahedudulaidi Yaubada yo tamowai matadiyena.

¹⁷ Bolimai hisa yogu miyasuwala mulidi ne unai ya uyoma meta kainauya yo moni ya baheidima Yelusalema bena deha tamowaidiyao ya saguidi yo hinage yogu kaitalasam ya ginauli Yaubaba unai. ¹⁸ Na huyana tauhegilugau ta se kitagau numa tabuna unai meta lauhe'a'a kabikabina ya ginaulidiko. Na menai nige boda hesau maiaguwao, yo nige tamowai hesau maidagu ka haikawayagala o ka hetalagegagega. ¹⁹ Na Dius tamowaidiyao teha Eisiya unai taulaoma siya menai taukitagau ede. Na siya inai taba se toloma, na ena saha hesau unai se hegilugau kabo se hededeheemasalaha kalimyena. ²⁰ O taba tamowai ta ku henamaiyedi, huyana Sunedeli unai se helauhetlagau meta yababa saha se lobai kaliguyen. ²¹ Na nuwana ginauli kesega mo ta debanaena se hegilugau meta matadiyena ya tolo na ma kalina lakilakigu ya wane, 'Tauboibota kabo boita unai se tolo'uyo, unai ede kwa helauhetlagau ta!'

²² Na Peliki Yesu tauhemuliwatanina yodi kawamamohoi kabina ye katanamwanamwa. Kabo koigogo wa ye hekaiyawasi na ye wane, "Huyana Lisiyasi iyala kapinana ye lagema kabo yom lauhetala te ya hineli'uyoi." ²³ Ye hededelau sentuliyo hesau unai ye wane, "Paulo ku lae na kwa kitahetetenamwanamwaei, na gonowana ye sae yo ye dobi numa kalona ne unai, yo hinage kana kahao kabo se laoma se kita na ena ginauli saha udiyedi ye deha kabo unai se sagui."

²⁴ Mayadai hisa mulidiyena Peliki ma mwanena Dulusila—iya Dius waihiuna hesau—se laoma se lage Heloda yona kabamiya numana wa unai. Na kalina se hetamalilaei na Paulo se woyaiyama na Yesu Keliso kawamamohoiyena yodi ye hedehedede. ²⁵ Na Paulo ye hedehedede meta yoda miyamiya bena se dudulai Yaubada matanaena, yo tabu gadosisi yababadiyao yo nuwatu yabababadiyao ta hemuhemuliwatanidi, yo

ye hededeheemasalaha meta lauhetala lakilakina sola kabo ye laoma. Peliki hedehedede wa ye lapuidi meta ye siliyata yo ye matauskalili, unai ye wane, "Paulo, nabada, na ku lau. Na ena solasola hesau ya lobai kabo ya hedede ku uyoma." ²⁶ Peliki yona nuwatu meta Paulo kabo monilakilaki ye mosei na ye yailigabaei, unai huya maudoina Peliki ye hedede bena Paulo ye laoma na maiyana se hedehedede.

²⁷ Bolimai labui mulidiyena Peliki teha Yudeya yodi gabana wa meta Posiyas Pesitasi unai se helauhedamai. Na Peliki ye henuwa bena Dius tamowaidiyao nuwadiyao ye henamwadi, ede numatutugudu wa unai Paulo ye laugabaei.

Paulo yo Dius babadadiyao Pesitasi unai se lauhetala

25 Pesitasi iya teha Yudeya yodi gabana hauhauna ye lage Sisaliya unai yona paisowa ye hetubu, na mayadai haiyona mulidiyena kabo ye sae Yelusalema. ² Na temenai taukitalasam tauwoyaidi yo Dius babadadiyao se laomagogoi na Paulo yodi kabahegiluna hedeheddededi se hedegabaei Pesitasi unai, ³ yo hinage Pesitasi se kaibwadi bena taba Paulo Sisaliya unai se seuyoi Yelusalema. Na yodi nuwatu meta Paulo yodi saeyamana ne unai kabo kedaena se nayai na se koihemwalo. ⁴ Na Pesitasi ye hededelau udiyedi ye wane, "Paulo meta Sisaliya unai numatutuguduyena se tole, na nige bayaona kabo ya dobi'uyo menai. ⁵ Taba yomi tamowai lakilakidiyao hekadi se laoma maidaguwao ka dobi menai kabo Paulo yomi kabahegiluna hedeheddediyao udiyedi se hedehedede, na kabo ya lapuhekasa Paulo saha ye ginaulipwanoli o nige."

⁶ Yona miya Yelusalema unai meta nuwana mayadai haligigi-haiyona o saudoudoi se gehe kabo ye dobi'uyo Sisaliya. Na mala ye tom kabo ye yogagogoidima kabalahtala numana wa unai, na kabo ye hedede Paulo se woyaiyama. ⁷ Se woyahemasalahayama, na Dius tamowaidiyao Yelusalema unai taudobima wa Paulo se tolohetakikili na yodi kabahegiluna hedeheddededi yababayabadi maudoidi wa se hedededi. Na iyamo yodi hedehedede maudoidi wa nige kabahemamohoiyedi.

⁸ Kabo Paulo ye bom ye hededeheemasalaha'uyoi na ye wane, "Yau meta nige Dius yodi laugagayo ya utusi yo nige numa tabuna laugagayona hesau ya utusi, yo Loma yodi laugagayo nige hesau ya utusi." ⁹ Pesitasi ye henuwa bena Dius tamowaidiyao ye henuwanamwadi ede Paulo ye henamaiyeli ye wane, "Gonowana ku sae Yelusalema? Na ya saewa kabo lauhegilu hedeheddededi maudoidi ta hesabadi kwa lauhetala kaliguwai." ¹⁰ Na Paulo ye wane, "Ya totolo ta meta Loma yodi kabahelahelauhetala logulogunaena, unai ye namwa mo taba unai ku tolehedudulaigau. Na kabigu ku katakalili meta yau nige saha hesau yababana ya ginauli o Dius yodi laugagayo hesau ya utusi. ¹¹ Ena laugagayo hesau ya utusi na unai taba ya boita meta gonowana, yau nige

boita ya laukwatakwataei. Na ena lauhgilu maudoidi kaliguyena ta nige hesau mamohoina meta nige gonowana kowa o tamowai hesau ye moselaegau Dius ta udiyedi. Na ya henuwa taba ya lau Sisa ye helauhetagalagau."

¹² Pesitasi yo yona tamowai lakilakidiyo wa maidanao se hedehedegogoi, na se hedede ye gehe kabu ye hedelau Paulo unai ye wane, "Kowa ku henuwa Sisa ye helauhetalago. Gonowana! Kabu lau Sisa unai."

Wasawasa Agilipa ye laoma Pesitasi ye kaitaumanai

¹³ Mayadai hisa mulidiyena kabu wasawasa Agilipa ma louna Benisi se dobi Sisaliya bena Pesitasi se kaitaumanai, matauwuna iya gabana hauhauna.

¹⁴ Mayadai hisa maidadi se miya, kabu Pesitasi Paulo wasana ye hedehemasaalahwa wasawasa Agilipa unai ye wane, "Peliki tamowai hesau numatutugudu ne unai ye tole na ye laugabaei kaliguwai." ¹⁵ Huyana ya sae Yelusalema meta taukaitalasam tauwoyaidi yo Dius babadadiyo yodi lauhgilu hedeheddediyao se heddedi, yo se hedelaoama kaliguwai bena taba Paulo ya hekilaino. ¹⁶ Na ya hedelau udiyedi ya wane, 'Teina nige Loma yodi laugagayo kabikabina.' Na ya hedede bena tabu tamowai hesau ta mosegabaei na se hekilainogaibui, na bena tauhegiluna maidanao se lauhetalabaguna. ¹⁷ Huyana maidaguwao ka dobima inai ka lage yodi lauhetala wa hesabana, meta nige mahana ya gabaei, na mala ye tom ede ya yogagogoidima kabahelauhetala numana wa unai, ya hedede Paulo se woyaiyama na ya helauhetaldi. ¹⁸ Huyana tauhegiluna wa se hedehedede, meta yogu nuwatu kabu laugagayo hesau utusina hedehededenia unai se hedehedede, na iyamo nige. ¹⁹ Na kadi mata ede siya Dius se bom yodi sunuma kabikabidi yo laugagayodi udiyedi se hedehedede, yo hinage tamowai hesau hesana Yesu iya ye boitako, na Paulo ye hedede meta iya ye silasilawa. ²⁰ Yodi hedehedede wa unai meta nige saha hesau gonowana ya nuwatulobai. Unai Paulo ya henamaiyei ya wane, 'Taba gonowana ku sae Yelusalema na temenai lauhgilu ta udiyedi se helauhetalago?' ²¹ Na Paulo ye hedelaoama ye wane, 'Yau kabu ya lau Sisa unai ye helauhetagalagau!' Unai ya hedede Paulo ka tole numatutuguduyen, na muliyena kabu ya hetamalilaei Sisa unai." ²² Na Agilipa ye hedelau Pesitasi unai ye wane, "Ya henuwa taba tamowai ta yona hedehedede ya lapuidi." Ede Pesitasi ye wane, "Ye namwa, malaitom kabu Paulo kalinana ku lapui."

Paulo wasawasa Agilipa unai ye lauhetala

²³ Malaitom kabu Agilipa yo Benisi kadi leli se didigakalili se likwa yo yodi wasawasa hekihekinoidi se bahedi na se laoma boda yodi kabahekohekoikesega numana unai, na tau'iyala kadi tanuwaga lakilakidiyo yo magai wa babadadiyo

maiyadiyao. Se tuli, na kabu Pesitasi ye hedede Paulo se woyaiyama. ²⁴ Na kabu ye hedede ye wane, "Wasawasa saesaena Agilipa yo boda maudoimiu inai maidamaiyao ta, teina tamowai ta kwa kita! Yelusalema yo Sisaliya unai Dius tamowaidiyo se kaibwada kaliguyena se wane, 'Teina tamowai ta ye namwa mo tabu ye maumauli.' ²⁵ Na ya nuwatulobai meta teina tamowai ta unai nige yababa hesau ye ginauli na debanaena bena taba se hekilaino na ye mwalo. Na ye hedelaoama meta taba ya hetamalilaei Sisa unai. Ede kabu ya hetamalilaei Loma. ²⁶ Na nige kabina ya kata saha kabu ya kuli ye lau Sisa unai na yona ya hedehedede, matauwuna ede nige kabahegiluna hedehededenia mamohoina hesau ya lobai. Unai ya laeyama boda maudoimiu yo kowa wasawasa Agilipa kalimiuwai, bena kana mata mamohoina kwa wasenei na kwa lobai, kabu gonowana ya kulikulilau Sisa unai, na yona ya hedehedede. ²⁷ Ya nuwatui meta nige ye dudulai bena tamowai hesau nige kana mata mamohoina ya lobai na taba ya hetamaligaibuilaei Sisa unai bena ye helauhetala."

26 Na kabu Agilipa ye hedelau Paulo unai ye wane, "Gonowana kabu ku tolo na ku bom ku hedehemasaalah'uyoigo." Ede Paulo nimana ye lausini na ye koihekaiyawasidi na kabu ye hetubu ye hedehedede ² ye wane, "Wasawasa Agilipa! Nuwagu ye namwa yo ya gwauyala, matauwuna ya tolo matam yena na ya hedehemasaalah'uyoigau na Dius yodi lauhgilu hedehededenia maudoidi ta udiyedi ya hedede. ³ Matauwuna kabina ya kata meta kowa Dius kadi kulutubu kabikabidiyo yo Dius yodi laulauhetala kabidi ku katakalili. Unai ya kaibwadaigo bena ku lapulapuinamwanamwa kaliguyena.

⁴ Dius tamowaidiyo maudoidi ma gagiligu unai yogu miyamiya yo yogu laulau maudoidi kabidi se katakalili, yogu magaiyena yo hinage Yelusalema unai.

⁵ Huya lohaloha kabigu se katakalili, na ena se henuwa kabu se hedehemasaalahagau meta yau Paliseya tamowaina hesau, unai huya maudoina Dius yodi laugagayo yo yodi kabikabi ya ginauliwatanikaliliyedi. ⁶ Na se helauhetagalagau ta matauwuna ede yogu kawamamohoi Yaubada yona hededehesunuma kada kulutubu udiyedi wa ye hemamohoiyei. ⁷ Iya ede hededehesunuma Isalaela bogana saudoudoi-labui se nayanayai bena ye laoma, na huya maudoina, mayadai yo boniyai, Yaubada se kaihelahui ma nuwakohihaidi. yogu wasawasa, teina hededehesunuma ta kawamamohoiyena debanaena Dius tamowaidiyo se hegilugau ta. ⁸ Idohagi to kwa nuwapwanopwano na nige kwa kawamamohoi meta Yaubada tauboiboita ye hetolo'uyoidi?

⁹ Yau hinage beyabeyana yogu nuwatu meta ye namwa mo ya kaikaipate Yesu Nasaleta tamowaina yona nuwatu ya hekaiyawasi. ¹⁰ Iya ede saha ya ginauli Yelusalema unai. Taukaitalasam tauwoyaidi

yodi gigibwaliyena Yesu taukawamamohoiyena ya toledi numatutuguduyena, na ena yodi hineli se ginauli bena se koihemwaloidi, kabo yau hinage ya talam.¹¹ Huya badobado ya lau sunago udiyedi Yesu taukawamamohoiyena ya hekilainodi yo ya lauhelilidi taba Yesu se hedehedeyababai. Na ya kouyalayalakalili, ede ya lau magai hekadiyo udiyedi Yesu taukawamamohoiyena ya hekamkamnadi.

¹² Mayadai hesau taukaitalasam tauwoyaidi yodi gigibwali se leyama na se hetamaligau ya lau Damaseko.¹³ Yugu wasawasa, mayamayadailakiyena keda wa unai mala hesau galewa ne unai ye sinadobima ma kagu kahao kalimaiyena. Mala wa ya kita meta ye dawayakalili na kabo mahana dawayana.¹⁴ Mala wa dawayana unai maudoimai ka gulidobi bwatano wa unai, na kalina hesau ya lapui galewa ne unai kalina Alamaikiyena ye hedehededorobima kaliguwai ye wane, ‘Saulo, Saulo idohagi to ku hekamkamnagau ta? Nige gonowana yugu nuwatu ta ku laukwatakwataei.’

¹⁵ Na ya henamai ya wane, ‘Kowa kaiteya, Guiyau?’ Na kalina wa ye hededelaoma ye wane, ‘Yau Yesu ku hekamkamnagau ta.¹⁶ Ku tolo! Ya taumasalahalimawai ta bena ya kaisunuwaiyego yo ku hemala yugu taupaisowa yo tauwasaduwai, teina saha ku kita ta yo hinage muliyena ginauli hekadi kabo ya hekitago na ku wasaduwaiyedi.¹⁷ Ku lau yom tamowai yo dagela tamowaidiyao udiyedi ku wasaduwai. Na ena se hewaiunugo, yau kabo ya gilihaigo.¹⁸ Ya henuwataba ku hededelau udiyedi na se kitalobai, na masigili se laugabae se lau mala unai, yo diyabolo yona gigibwali sunumadi se hekaiyawasidi na se nuwabui se lau Yaubada unai. Na yodi sunuma debanaena kabo yodi yababa ya nuwatugabaedi yo ya tolelaedi yugu tamowai udiyedi.’

¹⁹ Unai, wasawasa Agilipa, yau nige ya kawayagala, na saha Yaubada ye hekitagau wa ya ginauliwatan. ²⁰ Bagubaguna ya lauguguya Damaseko tamowaidiyao udiyedi, na kabo ya lau Yelusalema yo Yudeya tehana maudoina, yo hinage dagela tamowaidiyao udiyedi ya lauguguya, bena se nuwabui na se laoma Yaubada unai, na yodi kabikabi yo yodi miyamiya unai se hemamohoiyei meta se nuwabuiko.²¹ Yugu lauguguya ta debanaena Dius tamowaidiyao se kabihekahnigau numa tabuna bakubakuna unai, na bena se koihemwaloigau.²² Na Yaubada ye kitahetetegau na ya maumauli ye laoma ee teina mayadai ta. Unai ya tolo matamiuyena na Yesu wasana ya lauguguyaei boda maudoimiu kalimiuwai. Nige saha hesau wasana ya lauguguyaei na Peloweta yo Mose saha se hededenonohaiyako wa,²³ meta Keliso kabo se hekamkamna yo ye boita, na kabo iya tamowai bagubagunana boita unai ye tolo'uyo, na iya kabo mala ye hemasalahalimawai Dius yo dagela tamowaidiyao udiyedi.’

²⁴ Yona hedehedede wa unai Pesitasi ma kalina lakilakina Paulo ye yogahigudugudui na ye wane,

“Paulo, ku yauyaule! Yom sonoga me se heyauyaulego.”²⁵ Na Paulo ye wane, “Wasawasa Pesitasi, yau nige ya yauyaule yo nige ya hedehededegeibu. Na saha ya heddededi ta meta mamohoidi yo gonowana ta nuwatulobaidi.²⁶ Ginauli maudoidiyao ta wasawasa Agilipa kabidi ye katako, unai gonowana ya hedehedede lau unai. Kabina ya kata ginauli maudoidiyao ta ye nuwatulobaidiko, matauwuna ginauli maudoidi ta nige se tubu wadawadamya. ²⁷ Wasawasa Agilipa, peloweta yodi hedehedede ku kawamamohoiyedi? Kabina ya kata meta ku kawamamohoiyedi.”²⁸ Na Agilipa ye hededelau Paulo unai ye wane, “Ku nuwatui bena huyakubwakubwa ta unai ku henuwabuigau na ya hemala Yesu taukawamamohoiyena hesau?”²⁹ Ede Paulo ye wane, “Nuwana kabo ya guguya ne ye kubwa o ye loha, temeta unai nige ya mode. Na ya tapwalolo yo ya kaibwada mo Yaubada unai kowa yo boda maudoimiu taulapulapui teina mayadai ta, bena kwa nuwabui yo kwa hemala doha yau, na tabu se paigomiu doha teina nimagu ma paipaidi ta.”³⁰ Kabo wasawasa Agilipa, gabana Pesitasi, Benisi, yo tamowai hekadi maiyadiyao se tutuli wa se tolo ede se pesa.³¹ Kabahekohekoikesega numana wa se pesagabaei na se bom yodi se hedehedede se wane, “Teina tamowai ta nige saha hesau yababana ye ginauli na debanaena bena se koihemwaloi o se tole numatutugudu unai.”

³² Na Agilipa ye hededelau Pesitasi unai ye wane, “Teina tamowai ta gonowana ku yailihai, na iyamo ye kaibwadako bena ye lau Sisa unai ye lauhetala.”

Paulo ye kadau ye lau Loma

27 Yoma lau Italiya nuwatudi maudoidi Pesitasi ye hineli hedudulaidi ye gehe, kabo Paulo yo taulauhetala tamowaidiyao hekadi ye mosehekawalaedi sentuliyo hesana Diuliyasi unai, kabo ye kitahetetedi. Diuliyasi meta tau'iyala bodana hesau hesana **Sisa yona tau'iyala** kadi tanuwaga hesau.² Ka dobi gadowa na temenai Adalamitiyam yodi waga hesau ka lobai. Waga wa bena kabo ye gelu ye lau teha Eisiya, na magaidiyao udiyedi bena ye lauhepehepesa, ede unai ka gelu. Alistakasi Masedoniya tamowaina, teha Tesalonika unai ye laoma, iya maidamai ka gelu ka lau.³ Mala ye tom meta Sidona unai ka duna, na Diuliyasi Paulo ye katekamkamnae ede ye talamyei na ye pesa kehanao ye kaitaumanaidi, na ginauli saha udiyedi ye deha meta kabo unai iya se sagui.⁴ Menai ka gelu'uyo na yaumai wa ka taumatai ede Saipulusi bwanabwanaluwana woyona unai ka lau.⁵ Silisiya yo Pampiliya gabwadi unai ka heulisikawasi na ka lau ede teha Lisiya magaina hesau hesana Maila unai ka duna.⁶ Menai sentuliyo wa Alesandiliya yodi waga hesau ye lobai bena kabo ye lau Italiya, ede ye hedede na unai ka gelukawasi.⁷ Na yaumai yona towapilipili debanaena mayadai lohaloha ka kadauyedi. Mulidiyena kabo ka lage Nidasi, na dedekanaena ka

heulisi ka lau. Yaumai wa ka taumatai, unai nige gonowana yoma kedakulu wa ka lauwatani, ede ka dobi Kiliti bwanabwanaluwa hesabana, na isutetena hesana Salamona unai ka giuli na bwanabwanaluwa wa woyonaena ka heulishihadididi.⁸ Na woyona heulisina wa ye yababakalili unai ka kaipate ka lau ee bwanabwanaluwa wa magaina lakilakina hesana Laseya ka laugabaei na dedekanaena kalotauna hesana Gadowa Namwanamwana unai ka duna.⁹ Na yoma kadau wa unai meta mayadai ka gabaedi se badokalili, ede yoma kadau huyana ye hetubu ye yababa ye lau. Matauwuna gwagwama yo wowoli huyana ye hanauma.*¹⁰ Unai Paulo ye hededelau waga wa taugeluina maudoidiyao wa udiyedi ye wane, "Tatao, ya nuwatui meta yoda kadau ta kabo ye pilipili yo ye yababakalili, kabo unai waga yo gogo maudoidi ta gabaedi yo hinage tamowai hekadi kabo se mwaloi."¹¹ Iyamo sentuliyo wa nige ye lapulau Paulo unai, na ye kitalau waga tauheyaisiyena yo waga tanuwagana yodi hedehedede wa udiyedi.¹² Na huyagwagwama unai Gadowa Namwanamwana kabamiyana nige ye namwakalili. Unai waga wa taugeluina maudoidi wa se henuwa bena taba ka gelu'uyo ka dobi Peniki na menai ka miya kana sigana wowoli yo huyagwagwama ta se gehe. Matauwuna ede Kiliti unai Peniki meta gadowana ye namwa yo huyagwagwama yo wowoli gadowana ede, na gadowa ta meta ye sanalau teha yalugumini yo teha bulumgai mo udiyedi.

Wowoli se hekalo

¹³ Na kabo yawana ye sibobo ede waga taupaisowaina wa yodi nuwatu meta gonowana se dobi Peniki. Unai lowo se tabeisini na bena ka heulishihadididi ka dobi.¹⁴ Nige bayaona kabo yaumai bayabayaona hesau hesana wediliya bwanabwanaluwa wa unai ye towa dikwama.¹⁵ Na waga wa wolewolena ye konai ede nige gonowana yaumai wa ka taumatai, unai ka boboyogabai.¹⁶ Ka dobi Kauda bwanabwanaluwa hesabana na woyona musamusana wa unai ka kaipate bena kabahekohekoitu wagana ka tabeisiniyama waga wa unai ka tolenamwanamwaei.¹⁷ Se paihekahini ye gehe kabo waga taupaisowaina maina lakilakidiyo se haidi na waga wa sadaina* udiyedi se paidi na waga wa se momosihebayao. Se matausikalili matauwuna ede nige se henuwa teha Libiya tahalina hesana Sitisi unai se heduna, ede wolewole hesau mainaena se pai na se gabadobiyei gabwa wa unai na bena waga wa ye tabetabenuwahi.

27:9 Kalina Giliki unai se kuli *Diis yodi kaihudi mayadaina ye lauko*. Na *Diis yodi kaihudi mayadaina* meta Sepetemba o Okotoba unai, na tenem teha ne unai Sepetemba duwaduwalina unai wowoli huyana yo huyagwagwama ye hetubu. Na kabo Nowemba duwaduwalina unai kadau maudoidi se hekaiyawasidi ye lau ee Pebuwali.

27:17 Waga *sadaina* kaniyona ede waga dedekadiyao labui.

27:28 *Kala 20* meta 37 metres o 120 feet.

27:28 *Kala 15* meta 27 metres o 90 feet.

¹⁸ Yaumai yo bagodu wa se kotakesegaidi na waga wa ye ini'inipuluhi ye lau ee mala ye tom unai waga wa kana kai'usa hekana se hesuluhepesadi.

¹⁹ Mayadai hehaiyonana unai ede se hetubu waga wa gogona hekadi se haidi na se hesuluhepesadi.

²⁰ Wowoli wa ye kotakesegai na ka kulolo huyaloholahakalili nige sola mahana o kipwala ka kitadi yo nige yoma kabalau kabina ka kata, unai maudoimai nuwamai se basabasa na ka nuwatui meta kabo ka boita.

²¹ Mayadai hisa se lau na waga wa unai taugelu maudoimai nige hesau ye kaikai, unai Paulo ye tolo na ye hedede ye wane, "Lahinai taba yogu hedehedede wa kwa lapuwatani na Kiliti bwanabwanaluwa unai sola ta miyamiya na nige ta kukegabaei, meta teina pilipili ta taba nige ta hekalo, yo gogo taba nige ta gabaedi.²² Na nuwamiu ya hededehebayaodi meta maudoida kabo ta namwanamwa na waga gaibu mo kabo ta gabaei.

²³ Matauwuna ede yogu Yaubada, iya kagu tanuwaga yo yau iya yona taupaisowa, boniyai wa unai iya yona anelu ye taumasalah dedekaguyena

²⁴ na ye wane, 'Paulo, tabu ku matausi. Kabo Sisa matanaena ku tolo yo ye helauhetalago. Yo hinage Yaubada yona kabinamwa yo yona gadosisiyena ye hededehehesunuma meta maidamwao taukadau maudoidi waga me unai taba nige se mwaloi.'²⁵ Unai ya hededelaowa nuwamiu se bayao matauwuna ede Yaubada ya sunumaei na saha ye hedededi wa meta kabo se tubu yo se mamohoi.²⁶ Na iyamo bwanabwanaluwa hesau unai kabo ta heduna na ye koisinida."

Waga se heduna

²⁷ Boniyai hesaudoudoi-hasina unai meta sola Adiliya gabwana wa unai ka kulokulolo'usi. Na boniyai duwaduwalina wa unai meta waga unai taupaisowa wa se nuwatui meta bena tano ka hanahanawuiyako.

²⁸ Unai kabanowonowoi ledina se hai na se heyoli, na gabwa wa lohana se liyei na se lobai meta gabwa lohana ede kala 20.* Ka kulokulolo nige bayaona na hinage gabwa wa se liyetonogi'uyoi meta lohana ede kala 15.*²⁹ Nowonowoi wa ka kitadi meta ka hanahanaukalilik, na ka matausi meta kabo ye koisinigai dakwadakwaena. Ede lowo hasi se gabaedi waga yiuna wa unai, na waga wa ye tabetabehkekahini. Na maudoidi se tapwalolo yodi yaubada udiyedi meta taba idohagi na mala ye tom'mwamwayau.³⁰ Na waga wa unai taupaisowa maudoidi se koitalaliu na bena se wasabu. Unai kabahekohekoitu wagana wa se hedalolodobiyei gabwa wa unai. Na yodi helupodi

bena kabo se sae waga isuna wa unai lowo hekadi se gabaedi.³¹ Na Paulo ye hededelau sentuliyo yo tau'iyala tamowaidiyo wa udiyedi ye wane, "Ena tamowai ta waga ta se wasabugabaei, taba nige ta namwanamwa."³² Unai tau'iyala tamowaidiyo wa kabahekohekoitu wagana mainana se boli'utusidi na ye kulolobasi.

³³ Mala ye hetubu ye uyali ye laoma, ede Paulo ye hededelau waga wa taugeluina maudoidiyo wa udiyedi meta taba se kaikai, na ye wane, "Mayadai saudoudoi-hasi se laoko udiyedi meta kwa matausikalili, unai nige kai hesau kwa kai."³⁴ Na teina maudoimi ta meta taba nige hesau kulum maiyawana kesega ye taukwadalele. Unai ya hedebayao kalimiyena bena taba kwa kaikainamwanamwa to kabo kwa maumauli."³⁵ Yona hedehedede ta mulinaena kabo pwalawa ye hai na maudoidi matadiyena ye tapwalolo yo Yaubada ye lautokiyei, na kabo pwalawa wa ye kihi na ye kai.³⁶ Unai kabo maudoidiyo wa nuwadi se talu yo se bayao na se kaikai.³⁷ Waga wa unai taugelu maudoimai meta badomai ede 276.³⁸ Ka kaikai ee ye gehe kabo waga kana usa'usa witi baikidi wa se hesuluhepesadi gabwa wa unai, bena waga wa ye kahaisae.

³⁹ Mala ye tom na waga unai taupaisowa magai nige se hekaolbai, na kalotau hesau naganagalina se kita. Unai yodi hekasa se ginauli meta bena ka sae unai ka hetatadunaduna.⁴⁰ Ede lowo ma mainadiyo se boligabaedi yo hinage heyaisi kabapaihekahnidi mainadiyo se yailigabaedi. Na kabo wolewole waga isuna wa unai se kukei na ka boboyo ka sae nagali wa hesabana.⁴¹ Ka sae ede waga wa ye heduna nituli hesau unai, na isuna wa ye talakahai tahali wa unai na nige gonowana ye sigi, na bagodu se guligulise waga wa unai ye lau ee waga yiuna wa ye koigwaligwali.

⁴² Tau'iyala tamowaidiyo se koitalaliu bena taulauhetala tamowaidiyo wa se koihemwaloidi na tabu se tubasae na se wasawasabugabaedi.⁴³ Na sentuliyo wa nige ye henuwa bena Paulo se unui, ede yodi koitalaliu wa ye hekaiyawasi, na ye hededelau taugelu maudoidiyo wa udiyedi ye wane, "Kaiteyadi gonowana kabo se tuba, meta se kamposi na se tubabaguna se sae magai."⁴⁴ Na kadi kahao hekadi meta waga ye koigwaligwali wa molumoluna tehadiyo se haidi na udiyedi se tuba se sae. Na maudoimai ka tubasae magai wa unai ma namwanamwamai.

Paulo yona miya Malita unai

28 Ka sae, na magai wa tamowaidiyo yomai se hedehedede meta bwanabwanaluwa wa hesana ede Malita.² Bwanabwanaluwa wa tamowaidiyo yodi laulau se namwakalili kalimaiyena. Kaiwa se yuhi na se yoganeigai ka lau ka kaimwaiga, matauwuna ede nabu ye talu yo gwagwama huyana.³ Ka kaikaimwaiga, na Paulo ye lau kaikaiwa

ye bahema bena ye gabudi. Na kaiwa kalakalasina wa gigibwalina unai mwata hesau kaikaiklasina ye nenepesa ede Paulo nimana ye kalasi na unai ye kabakabasi.⁴ Magai wa tamowaidiyo mwata wa se kita Paulo nimana wa unai ye kabakabasi, unai se wane, "Teina tamowai ta meta iya taukaikaiunu! Yodi yoli wa unai nige ye mwalo, na iyamo yoda yaubada Tautolehedudulai nige ye henuwa bena ye maumauli."⁵ Na Paulo nimana wa ye hekwade ede mwata wa ye koihebekudobiyei kaiwa kalakalasina wa unai, na kamnana ye lapui meta tauna wa nige se kamkamna.⁶ Na tamowai wa yodi nuwanuwatu kabo Paulo tauna se loloni yo ye guli na ye mwalo, na iyamo se naya huyalohaloha na se kita meta nige saha hesau ye tubu kalinawai. Unai yodi nuwatu wa se bui'uyoi na se hedede meta iya yaubada hesau.

⁷ Yoma kabakaimwaiga wa dedekana wa unai meta bwanabwanaluwa tamowaidiyo kadi tanuwaga lakilakina hesana Pabilusi yona tano. Ye yogaisinigai yona numaena ka miya na mayadai haiyona ye kitahetetenamwanamwakaliliyegai.⁸ Na Pabilusi tamana ye kasiyebwa na ye kenokeno yodi numa wa unai. Kana kasiyebwa meta taugwagwama yo bogalau. Paulo ye sae numakalo wa unai na taubada wa yona ye tapwalolo, na nimana ye tolesaedi taubada wa unai ede ye namwanamwa.⁹ Taubada wa ye henamwanamwa ede taukasiyebwa maudoidi bwanabwanaluwa wa unai se laedima, na Yaubada yona gigibwaliyena Paulo tamowai maudoidi wa ye henamwanamwadi.¹⁰ Unai tamowai maudoidiyo wa se hekasisikaliliyegai yo se kaikainauyaigai. Na huyana kabo bena waga hesau unai ka gelu, ede yoma kabinonoha wa unai kadau gogodiyao udiyedi se saguigai.

Paulo ye lau ye lage Loma

¹¹ Huya gwagwama wowolina wa debanaena Alesandiliya yodi waga hesau bwanabwanaluwa wa unai ye miyahekila. Waga wa isuna unai Giliki yodi yaubada labui Kasta yo Polakisi tautaudi se pusae na se tolehepatu.

Ka miya nawalai haiyona, na wowoli huyana wa ye gehe ede waga wa unai ka gelu na ka hetubu ka kadau ka lau Loma.¹² Silakusi unai ka duna na menai ka miya mayadai haiyona.¹³ Menai ka gelu'uyo ka sae Legiumu unai ka duna. Mala ye tom na yawana ye towa, ede ka gelu'uyo, na mayadai hesauna unai ka lage Puteyoli.¹⁴ Temenai Yesu taukawamamohoiyena tamowaidiyo hekadi ka lobaidi, ede se yogaisinigai na menai ka miya mayadai haligigi-labui, mulidiyena kabo ka sae Loma.¹⁵ Loma unai Yesu taukawamamohoiyena yoma sae wasana se lapui, ede se dobima Apiusi Yona Kabalokulokune yo Kabakaiyawasi Numana Haiyona magaidi udiyedi se launayanayaigai. Paulo tamowai ta ye kitadi meta nuwana ye bayao na tapwaloloyena Yaubada ye lautokiyei.¹⁶ Loma unai ka lage ede iyala kapinana wa

Paulo ye talamgabaei ye lau ye bom yona kabamiya, na tau'iyala tamowaina hesau ye laoma Paulo ye kitahetete.

Paulo yona miya Loma unai

¹⁷ Mayadai haiyona mulidiyena Paulo Dius babadadiyo Loma unai taumiya ye yogagogoidima na ye hededelau udiyedi ye wane, "Kehaguwao, nige saha yababana hesau ya ginauli yoda tamowai yo kada kulutubu kabikabidi yo miyamiyadiyo udiyedi, na iyamo Dius babadadiyo Yelusalema unai se haigaibuigau na se moselaegau Loma yodi laugagayo taukitahetetenam tamowaidiyo udiyedi. ¹⁸ Se henamaiyegau meta nige kagu mata hesau yababana se lobai bena kabo unai se unuhemwaloigau, ede lauhetala wa unai bena se yailigabaeigau. ¹⁹ Na Dius babadadiyo wa nige se henuwa bena lauhetala unai se yailigabaeigau. Ede ya kaibwada taba bena ya laoma Loma, na Sisa kabo ye helauhetagalau. Na yogu laoma ta unai meta nige bena helegu Dius tamowaidiyo ya hegiludi. ²⁰ Teina nuwatu ta debanaena ede ya hedede kwa laomagogoi, na ya hedehedede kalimiuyena ta. Seni ta unai se paigau, matauwuwna ede kita Dius yoda sunuma saha kabo ye tubu huya matadaena."

²¹ Unai Dius babadadiyo se hededelau Paulo unai se wane, "Nige sola leta hesau Yudeya unai se hetamaliyama na unai wasam ka hasili, o tamowai hesau metai ye laoma na wasam yababana hesau ye hedede kalimaiyena. ²² Na ka henuwa bena taba ka laomagogoi na yom nuwatu saha ku hedehedehemasalahadi na ka lapuidi, matauwuwna ede teha maudoina tamowaidiyo meta kada boda ta unai yom tapwalolo kabikabina ta se hedehededeheyababa."

²³ Unai yodi laomagogoi mayadaina se godu, ede bodalakilaki se laoma Paulo yona kabamiya wa unai na ye lauhekataedi, malatomtom yena ye hetubu ye lau ee meimeilahi. Yaubada yona basileiya hedehededenae ye hedehedehemasalah, na Mose yona laugagayo yo peloweta yodi kulikuli udiyedi ye

hekitadi meta Yesu Yaubada yona kaisunuwa tamowaina ede. ²⁴ Yona hedehedede wa udiyedi meta tamowai wa hekadiyo yodi talam se ginauli, na hekadiyo nige se kawamamohoi. ²⁵ Unai ede se bom se haihaikawayagala'uyoidi. Na bena kabo se dahalaigwalgwali se lau yodi magai, unai Paulo yona hedehedede gehegehedi ye hedededi kalidiyena ye wane, "Yaluwa Tabuna saha peloweta Aisaiya ye hekata na ye hededegabaedi kami kulutubu udiyedi meta se laoma se mamohoi. ²⁶ Doha Yaubada ye hededelau Aisaiya unai ye wane,

'Ku lau tamowai ta udiyedi na ku hedede ku wane,
"Yogu hedehedede kabo kwa lapulapuidi,
na taba nige kwa lapulobaidi.

Yogu laulau yo yogu kabikabi kwa kitadi,
na taba nige kwa kitalobaidi."

²⁷ Matauwuwna tamowai ta nuwadiyao meta se kwailolokalili,
beyadi se kolakola,
yo matadi se gibu.

Na taba matadi se lala, kabo se kitalobai,
yo taba beyadi se malapai, kabo hedehedede se lapulobaidi,
yo taba nuwadi se masalaha, kabo se nuwatulobai,
na nigele.

Unai nige gonowana se nuwabui na ya
henamwananamwadi.' (Aisaiya 6:9, 10)

²⁸⁻²⁹ Unai ede ya henuwa bena kabina kwa kata meta Yaubada yona kabihemauli ye ginauliye yo wasana ye laoko dagela tamowaidiyo udiyedi. Na siya kabo se lapulau Yaubada yona kabihemauli hedehededenae ta unai."*

³⁰ Paulo yona numa* wa unai ye miya bolimai labui. Na kaiteyadi se laoma bena iya se kita meta ye yogaisinidi, ³¹ na ma nuwabayaona Yaubada yona basileiya wasana ye lauguguyaeyo Guiyau Yesu Keliso wasana ye lauhekataei udiyedi. Na yona paisowa wa unai meta nige tamowai hesau ye gudugudui.

28:28-29 Kulikuli hekadiyo lausoiso 29 se kuli doha teina: *Paulo yona hedehedede wa ye gehe ede Dius tamowaidiyo se pesa na se bom se haihaikawayagala'uyoidi.* Tausonoga lausoiso ta nige se lobai buka beyabeyadiyo udiyedi, unai nige ka kuli buka ta unai.

28:30 *Paulo yona numa* Loma unai ye miyai na nawalai kesega kesega ye hemahemaisa. Dimdim unai se kuli *rented house*.

Paulo yona leta ekalesiya Galatiya unai taumiya udiyedi

Buka ta hededehe masalahana

Teina kulikuli ta meta leta Paulo ye kuli ekalesiya teha Galatiya unai taumiya udiyedi. Galatiya unai Paulo ekalesiya bodana ye hetubu, na kabo ye lau teha hesau unai ye paisowa. Paulo yona miyasuwala wa unai taulauhekata hekadiyo se lage na ekalesiya se henuwapwanopwanodi. Siya meta Dius luwadiyena se tubu, na tausunuma wa se hekatadi taba laugagayo se miyawatanidi. Iya ede laugagayo Yaubada ye mosei Isalaela tamowaidiyao udiyedi, doha kai yo mayadai yo kabikabi udoi'udoi laugagayodi, yo pelitome laugagayona.

Teina leta ta unai Paulo ekalesiya ye hedede hesibasibadi. Ye hededebayolaou udiyedi meta ewaneliya kesega mo, yo keda kesega mo ye lau mauli hesabana, iya ede sunuma Yesu Keliso unai. Tamowai hekadiyo wa yodi lauhekata iya ede lauhekatalupolupo, tabu se kawamamohoiyei. Paulo yona hedehedede hekadiyo se bayaokalili, matauwuna taulauhekata hekadi wa ye kouyalayalaedi.

Nuwatu lakilakidiyao

1. Apostolo mamohoina yo wasa mamohoina (1:1-10)
2. Wasa Paulo ye lauguguyaei wa meta mamohoina (1:11-2:10)
3. Laugagayo miyawatanina nige ye tolehedudulaida, na sunuma mo (2:1-4:31)
4. Yailihai miyana (5:1-6:10)
5. Tauwoyaida ede Yaluwa Tabuna yo gadosisi (5:1-6:10)
6. Paulo yona guguya yo lautoki (6:11-18)

Lautoki

1 Yau Apostolo Paulo yo Guiyau tauhemuliwatanina maudoidi maiyaguwao, leta ta ka kuli na ka hetamali ye laowa Guiyau taukawamamohoiyena maudoimiu teha Galatiya unai taumiya kalimiuyena.

Nige tamowai se kaisunuwaigau bera ya hemala apostolo, na Yesu Keliso yo Tamana Yaubada, iya Yesu boita unai ye hetolo'uyoi wa, se kaisunuwaigau.

³ Taba Tamada Yaubada yo Guiyau Yesu Keliso yodi kabinamwa yo yodi nuwadaumwali se leyawa kalimiuiwai. ⁴ Keliso Yaubada Tamada ye kawakabiyei na ye talamgabaei'uyoi ye hemala kaitalasam yoda yababa hesabadi, yo ye gilihaida tanoubu yababayababana ta unai. ⁵ Lautoki yo hedebasae ta mosei Yaubada unai huya maudoina ye lau ee nige kana siga. Mamohoi!*

Nige wasa hesau namwanamwana

⁶ Keliso yona kabinamwa debanaena Yaubada ye kaisunuwaigomiu. Ya siliyatikalili matauwuna huyana nige ye loha na taukaisunuwaigomiu wa kwa laugabaei'uyoi na wasa namwanamwana udoi kwa kawamamohoiyei. ⁷ Na iyamo wasa me meta nige wasa mamohoina, na tamowai hekadi se henuwa bera Keliso wasana namwanamwana se tolebui na nuwamiyao se hepwanopwanodi. ⁸ Na ena taba kai o apostolo hesau o galewa aneluna hesau wasa udoi ye lauguguyaei kalimiuiwai nige doha saha ka

lauguguyaei wa, meta taba hekamkamna lakilakina ye lobai. ⁹ Saha ka hedede yako wa meta kabo ya hedede'uyoi: Ena tamowai hesau wasa namwanamwana ye lauguguyai kalimiuyena nige doha wasa kwa haiyako wa, meta taba hekamkamna lakilakina ye lobai.

¹⁰ Hage yogu kwa hedehedede: Yogu hedehedede ta unai nuwana ya kaipate bera tamowai kabo se kitahenamwagau, o Yaubada? Nuwana ya kaipate bera tamowai ya henuwanamwadi? Taba nige! Ena ya kaipate bera tamowai ya henuwanamwadi, meta yau nige Keliso yona taupaisowa.

Wasa Paulo ye lauguguyaei wa yona kabalaoma ede Yaubada

¹¹ Kagu kahao, ya henuwa bera kabina kwa kata meta wasa namwanamwana ya lauhekata'usei ta, iya nige tamowai yodi nuwanuwatuyena ye laoma. ¹² Nige tamowai hesau unai ya hai o ye hekatagau na yogu kabahaina ede Yesu Keliso ye hemasalahadi kaliguwai.

¹³ Beyabeyana Dius yodi miyamiya yo yodi tapwalolo kabikabidi udiyedi ya miya, na yogu mauli wa wasana kwa lapuiyako, idohagi Yaubada yona dubu tamowaidiyao ya hekamkamnadi yo hinage bera ya unuhemwalohegehedi. ¹⁴ Kagu isi maudoidi luwadiyena meta yau Dius yodi tapwalolo kabikabidi maudoidi kabidi ya katakalili, yo hinage ya

kaipatebayaokalili bena taba kagu kulutubu kabikabidi ya hebayaodi tamowai udiyedi.

¹⁵ Sola nige se labasigau na Yaubada ye kaisunuwaigau na yona kabinamwaena ye yoganeigau. Na huyana ye hineli ¹⁶ bena natuna ye hemasalahayama kaliguyena na bena kabo yau dagela tamowaidiyao* udiyedi Keliso wasana ya lauguguyaesi, meta nige tamowai hesau ya henamaiyei, ¹⁷ yo hinage nige ya sae Yelusalema bena apostolo bagubagunadiyao ya kitadi na se hekatagau. Na yau meta ya dudulai mo ya lau teha Alabiya na menai muliyena kabo ya uyoma Damaseko.

¹⁸ Kabo bolimai haiyona mulidiyena ede ya sae Yelusalema Petelo ya kita na menai maidagu ka bawa sabati labui yo mayadai kesega. ¹⁹ Menai apostolo hekadiyo wa nige ya kitadi, na Guiyau* kana kaha Yamesi ye bom mo menai ya kita. ²⁰ Yaubada matanaena ya hededemamohoi kalimiyena: Ginauli saha wasadi ya kulidi ta meta nige ya lupoigomiu.

²¹ Na muliyena kabo ya lau teha Siliya yo Silisiya udiyedi. ²² Na Yudeya unai Keliso taukawamamohoiyena bodadi meta yau nige kabigu se kata. ²³ Na wasagaibugu mo se lapui, "Tamowai ta, iya beyabeyana ye hekamkamnada yo Keliso sunumana bena ye hekaiyawasi, iya ede Keliso sunumana ye laulauguguyaesi." ²⁴ Na saha ye tubu kaliguyena wa debanaena Yaubada se hedebasaei.

Yelusalema unai apostolo wa Paulo se kawanamwanamwaei

2 Bolimai 14 mulidiyena ede ya seuyo Yelusalema. Yogu sae ne unai meta Banaba maiyagu, yo hinage Taitasi maidamai ka sae. ² Yaubada yona hededehehemasalahi kaliguyena debanaena ede ya sae, na saha ya lauhekataei dagela tamowaidiyao udiyedi wa meta ya hededehehemasalahi kalidiyena. Na ya hededelau tauwoyawoya tamowaidiyao se bom mo udiyedi, yogu hedehedede wa kabo se hemamohoioyeidi e nige. Ya matausikalili matauwunna saha ya ginaulidiko yo saha kabo ya ginaulidi,* madai nige kaniyodi.

³ Tauwoyawoya wa se talameigau yo hinage nige saha hesau se hedede Taitasi unai bena taba ye pelitome. Na iya meta Giliki tamowaina na maidagu ka sae Yelusalema. ⁴ Pelitome nuwatuna wa nige ye masalahama ye lau ee tamowai hekadiyo se mwalaegaibuma luwamaiyena. Siya meta nige kada kahao mamohoidiyao, na bena yoda yailihai miyamiyana Keliso unai se kaikewasipwai. Yodi nuwatunna Dius yodi laugagayo maudoidi udiyedi

se kauda na ta miyawatanidi. ⁵ Na nige ka henuwa bena taba ka lapulapulau udiyedi, matauwunna ka henuwa bena wasa namwanamwana mamohoina tabu se bui na bena ye miya kalimiuyena.

⁶ Na dubu babadadiyao tamowai siya se kitahesae'useidi wa meta nige saha hesau se hededeheubeilaei yogu lauhekata wa unai. (Yodi sae ta meta nige yona udoi hesau kaliguyena, matauwunna Yaubada nige tamowai kana kaoyena ye kitahenamwagaibui.) ⁷ Na se kitalobai meta wasa namwanamwana hededehehemasalahana paisowanana ta Yaubada ye leyama bena ya ginauli dagela tamowaidi udiyedi, doha Petelo yona paisowa ye mosei Dius tamowaidiyao udiyedi wa. ⁸ Matauwunna Yaubada Petelo ye hepaisowa na wasa namwanamwana ye duwai Dius tamowaidi udiyedi wa, na Yaubada kesegana ta meta hinage yau ye hepaisowagau na paisowa ta ya ginauli dagela tamowaidi udiyedi. ⁹ Ede Yamesi, Petelo yo Yowane, siya tautolobaguna tamowaidiyao, se kitalobai meta Yaubada yona katekamkamnaena paisowa ta ye haiyama. Unai yau yo Banaba se lautokiyeigai yo se kawanamwanamwaeigai kabo ka lau dagela tamowaidiyao udiyedi na siya se lau Dius tamowaidiyao udiyedi. ¹⁰ Na yodi kaibwada kalimaiyena ede taba taudehadeha* ka nuwatuidi, na teina hekasa ta meta yau yogu nuwanuwatu lakilakina ede.

Paulo Petelo yona laupwano ye hekita

11-12 Muliyena, Petelo Yelusalema unai ye dobima Antiyoka. Bagunaena meta tausunuma siya nige Dius tamowaidi maidanao se kaikaigogoi, na huyana Yamesi kana bodao hekadiyo se laoma kabo ye bom ye tolehesuwala'uyoi matauwunna ede taupelitome tamowaidiyao wa* ye matausiyedi. Saha ye ginauli wa ye yababa, unai Petelo ya dilamatia. ¹³ Yona kailupolupo ta Dius tamowaidi hekadiyo Antiyoka unai taumiya wa se kita ede se hemuliwatani, yo hinage unai Banaba se woyahesuwala.

¹⁴ Na ya kita meta wasa namwanamwana miyamiyana mamohoina nige se miyamiyai, ede maudoidi matadiyena ya hededelau Petelo unai ya wane,

"Kowa Dius tamowaina, na iyamo yom miyamiya meta doha dagela tamowaidiyao, na nige doha Dius tamowaidiyao. Idohagi to bena dagela tamowaidiyao ku muyowuidi na bena Dius yodi miyamiya se miyamiyaeidi?

1:16 Dagela tamowaidiyao ta, siya meta nige Dius tamowaidiyao.

1:19 Guiyau ta meta Yesu. Na Yamesi meta Yesu kana kaha mamohoina.

2:2 Yona kufikuli unai Paulo yona paisowa ye heyaheyasoniyei heloikailakwa unai. Heyaheyasoni ta 2 Timoti 4:7 unai hinage ta lobai. Na kalina Saliba unai nige gonowana yoda paisowa ta heyaheyasoniyei kailakwa unai, unai ede heyaheyasoni ta kaniyona ka kuhemmasalahi lausoisoi ta unai.

2:10 Taudehadeha ta, siya ede Yesu tausunumaena Yelusalema unai taumiya nige gonowana se bom se sagu'uyoidi.

2:11-12 Taupelitome tamowaidiyao wa se lauhekata meta ekalesiya tatao maudoidi bena pelitome se hai yo hinage Dius yodi laugagayo maudoidi se miyawatanidi. Ena nige, meta nige gonowana siya Keliso tausunumaena mamohoidi.

¹⁵ Kita meta nige ba'aya tamowaidi doha dagela tamowaidiyao, matauwununa ede se labasida meta kita Dius tamowaidi. ¹⁶ Na iyamo kabina ta kata meta Yaubada tamowai nige laugagayo lauwatanina unai ye tolehedudulaidi, na yona sunuma Yesu Keliso unai debanaena ye tolehedudulaidi. Unai kita hinage yoda sunuma ta tole Yesu Keliso unai, to kabo Keliso sunumana unai Yaubada ye tolehedudulaida, na nige laugagayo miyawatanina debanaena. Matauwununa ede nige gonowana tamowai hesau laugagayo mo miyawatanina debanaena Yaubada kabo iya ye kitahenamwa.

¹⁷ Huyana ta kaipate sera Yaubada ye tolehedudulaida Keliso debanaena, meta ta masalahi ede kita Dius tamowaidiyao hinage ma yababada. Unai kaniyona ede saha, Keliso iya ye woyaida ta lau yababa unai? Nige kalikalili. ¹⁸ Na ena taba laugagayo beyabeyana wa miyamiyana ya hekaiyawasi, na muliyena ya miyawatani'uyoi,* kabo ya hemasalahauyoigau meta yau laugagayo tau'utusina.

¹⁹ Matauwununa laugagayo debanaena ya boitako na yona gigibwali kaliguwai ye gehe.* Unai taba sera ya mauli Yaubada yona. ²⁰ Keliso yona boita sataulo unai meta yau hinage maidagu ka boita. Unai nige yau ya maumauli, na Keliso kaliguyena ye miya.* Taugu ta unai ya miyamiya ta meta Yaubada natuna sunumana unai ya miyamiya, iya ye gadosisiyeigau na yona mauli ye mosegabaei yau hesabagu. ²¹ Na yau taba nige Yaubada yona katekamkamna ya tolehesuwala, matauwununa ede, ena taba Yaubada tamowai ye tolehedudulai laugagayo miyawatanina debanaena, meta Keliso yona boita ne nige kaniyona.”

Kabatolehedudulaida ede saha—laugagayo o sunuma?

3 Komiu Galatiya meta tamowai yauyaulediyao. Kaiteya ye lupohaigomiu? Komiu kalimiuyena meta Keliso yona boita Sataulo ne unai kaniyona maudoina ya hededehemasalaha. ² Ya henuwa sera yogu kwa hedehedede: Idohagi na Yaluwa Tabuna kwa hai, laugagayo miyawatanina debanaena, o Keliso wasana kawamamohoieina debanaena? ³ Sola ma yauyaulemiu? Yomi ekalesiya maulina Yaluwa yona gigibwali unai kwa hetubu, na idohagi to kwa kaipate sera kwa bom yomi bayao yena kwa miyai?

⁴ Beyabeyana wasa namwanamwana debanaena kwa kamkamnakalili. Mamohoi kwa kamkamnagaibu e

nige? Ya nuwatui nige. ⁵ Hage, yogu kwa hedehedede: Yaubada iya Yaluwa Tabuna ye haiyawa yo laulau gigigibwalidi ye ginaulidi kalimiuyena meta laugagayo miyawatanina debanaena, o Keliso wasana kawamamohoieina debanaena?

⁶ Gonogonowana doha Abelahama wasana ta hasili buka tabuna unai: “Iya Yaubada ye sunumaei, debanaena Yaubada ye hedede meta Abelahama iya miyamiyadudulai tamowaina.” (*Genese 15:6*) ⁷ Unai sera kwa nuwatulobai meta Abelahama natunao mamohoidi ede Yaubada tausunumaena.

⁸ Beyabeyana kulikuli tabuna ye hededenonohaiyako meta dagela tamowaidiyao Yaubada kabo ye tolehedudulaidi yodi sunuma debanaena, doha wasa namwanamwana hedehededenya ye hededehemasalahanonohai Abelahama unai ye wane, “Tanoubu maudoina kalimyena kabo hededehehenamwa se hai.” (*Genese 12:3; 18:18; 22:18*)

⁹ Unai sera tausunuma meta Yaubada ye hededehehenamwadi gonogonowana doha Abelahama sunuma tamowaina wa.

¹⁰ Kaiteyadi se kitalau laugagayo miyawatanina unai sera kabatolehedudulaidi, sera meta hededeheyababa logologunaena se miya. Matauwununa kulikuli tabuna unai ye wane, “Laugagayo bukana unai ginauli maudoidi se kulidi ne, ena tamowai hesau nige ye miyawataninamwanamwaedi, meta iya hededeheyababa logologunaena ye miya.” (*Dutelonomi 27:26*) ¹¹ Ye masalahakalili meta laugagayo nige gonowana tamowai hesau ye tolehedudulai Yaubada matanaena, matauwununa ede, “Taumiyamiyadudulai meta sunuma debanaena kabo se mauli.” (*Habakuku 2:4*) ¹² Na laugagayo meta nige sunuma unai ye tolo, iya meta udoi. Na buka unai ta hasili meta “Laugagayo hedehededeni taumiyawatanidi, iya yona laulau debadiyena kabo ye mauli.” (*Lewitikasi 18:5*) ¹³ Laugagayo ye hegiluda na kita hededeheyababa logologunaena. Na huyana Keliso se hekabasi sataulo unai meta kada hededeheyababa wa iya ye haidi, unai ede ye hemaisahaida. Doha kulikuli tabuna unai se kulyako se wane, “Ena tamowai hesau sataulo unai se hekabasi meta iya hededeheyababa tamowaina.” (*Dutelonomi 21:23*) ¹⁴ Yesu Keliso ye hemaisahaida na iya debanaena hededehehenamwa ye mose Abelahama unai wa sera ye laoma dagela tamowaidiyao udiedi. Kaniyona ede sera sunuma debanaena Yaubada Yaluwa Tabuna ye hededehehesunuma wa kabo ta hai.

2:18 Ena taba laugagayo beyabeyana wa ... ya miyawatani'uyoi: Nuwatu ta Paulo heyahayasoni unai ye kuli: *Ena ginauli hesau ya hetatagwaliwali na muliyena ya ginauli'uyoi ...*

2:19 Laugagayo ye hemasalahada meta kita yababa tauginalidi, na yababa maisana ede boita. Na laugagayo nige gonowana tauboiboita ye tanuwagaidi.

2:20 Hedehedede ta kaniyona ede, Paulo nige ye bom yona nuwatu ye miyawatani, na yona miyamiya maudoina tautanuwagaedi meta Keliso.

Yaubada yona hededehehesunuma Abelahama unai meta laugagayo ye saedikwai

¹⁵ Kagu kahao, mayadai maudoina maulina miyamiyana heyahayasonina hesau ya hai na ya hedehededei: Taba tamowai labui ginauli saha hesau se koitalaliuye na se talamyei, meta nige gonowana tamowai hesau yodi nuwatu ne ye tolehesuwala o unai saha hesau ye hedede. Gonogonowana doha Yaubada yona hededehehesunuma:

¹⁶ Hededehehesunuma wa ye hedede Abelahama maidana kana isimulita kalidiyena. Nige ye hedede ye wane, "kam isimulitao udiyedi", kabo hededehehesunuma tauhaina ne se bado, na ye wane "kam isimulita tamowaina unai". Hedechedede ta kaniyona ede tamowai kesega mo, iya ede Keliso.

¹⁷ Yaubada yona hededehehesunuma Abelahama unai na bolimai 430 se lau, kabo laugagayo ye masalahama. Laugagayo ta ye mulitama, unai nige gonowana hededehehesunuma wa ye tolehesuwala.

¹⁸ Taba ena Yaubada yona kainauya ta hai laugagayo yoda miyawatanina debanaena, meta nige gonowana Yaubada yona hededehehesunuma debanaena kainauya ne ta lobai. Iyamo huyana yona katekamkamna unai Yaubada yona kainauya wa ye mosei Abelahama, meta nige laugagayo unai, na hededehehesunuma unai.

¹⁹ Ena doha teina, kabo laugagayo ne kana paisowa saha? Yaubada ye leyama kabo ye hekitalobaida meta yababa ta ginauli. Laugagayo yona paisowa ta ye ginauli ye lau ee kana sigana Yaubada yona hededehehesunuma tamowaina wa ye lagema.

Laugagayo ta meta Yaubada ye mosei anelu udiyedi na se mosehekawalaei Mose unai, iya meta Yaubada yo tamowai duwaduwalidiyena tautolo. ²⁰ Ena tamowai labui bena yodi talam se ginauli, meta tautoloduwaduwali se henuwa. Na huyana Yaubada hededehehesunuma ye mosei Abelahama, meta iya ye bom ye ginauli.*

²¹ Ta hededeyako meta Yaubada yona hededehehesunuma debanaena tamowai ye tolehededulaidi na mauli se lobai. Unai ede hage idohagi, laugagayo meta Yaubada yona hededehehesunuma ye tolehesuwala? Nige kalikalili! Ena taba Yaubada laugagayo hesau ye leyama unai kabo mauli ta lobai, meta kabo kabatolehededulaidi ede laugagayo. ²² Na kulikuli tabuna ye hededehehesalaha meta tanoubu maudoina ta yababa yona kaukau tamowaidiyo. Unai Yaubada saha ye hededehehesunuma wa meta bena Yesu Keliso ta sunumaei na ta hai, na tausunumaena maudoidi gonowana yona kainauya ne se hai.

²³ Huyana sola nige sunuma ta ye masalahama meta kita laugagayo kaukauna unai ta miya. Ye

kabihekakinida ye lau ee kana sigana sunuma ta ye masalahama. ²⁴ Laugagayo wa ye tole meta kabo ye kitahetetede na ye woyaida ta lau Keliso unai, na kabo ye tolehededulaida sunuma debanaena. ²⁵ Na sunuma wa ye laomako, debanaena meta kita nige laugagayo yona kitahetete unai ta miyamiya, ²⁶ matauwuwuna komiu maudoimiu ta Yaubada natunao Yesu Keliso yomi sunumaena debanaena. ²⁷ Kaniyona ede maudoimiu ta Yesu Keliso unai se hebabatisogomiu meta Keliso kwa luwui doha luwuluwu. ²⁸ Unai ede bodamiuyena meta nige hekasana hesau, bena Dius o Giliki, heyayai tauhaina tamowaina o yailihai tamowaina, loheya o waihiu, matauwuwuna ede Yesu Keliso unai maudoimiu ta meta boda kesega. ²⁹ Ena komiu Keliso yona, meta komiu Abelahama kana isimulitao yo Abelahama lauhedamainao hededehehesunuma wa debanaena.

4 Saha ya hedede'usei ta meta doha teina: Ena tamowai hesau ye boita meta natuna kabo iya tamana lauhedamainao yona gogo maudoidi tanuwagadi. Na ena iya sola ma gagilina na tamana ye boita meta iya yo yona taupaisowa tamowaidiyao maidanao gonogonowadi. ² Wawaya ne meta iya taukitahetetenya yo gogo ne taukitahetetedi yodi gigibwali logulogunaena ye miyamiya kana sigana ye lakilaki yo tamana yona heksa mayadaina ye tole wa ye sae ye lobai. ³ Gonogonowana doha hinage, huyana kita sola nige Keliso kabina ta kata na kada kao doha wawayao supusupudi, meta kita kaiyaulina ta miyamiyadiyo logulogudiyena ta miyamiya.

⁴ Na huyana Yaubada yona kaisunuwa mayadaina mamohoina ye lage meta Yaubada natuna ye hetamaliyama. Waihiu unai ye tubu na ye labasi laugagayo logulogunaena, ⁵ bena laugagayo logulogunaena taumiya maudoida ye hemaisahaida, yo hinage bena natu yona dudulai mamohoina ta hai.

⁶ Komiu meta Yaubada natunao, unai Yaubada natuna yaluwana ye hetamaliyama nuwada ta udiyedi na ye hekatada na ta yogayogasae Yaubada unai ta wane, "Aba,* Tamagu!" ⁷ Unai komiu meta nige taupaisowa tamowaidiyo, na komiu meta natu. Na kwa hemala natu ta unai ede Yaubada ye hetologomiu yona hededehehesunuma tauhaidi.

Tabu kwa uyo'uyo

⁸ Huyana sola nige Yaubada kabina kwa kata meta komiu kaiyaulina ta yaubadadi* yodi taupaisowa tamowaidiyo, siya nige yaubada mamohoidi. ⁹ Na teina huya ta komiu Yaubada kabina kwa katako, o taba ya wane, Yaubada kabimiu ye katako. Na idohagi to kwa kitakitabui'uyo kaiyaulina ta yona kabikabi basabasadi ta udiyedi. Idohagi, kwa henuwa bena

3:20 Yaubada laugagayo ye mosei Isalaela tamowaidi meta Mose ye hepaisowa iya tautoloduwaduwali. Na huyana yona hededehehesunuma ye mosei Abelahama meta ye hedededudulai Abelahama unai. Unai ta kita meta Yaubada yona hededehehesunuma wa ye saekalili na kabo laugagayo wa.

4:6 Aba kaniyona ede tamagu kalina Hebelu yo Alamaiki udiyedi. Wawayao gagilidi teina hedehedede ta se hepaisowa na se yogalau tamadiyo udiyedi.

4:8 Galatiya tamowaidi meta koitau udoi'udioi se tabataba'ohuidi, bena udiyedi sagu se lobai.

kwa uyo kwa hemala siya yodi heyayai tauhaidi?

¹⁰ Komiu meta mayadai, nawaiai, huya yo bolimai saesaedi hekasisidi yo kabikabidi sola udiyedi kwa miyamiya. ¹¹ Debamiuyena ya matausikalili matauwuwuna kana kao doha yogu paisowabayao kalimiuyena meta kabo nige kaniyona.

^{12a} Kagu kahao yo louguwao, ya hedehedebayao kalimiuyena bena yomi mauli kwa buidi doha yau, matauwuwuna huyana ya lagewa meta yau yogu mauli doha komiu.*

^{12b-13} Kabina kwa kata meta yogu huyalage bagubagunana unai ya kasiyebwa, na debanaena ya miya kalimiuwai na wasa namwanamwana wa ya lauguguyaei kalimiuyena. Na iyamo nige saha yababana hesau kwa ginauli kaliguyena. ¹⁴ Kagu kasiyebwa ta ye henuwatupilipilicomiu, na nige unai kwa subugau o kwa kitaheyababagau, na kwa yogaisinigau doha Yaubada yona anelu hesau, o yau doha Yesu Keliso ede. ¹⁵ Beyabeyana yomi gwauyala maudoina meta haedi se lauko. Huyana ne unai yomi gadosisi ye lakikalili. Ena gonowamiu meta kabo hinage matamiu kwa lamohaidi na kwa haidima—saha ya hedede ta meta mamohoi! ¹⁶ Hage idohagi, hedehedede mamohoina yogu hededehemasalahana ta unai ede ya hemala kami waiunu?

¹⁷ Siya taulauhekatalupolupo ne meta se kaipatekalili bena se henuwanamwagomiu na bena kwa patulau udiyedi, iyamo nige yomi namwa o dudulai hesau hesabana. Saha se henuwa ede bena kalimaiyena komiu se tolehesuwalagomiu, na kabo kwa patulau siya udiyedi. ¹⁸ Ye namwa mo taba huya maudoina kwa kitaloma kaliguwai, huyana yau maidamiu ta miyagogoi yo hinage yogu miyasuwala udiyedi.*

¹⁹ Natuguwao, debamiuyena meta kamkamna lakilakina ya hekalo'uyoi doha labalaba kamkamnana, na kamkamna ta kabo ye lau ee Keliso kana kao ye masalah yo ye tubu kalimiuyena. ²⁰ Na ya henuwakalili bena yau taba maidamiu metai, to kabo gonowana ya hedehedenanwanamwana kalimiuwai, na iyamo kedagu ye lohakalili. Unai nuwagu ye pwanopwano yo nige kabina ya kata saha kabo ya ginauli hesabamiu.

Hega yo Sala meta talam beyabeyana yo hauhauna heyaheyasonidi

²¹ Hage yogu kwa hedehedede, komiu kaiteyadi kwa henuwa bena Mose yona laugagayo logulogunaena kwa miya, na laugagayo* wa hedehededenmaudoidi kabidi kwa kata o nige? ²² Matauwuwuna kulikuli tabuna unai ta hasili meta Abelahama natunao labui. Natuna hesau meta heyayai tauhaina waihiuna* wa ye labasi, na natuna hesauna ne meta Abelahama mwanena mamohoina* iya ye labasi.

²³ Na heyayai tauhaina waihiuna wa natuna ye labasi meta Abelahama yona nuwatu unai ye tubu, na Abelahama mwanena mamohoina meta hedehesunuma debanaena natuna ye labasi.*

²⁴ Teina sinesinebadao labui ta meta Yaubada yona talam labui heyaheyasonidi. Hega meta ye hemala talam bagubagunana Yaubada ye mosei Mose Sinai kudulina unai wa, na teina talam ta unai meta tamowai maudoidi laugagayo ye heyayaiyedi. ²⁵ Hega heyaheyasonina ede Sinai kudulina teha Alabiya unai, na teina huya ta unai kana kao doha Yelusalema magaina lakilakina, matauwuwuna iya yo natunao laugagayo unai meta ma kaukaudi. ²⁶ Na sinebada Sala, iya nige heyayai tauhaina wa, meta iya sinada. Iya meta Yelusalema hauhauna galewa ne unai ye heyaheyasoniyei. ²⁷ Iya ede kulikuli tabuna unai se kuliyako se wane,

“Kowa waihiu kobokobosina nige natum,
benku gwauyala.

Kowa nige labalaba kamkamnana hesau kamnana
ku lapui,

benku wana yo ku gwauyala,
matauwuwuna waihiu miyamiyagologolowanana
natunao kabo se badokalili
na kabo waihiu tawatasolana.”* (ISA 54:1)

²⁸ Unai kagu kahao, komiu meta doha Isako, Yaubada yona hedehesunuma wa unai kwa tubu.

²⁹ Abelahama yona huya unai wawayabuluma unai ye tubuma wa meta wawayabuluma yona gigibwali unai ye tubuma wa ye hekamkamna. Teina laulau ta iya ede gonogonowana doha teina kalidaena. ³⁰ Na kulikuli tabuna unai saha ta hasili? Ye wane, “Heyayai tauhaina waihiuna ne ma natuna ku tolehesuwaladi, matauwuwuna waihiu yaialihaina ne natuna meta tamana yona dudulai maudoina kabo ye haidi, na heyayai tauhaina waihiuna ne natuna taba nige saha hesau ye hai.” (Genese 21:10)

4:12a Huyana Paulo ye lage Galatiya tehana unai meta yona laulau ye buidi ye hemala doha dagela tamowaidi, na nige ye tolobayao laugagayo unai. Lausoisoit a unai ye wane taba tausunuma Galatiya unai wa hinage tabu se kitakitalau laugagayo unai.

4:18 Lausoisoit a unai Paulo yona nuwatu nige ye masalahakalili. Tausonoga hekadiyo se wane hedehedede ta kaniyona bena doha teina: *Ye namwakalili ena taba huya maudoina taukitahetetegomiu maidamiu kwa miyamiya na se paisowa ma nuwakohihaidi, ena se paisowa yomi namwa hesabana, doha yau huyana maidamiu wa.*

4:21 Hedehedede laugagayo Paulo yona huyaena se hepaisowa teha labui udiyedi: (1) laugagayo Yaubada ye moseidi Sinai kudulina unai, yo (2) Genese, Esodo, Lewitikasi, Numela, yo Dutelonomi bukadiyao. Inai laugagayo kaniyona ede Genese bukana.

4:22 Iya ede Hega.

4:22 Abelahama mwanena mamohoina ede Sala. Iya meta nige heyayai tauhaina waihiuna, na iya Hega kana tanuwaga.

4:23 Hega yo Sala ma natudi wa wasadi kabo ku hasili Genese 16:1-4 (Hega natuna Isamaela), 17:15-21 yo 18:10-14 (Sala natuna Isako).

4:27 Buka Beyabeyana hedehededenia ta Paulo ye hasili na nuwanuwatuna ede tamowai se bado kabo Yaubada ye gilihaidi sunuma debanaena, meta yodi kabagwauyala.

³¹ Unai kagu kahao yo louguwao, kita meta nige heyayai tauhaina waihiuna natunao, yo nige laugagayo logulogunaena ta miya. Na kita meta waihiu yaiyailihaina natunao, yoda sunuma debanaena Yaubada ye kawanamwanamwaeda yo ye haida ta hemala natunao.

Keliso unai yailihai miyana unai bena ta miya

5 Keliso iya ye yailihaidako, unai kita meta yailihai tamowaidiyao. Unai kwa tolobayao na tabu tamowai hesau ye hephilipili'uyoigomiu laugagayo miyamiyadi udiyedi.

² Kwa lapulapui, yau Paulo ya hededelaowa: Ena kwa henuwa bena se hepelitomeigomiu, meta Keliso nige gonowana ye saguigomiu. ³ Na ya hedede'uyo kalimiuyena: Ena tamowai hesau ye henuwa bena se hepelitomei, meta iya bena laugagayo kabikabidi maudoidi ye miyawatanidi. ⁴ Ena ku henuwa bena Yaubada ye kitahenamwago laugagayo miyawatanina debanaena, meta kowa Keliso ku patugabaiyako yo yona gadosisi yo kabinamwa udiyedi meta kowa nige. ⁵ Na kai Yaluwa unai taumiya meta ma nuwabayaomai ka nayanayakalili bena Yaubada yona hededehegesunuma kalidawai wa ye hemamohoiei na ye tolehededulaigai sunuma debanaena.

⁶ Matauwuna Yesu Keliso unai taupelitome o nige taupelitome meta nige yona udoi hesau. Na saha ye saekalili ede sunuma, na sunuma ta kabahemasalahana ede gadosisi miyamiyana unai.

⁷ Yomi huanuwabui unai ye laoma meta kwa paisowanamwanamwakalili,* na kaiteya ye hededelaowa bena wasa mamohoina hemuliwatanina ta kwa hekaiyawasi? ⁸ Temeta hedehedede me meta Yaubada tauyoganeigomiu iya nige yona nuwatu. ⁹ Taba pwalawa lakilakina na yisti gagilina unai ta hebwali meta kabo pwalawa ne maudoina ye sese. Unai, taba luwamiuyena lauhekatalupolupo gagilina, meta maudoimiu kabo ye woyahesuwalagomiu. ¹⁰ Iyamo yau nuwagu ta ye bayao Yaubada unai meta nige gonowana komiu kabakitalau hesau unai kwa kitalau. Na tauhenuwapwanopwanogomiu ne meta kabo hekamkamna ye lobai, matauwuna Yaubada nige gonowana tamowai hesau ye hekasisigaibui.

¹¹ Kagu kahao yo louguwao, taulauhekatalupolupo wa se hedede bena yau hinage pelitome kabikabina ya lauguguyaesi. Na ena taba pelitome kabikabina ya laulauguguyaesi, meta idohagi to Dius tamowaidiyao se hekamkamnagau? Na ena taba pelitome kabikabina ya laulauguguyaesi, meta sataulo lauhekatana ne nige koipilina hesau. ¹² Na siya taupelitome tamowaidiyao se henuhenuwasaegomiu ne, ye namwa mo taba se lau se nigwahaimolosiyei.*

¹³ Kagu kahao, laugagayo unai Keliso ye yailihagomiu. Na tabu yomi yailihai yona dudulai ne kwa hepaisowa na nuwatu yababayababadiyo kwa ginaulidi. Ye namwa mo taba gadosisiyena kwa haisagusagu'uyoigomiu. ¹⁴ Laugagayo maudoidi meta hedehedede lakilakina kesega ye kabigogoihegehedi, iya ede, "Kam kaha ku gadosisiyei doha kowa ku bom ku gadosisi'uyoigo." ¹⁵ Ena kwa bom kwa hewahewaiunu'uyoigomiu, doha suisui se bom se lulululu'uyoidi, bena kwa kitakitanamwanamwa, matauwuwuna ede kami boda kabo kwa hetatagwaligwali.

Tauda gadosisidi laulaudiyo

¹⁶ Unai ya hededelaowa bena Yaluwa Tabuna yona hesibasiba unai kwa miya, kabo taba nige gonowana taumi ta yona gadosisi maudoidi kwa lauwatanidi.

¹⁷ Matauwuna tauda ta yona gadosisi meta ye kaipate bena Yaluwa yona gadosisi ye hekaiyawasi, yo Yaluwa yona gadosisi meta ye kaipate bena tauda ta yona gadosisi ye hekaiyawasi. Se hewahewaiunu'uyoidi, unai nige gonowana kwa bom yomi nuwatu namwanamwadi kwa ginauliwatanidi.

¹⁸ Na ena Yaluwa ye woyawoyaigomiu meta komiu nige laugagayo logulogunaena kwa miya.

¹⁹ Tauda ta yona gadosisi ginaulidiyo se masalahakalili, siya ede teina: nuwatubiki kabikabidiyo yo laulau yababayababadiyo udoi'udoi, ²⁰ koitau taba'ohudi, kalawai yo taubalau yo kabikabidiyo udoi'udoi, haihewahewaiunu, miyagegagega, kaikalomagigili, koukouyalayala, mahimahihi, haihaikawayagala, kabikabiboda, ²¹ gadolelehi, numanumayauyaule, gwauyalabikibiki, yo laulaudiyo se bado. Lahinaidi ya hededelaowako kalimiuyena, na teina hinage ya hedede'uyoi kalimiuyena: Ena tamowai hesau miyamiya ta udiyedi ye miyamiya meta taba nige ye lusola Yaubada yona basileiya unai.

Yaluwa Tabuna yona woyawoya kaniyodi

²² Na yaluwa kaniyona ede teina: gadosisi, gwauyalala, nuwadaumwali, nuwatalu, kabinamwa, haisagusagu, tololahitahi, ²³ nuwadobidobi, yo kitahetete'uyoida. Teina nuwanuwatu maudoidiyao ta meta nige laugagayodi hesau. ²⁴ Na kaiteyadi se patulau Yesu Keliso unai meta taudi ta nuwatudi yababadi yo yodi lelehi bikibikidi se hesataulodiko. ²⁵ Na kita Yaluwa unai taumiya meta bena Yaluwa yona nuwatu maudoidi udiyedi ta laulau. ²⁶ Tabu ta haihaisaesae, tabu ta hekohekoipili'uyoida, yo tabu hesau yona gogo ta gadolelehiyeidi.

5:7 Nuwatu ta meta Paulo heyaheyasoni unai ye kuli ye wane, *Beyabeyana kailakwa unai kwa heloinamwanamwa*.

5:12 Hedehedede ta meta Paulo ye koipili na ye hedede. Na hedehedede ta kaniyona ede tamowai kuhina se nigwhai. Dius yodi laugagayo unai ye wane, ena tamowai kuhina se boligabaei meta tamowai ne Dius bodadi udiyedi se tolehesuwala (Dutelonomi 23:1).

Taba ta haisagusagu

6 Kagu kahao, ena luwamiuyena tamowai hesau ba'aya hesau ye hekalo meta komiu Yaluwa unai tautolobayao bena nuwadobidobiyyena kwa sagui na kwa tolehedudulai. Na kwa kitahetete'uyoigomiu tabuna yababa kesekesegana ta unai hinage kwa kalabesibesi.² Yomi pilipili udiyedi bena kwa sagusagu'uyoigomiu na teina kabikabi ta unai Keliso yona laugagayo kwa hemamohoiyei.

³ Na tabu ta nuwasaesae,* matauwuwuna ede, ena tamowai hesau ye nuwatui meta iya ye saekalili, na iyamo nige yona dudulai hesau, meta ye bom ye lupo'uyoi. ⁴ Tamowai kesega kesega bena yona miyamiya unai ye bom ye kitasipwai'uyoi na tabu yona mauli ne tamowai hesau unai ye hekaigonogonowa. Ena yona laulau se namwa kabo gonowana ye gwauyala. ⁵ Matauwuwuna tamowai kesega kesega bena ye bom polohena ye bahei.

⁶ Ena tamowai hesau Yaubada wasana unai se hekahekata yo se hedehedede hesibasiba meta yona gogo maudoidi udiyedi bena tauhekatana ne ye sagusagi.

Saha ta kumai meta kaniyona kabo ta keli

⁷ Tabu kwa lupo'uyoigomiu. Yaubada nige gonowana ta lupoi. Like saha ta kumai meta kabo like ne kaniyona ta keli. ⁸ Kaiteya kaiyaulina ta miyamiyana unai ye miya meta kabo yona laulau ne kaniyona ye lobai, iya ede boita nige kana siga. Na kaiteya yaluwa miyamiyana unai ye miya kabo Yaluwa unai yona laulau ne kaniyona ye hai na ye lau mauli nige kana siga unai. ⁹ Unai miyamiya namwanamwadi udiyedi tabu kamnada se yababa, matauwuwuna mahanagan dudulaina ye lagema unai kabo namwa ta lobai, ena nige paisowa te ta hekaiyawasi. ¹⁰ Unai teina yoda huya namwanamwana ede bena yoda laulau se namwa tamowai maudoidi udiyedi, na iyamo tausunuma bodana meta bena ta nuwatukaliliyeidi.

Paulo wasa ta ye bom yona nimaena ye kuli: Pelitome nige kaniyona, na Yaubada bena ye hehauhau

¹¹ Nuwanuwatu gegegehediyo ta udiyedi meta kulikuli lakilakidiyo ya hepaisowadi na yomi leta ta ya bom nimaguyena kabo ya kulihegehe.

¹² Kaiteyadi se henuwagomiu bena taba pelitome kwa hai, meta yodi nuwatu ede taba tamowai se kitahenamwadi, yo hinage nige se henuwa bena Yesu Keliso yona sataulo lauguguyana debanaena se hewaiunudi. ¹³ Na siya taipelitome ne meta Mose yona laugagayo nige se miyawatanidi, na iyamo se henuwagomiu bena pelitome kwa hai. Na teina unai kabo se hededetausae'uyoidi yo kabo se hedede meta komiu siya tauhemuliwatanidi.

¹⁴ Na yau meta nige ya henuwa bena ginauli hesau debanaena ya hededesaesae, na saha kabo ya hededetausae'usei ede Yesu Keliso yona sataulo. Sataulo ta debanaena kaiyaulina ta nuwanuwatudi maudoidi kaliguwai se gehe, na sataulo ta wasana ya laulauguguyaei debanaena kaiyaulina ta nige se modelau kaliguwai. ¹⁵ Keliso yona sataulo mo ya hededetausaei matauwuwuna pelitome o nige pelitome meta nige kaniyona hesau, na saha ye saekalili ede bena Yaubada ye hehauhau.

¹⁶ Nuwamu se daumwali yo Yaubada yona katekamkamna yo gadosisi ye laowa teina laugagayo hauhauna ta tauhemuliwatanina maudoimiu kalimiuwai—komiu Yaubada yona Isalaela tamowaidiyao ede.*

¹⁷ Gehena ta unai, nige ya henuwa bena tamowai hesau ye hephilipilau laugagayo nuwanuwatudi ta udiyedi, matauwuwuna Yesu Keliso debanaena hekamkamna ya hekalo, na leleyadi wa siya ede taugu ta unai.

¹⁸ Kagu kahao yo louguwao, yoda Guiyau Yesu Keliso yona kabinamwa taba maudoimiu nuwamu ne udiyedi ye miya. Mamohoi.*

6:3 Teina hedehedede ta, *tabu ta nuwasaesae*, meta nige Paulo yona kulikuli unai, na ka kulihemasalahma matauwuwuna nuwanuwatuna ede lausoisoi ta unai.

6:16 Paulo tausunuma ye heyahayasoniyedi Isalaela unai, kaniyona ede siya Yaubada yona basileiya tamowaidiyao.

6:18 Paulo kalina Hebelu unai ye kuli ede *Amen*.

Paulo yona leta ekalesiya Kolose unai taumiya udiyedi

Buka ta hededehehemasalahana

Kolose meta magai lakilakina teha Eisiya unai. Kolose unai Yesu wasana tauwasaduwai bagubagunana nige Paulo, na Epapalasi. Huyana Paulo ekalesiya Kolose unai taumiya yodi leta ta ye kuli meta iya maiyana Epapalasi numatutugudu unai se miyamiya.

Kolose unai dubu luwadiyena ekalesiya se badokalili dagela tamowaidi udiyedi se tubu na se nuwabui. Unai ede hekadiyo se nuwapwanopwano yodi sunuma wuwuna ede saha, yo miyamiya dudulaina saha, yo taba'ohu dudulaina saha. Unai Paulo leta ta unai ye kulihemasalaha meta Yesu ye saekalili, yo ye guguyaidi taba Yesu ye bom mo se sunumaei, yo tabu se taba'ohu anelu yo yaluyaluwa udiyedi. Yo hinage laulau dudulaidi ye hededehehemasalahadi.

Nuwanuwatu lakilakidi

1. Lautoki (1:1-2)
2. Paulo Kolose yodi ye tapwalolo (1:3-14)
3. Keliso ye saekalili, na mauli mamohoina ye mosei tausunumaena udiyedi (1:15-2:23)
4. Ekalesiya maulidi miyamiyadi (3:1-4:6)
5. Paulo yo maiyana taumiya yodi lautoki se hetamalidi (4:7-18)

1 Yau Paulo, Yesu Keliso yona nuwatu unai ye kaisunuwaigau yona apostolo. Kada kaha Timoti maiagu leta ta ka kuliwaya ² komiu kama kahao sunuma unai Kolose unai kalimiuwai. Komiu Yaubada yona tamowai tabudiyao,* yo kwa tolabayao sunuma unai. Taba tamada Yaubada yona kabinamwa yo yona nuwadaumwali ye lediwa kalimiuwai.

Lautoki yo tapwalolo

³ Huya maudoina yomiu ka tapwatapwalolo meta Yaubada, iya Guiyau Yesu Keliso Tamana, ka laulautokiyei, ⁴ matauwuna ede wasamiu ka lapui meta yomi sunuma Yesu Keliso unai ye bayao, yo yona tamowai maudoidi kwa gadosisiyedi. ⁵ Yomi sunuma yo yomi gadosisi ta wuwudi ede kainauya Yaubada ye tolenonohaiyako galewa ne unai na kwa nayanayaei ma nuwabayaomiu. Kainauya ta wasana wa kwa lapuiyako huyana wasa mamohoina ye laowa kalimiuwai, iya ede wasa namwanamwana.* ⁶ Tanoubu ta maudoina unai wasa namwanamwana ta ye kini ye laki ye lau, yo ye kaniyo, doha ede saha ye tubu komiu kalimuyena ta. Yona kabahetubu meta huyana wasa namwanamwana ta kwa lapui na Yaubada yona kabinamwa wasana mamohoina kwa nuwatulobai. ⁷ Wasa ta tauhekatalogiu ede Epapalasi, yoma hali taupaisowa* namwanamwana, na ka gadosisiyei. Iya meta Keliso yona taupaisowatahitahi tamowaina hesau, iya ede yomai ye paipaisowa. ⁸ Yomi gadosisi Yaubada Yaluwana ye haiyawa wa kada kaha wa ye hededehehemasalahana kalimaiyena.

⁹ Unai ede huyana wasamiu ka lapui na ye laoma meta nige ka kaiyawasi na huya maudoina yomiu ka tapwatapwalolo. Ka kaikaibwadasae Yaubada unai bena Yaluwa Tabuna yona sibasiba yo nuwamasalahmaudoina unai ye hemwayaugomiu na Yaubada yona nuwatu kabina kwa kata. ¹⁰ Yoma tapwalolo ta kaniyona ede bena yomi mauli miyamiyana maudoina kwa miyaei doha Guiyau tausunumaena yodi miyamiya, na iya nuwana kwa henamwa yomi laulau udoi'udoi udiyedi, kana kao ede doha teina: Yomi paisowa namwanamwadi udiyedi bena kaniyodiyae se tubu, yo Yaubada nuwatulobaina kalimuyena bena ye laki ye lau; ¹¹ Yaubada yona gigibwali saesaena unai bena ye hebayaogomiu na kwa nuwabayao yo nuwamiu se talu; na ma gwaugwauyalamiu ¹² Tamada kwa laulautokiyei. Iya dudulai ye leyawa na yona kainauya yona tamowai udiyedi gonowana kabo kwa hai, galewa ne unai. ¹³ Yo hinage iya masigili yona gigibwali unai ye gilihaida na ye tolelaeda natuna ye gadosisiyei'usei yona basileiya unai, na yona kitahetete yo yona woyawoya unai ta miyamiya. ¹⁴ Na natuna wa ye hemaisahaida na ye yailihaida, na yoda yababa ye nuwatugabaedi.

Keliso ye saekalili

¹⁵ Yaubada nige gonowana ta kita, na natuna mo gonowana ta kita. Iya kana kao gonogonowana doha tamana, ye baguna na kabo Yaubada nimana ginaulidi maudoidi, ¹⁶ matauwuna Yaubada ginauli maudoidi iya kalinawai ye hetubudi, galewa yo tanoubu ginaulidiyao, ginauli masamasalahadiyao yo ginauli

^{1:2} Yaubada yona tamowai tabudiyao, siya nige ekalesiya tauwoyaidi se bom mo, na Yesu tausunumaena maudoidi.

^{1:5} Wasa namwanamwana hinage ta wane ewaneliya.

^{1:7} Inai ka kuli taupaisowa, na teha hekadiyo ka kuli heyayai tauhaina. Hedehedede labui ta nuwanuwatudi kesega mo.

wadawadamdi, doha wasawasa yo gigibwali yo tanutanuwagao yo tauloonina udoi'udoi. Ginauli maudoidi ta iya ye ginaulidi, yo ginauli maudoidi meta iya yona.¹⁷ Iya ye tububaguna na kabo ginauli maudoidi, yo iya debanaena ginauli maudoidi se miyamiya yo se namwanamwa.

¹⁸ Iya meta kulukulu, na iya tauna ede ekalesiya bodana. Iya mauli kabahetubuna, yo tauboiboa udiyedi ye tolo'uyobaguna, bena ginauli maudoidi udiyedi ye baguna.¹⁹ Matauwuna Yaubada ye hineli ede bena iya ye bom kana kao mamohoina maudoina ye miyahai Keliso unai,²⁰ yo iya unai ginauli maudoidi tanoubu ta yo galewa ne udiyedi ye uyoidima kalinawai, na nuwadaumwali ye ginauli Keliso kwasinana unai, iya ede sataulo ne unai ye didima wa.

²¹ Huya bagubagunana unai meta komiu Yaubada kwa miyasuwalei yo nuwamiu ne unai kwa hemala kana waiunu, kabahemasalahagomiu ede yomi laulau yababadi wa udiyedi.²² Na teina huya ta unai Keliso yona boita yo bulumana debanaena Yaubada ye kawakeha'uyoigomiu. Yona nuwatu ede bena ye haigomiu na matanaena kwa hemala tamowai tabudiyao, nige yababa hesau, yo nige kabahegilugomiu hesau,²³ ena yomi sunuma unai kwa tolabayao na wasa namwanamwana hededehegesunumana wa nige kwa sigigabaei. Teina wasa namwanamwana ta, iya ede kwa lapuiyako yo se lauguguyaeyako tanoubu ta tamowaidiyao maudoidi udiyedi. Na yau Paulo wasa ta taupaisowaina yo tauwasaduwaiyeina ede.

Paulo yona paisowa dubu debanaena

²⁴ Ya gwauyalakalili meta taugu ta unai hesabamiu ya kamkamna. Kamkamna udoi'udoi ta, siya meta Keliso debanaena, na ya hekalodi kana siga hekamkamna ta se gehe, na unai Keliso tauna ya saguidi, siya ede yona dubu.*²⁵ Yau dubu yodi taupaisowa. Na Yaubada paisowa ta ye leyama bena iya wasana maudoina ya hededehemasalahananamwanamwaei kalimiuyena.
²⁶ Yaubada wasana ta, iya ede yona nuwatu wadawadamna nige ye hemasalahi isi bagubagunadi udiyedi, na teina mayadai ta unai ye hemasalahi yona tamowai tabudiyao* udiyedi.²⁷ Yaubada ye henuwa bena yona nuwatu wadawadamna saesaekalilina yo wasawasana ye hemasalahi siya kalidiyena. Yona nuwatu te meta komiu dagela tamowaidiyao nuwanuwatudi, iya ede: Keliso meta hinage komiu dagela tamowaidiyao maidamiu. Na Keliso debanaena komiu hinage gonowana kwa nuwabayao meta kabo Yaubada yona namanamali kwa lobai.

²⁸ Na kai meta Keliso wasana ta ka hededehemasalahi, na sibasiba Yaubada ye leyama ta unai tamowai maudoidi ka guguyaidi yo ka hekatanamwanamwaedi, bena maudoidi se bayao, Keliso debanaena.²⁹ Teina nuwatu ta unai ya kaipatebayao na Keliso yona bayao yena ya paisowa, iya ede gigibwalina yogu mauli unai ye paipaisowa ma bayaona.

2 Komiu yo Laodisiya unai taumiya yo hinage tamowai hekadiyo siya sola nige kagu kao se kita, ya henuwakalili bena kabina kwa kata meta ya kaipatebayao hesabamiu,² bena nuwamiyao se bayao yo gadosisi unai kwa hebodakesega, yo bena ginauli maudoidi kwa nuwatulobainamwanamwaedi, na Yaubada yona nuwatu wadawadamna kabina kwa kata, iya ede Keliso.³ Iya kalinawai meta sibasiba yo sonoga maudoidi doha wasawasa wadawadamdi.

⁴ Nuwatu ta ya hedededi kalimiuyena, na tabu tamowai hesau yona hededesonoga udiyedi ye lupohaigomiu.⁵ Buluma unai ya miyasuwalegomi, na iyamo yogu nuwanuwatu ta unai yau ede maidamiu. Ya gwauyala matauwuna ya kitagomiu meta yomi miyamiya se dudulai yo yomi sunuma Keliso unai ye bayao.

Mauli mamohoina ede Yesu unai

⁶ Yesu Keliso kwa haiyako yomi Guiyau, unai iya bena kwa hemuhemuliwatani.⁷ Kawi lamdi se dobi bwatano unai na kabo kaiwa ne se kinilakilaki, meta doha komiu bena Keliso unai kwa tolabayao.* Yomi sunuma se hekatagomiu wa unai bena kwa bayao, yo huya maudoina kwa laulautoki Yaubada unai.

⁸ Kwa kitakitanamwanamwa tabu tamowai hesau tanoubu ta sonogadi hedehedede lopolupodi udiyedi ye woyahaigomiu. Yodi lauhekata ta meta kulutubu kabikabidiyao yo tanoubu ta laugagayodi lakilakidiyao udiyedi se tolo na nige Keliso unai.⁹ Na iyamo Yaubada meta Keliso unai ye miya. Iya kana kao maudoina ede ta kita Keliso tauna unai.¹⁰ Na Keliso unai sonoga maudoidi kwa henuwadi wa meta kwa haidiko. Na Keliso meta gigibwali yo tanuwaga maudoidi ye saedikwaidi.

¹¹ Keliso unai komiu pelitome kwa haiyako,* kaniyona ede mauli beyabeyana kwa tolehesuwala. Pelitome ta meta nige tamowai nimadiyena se ginauli, na Keliso ye ginauli¹² huyana babatiso unai Keliso maidamiu se puluhikesegagomiu.* Yo iya maidamiu kwa tolo'uyo matauwuna yomi sunuma Yaubada yona gigibwali unai, iya Keliso boita unai ye hetolo'uyoi.¹³ Beyabeyana komiu meta boita unai,

1:24 Dubu meta ekalesiya bodana ye hetahetala, nige yodi kabakoikoigogo numana.

1:26 Paulo yona kulikuli udiyedi *tamowai tabudiyao* meta Yesu tausunumaena maudoidi, nige bena dubu yona taupaisowa doha tauwasaduwai se bom mo. Hedehedede *tabu* kaniyona meta *Yaubada yona*.

2:7 Paulo yona kulikuli doha teina: *Lammiu bena se dobi Keliso unai na iya unai kwa kinilakilaki*. Lausoisoi unai heyaheyasoni kaniyona ka kulihemasalahi.

2:11 *Pelitome kwa haiyako*: Taulauhekatalupolo se laoma Kolose unai, yodi lauhekata meta bena ekalesiya loheloheyao maudoidi bena se hepelitomedi. Unai Paulo pelitome mamohoina ye hededehemasalahi.

2:12 Paulo yona huyaena *babatiso* yodi kabikabina ede waila unai se kabiheyolidobiyeidi na se kabihetolo'uyoidi.

yomi laulau yababadi debadiyena, matauwuwuna yomi mauli beyabeyana nige kwa boligabaei.* Na huyana komiu boita unai meta Yaubada Keliso maidamiu ye hemauligomiu, na yoda yababa maudoidi ye nuwatugabaedi.¹⁴ Kabahegiluda pepwana ye haigabaei na ye tutuhepatulaeli sataulo ne unai.¹⁵ Tanoubu ta gigibwalidiyao yo tanuwagadiyao yodi gigibwali Yaubada ye haigabaei ede boda matadiyena ye hemwadinedi, yo ye hekitadi meta sataulo wa unai ye saedikwaidiko.

**Tabu kwa kitalau miyamiya yo kabikabi laugagayodi
udiyedi**

¹⁶ Unai tabu kwa lapulau tamowai udiyedi ena se hegilugomiu kabikabi udoi'udoi debadiyena, doha kai yo numanuma hekahekasisidi, yo henuwaisini mayadaidi udoi'udoi, yo nawalai ye poehauhau kaikaigogodi yo Sabati hekasisina unai. ¹⁷ Teina laulau ta meta tautaugaibu yo ginauli matadaena se laolaoma ne kabakitadi; na mamohoina ede Keliso unai. ¹⁸ Tamowai hekadi kadi kao se ginaulidi doha taunuwadobidobi, yo se taba'ohu anelu udiyedi. Se hedede meta nige gonowana yomi kainauya kwa hai. Tabu kwa lapulapulau udiyedi! Siya tautau udiyedi ginauli maudoidi se kitadi meta se hedehedehedehemasalahadi, na nuwadiyao ne tanoubu nuwanuwatudi udiyedi se mwayau ede se henuwasaesaedi. ¹⁹ Siya nige se patulau kulukulu unai, iya ede Keliso. Na kulukulu unai ye dobi yauna maudoidi meta iya wanowanogalana bayabayaodi udiyedi ye kabihekahinidi, na se patukesega kulukulu unai, na se hemala tau kesega na se kini Yaubada yona gigibwaliyena.

²⁰ Komiu Keliso maidamiu kwa boitakesegako, unai tanoubu ta laugagayona meta nige yodi gigibwali kalimiuyena. Na idohagi to sola kwa miyamiyawatanidi kana kao doha komiu sola tanoubu ta tamowaidiyao? Yodi laugagayo doha se wane,
²¹ “Tabu ku hepahepaisowa! Tabu ku kaikai! Tabu ku kabikabitonogi!” ²² Teina laugagayo ta meta tamowaigaibu yodi sonoga yo yodi lauhhekata. Na tanoubu ginaulidi se laugagayoidi wa meta ta hepaisowadi na kabo se gehe. ²³ Laugagayo ne kadi kao doha sonoga, matauwuwuna ede se hededehehemasalaha meta idohagi bena ta taba'ohu Yaubada unai, yo idohagi bena ta nuwadobidobi, yo idohagi bena tauda ta hekamkamna na unai kabo yoda laulau se dudulai. Laugagayo maudoidi ta nige yodi namwa hesau, kaniyona ede tamowai yodi

buluma gadosisidi nige gonowana se hekaiyawasidi.

Mauli hauhauna miyamiyana

3 Keliso maidamiu Yaubada ye hemauligomiuko.
Unai nuwamiu kwa tudi se lau galewa ginaulidiyao
udiyedi. Temenai Keliso ye tuli Yaubada nimatutuna
unai.² Galewa ginaulidiyao kwa nuwanuwatuidi, na
tabu yomi nuwatu se lau tanoubu ta ginaulidiyao
udiyedi,³ matauwuwuna kwa boitako na yomi mauli
mamohoina ede wadawadamyena Keliso unai, iya ede
Yaubada maiyana.⁴ Keliso iya yomi mauli mamohoina
ede, na huyana ye masalaha'uyoma meta komiu kabon
hinage maidamiu kwa masalaha yona namanamali
unai.

⁵ Unai bena tanoubu laulaudi kalimiuyedi ne kwa hekaiyawasikaliliyeidi, siya ede: ganawali,* laulaubiki, nuwatubiki, gadosisi yababayababadi, yo gogo gadosisidi kalimyena ye lakikalili, iya meta yaubadalupolupo taba'ohuidi. ⁶ Teina laulau ta debadiyena Yaubada taukawayagala ne ye kouyalayalaedi yo kabu ye hekamkamnadi,⁷ na yomi mauli beyabeyana unai meta teina miyamiya ta udiyedi kwa miyamiya.

⁸ Iyamo teina huya ta meta laulau doha teina bena kwa hekaiyawasidi: kouyalayala, kabikabisokosoko, yababa ta ginauli tamowai hesau unai, tamowai ta hededeheyahabagaibui, yo tabu hedagwali yababa kawamiuyedi kwa hedehededeidi. ⁹ Tabu kami kahao udiyedi kwa laulaulupolupo, matauwuwuna taumiuyedi yo yodi kabikabi maudoidi kwa tolehesuwaladiko, ¹⁰ na taumiuhauhaudi kwa luwuidi. Taumiuhauhaudi ta meta huya maudoina Yaubada ye hehauhaudi ye lau ee kami kao doha tauhetubugomiu, yo hinage iya kabo kabina kwa katanamwanamwa. ¹¹ Unai taba nige tamowai ta hinehinelidi bena siya Giliki o Dius tamowaidi, taupelitome o nige taupelitome. Tabu laolaoma yo bubutuma tamowaidiyao* ta kitadobidobiyeidi. Yo tabu heyayai tauhaina tamowaidi o tamowai yaiyailihaidi* ta hinelidi. Na nuwanuwatuna lakilakina ede Keliso, na iya meta maudoida kalidaena ye miya.

¹² Komiu meta Yaubada yona kaisunuwai tamowaidiyao, ye tolehesuwalagomiu komiu iya yona,* yo ye gadosisikaliliyeigomiu. Unai laulau te udiyedi kwa sumagomiu,* doha katekamkamna, kabinamwa, nuwadobidobi, hedehedebigabiga, yo nayatautaubiga. ¹³ Bena kwa nuwatalu na tabu kwa tautausi'olologaibu, yo yababa saha kalimiuwai se ginaulidi bena kwa nuwatugabaedi. Yababa kwa

2:13 *Yomi mauli beyabeyana nige kwa boligabaei*: Hedehedede ta kaniyona ede, yodi mauli beyabeyana nige se hekaiyawasi. Paulo pelitome hedehededenya ye hepaisowa.

3:5 Hedhehedede *ganawali* ta unai laulau yababadi labui ta sumagogoidi: (1) Maitawasola ye lau tamowai hesau nige mwanena unai, yo (2) hewali yo hasala nige tawataswasolabi se kenokesega. Kita Saliba kada mumuga hewali yo hasala yodi kaiheya nige se kita meta bena laulau yababana, unai laulau te nige hesana kalinadaena.

3:11 Paulo ye kuli, *Sikitiya tamowaídíyao*. Giliki tamowaidi se hedede meta siya tamowai nige saha hesau kabina se kata.

3:11 Heyayai tauhaina tamowaina meta tapaisoua ye hemala kana tanuwaga yona gogo, nige yona gigibwali yo nige yona dudulai hesau. Tamowai yaiyailihaina ede ye bom yona ye paipaisowa, na nige gonowana tamowai hesau iya ye heyayaiyei.

3:12 Kalina to kalina kaniyodi meta tamowai tabudiyao.

nuwatugabaedi gonogonowana doha Guiyau yomi yababa ye nuwatugabaediko.¹⁴ Na laulau namwanamwadi maudoidi ta udiyedi meta gadosisi kwa hai. Matauwuna iya laulau maudoidi ta ye kabigogoinamwanamwaedi.*

¹⁵ Maudoimi ta meta Keliso tauna. Ye yoganegomiu bena nuwadaumwali unai kwa miya. Unai Keliso yona nuwadaumwali bena nuwamiu ye tanuwagaidi, yo bena kwa laulautoki.¹⁶ Keliso hedehededeni bena nuwamiu ye hemwayaudi: Yomi sibasiba unai kwa lauhekata yo kwa guguya'uyoigomiu, yo Same yo hedebasae wanadi yo wana tabudiyao kwa wanaidi ma laulautokimiu Yaubada unai.¹⁷ Na ginauli maudoidi kwa ginaulidi yomi hedehedede yo laulau udiyedi, bena kwa ginaulidi Guiyau Yesu hesanaena, na iya unai Yaubada Tamada kwa laulautokiyei huya maudoina.

Ekalesiya yodi numa laugagayodi

¹⁸ Sinesineo maitawasola, bena mwanemiyao kwa hekasisiyeidi. Laulau ta meta Guiyau tauhemuliwatanina yodi miyamiya dudulaina ede.

¹⁹ Tatao maitawasola, mwanemiyao kwa gadosisiyeidi, na tabu kwa sinasinakalaedi.

²⁰ Wawayao, sinamiyao yo tamamiyao kwa kawakabiyeidi ginauli maudoidi udiyedi, matauwuna laulau ta Yaubada ye kitahenamwa.

²¹ Tama, tabu huya maudoina natumiyo kwa henuhenuwayababadi, na madai nuwadiyao se basabasa.

²² Heyayai tauhaidi, kami tanuwagao tanoubu ta unai kwa kawakabiyeidi huya maudoina ginauli maudoidi udiyedi, ena se kitakitagomiu o nige se kitagomiu, yo nige bena unai kabo se kitahenamwagomiu. Na kwa kawakabiyeidi ma nuwamamohoimiu yo Yaubada hekasisina unai.

²³ Yomi paisowa maudoidi bena kwa ginaulidi ma nuwakohihaimiu, doha Yaubada yona kwa paipaisowa, na nige tamowai mo yodi,

²⁴ matauwuna kabina kwa kata meta yomi paisowa maisana kabo Guiyau unai kainauyana kwa hai. Kaniyona ede Guiyau Keliso yona kwa paipaisowa.

²⁵ Na ena tamowai hesau laulau yababana ye ginauli kabo yona laulau yababana ne maisana ye hai, matauwuna Yaubada nige tamowai ye gadosisihineli yo ye kitahenamwagaibui.

4 Tanutanuwagao, yomi heyayai tauhaidi kwa kitahetetenamwanamwaedi yo kwa hemiyanamwanamwaedi, matauwuna komiu hinage kami Tanuwaga ede galewa ne unai.

Guguya udoi'udoi

² Yomi tapwalolo bena se laulau, na udiyedi kwa silasilawa yo kwa laulautoki.³ Yomai hinage kwa tapwatapwalolo bena Yaubada keda ye soke na wasa namwanamwana, iya ede Keliso wasana wadawadamna Yaubada ye hemasalahayama wa* ka wasaduwaiyei. Teina wasa ta debanaena se kaugau na numatutuguduyena se tolegau.⁴ Yo taba kwa tapwalolo bena wasa ta ya hedehedemasalanamwanamwaei tamowai udiyedi, matauwuna teina ta yogu paisowa ede.

⁵ Na komiu, yomi laulau bena se namwa yo se sibasiba nige taukawamamohoi udiyedi. Maiyamiyao yomi miya mahanadiyao bena kwa hepaisowanamwanamwaedi na Keliso wasana kwa wasaduwaiyei.⁶ Yomi hedehedede udiyedi tamowai bena kwa katekamkamnaedi, yo yomi hedehedede bena se namwa,* na bena kabina kwa kata yodi hedehedede idohagi kabo hededebuinamwanamwaedi kwa moseidi.

Lautoki

⁷ Wasagu maudoina meta Tikikasi kabo yomiu ye hedehedede. Iya meta kada kaha ka gadosisiyei, yo taupaisowatahitahi, yo yoma hali taupaisowa Guiyau yona paisowa ta unai.⁸ Iya ya hetamali ye laowa kalimiuwai, na bena wasamai yomiu ye hedehedede, yo hinage bena nuwamiu ye hededehebayaodi.

⁹ Onesimo* maidana kabo se laowa. Iya kehamiu hesau, sunuma unai taumiyatahitahi yo iya ka gadosisiyei. Siya kabo wasamai maudoidi se hedededi kalimiuwai.

¹⁰ Alistakasi, iya ede maidagu numatutugudu ta unai, yo hinage Maleko, iya Banaba nubaina, yodi lautoki se hetamalidiwa kalimiuwai. Maleko hedehededeni ye laowako kwa lapui, na ena ye laowa meta kwa hailobai.¹¹ Kada kaha Yesu, hesau ede Diyasitasi, iya hinage ye lautokiyeigomiu. Yaubada yona basileiya paisowana unai yogu hali taupaisowa luwadiyena meta yodi haiyona ta siya se bom mo Dius tamowaidiyo. Na yodi haisagusagu kaliguyena meta nuwagu se hebayaokaliliyei.

¹² Kami kaha Epapalasi, iya Yesu Keliso yona taupaisowa hesau, hinage yona lautoki ye hetamaliyawa. Iya meta huya maudoina hesabamu ye tapwalolobayao, bena taba Yaubada yona nuwatu maudoidi kabidi kwa katanamwanamwa na unai kwa tolabayao.¹³ Komiu yo Laodisiya yo Hiyelapolis udiyedi taumiya, ya heddedemamohoi kalimiuyena meta iya yomiu ye paisowabayo.¹⁴ Doketa Luka, iya yoda gadosisi tamowaina, yo Demasi, siya hinage yodi

3:14 Tamowai hekadi se kulibui se wane, *Iya ede ye kabigogoida na ta miya nuwakesega unai.*

4:3 *Yaubada ye hemasalahayama wa:* Hedehedede ta meta hededehemasala, kulikuli beyabeyadi udiyedi nige se kuli. Na yoda buka ta unai ta kuli matauwuna ede Keliso wasana beyabeyana wadawadamnya, na Paulo ye hededehemasala yona kulikuli ta unai.

4:6 *Yomi hedehedede bena se namwa:* Paulo ye kuli, bena *kalita unai kwa hekamnadi*. Siya yodi kabikabi unai, ena se kaikaigogo na pwalawa ma kalitana se kai, kaniyona ede se kawakeha.

4:9 *Onesimo meta heyayai tauhaina hesau kana tanuwaga ye wasabugabaeiusei na ye laoma Paulo unai.* Paulo iya ye sagui na ye nuwabui, na kabo Paulo Onesimo ye hetamali ye uyo kana tanuwaga unai. Wasana ta hasili Paulo yona leta ye lau Pilemona unai.

lautoki se hetamalidiwa. ¹⁵ Yugu lautoki kwa mosei kada kahao Laodisiya unai taumiya udiyedi, yo hinage lounda Nimpa unai yo yona numaena tauhekohekoikesega udiyedi.

¹⁶ Leta ta kalimiuyena se hasiligabaei ye gehe kabohinage kwa laei Laodisiya unai ekalesiya bodana ne udiyedi se hasili, na hinage leta ya kulilaei Laodisiya udiyedi wa bena se haiyawa na kwa hasili.

¹⁷ Na kwa hededelau Akipasi unai kwa wane, “Paisowa saha Guiyau ye haiyawa wa ku ginaulihegehenamwanamwaei!”

¹⁸ Yau Paulo, lautoki ta yau nimaguyena ya kuli.* Kwa nuwatuigau yau ede numatutuguduyena. Yaubada yona kabinamwa komiu kalimiuyena!

4:18 Tamowai hesau Paulo ye sagui na leta ta ye kulidobiyei pepwa unai, meta Paulo ye hedehedede na leta ta se kuli. Ye gehe kabolausoisoii 18 ta Paulo ye bom nimanaena ye kuli. Nuwana yodi leta maudoidi se kulidi temdohagi.

Paulo yona leta ye lau Taitasi unai

Buka ta hededehehemasalahana

Taitasi meta Paulo maidana taupaisowa teha Giliki yo teha Eisiya unai. Na teina leta ta unai Paulo ye hededehehemasalahana Taitasi unai yona paisowa saha bena ye ginauli Kiliti bwanabwanaluwana unai, idohagina tauwoyawoya ye hetolodi dubu maudoidi udiyedi, yo idohagina bena ye hekatadi.

Leta ta unai Paulo nuwanuwatu saesaedi hekadiyo ye kulidi. Ye hededehehemasalahana meta Keliso yona boita yo tolo'uyo debanaena kita tausunuma gonowana yoda laulau beyabeyadi ta hekaiyawasidi na mauli hauhauna unai ta miyamiya.

Nuwatu lakilakidi

1. Lautoki (1:1-4)
2. Taitasi bena dubu taukitahetetedi ye hetolodi (1:5-8)
3. Taitasi bena lauhekatalupolupo ye hekaiyawasidi (1:9-16)
4. Taitasi bena ekalesiya ye hekatadi laulau dudulaidi yo namwanamwadi udiyedi (2:1-3:11)
5. Lautoki (3:12-15)

1 Yau Paulo, Yaubada yona taupaisowa yo Yesu Keliso yona apostolo, leta ta ya kuli. Yesu Keliso ye hetologau yau apostolo bena Yaubada yona kaisunuwa tamowaidi ya saguidi sunuma unai yo hedehedede mamohoina ya hekatadi. Hedehedede mamohoina ne ye saguida na Yaubada yona nuwatu ta miyawatanidi² yo mauli nige kana siga ta nayanayai ma nuwabayaoda. Mauli ne Yaubada ye hededenonohaiyako, huyana sola nige tanoubu ta ye hetubu. Na Yaubada iya nige taukailupolupo!³ Yona kaisunuwa mayadaina ta unai yona hededehehesunuma wa hedeheddedi ye hemasalahadi. Na Yaubada Taugilihaida paisowa saesaena ta ye leyama bena ya hededehehemasalahadi yogu lauguguya udiyedi.

⁴ Ya kulikulilaowa Taitasi kalimyena, kowa natugu mamohoina yoda sunuma ta unai. Taba Yaubada Tamada yo Taugilihaida Yesu Keliso yodi kabinamwa yo nuwadaumwali se leyawa kalimyena.

Kiliti bwanabwanaluwana unai Taitasi bena dubu kesega kesega kadi taukitahetetedi ye hetolodi

⁵ Kiliti bwanabwanaluwana unai ya laugabaego, kaniyona ede paisowa saha ta kabitoledi wa bena ku hegehedi. Magai kesega kesega udiyedi dubu taukitahetetedi bena ku hetolodi doha saha ya hedehedeko kalimyena wa.⁶ Taukitahetete ne meta tabu kana gilu hesau. Iya bena tawasola miyamiyana ye miyanamwanamwae.* Natunao bena se kawamamohoi Guiyau unai, yo yodi mauli bena se dudulai, to kabo tamowai hekadiyo tabu se hegiludi miyamiya yababadi yo kawagabae udiyedi.⁷ Dubu taukitahetetenai ne Yaubada yona paisowa tauginaulina. Unai iya tabu kana gilu hesau. Tabu ye nuwasaesae, tabu ye koikoipilimwamwayau, tabu

tamowai numanumaya yaulena, tabu ye laulauhelili, tabu moni gadosisina ye lakikalili kalinawai.⁸ Na iya meta bena tamowai ye yogayogaisinidi, yo saha ye namwa bena ye gadosisiyei, yo yona nuwanuwatu yo yona miyamiya bena se dudulai yo hinage se namwa Yaubada matanaena, yo paisowa huyadiyao bena ye lauwatanidi.

Taitasi bena taukitahetete ne ye hekatadi na lauhekatalupolupo se hekaiyawasidi

⁹ Dubu taukitahetetenai ne bena lauhekata dudulaina ta lauhekata'usei wa ye kabihekahini, kabo gonowana tamowai hekadiyo ye henuwabayaodi yona lauhekata namwanamwadi ne udiyedi, yo hinage lauhekata dudulaina taukawayagalaena kabu ye hekitalobaidi meta se lausapuli.¹⁰ Matauwuna ede tauhaikawayagala se bado. Se hedehededegeibu na yodi kailupolupo ne udiyedi tamowai se woyahesuwaladi. Tauhaikawayagala wa udiyedi tamowai se bado se lauhekata meta mauli kamwasana ede taba tamowai pelitome ye hai.

¹¹ Taba ku hekaiyawasidi, matauwuna numa se bado tamowaidiyao meta se henuwapwanopwanodi. Na yodi paisowa ta unai huya maudoina yodi nuwatu bena se laulaumoni.

¹² Doha Kiliti yodi tauhededepeloweta hesau ye hedehedeyako, ye wane, "Kiliti tamowaidiyao kadi paisowa ede hedehedelupolupo. Yodi laulau se yababakalili doha suisui kaikaiklasidi. Se miyamiyaheboni, yo siya meta tamowai botabotaidi."

¹³ Peloweta ne yona hedehedede meta mamohoi. Unai ku hedebayao udiyedi meta se lausapuli, na bena se sunumanamwanamwa.¹⁴ Tabu se lapulapulau Dius kadi pilipilidai yo hedehedede

1:6 Hedehedede ta kalina Giliki unai hinage gonowana ta bui ta wane, *Iya bena mwanena kesega mo.*

mamohoina tautolehesuwalana yodi kaihekahekasisi laugagayodi udiyedi.¹⁵ Tamowai nuwadiyao se a'a meta kalidiyena kai yo ginauli maudoidi se laugagayoidi ne se a'a. Na kaiteyadi nuwadiyao se bida yo nige se kawamamohoi, meta kalidiyena nige ginauli hesau ye a'a. Yodi nuwanuwatu ne se bida, yo yababa saha se ginauli ne nige gonowana se nuwatulobai.¹⁶ Se hedede sera Yaubada kabina se kata, na yodi laulau udiyedi meta se uhalaesi. Yodi laulau ne meta ye subukaliliyeidi. Se kawagabae, yo nige gonowana laulau namwanamwadi se ginaulidi.

Taitasi sera tausunuma ye hekatadi laulau dudulaidi udiyedi.

2 Na kowa, Taitasi, yom guguya maudoina unai sera lauhekata dudulaina mo ku lauwatani.
2 Tautaubadao ku hekatadi sera se bom se kitahetete'uyoidi, yo sera yodi miyamiya se dudulai, yo se nuwanuwatusibasiba. Yo hinage yodi sunuma yo yodi gadosisi sera se namwa, yo sera se nuwabayao.

3 Gonogonowana doha, sinesinebadao ku hekatadi sera yodi miyamiya unai Yaubada hekasisina unai se miya. Tabu tamowai se hededeheyahababadi, yo numanuma bayabayaona tabu ye tanuwagaidi. Na sera ginauli namwanamwadi mo se lauhekataedi.
4 Kabo gonowana natudiyao sinesineo se hekatadi sera mwanediyao yo natudiyao se gadosisiyedi,⁵ yo se bom se kitahetete'uyoidi, yo yodi nuwanuwatu yo yodi laulau sera se namwa yo se dudulai. Bena yodi numa se kitahetetedi, yo kabikabi se namwa tamowai udiyedi, yo mwanediyao se hekasisiyedi. Kabo tamowai hekadi nige gonowana Yaubada wasana se hededeheyababab.

6 Hinage sera tatao ku henuwabayaoi na se bom se kitahetete'uyoidi.⁷ Yom kabikabi sera se namwa na tatao se kitadi to kabo se hemuliwatanigo. Saha ku lauhekatae ne sera hinage ku miyawatani. Ku lauhekata ma nuwamamohoi.⁸ Yom hedehedede tamowai udiyedi sera se dudulai, kabo nige gonowana hedehedede ne se hetaladi. Teina unai kada waiunu kabo se mwadine, matauwuna nige sera hesau se lobai na unai kabo se hededeheyababab.

9 Heyayai tauhaidi tamowaidiyao ku hekatadi sera kadi tanutanuwagao se kawakabiyedi ginauli maudoidi udiyedi. Bena se kaipate na nuwadi se henamwa, yo tabu se kawakawabui,¹⁰ tabu se kaikaiwahali, na yodi laulau ne udiyedi se hemasalahadi meta gonowana kadi tanutanuwagao siya se sunumaedi. Unai kabo tamowai maudoidi Yaubada Taugilihaida lauhekatana se kitahenamwa.

11 Lauhekatana ne sera se miyawatani matauwuna Yaubada yona kabinamwa Keliso ye hemasalahadi tamowai maudoidi udiyedi, na kabinamwa wa ye gilihaidi.¹² Kita gilihaidi tamowaidi ye hekatada meta laulau Yaubada nige ye henuwadi yo tanoubu gadosisidi sera ta hekaiyawasidi na yoda

laulau ta sibasibaidi yo yoda laulau se dudulai yo laulau Yaubada ye kitahenamwadi sera udiyedi ta miya, teina yoda huya ta unai.¹³ Na huya maudoina ta nayanaya ye lau ee Yaubada yona hededehegesunuma saesaena wa ye hemamohoiyei na Yesu Keliso, iya yoda Yaubada saesaena yo Taugilihaida, ye taumasalahma namanamalina.

14 Yesu Keliso ye bom ye mosegabaei'uyoi kita hesabada na yona nuwatu meta sera ye yaillihaida yababa maudoidi udiyedi yo ye he'a'ada na ta hemala ye bom mo yona tamowai na laulau namwanamwadi ta ginaginaulidi ma nuwakohihaida.¹⁵ Huya maudoina teina lauhekata ta sera ku laulauhekataedi, yo ku hededebayao tamowai udiyedi sera se kawakabiyedi. Nige taukawakabi sera ku hekitalobaidi meta se laupwano. Paisowa ta gigibwalina ede kalimwai, unai tabu tamowai hesau ye kitadobidobiyeigo.

Taukawamamohoi laulau namwanamwadi sera se miyamiyadi

3 Taukawamamohoi sera ku henuhenuwaisinidi gabemani yo tauwoyawoya hekadi sera se hekasisiyedi yo se kawakabiyedi, na se nonoha huya maudoina sera kabikabi namwanamwadi se ginaginaulidi.² Tabu tamowai hesau se hededeheyababab. Tabu se haihaikawayagala. Na sera se nuwatalu, na se nuwadobidobi yo yodi laulau se namwa tamowai maudoidi udiyedi.

3 Beyabeyana kita hinage ta yauyaule yo ta kawagabae, yo nuwanuwatu yababadi udoi'udoi se lupohaida. Gwauyala yo gadosisi udoi'udoi mo ta laulauwatanidi. Huya maudoina yoda nuwatu sera tamowai ta heyababadi. Ta kaikalomagigili. Tamowai se subuda yo kita hinage ta subudi.

4 Na huyana Yaubada Taugilihaida yona kabinamwa yo yona gadosisi ye hemasalahadi kalidaena,⁵ meta ye gilihaida. Nige yoda laulau dudulaidi debadiyena, na yona katekamkamna debanaena ye gilihaida, meta ye labasi'uyoida na unai ye deulida, yo Yaluwa Tabuna unai mauli hauhauna ye leyama.⁶ Yaubada Yaluwa Tabuna ye haiyama ma nuwakohihaina, Yesu Keliso iya taugilihaida debanaena.⁷ Yona kabinamwa debanaena ye tolehededulaida, na hededehegesunuma ye leyama meta mauli nige kana siga kabo ta hai.

8 Teina hedehedede ta meta hedehedede mamohoina.

Ya henuwa sera teina hedehedede maudoidi te ku hebayao'uyoidi, na sera Yaubada tausunumaena se kaipate na huya maudoina miyamiya namwanamwadi udiyedi se miya. Lauhekata ta se namwa na udiyedi tamowai maudoidi sagu se lobai.

9 Na haikawayagala yauyauledi, yo kulutubu dededi,* yo laugagayo haikawayagaladi ku kaihaleidi, matauwuna nige kaniyodi yo nige gonowana se saguida.¹⁰ Ena tamowai hesau koigwaligwali ye ginauli, kabo ku hededehekaiyawasi. Na ena nige ye kawakabi, kabo ku hedede'uyo unai. Na mulina ne

unai meta tamowai ne tabu ku modelau unai,
¹¹ matauwuna tamowai doha tenem hedehedede mamohoidi se laugabaediko. Yababa se ginaulidi udiyedi se bom se hegili'uyoidi.

Lautoki

¹² Atemasi o Tikikasi bena kabo ya hetamali ye laowa kalimwai. Huyana ye lagewa meta mwamwayau ku laoma kaliguyena Nikopolisi unai, matauwuna yogu hineli ya ginauliyako kabo temenai gwagwama huyana ya miyahekila. ¹³ Sinasi, iya laugagayo tauhekasadi, maiyana Apolosa yodi kadau ne unai, na

ena se henuwasagu meta bena kwa saguidi. ¹⁴ Yoda tamowai Kiliti unai tabu se miyamiyagaibu, na bena ku hekatadi na kabikabi namwanamwadi udiyedi se miya, na ena tamowai hekadiyo kai yo gogo udiyedi se deha, meta bena se saguidi.

¹⁵ Maidagu taumiya maudoidi yodi lautoki se hetamalidiwa. Yogu lautoki ku mosei kaidimwadi tausunuma se gadosisiyeda udiyedi.

Na Yaubada yona kabinamwa maudoimiu kalimiuyena!

Yauwedo yo kaiyoni.

3:9 Kulutubu dededi: Tamowai se kaipatekalili bena taba kadi kulutubu ne udiyedi tamowai hesau se lobai meta iya Dius tamowaina, na debanaena kabo se hedede meta siya ekalesiya mamohoidi.

Paulo yona leta ye lau Pilemona unai

Buka ta hededehehemasalahana

Pilemona meta ekalesiya tamowaina hesau magai Kolose unai taumiya, yo iya yo Paulo se kawakeha namwanamwa. Iya gogo tamowaina, na yona numa lakilakina unai dubu tamowaidi se koikoigogo.

Pilemona meta hinage yona heyayai tauhaidi hekadi ye hemaisadi, na luwadiyena hesau hesana ede Onesimo. Na Onesimo nuwana kana tanuwaga unai ginauli hesau ye kaiwahali ede ye wasabu ye lau Loma. Temenai Paulo ye kaitaumanai numatutugudu unai. Paulo Yesu wasana ye hededehehemasalahana namwanamwa Onesimo unai, ede ye nuwabui. Kabo Paulo ye hineli meta laulau dudulaina ede taba Onesimo ye uyo kana tanuwaga Pilemona unai.

Loma yodi laugagayo ye wane, ena heyayai tauhaina kana tanuwaga ye wasabugabaei na ena se lobai, meta kana tanuwaga yona dudulai gonowana kabu ye koihemwaloi. Unai Paulo leta ta ye kuli ye lau Pilemona unai na ye kaibwadai tabu tabu Onesimo ye hekamkamna, na ye hai'uyoi na ye kabinamwanamwaei doha kana kaha hesau Keliso unai.

Leta ta taubaheina ye lau Pilemona, siya meta Tikikasi yo Onesimo (Kolose 4:7-9).

1 Yau Paulo, Yesu Keliso debanaena numatutugudu unai taumiya. Maidagu kada kaha Timoti leta ta ka kuli ye laowa kowa yoma hali taupaisowa Pilemona kalimwai. Kowa meta kama kaha ka gadosisiyeigo.

2 Yoma lautoki se lau loumai Apiya unai, yo Akipasi iya Yesu yona iyala unai tau'iyalasaguigai kalinawai, yo hinage ekalesiya taulaoalomagogoi yom numa unai ne kalidiyena. **3** Ka kaibwada Tamada Yaubada yo Guiyau Yesu Keliso udifyedi bena yodi kabinamwa yo nuwadaumwali se leyawa kalimiuyena.

4 Kagu kaha Pilemona, huya maudoina yogu tapwalolo udifyedi ya nuwanuwatuigo, meta Yaubada ya laulautokiyei, **5** matauwuwuna wasam ya lapulapui meta kowa Guiyau Yesu tausunumaena yo Yaubada yona tamowai maudoidi taugadosisiyedi. **6** Tamowai ku saguidi yom sunuma debanaena. Na ya tapwatapwalolo bena yom haisagusagu paisowana ne ye bayao ye lau, na debanaena bena ku nuwatulobai laulau namwanamwadi sahasahadi Yaubada ye ledima Keliso hesanaena bena ta ginaulidi. **7** Kagu kaha, yom gadosisi debanaena ya gwaulyalakalili yo nuwagu ye bayao, matauwuwuna ede Yaubada yona tamowai ku henuhenuwabayaodi.

8-10 Unai kabu nuwatu hesau bena yom ya hedehedede. Ya kaibwadaigo bena yom heyayai tauhaina Onesimo ku hai'uyoi. Iya doha natugu, matauwuwuna numatutuguduyena ya woyalaei Guiyau unai.* Keliso debanaena ya dudulai meta ya nuwabayao na ya hedede saha bena ku ginauli, yau Paulo, ya tautaubadako yo Yesu Keliso debanaena numatutugudu unai ya miyamiya. Na iyamo taba nige apostolo gigibwalina ya hepaisowa na ya

hededelaowa. Na yoda haigadogadosisi'uyoida wa debanaena ede ya kaibwadaigo.

11 Onesimo meta yom heyayai tauhaina. Beyabeyana iya nige yom ye paipaisowanamwanamwa, na teina huya ta unai iya *taupaisowa namwanamwana* kowa yo yau kalidaena.* **12** Iya ya hetamali ye uyowa kalimyena, na iya yogu gadosisi tamowaina ede. **13** Ya henuwa bena taba Onesimo sola maidagu ka miya, to kabu ye lauhedamaigo na ye saguigau huyana ewaneliya debanaena ya miyamiya numatutugudu ta unai. **14** Na nige gonowana saha hesau ya ginauligaibui kana siga ku talambaguna, matauwuwuna nige ya henuwa bena ya lauheliligo na laulau namwanamwadi ku ginaulidi, na bena yom gadosisi mamohoina unai ku ginaulidi.

15 Nuwana huyakubwakubwa mo Onesimo ye miyasuwala na bena kabu ye uyowa maidam kwa miya ye lau nige kana siga. **16** Iya yom heyayai tauhaina, na sunuma debanaena ye hemala kada kaha. Iya ya gadosisiyei, na nuwana yom gadosisi iya unai kabu ye lakikalili, matauwuwuna iya yom taupaisowa yo hinage kam kaha Guiyau debanaena.

17 Unai, ena ku nuwatui meta yau kam kaha, kabu Onesimo ku yogaisini doha hinage yau ku yogaisinigau. **18** Ena laupwano saha hesau ye ginauli o ginauli hesau unai ye kaihagahaga kalimyena, polohe ne ku tole kaliguyena. **19** Yau Paulo, nimagu ta unai ya kulikulilaowa kalimyena: Kabo ya hemaisago. Na yom mauli unai ku kaihagahagakalili kaliguyena,* na iyamo taba nige ya hetala. **20** Kagu kaha, Guiyau debanaena yogu kaibwada ta bena taba ku ginauli. Unai kabu nuwagu ta ku hebayao Keliso unai.

8-10 Numatutugudu unai Paulo Yesu wasana ye hededehehemasalahana Onesimo unai, ede ye nuwabui. Unai ye hemala doha Paulo natuna.

11 Hesa *Onesimo* kaniyona ede *taupaisowanamwanamwa*.

1:19 Paulo Pilemona ye henuwabui ede mauli nige kana siga ye lobai, na hagahagana ede ye lakikalili.

²¹ Teina ta ya kulikuli na ya nuwatui meta yogu kaibwada ta kabo ku ginauli, yo kabina ya kata meta yom laulau ne kabo se namwakalili na kabo yogu kaibwada ta.

²² Na ginauli kesega mo ede: Ya nuwatui meta Yaubada yomi tapwalolo wa ye lapuidi ede kabo ya uyowa kalimiyena. Unai bili hesau ku nonohai yau hesabagu.

²³ Epapalasi meta iya hinage maiyagu numatutugudu unai Yesu Keliso debanaena. Yona lautoki ye hetamaliyawa kalimyena. ²⁴ Yo Maleko, Alistakasi, Demasi yo Luka, siya meta yogu hali taupaisowa, se lautokiyeigo.

²⁵ Guiyau Yesu Keliso yona kabinamwa bena nuwamiuyena ye miya.

Kulikuli ye lau Hebelu tamowaidiyao udiyedi

Buka ta hededehehemasalahana

Teina leta ta ye lau Hebelu tamowaidi udiyedi. Hebelu meta Dius tamowaidiyao hesadi hesau. Leta ta kaniyona ede Dius tamowaidiyao Yesu tausunumaena bena tabu se uyo'uyo yodi taba'ohu beyabeyana unai na laugagayo yo kabikabi Yaubada ye mosedi Mose unai na se laoma Dius tamowaidiyao udiyedi tabu se miyawatani'uyoidi. Huyana leta wa se hai meta ekalesiya hekamkamna lakilakina se hekalo ede hekadiyo se hetubu se nuwabasabasa na Yesu Keliso bena se kitagabaei.

Leta taukulina ye henuwaisinida meta Keliso iya ede Yaubada natuna. Yesu ye saekalili, na kabo anelu, Mose yo peloweta hekadiyo. Yo iya yoda taukaitalasam saesaena, na yona kabihemauli hesabada wa ye saekalili na kabo Aloni yo taukaitalasam maudoidi yodi kabikabi wa. Yesu iya talam hauhauna tauhaiyamana. Na talam ne ye saekalili na kabo talam bagubagunana.

Leta ta taukulina meta hesana nige ye kulihemasalaha, unai nige kabina ta kata iya kaiteya. Bagubagunana tausibasiba gwaudi yodi nuwatu bena Paulo iya leta ta taukulina ede, na mulinawai tausibasiba hekadiyo yodi nuwatu udoi. Na ye masalahakalili meta leta taukulina wa Dius tamowaidiyao yodi taba'ohu kabikabidi kabidi ye katakalili. Huyana leta ta ye kuli meta Yelusalema unai numa tabuna wa sola ma totolona. Loma tamowaidi numa tabuna se heyababa bolimaina meta ta hedede ta wane 70 AD unai. (70 AD kaniyona ede Yesu yona huyalabasi na bolimai 70 mulidiwai.)

Nuwatu lakilakidi

Keliso iya ede Yaubada natuna (1:1-3)

Keliso ye saekalili na kabo anelu (1:4 – 2:18)

Keliso ye saekalili na kabo Mose (3:1 – 4:13)

Keliso ye saekalili na kabo Aloni yo taukaitalasam maudoidi (4:14 – 7:28)

Keliso yona kaitalasam ye saekalili na kabo kaitalasam hekadiyo (8:1 – 10:39)

Hededehebayao ye lau Keliso tausunumaena udiyedi (11:1 – 12:29)

Hededehebayao gehegehena (13:1-25)

Yaubada natuna Yesu iya ye saekalili

1 Huya bagubagunana unai Yaubada hedehedede ye moseidi peloweta udiyedi huya udoi'udoi udiyedi yo laulau udoi'udoi udiyedi, na kabo se hededegebaedi kada mumugao udiyedi. ² Na teina huya mulimulitana ta unai Yaubada yona hedehedede ye mosei natuna unai, na iya ye hededelaoma kalidawai. Natuna iya ede Yaubada maiyana ginauli maudoidi se hetubudi wa,* yo Yaubada iya ye kaisunuwai kabo ginauli maudoidi ye mosehekawadi unai. ³ Natuna Tamana yona namanamali yo hinage kana kao dudulaina ye hemasalahadi kalidawai yo ginauli maudoidi ye hebayaodi yona hedehedede gigibwalina unai, to bena se miyahai. Ba'a ya kabahe'a'ana ye ginauli, mulinawai kabo ye tulidobi Wasawasa Saesaena nimatuutuunaena galewa unai.

Yesu ye saekalili na kabo anelu

⁴ Teina ye hemasalahana meta Natuna ye saekalili na kabo anelu, yo hinage gonogonowana doha iya hesana ye saekalili na kabo anelu hesadiyao.

⁵ Matauwuna Yaubada nige ye hededelau anelu hesau unai ye wane,

“Kowa yau natugu,
mayadai ta unai ya hineli yau tamam.” (Same 2:7)
o hinage,
“Yau kabo tamana na iya kabo natugu.”
(2 Samuwela 7:14)

⁶ Yo huyana Yaubada natuna taubaguna * ye hetamaliyama tanoubu ta unai iya hedehededeni ye wane,

“Yaubada yona anelu maudoidi taba se kaihelahui.”
* (Dutelonomi 32:43)

⁷ Yona anelu hedehededeni ye wane,
“Yona anelu ye ginaulidi yodi sagena doha yaumai,
yo yona heyayai tauhaidi yodi gigibwali doha
kaiwa pulupululuna.” (Same 104:4)

⁸ Na Yaubada ye hededelau natuna unai ye wane,
“Yaubada, yom kabatuli kabo ye miya nige kana
siga,
yo yom basileiya ne kabo laulaududulai unai ku
tanuwagai.

1:2 Yowané 1:1-3 ku hasili.

1:6 Kalina Giliki unai taubaguna kaniyona ede ye saekalili o hekahekasisina. Yo hinage Dius tamowaidiyao taubaguna se kita meta iya ye saekalili na kabo hekadiyo.

1:6 Kulikuli ta ta hasili Dutelonomi bukana unai. Na nige Dutelonomi nimakulikuli pepwadi maudoidi udiyedi, na hesau tausonoga se lobai duha hesau unai, Gabwa Boiboitana dedekanaena wa, pepwana ne unai se kuli doha lausoisoitai.

⁹ Kowa laulau dudulaina ku henuwa na laulau yababayabadi ku subudi.
Unai Yaubada, iya yom Yaubada, kowa ye kitahesaego kam kahao maudoidi luwadiwai na ye heyausigo gwauyala yausina unai.”
(Same 45:6-7)

¹⁰ Hinage natuna unai ye wane,
“Guuyau, huya bagubagunana unai kowa tanoubu wuwuna ku tole
yo hinage galewa meta nimam ginaulina.
(Same 8:6, Sakaliya 12:1)

¹¹ Siya kabo se tauwadam, na kowa ku miyahai.
Kabo se beyabeya doha kaleko beyabeyana.

¹² Kabo ku nokudi doha kaleko,
yo doha luwuluwu beyabeyana kabo ku haigabaedi na hauhaudi ku toledi.
Na kam kao gonogonowana mo
yo yom bolimai taba nige kadi siga.”
(Same 102:25-27)

¹³ Yo Yaubada nige anelu hesau unai ye hededelau ye wane,
“Nimatuutuugu ta unai ku tuli,
kana siga kam waiunu ya toledi kaem kadi duku.”
(Same 110:1)

¹⁴ Na anelu meta siya yaluyaluwa yo heyayai tauhaina mo, na Yaubada ye hetahetamalidi bena mauli tauhaidi se saguidi.

Wasa namwanamwana ta bera ta lapunamwanamwaei

2 Unai teina wasa namwanamwana Yesu ye leyama ta, taba ye namwa mo bera ta lapunamwanamwaei. Ena nige, kabo ta lausuwalaei.
2 Huya bagubagunana Yaubada yona laugagayo anelu se mosei Mose unai Sinai koyana unai wa meta ma gigibwalina. Na ena tamowai hekadi laugagayo anelu se mosei wa se utusi yo nige se kawakabiyei kabo hekamkamna dudulaina se lobai. **3** Unai, ena Yesu yona kabihemauli saesaena ta ta kitahegagili, taba nige Yaubada yona hekamkamna lakiakina ta kaihalei! Teina kabihemauli ta bagubaguna unai Guuyau ye hededegabaei na kaiteyadi se lapui meta se hemamohoiyei kalidawai, **4** yo hinage Yaubada ye hemamohoiyei hekihekinoi yo laulau gigigibwalidi udoi'udoi udiyedi, yo kabahemamohoiyena hesau ede Yaluwa Tabuna ye mosei tamowai udiyedi yona hineli unai.

Yesu ye hemala doha kita

5 Tanoubu hesau matada ne unai ta hetahetala ta Yaubada taba nige ye mosei anelu se tanuwagai.

6 Buka Tabuna tehana hesau unai tamowai hesau ye hededelau Yaubada unai ye wane,

“Tamowai nige ye sae, na iyamo ku nuwatui,
yo tamowai natuna ku kitahetete.

7 Huya kubwakubwa unai iya ku tole anelu gunidiwai,

na kabo hedebasae yo hekasisi unai ku hepasa.

8 Ginauli maudoidi ku mosediko iya ye tanuwagaidi.” (Same 8:4-6)

Na teina hedehedede ta “ginauli maudoidi” kaniyona ede “nige ginauli hesau ye kabihebeku”. Na sola nige ta kita meta tamowai ginauli maudoidi ye tanuwagaidi. **9** Na saha ta kita ede Yesu. Huyakubwakubwai Yaubada iya ye toledobiyei anelu gunidiwai, na kabo hedebasae yo hekasisi udiyedi ye hepasa, matauwuna ede Yesu ye boita kita hesabada. Mamohoi, Yaubada yona kabinamwa unai Yesu ye boita tanoubu maudoina hesabadi.

10 Yaubada iya tanoubu tauginaulina yo ginauli maudoidi tanuwagadi. Unai ye dudulai mo Yaubada natuna Yesu yona kamkamna unai ye hai ye tolehedudulaimamohoiyei. Matauwuna ede Yesu yoda kabihemauli yona kabalaoma yo Yaubada natunao maudoidi ye laedima yona namanamali unai.

11 Ede Yesu iya tamowai tautolehesuwaladi, yo tamowai ye tolehesuwaladi ta meta siya maidadi tamadi kesega. Temeta unai Yesu nige ye mwadine bera ye kataidi kana kahao yo lounao. **12** Doha ye hededelau Yaubada unai ye wane,

“Kabo kam kao namwanamwana ya hededeheemasalah kagu kahao yo louguwao udiyedi.

Yo ya hedebasaego yom tamowai matadiwai.”

(Same 22:22)

13 Iya hinage ye wane,

“Yogu sunuma kabo ya tole iya unai.” (Aisaiya 8:17)

Na nuwanuwatu gonogonowana ta unai ye wane,

“Yau ede teina, na Yaubada natunao ye ledima wa maiaguwao.” (Aisaiya 8:18)

14 Yaubada natunao ne buluma yo kwasina unai ye ginaulidi, unai Yesu hinage ye hemala buluma yo kwasina gonogonowana doha siya, meta kabo gonogonowana yona boita unai boita tanuwagana, iya ede Satani, yona gigibwali ye koigwaligwali, **15** yo tamowai ye yailihaidi. Siya ede boita taumatausiyena yo yodi mauliyena meta siya Satani yona heyayai tauhaidi.

16 Ye masalahakalili meta Yesu ye laoma nige bera anelu ye saguidi, na bera Abelahama kana isimilitao ye saguidi. **17** Unai ede Yesu ye hemala tamowai doha kita, bera iya taukitalasam saesaena namwanamwana. Unai iya ye katekamkamnaeda yoda basabasa udiyedi, yo hinage Yaubada yona ye paisowanamwanamwa, na kaitalasam ye ginauli tamowai yodi yababa kabanuwatugabaedi. **18** Iya laukita ye hekalo na unai ye kamkamna, unai iya gonowana ye saguida huyana laukita ta hekalo.

Yesu ye saekalili na kabo Mose

3 Kagu kahao yo louguwao, Yaubada yona tamowai, galewa yogana taulapuina doha yau, ya henuwa bera huya maudoina nuwamiu se lau Yesu unai. Iya ede ta hededegabae meta iya Yaubada yona hetahetamali tamowaina yo yoda taukitalasam

saesaena.² Iya nuwana ye tolekesegai taukaisunuwaina unai na yona paisowa ye ginauli gonogonowana doha Mose hinage yona paisowa ye ginaulikesegai Yaubada yona numa unai.*³ Na Yesu hedebasae saesaena ye hai na kabo Mose, doha hinage numa namwanamwana tauginaulina hedebasae lakilakina ye hai na kabo numa ne.⁴ Numa kesega kesega tauginaulidi udoi'udoi, na Yaubada ye bom ginauli maudoidi tauginaulidi.⁵ Mose nuwana ye tolekesegai Yaubada yona numa paisowana unai, na iya meta heyayai tauhaina mo. Yona paisowa wa meta saha kabo Yaubada huya matadawai ye hemasalahadi ne tautaudi.⁶ Na Keliso nuwana ye tolekesegai Yaubada unai, na iya Yaubada natuna yo yona numa taukitahetetena. Numa ne iya ede kita, ena ta tolokesegai na yoda sunuma ta tole Yaubada yona hededehegesunuma udiyedi yo ma nuwabayaoda ta hedehededehemasalahadi tamowai udiyedi.

Hedehedede bayabayaona ye lau taukawayagala udiyedi

⁷ Unai Yaluwa Tabuna yona hedehedede sera kwa lapui, doha ye wane,
 “Teina mayadai ta unai ena kalinana kwa lapui,
⁸ tabu nuwamu kwa hekwailolodi iya unai,
 doha Isalaela tamowaidiyao se tolodagedagelaei
 huyana Yaubada se laukita balabala unai.
⁹ Temenai kami mumugao yogu kabinamwa
 kalidiwai bolimai 40 luwadiwai se kitadi
 na sola yodi laulau yo yodi miyamiya ta udiyedi se
 hekohekoipiligau.
¹⁰ Unai tenem isi ne ya koipiliyeidi
 na ya wane, ‘Siya huya badobado nuwadi se
 toletolehesuwaladi kaliguwai.
 Saha ya hedede sera se ginaulidi wa se
 kawayagalaei.’
¹¹ Unai ede yogu kouyalayala unai ya
 hededekeigwala,
 ‘Taba nige yogu kabakaiyawasi magaina* unai se
 lusola.’” (Same 95:7-11)
¹² Bena kwa kitanamwanamwa, kagu kahao yo
 louguwao. Kwa kitahetete'uyoigomiu tabu nuwamu
 se yababa yo se labulabui, yo tabu Yaubada
 Maumaulina kwa nuwagabaei.¹³ Komiu ma kami
 kahao sera kwa haihedededehebayao'uyoigomiu
 mayadai kesega kesega udiyedi. Na teina mayadai
 kesega kesega Yaubada ye katai “teina mayadai ta”.
 Unai kabo taba nige yababa ye lupoigomiu na
 nuwamu se kwailolo Yaubada unai.¹⁴ Ena nuwada ta
 tolekesegai Yaubada unai ye lau ee yoda huya kana
 siga yo ta tolabayao yoda sunuma unai doha huya
 bagubagunana yoda nuwabui mayadaina wa, kabo ta
 hemala Keliso kana kahao yo lounao mamohoidiyo.

3:2 Numa ne, iya ede Isalaela tamowaidi heyahesonidi, na Mose iya kadi boda hesau.

3:11 Yaubada yona huyahedede wa unai, teina hedehedede ta *kabakaiyawasi magaina* kaniyona ede Kanana. Hebelu 4:3 yo 4:6 udiyedi buka ta taukulina wa kabo *kabakaiyawasi magaina* ye heyahesonieyi galewa unai.

¹⁵ Na tabu teina hedehedede bayabayaona ta
 nuwamu se luluhidi:

“Teina mayadai ta unai ena kalinana kwa lapui,
 tabu nuwamu kwa hekwailolodi iya unai,
 doha Isalaela tamowaidiyao huyana se
 tolodagedagelaei.” (Same 95:7-8)

¹⁶ Na tamowai Yaubada kalinana se lapui na iyamo
 se kawayagalaei wa, siya kaiteyadi? Siya ede Aikupito
 unai Mose ye woyahepesadi wa.¹⁷ Kaiteyadi bolimai
 40 luwanawai Yaubada se hekouyalayala?
 Tamowaidiyao ne meta se yababa na balabala unai se
 boita.¹⁸ Yo siya kaiteyadi Yaubada ye hetahetaladi yo
 ye hededekeigwala meta taba nige yona
 kabakaiyawasi magaina unai se lusola? Siya ede
 taukawayagalaena wa.¹⁹ Unai ta nuwatulobai meta
 siya taba nige se lagelau Yaubada yona kabakaiyawasi
 magaina wa unai, matauwuna nige se
 kawamamohoi.

Yaubada natunao yodi kabakaiyawasi hededehegesunumana

4 Yaubada yona kabakaiyawasi magaina lusolana
 hededehegesunumana sola ye totolo, unai kita sera
 ta kitanamwanamwa, madai hesau luwadaena
 Yaubada ye kitalobai taba nige gonowana ye lusola.

² Na wasa namwanamwana meta Yaubada
 kabakaiyawasi magaina ye kabinonohaiyako, kita
 hinage ta lapuiyako gonogonowana doha siya. Na
 wasa se lapui wa meta nige ye saguidi, matauwuna
 saha Yaubada ye hedede kalidiwai wa nige se
 kawamamohoiyei.³ Na kita taukawamamohoi
 gonowana ta lusola yona kabakaiyawasi magaina
 unai. Na kaiteyadi nige se kawamamohoi kalidiwai
 Yaubada ye wane,

“Yogu kouyalayala unai ya hededekeigwala,
 ‘Taba nige se lusola yogu kabakaiyawasi magaina
 unai.’” (Same 95:11)

Iyamo Yaubada yona kabakaiyawasi magaina ye
 nonohaiyako huyana tanoubu yona huyahetubuna wa
 unai.⁴ Doha kulikuli tabuna teha hesau unai mayadai
 hehaligigi-labuina ne hedehededenya ye hedede ye
 wane,

“Yaubada yona paisowa maudoidi udiyedi ye
 kaiyawasi mayadai hehaligigi-labuina unai.”
 (Genese 2:2)

⁵ Na kulikuli hesauna wa unai ye wane,
 “Taba nige se lusola yogu kabakaiyawasi magaina
 unai.”

⁶ Tamowai bagubagunadi wasa se lapui wa nige se
 lusola yodi kawayagalaei debanawai, na kabakaiyawasi
 magaina wa sola ye totolo tamowai hekadi hesabadi
 sera se lusola.⁷ Tenem unai Yaubada huya hesau ye
 tole kabakaiyawasi magaina lusolana hesabana na
 hesana ye katai ede “Teina mayadai ta”, huyana yona

hedechedede ye mosei Dawida* unai. Na Dawida ye hedede ye wane, doha ya kuliyaiko wa:

“Teina mayadai ta unai, ena kalinana kwa lapui,
tabu nuwamu kwa hekwailolodi iya unai.”

⁸ Ena taba Yosuwa Isalaela tamowaidi wa ye
woyalaediko kabakaiyawasi magaina ne unai, meta
Yaubada huya mulinawai taba nige mayadai hesau ye
kaisunuwai'uyoi. ⁹ Unai kaiyawasi mayadaina wa sola
ye totolo Yaubada yona tamowai yodi. ¹⁰ Na ena
tamowai hesau ye lagelau Yaubada yona
kabakaiyawasi magaina unai, meta kabo ye kaiyawasi
yona paisowa maudoidi udiyedi, doha ede Yaubada
yona paisowa maudoidi mulidiyena hinage ye
kaiyawasi. ¹¹ Unai bena ta kaipatebayao na ta lusola
kabakaiyawasi magaina ne unai, na tabu Yaubada ta
kawayagalaei doha Isalaela tamowaidiyo wa. Ena
yoda laulau doha siya meta kabo ta beku na nige ta
lusola.

¹² Matauwuna Yaubada yona hedechedede meta
maumaulina yo gigigibwalina yo ye matakalili na
kabo kelepamatatehalabulabui. Nuwada ye bolilapaidi
ye luwu ye lau yoda nuwanuwatu yo yoda hineli
mamohoidiyao udiyedi ye lage na ye hinelidi yo ye
kitasipwaidi. ¹³ Yaubada matanawai ginauli maudoidi
nige hesau wadawadamna, na se masalahakalili
matanawai. Laulau sahasahadi ta ginaulidi meta bena
ta hedehedemasalahadi iya kalinawai.

Yesu yoda taukitalasam saesaena

¹⁴ Yoda sunuma ta hedehededehemasalahi ta unai
beni ta tolabayao, matauwuna yoda taukitalasam
saesaena ye saeko galewa. Iya ede Yesu, Yaubada
natuna. ¹⁵ Yoda taukitalasam saesaena ta yoda
basabasa maudoidi kabidi ye katakalili, matauwuna
laukita maudoidi ta hekalodi ta meta iya hinage ye
hekalodi. Na iyamo nige ye ba'aya. ¹⁶ Unai bena ta
laoma Yaubada yona telona ta hanahanawui ma
nuwabayaoda, kabo yona katekamkamna yo
kabinamwa ta lobaidi na yoda huyayababa unai kabo
ye saguida.

5 Dius tamowaidi yodi taukitalasam saesaena
tamowai luwadiwai Yaubada ye hetolo yo yona
paisowa meta tamowai yodi tautolo Yaubada
matanawai na kainauya yo kitalasam ye mosei
tamowai yodi yababa hesabadi. ² Na ye taubigakalili
tausupusupu yo taugege tamowaidiyo udiyedi,
matauwuna ede iya taubasabasa hesau. ³ Teina unai
kitalasam ye ginauli iya yona yababa yo tamowai
maudoidi yodi yababa hesabadi.

⁴ Nige tamowai hesau teina paisowa
hekahekasisina ta yona nuwahineliwai ye hai, na
Yaubada yona yoga mo unai, doha Aloni. ⁵ Tenem unai
Keliso hinage nige ye bom ye hesae'uyoi na ye hemala

taukitalasam saesaena, na Yaubada iya ye toleisini
na ye wane,

“Kowa yau natugu;
mayadai ta unai ya hineli yau tamam.” (*Same 2:7*)

6 Yo kulikuli tehana hesau unai ye wane,
“Kowa taukitalasam tamowaina ye lau ee huya
nige sigana doha Melekisedeka.” * (*Same 110:4*)

7 Huyana Yesu tanoubu ta unai ye miyamiya meta
tapwalolo yo kaibwada ye moseidi Yaubada unai ma
kalina lakilakina yo ma matasuluna, na Yaubada ye
bom gonowana boita unai ye hemauli. Yaubada Yesu
kalinana ye lapui matauwuna Yesu iya ye hekasisiyei
yo yona gigibwali unai ye miya. ⁸ Iya Yaubada natuna
mamohoina, na iyamo kamkamna unai kawakabi ye
kaipatei. ⁹ Na Yaubada Yesu ye hai ye
tolehedudulaimamohoeyei, ede ye hemala
taukawakabi yodi kabihemauli nige sigana yona
kabalaoma. ¹⁰ Yo Yaubada iya ye kaisunuwai
taukitalasam saesaena doha Melekisedeka.

Hedede bayabayaona ye lau Yaubada tautolehesuwalana udiyedi

11 Yesu ye hemala taukitalasam saesaena
hedechededeni se bado taba ka hedededi, na
hekatagomiu ye pilipilikalili, matauwuna ede yomi
lapulobai ne se pahili. ¹² Kwa kawamamohoi
huyalohaloha, unai komiu taba taulauhekata
hekadiyo, na nige gonowamiu, na taba yomi sunuma
yona kabahetubu lauhekatanu unai ka
hekata'uyoigomiu. Komiu sola doha wawayao gagilidi
meta susu mo kwa numanuma, na nige gonowana kai
kwaikwailolona kwa kai. ¹³ Ena hesau susu mo ye
numanuma, meta laulaududulai lauhekatanu sola
nige kabina ye kata, matauwuna iya sola wawayo
gagilina. ¹⁴ Na kai kwaikwailolona meta tamowai
lakilakidi siya kadi. Yodi kaikaipate debanawai
gonowana namwa yo yababa se kitahinelidi.

6 Unai bena yoda sunuma Keliso unai yona
cabahetubu lauhekatai bagubagunadi ta
laugabaeidi, na ta dudu ta lau bena nuwamasalahi
saesaena ta hai. Na tabu yoda sunuma cabahetubuna
lauhekatai ta lauhekata'uyoidi, siya ede: nuwabui
laulau yababayabadi udiyedi yo yoda sunuma
Yaubada unai, ² babatiso yo nimatolesaena kulu unai,
boita tolo'uyona yo hekasa mayadaina. ³ Yaubada
yona yali unai ta sigilau nuwamasalahi saesaena ta
hai.

4-6 Tamowai hekadiyo nige gonowana se
nuwabui'uy. Siya wasa namwanamwana se
lapuiyako, galewa kainauyadi se miyalobaaidiko,
Yaluwa Tabuna unai yodi tupwa se haiyako, yo
Yaubada yona hedehedede yona namwa yo basileiya
ye laolaoma matadawai gigibwalina se
nuwatulobaaidiko. Na ena Yaubada se lausuwalaei

4:7 Isalaela tamowaidi yodi kawayagala mulidiwai bolimai gwaudi se lauko na kabo Dawida ye tubu.

5:6 Melekisedeka: Genese 14:18-20 ku hasilidi.

meta nige gonowana se uyoma se nuwabui'uyo, matauwuwuna yodi lausuwala ne unai siya Yesu se hesahesataulo'uyoi na tamowai matadiwai iya se hemwadine'uyoi.

⁷ Bwatano namwanamwana unai meta ena nabu ye taludobi kewanawai kabo ye mumusi na koya kaidi kaniyodi ye toledi na koya tanuwagana unai namwa ye lobai. Tano ne Yaubada unai henamwa ye hai. ⁸ Na bwatano unai gwaligwali yo lagau mo se kini na nige yona namwa saha hesau, tano ne tanuwagana kabo tano ne ye hededeheyababa. Na gehena unai kabo ye gabu.

⁹ Kehamaiyao, ka hededebyaolaowa kalimiuwai doha teina, na iyamo kabina ka kata meta komiu laulau namwanamwadi kwa ginaginalidi, siya ede Keliso yona kabiherauli unai se masamasalaha.

¹⁰ Yaubada yona hekasa se dudulai, unai yomi paisowabayao yo yomi gadosisi kalinawai taba nige ye nuwaluluhiyeidi. Siya ede doha yomi hali taukawamamohoi meta beyabeyana kwa saguidi yo iya ede sola kwa sagusaguidi. ¹¹ Laulauna gonogonowana ka henuwagomiu bena komiu kesega kesega kwa miyamiyanamwanamwaei ye lau ee huya kana siga, na unai bena yomi sunuma se bayao. ¹² Nige ka henuwagomiu bena kwa matakkenokeno. Sunuma yo taubiga tamowaidi kabo saha Yaubada ye hededehehesunumaedi wa se haidi. Unai ka henuwa bena yodi laulau kwa lauwatanidi!

Yaubada yona hededehehesunuma taba nige ye bui

¹³ Huyana Yaubada yona hededehehesunuma ye mosei Abelahama unai, meta ye bom hesanawai ye hededeikaigwala, matauwuwuna nige hesau ye saekalili doha iya. Na ye kaigwala ¹⁴ ye wane, "Mamohoi yau kabo ya kainauyaigo yo kam isimulita ya hebadodi." (*Genese 22:17*) ¹⁵ Na Abelahama ye nayatautaubiga na mulinawai saha Yaubada ye hededehehesunuma wa ye lobai.

¹⁶ Tamowai maudoidi wa tamowai saesaedi hesadiyao udiyedi se hededeikaigwala. Na tamowai hesau taba saha ye hededeyako, meta hededeikaigwala unai ye hemamohoiyei. Unai kabo haikawayagala maudoidi ye hekaiyawasidi. ¹⁷ Yaubada ye henuwa bena yona hededehehesunuma tauhaidi kalidiwai ye hemasalaha meta taba nige yona hineli ye bui, unai kaigwala wai ye hemamohoiyei. ¹⁸ Teina ginali labui ta, Yaubada yona hededehehesunuma yo yona hededeikaigwala, kabo nige gonowana ye buidi, matauwuwuna nige gonowana ye kailupolupo. Kita taulaoma Yaubada unai sagu ta lobai, iya ede teina ginali labui ta udiyedi ye henuwa bena ye hebayaoda

6:19 Teina ginali ta, *woyo yo teha tabukalikalilina* meta Isalaela yodi logologu tabuna wa unai ta lobaidi (*Hebelu 9:1-3*). Teina hedehedede ta, *Na yoda sunuma woyo ye kabigigili na ye lusolalau teha tabukalilina unai* meta Yaubada yona kabamiya galewa ne unai heyaheyasonina, na kaniyona ede yoda sunuma ye kabihekahnida Yaubada unai.

7:1 Genese 14:1-16 ku hasili.

7:2 *Taiti* kaniyona ede *one tenth*. Meta ena tamowai yona moni 100 Kina, meta 10 Kina kabo ye mosei Yaubada unai. O yona puwaka 10, meta kesega ye mosegabaei Yaubada unai.

7:2 Genese 14:17-20 ku hasili.

na yona hededehehesunuma udiyedi bena ta tolobayao.

¹⁹ Na yoda tolobayao Yaubada yona hededehehesunuma udiyedi meta doha lowo, yaluwada taukabihekahnina bayabayaona. Yoda sunuma ta woyo ye kabigigili na ye lusolalau teha tabukalilina unai.* ²⁰ Menai Yesu taukedabagunaeda debadawai ye lusolalaoko yo ye hemala yoda taukaitalasam saesaena ye lau ee nige sigana doha Melekisedeka.

Melekisedeka iya taukaitalasam namwanamwana na kabo Lewi tamowaidiyo

7 Teina Melekisedeka ta iya Salema yodi wasawasa, yo Yaubada Saesaekalilina yona taukaitalasam tamowaina. Huyana Abelahama wasawasa ye saepwaidi gehena* na yona uyoma magai unai, meta Melekisedeka iya ye hailobai na hededehehenamwa ye mosei Abelahama unai. ² Yo Abelahama gogo iyala unai ye hai'uyoidi wa maudoidi luwadiwai yona taiti* ye hai ye mosei Melekisedeka.* Hesa Melekisedeka kaniyona ede "laulaududulai wasawasana", yo hesa Salema kaniyona ede "nuwadaumwali", unai iya hinage "nuwadaumwali wasawasana". ³ Iya nige tamana yo sinana yo kana mumugao yo yona huyatubu yo yona mauli sigana wasadi, na iya meta taukaitalasam tamowaina ye lau huya nige sigana, doha Yaubada natuna. ⁴ Na tamada Abelahama iyala unai gogo ye haidi wa yona taiti ye mosei Melekisedeka, unai ta nuwatulobai meta tamowai ta ye saekalili.

⁵ Laugagayo ye hedede meta taukaitalasam siya ede Lewi kana isimulitao hekadiyo, bena Isalaela tamowaidi maudoidi udiyedi taiti se tanoi. Tamowaidi ta meta siya kadi kahao, na maudoidi ta Abelahama unai se tubuma. ⁶ Teina Melekisedeka ta iya nige Lewi kana boga hesau, na iyamo taiti ye hai, yo hinage Abelahama, iya hededehehesunuma tauhaina wa, ye hededehehenamwa. ⁷ Nige gonowana ta nuwapwanopwano, matauwuwuna maudoida kabina ta kata meta tamowai dobidobina hededehehenamwa ye hai tamowai saesaena unai. ⁸ Taiti tautanotano ne, siya kabo se boita. Na taiti tauhaina hesau ede Melekisedeka, na Yaubada ye hedehedede meta iya kabo ye miya ye lau nige kana siga. ⁹ Unai gonowana kabo ta wane, Abelahama taiti yona tolena ta meta Lewi hinage taiti ye tole, ¹⁰ matauwuwuna ede huyana Melekisedeka Abelahama ye hailobai, meta Lewi iya sola kana mumuga Abelahama tauna luwanawai.

Yesu taukaitalasam saesaena doha Melekisedeka

11 Taukaitalasam Lewi unai tautubuma wa yodi paisowa yona kabalaoma ede Mose yona laugagayo.

Na iyamo taukitalasam ne nige gonowadi tamowai yodi yababa udiyedi se tolehedudulaidi. Unai Yaubada taukitalasam hesau ye hetamaliyama, iya ede doha taukitalasam Melekisedeka, na nige doha Aloni.

¹² Teina unai Yaubada taukitalasam yona paipaisowa ye bui, ede laugagayo hinage ye bui. ¹³ Teina hedehedede maudoidi ta tamowaina wa meta iya nige Lewi kana isimulita hesau, na iya boda udoi. Na tenem boda ne unai meta nige tamowai hesau kitalasam paisowana ye ginauli. ¹⁴ Ye masalah meta yoda Guiyau iya Yuda kana isimulita, yo Mose nige saha ye hedede bena taukitalasam hesau Yuda kana boda unai kabo ye tubuma. ¹⁵ Yo saha ka hedede ta ye masalahakalili, ena taukitalasam hesau doha Melekisedeka ye masalahama. ¹⁶ Iya ye hemala taukitalasam meta nige laugagayo debanawai, kaniyona ede kana mumugao siya taukitalasam bagubagunadi. Na ye hemala taukitalasam mauli nige yona kabagehe yona gigibwali debanawai.

¹⁷ Matauwuna Yaubada ye hededyeyako ye wane, "Kowa taukitalasam miyamiyahaina doha Melekisedeka." (*Same 110:4*)

¹⁸ Laugagayo yo kabikabidi bagubagunadi wa Yaubada ye tolehesuwaladi matauwuna ede se basabasa yo nige kaniyodi, ¹⁹ matauwuna laugagayo ta nige gonowana tamowai se tole hedudulaidi. Na Yaubada hededehegesunuma namwanamwadi ye ledima, se saguida na udiyedi kabo gonowana ta sigilau Yaubada unai.

²⁰ Laugagayo yo kabikabi hauhauna ta Yaubada ye hetubu na hededeikaigwala ye ginauli Yesu unai. Na nige hededeikaigwala hesau ye ginauli taukitalasam tamowaidiyao bagubagunadi udiyedi. ²¹ Na huyana Yesu ye hemala taukitalasam, Yaubada hededeikaigwala ye ginauli ye wane,

"Guiyau ye kaigwalako,
yo iya taba nige nuwana ye bui:

Kowa kabo taukitalasam ye lau ee huya nige
sigana" (*Same 110:4*)

²² Teina hededeikaigwala ta debanawai Yesu ye hemala talam namwanamwana tauhaiyamana. Talam ne ye namwakalili na kabo talam beyabeyana.

²³ Taukitalasam Lewi unai tautubuma wa meta se badokalili, matauwuna boita ye hekaiyawasidi unai kadi paisowa nige se laei sigana unai. ²⁴ Iyamo Yesu ye miya ye lau nige sigana, unai iya ye hemala taukitalasam miyatahitahina. ²⁵ Unai iya gonowana tamowai ye hemaulidi, siya ede tamowaidiyao Yesu debanawai se laoma Yaubada unai. Matauwuna iya ye miya ye lau nige kana siga na huya maudoina kabo yodi ye kaikaibwada.

²⁶ Ye namwakalili to yoda taukitalasam saesaena ede Yesu, matauwuna iya tabuna, nige kana gilu hesau, ye a'a, iya tamowai yodi yababa nige ye patulau udiyedi, yo galewa ne unai ye saekalili.

²⁷ Taukitalasam saesaedi Lewi kana isimulitao, siya bena mayadai badobado kitalasam se ginaginalidi,

bagubaguna se bom yodi yababa hesabadi na kabo tamowai maudoidi yodi yababa hesabadi. Na Yesu meta udoi. Iya tamowai yodi yababa maudoidi debadiwai kitalasam kesega mo ye ginauli huyana ye mose'uyoi sataulo ne unai.

²⁸ Tamowai se basabasakalili, na iyamo laugagayo debanawai se hemala taukitalasam saesaedi; na laugagayo mulinawai hededeikaigwala ye laoma, na unai Yaubada Natuna ye kaisunuwai ye hemala taukitalasam saesaena. Yaubada iya ye tolehedudulaimamohoiyei ye lau ee nige kana siga.

Yesu yoda taukitalasam saesaena talam hauhauna wa unai

8 Kai saha ka hedehededei ta meta iya ede teina: Kita yoda taukitalasam saesaena ye tutuli Yaubada namanamalikalilina yona telona nimatuutunawai galewa ne unai, ² yo kabataba'ohu unai ye paipaisowa. Kabataba'ohu ta logologu tabuna mamohoina Guiyau ye ginauli na nige tamowai se ginauli.

³ Laugagayo ye hedede meta bena taukitalasam saesaedi maudoidi yodi kainauya yo kitalasam se moseidi. Gonogonowana doha hinage teina yoda taukitalasam saesaena ta bena kitalasam hesau ye mosei Yaubada unai. ⁴ Ena taba iya tanoubu ta unai, taba nige ye hemala taukitalasam, matauwuna tanoubu ta unai meta taukitalasam tamowaidiyao nonohadi, siya ede kitalasam se moseidi Yaubada unai, doha laugagayo ye hededehemasalahayako wa.

⁵ Yo siya yodi kabapaisowa, iya ede logologu tabuna ne, meta galewa ne unai logologu tabuna mamohoina kabakitana yo tautauna. Unai ede huyana Mose bena logologu tabuna ta ye ginauli, Yaubada ye hededebyaolau unai ye wane, "Ku kitalau kabikabina tautauna maudoina kuduli ne unai ya hekitago wa meta ku ginauliwatani." (*Esodo 25:40*) ⁶ Na taukitalasam saesaena paisowana Yesu ye hai wa ye namwakalili na kabo Lewi tamowaidiyao yodi paisowa, gonogonowana doha talam iya ye haiyama wa ye namwakalili na kabo talam bagubagunana wa. Na talam hauhauna ta yona kabatolo ede hededehegesunuma namwanamwadiyao. Hededehegesunuma ta se namwakalili na kabo hededehegesunuma bagubagunadi wa.

⁷ Taba ena talam bagubagunana wa unai nige laupwano, meta Yaubada taba nige talam helabuina ye leyama. ⁸ Na Yaubada Isalaela tamowaidi udiyedi laupwano ye lobai ede ye wane,

"Guiyau ye wane: Huyana ye laolaoma,
yau kabo talam hauhauna ya ginauli
Isalaela yo Yuda tamowaidiyao udiyedi.

⁹ Kadi mumugao nige yogu talam beyabeyana wa se sunumaei,
ede ya lausuwalaedi.
Unai talam hauhauna ta kabo nige doha siya
udiyedi ya ginauli wa,

huyana nimadi udiyedi ya kabi na Aikupito unai ya woyahepesadi wa.

¹⁰ Na Guiyau ye wane: Teina talam ta kabo ya ginauli Isalaela tamowaidi udiyedi, tenem huya ne mulinawai.

Yau yogu laugagayo kabo ya toledi kuludi ne udiyedi

yo ya kulidi nuwadi ne udiyedi.

Yau kabo yodi Yaubada,

yo siya yau yogu tamowai.

¹¹ Huyana ne taba nige tamowai hesau helena taumiya ye hekata

yo taba nige ye hededelau kana kaha unai ye wane, 'Guiyau taba kabina ku kata,'

matauwuwuna siya maudoidi gagilidi ye sae lakilakidi

kabo kabigu se kata.

¹² Yau yodi laulau yababayababadi kabo ya hededegigilidi

yo yodi ba'aya taba nige ya nuwatu'uyoidi." (Yelemiya 31:31-34)

¹³ Na teina talam ta Yaubada ye katai Talam

hauhauna, unai talam bagubagunana wa ye beyabeyako. Na saha ye beyabeyako yo nige yona gigibwali meta kabo ye tauwadam.

Yaubada kaihelahuina logologu tabuna wa unai

9 Talam bagubagunana wa meta yona kaihelahui laugagayodi yo kabikabidi, yo hinage tanoubu ta unai kabataba'ohu se ginauli. ²⁻³ Kabataba'ohu ta meta logologu tabuna kaleko unai se ginauli, na kalona ne unai meta kaleko unai se woyo'utusi na ye hemala dahala labui. Na dahala bagubagunana wa unai meta lampa haligigi-labui yodi kabatolo ye totolo, yo hinage pwalawa tabudi ma hatahatana* menai. Teina dahala ta hesana ede Teha tabuna. Na woyo kalekona dagelanawai meta dahala hesau hesana ede Teha tabukalikalilina.^{*4} Dahala ta unai kabakaitalasam hatahatana gole unai se ginauli, meta mulamula panepanedi kabagabuna. Yo talam keisina* gole unai se suma wa hinage temenai. Teina keisi ta kalonawai meta mana * kaba'usaedi gole unai se ginauli wa, yo Aloni yona tuke ye bwagu wa, yo laugagayo saudoudoi wekudi tabatabadiyao labui* wa. ⁵ Keisi wa kewanawai selubim* namanamalidi se tutuli. Pepedi se kaladi na ba'aya kabahededegigilina tehana wa se helogologu. Na ginauli maudoidi ta

hedechedededi se badokalili, na nige gonowana ta hetalahegehehedi.

⁶ Huyana ginauli maudoidi se tolehekasanonohaidi doha teina, kabo taukaitalasam se mwaleae dahala bagubagunana unai, mayadai badobado temenai yodi paisowa se ginaginalidi. ⁷ Na taukaitalasam saesaena ye bom mo kabo bolimai kesega kesega luwadiwai mayadai kesega mo unai ye mwalaesae teha tabukalikalilina unai, na yona mwalaesae ne unai meta sera kwasina ye bahei. Teina kwasina ta meta iya yo tamowai maudoidi yodi yababa nige se nuwatulobaidi wa hesabadi menai Yaubada matanawai ye lausibusibuye. ⁸ Taukaitalasam saesaena ye bom mo gonowana ye mwalaesae dahala teha tabukalikalilina unai. Teina unai Yaluwa Tabuna ye hemasalaha kalidawai meta huyana logologu tabuna bagubagunana sola ye totolo meta kabalusae teha tabukalikalilina kedana nige sola ye tasoke.

⁹ Teina talam bagubagunana kabikabidiyo ta meta teina huya ta kita yoda kabakita. Ye hekitada meta tautaba'ohu yodi kainauya yo kitalasam se mosemoseidi Yaubada unai wa, meta taba nige gonowana nuwadiyao se he'a'adi. ¹⁰ Matauwuwuna teina kainauya yo kitalasam ta meta siya ede kai, numanuma, taudi yo gogo deulihe'a'adi kabikabidi mo. Tamowai teina kabikabi ta se ginaulidi meta dagelagaibudi mo se he'a'adi, na nuwadiyao meta nige se buidi. Na Yaubada yona nuwatu meta sera tamowai tenem kabikabi ne se ginaginalidi ye lau ee kabikabi hauhauna ta ye lage.

Keliso kwasinana hedechededena

¹¹ Keliso ye laoma ye hemala ginauli namwanamwadi se laomako wa yodi taukaitalasam saesaena, na logologu tabuna unai ye lusolako. Teina logologu tabuna ta ye saekalili yo ye namwakalili na kabo tanoubu unai ta. Nige tamowai nimadiwai se ginauli, yo iya meta nige doha tanoubu ta ginaulina hesau.

¹² Yesu yona lusola ne unai meta nige gouti o bulumakau natuna hakiyana kwasinana ye hepaisowa, na ye bom kwasinana mo ye bahei na ma kesega mo ye lusola teha tabukalikalilina wa unai, na unai yoda kabihemauli miyatahitahina ye ginauli.

¹³ Kabikabi bagubagunana unai ena Yaubada matanawai tamowai taudiyo nige se a'a* meta kabo taukaitalasam ne gouti o bulumakau hakiyadi kwasinadi unai se lausibusibuyedi, o bulumakau bainsana saehauna kahusana se hesulusae

9:2-3 Lewitikasi 24:5-9, Maleko 2:26, yo Esodo 25:23-30 ku hasilidi.

9:2-3 *Hesana teha tabukalikalilina se tole matauwuwuna iya ede Yaubada yona kabamiya tanoubu ta unai.*

9:4 *Talam keisina:* Kalina dimdim unai se hedechedede *ark of the covenant*. Teina hedechedede ta *ark* kaniyona ede *keisi*.

9:4 Mana meta kana kao doha laisi tumadiyao. Se posiposi yo se gagilikalili, na se kamnakalili. Esodo 16:13-16 yo 16:31-35 ku hasili. Dimdim unai se wane kadi kao doha koliyanda tumadiyao, na kai laisi unai ka heyahayasoniyei.

9:4 Esodo 34:1 ku hasili.

9:5 Buka Tabuna nige *selubim* kadi kao yo yodi paisowa ye hemasalahanwanamwaei. Anelu udiyedi meta siya udoi, kadi kao se hemasalahadi meta ma pepedi yo kaedi yo hinage nimadi. Na siya yodi paisowa ede teha hetahetabudi se kitakitahetetedi.

9:13 *Yaubada matanawai tamowai taudiyo nige se a'a* kaniyona ede tamowai wa nige gonowana se mwaleae logologu tabuna bakubakuna unai se kitalasam yo se tapwalolo.

kewadiwai. Unai kabo se a'a'uyo. Iyamo teina ta meta dagelagaibudi mo se a'a. ¹⁴ Na Yaluwa Tabuna Miyamiyahaina Yesu ye hebayao na ye bom ye kainauyai'uyoi Yaubada unai. Na iya meta nige yababana hesau. Unai ede Keliso kwasinana ye gigibwalikalili na kabo suisui kwasinadi.

Kabahemwaloida laulaudiyo udoi'udoi udiyedi Keliso kwasinana nuwadao ye he'a'adi, na ta hemala Yaubada Maumaulina yona taupaisowa.

¹⁵ Keliso yona kitalasam debanawai talam hauhauna ta ye haiyama, unai kaiteyadi Yaubada ye yoganeidi wa bena Yaubada yona hededehegesunuma gogodi miyamiyahaidiyo se haidi. Matauwuna talam bagubagunana wa unai na tamowai saha se ginaulipwanolidi wa ba'ayadi maudoidi debadiwai Keliso ye boita, unai ye hemaisahaidi yo yailihai ye moseidi.

¹⁶ Na huyana tamowai hesau yona gogo hekasana pepwana ye kulikauli na ye boitagabaei, meta nige gonowana tamowai hesau ye kabilau gogo ne udiyedi kana siga se hemamohoiyei meta pepwa ne taukulina ede ye boitako. ¹⁷ Ena taukulina ta ma miyana meta nige gonowana tamowai hesau gogo hekasana pepwana ta ye hepaisowa na unai ginauli saha ye hededehegesunuma wa ye hai. Teina pepwa ta nige gonowana ye paisowa kana siga ee taukulina ta ye boita. ¹⁸ Doha hinage talam bagubagunana wa nige yona gigibwali ye lau ee kwasina unai se hemamohoiyei. ¹⁹ Mose Yaubada yona laugagayo maudoidi ye hededegebaedi tamowai udiyedi, na muliyena bulumakau natudiyao yo gouti kwasinadi yo waila ye haidi na mamoe wiyan pulupululuna yo hisopa* lagadi ye hepaisowadi na Yaubada yona laugagayo bukana yo tamowai maudoidi udiyedi ye lausibusibuidi ²⁰ na ye wane, "Teina kwasina ta meta Yaubada yona talam kalimiuwai wa kabahemamohoiyena. Na Yaubada ye hededebayao bena yona laugagayo kwa kabihekahnidi."

(Esodo 24:7-8) ²¹ Yo laulau kesekesegana unai kwasina ye lausibusibuyei logulogu tabuna unai yo kabakaihelahui gogodi maudoidi udiyedi. ²² Mamohoi, laugagayo ye hedede meta ginauli se bado bena kwasina unai se he'a'adi. Taba bena kwasina nige ye bwalili, nige yababa kabahedegigilina hesau.

²³ Teina ginauli ta meta siya ede galewa gogodiyao tautaudi, yo kababe'a'adi meta suisui kwasinadi. Na galewa ginaulidi kababe'a'adi meta ye saekalili na kabo suisui kwasinadi. ²⁴ Matauwuna Keliso nige ye lusae logulogu tabuna tamowai nimadiwai se ginauli wa unai. Na ye lusae galewa ne unai logulogu tabuna mamohoina ne unai. Temenai ye masalahalau Yaubada matanawai kita hesabada. ²⁵ Hinage ye lusae galewa ne unai nige bena huya badobado ye bom ye kaikitalasamyei'uyoi, doha taukalasam saesaena

bolimai kesega kesega ye lusae teha tabukalikalilina unai ye kaikitalasam, na kwasina ye bahei wa meta nige iya ye bom kwasinana. ²⁶ Ena taba Keliso yona kitalasam ne ye ginaginauli'uyoi, meta huyana Yaubada tanoubu yona hetubuna wa unai ye laoma ee teina kabo ye kamkamna ma gwauna. Na huya gehena ta unai ye laoma ma kesega mo ye kitalasam'uyoi bena ba'aya ye tolehesuwaladi.

²⁷ Doha ede tamowai ye boita ma kesega mo na mulinawai kabo ye masalahah hekasa mayadaina unai, ²⁸ hinage Keliso ye boita ma kesega mo na kitalasam ye ginauli tamowai gwaudi yodi yababa kabalaehesuwalana. Na kabo ye uyoma nige bena tauba'aya hesabadi, na tenem huyana ne unai kabo mauli nige sigana ye moseidi iya taunayawatanina tamowaidiyo ne udiyedi.

Keliso ma kesega mo ye kitalasam

10 Laugagayo Mose unai se laoma wa meta ginauli namwanamwadi se laolaoma ne tautaudi mo, nige mamohoidiyo. Unai ede kitalasam kesekesegadi tamowai se ginaginauli'uyoidi bolimai badobado, na udiyedi taba nige gonowana taukahelahui ne se hedudulaidi. ² Ena taba laugagayo wa tamowai se hedudulaidi kabo gonowana kitalasam wa se kaiyawasi. Matauwuna ena taba kitalasam kesega mo unai taukahelahui wa se a'ako, kabo nige gonowana yodi yababa se nuwatu'uyoidi.

³ Na tenem kitalasamdi ne meta ba'aya kabahenuhenuwaisinidi bolimai badobado,

⁴ matauwuna bulumakau yo gouti hakiyadi kwasinadi nige gonowana ba'aya se haigabae.

⁵ Tenem unai huyana Keliso ye dobima tanoubu ta unai meta ye wane,

"Kitalasam yo kainauya nige ku henuwadi, na yau taugu ta ku kabinonohai yogu.

⁶ Kainauya gabugabudi yo ba'aya kabahedegigilina kainauyadi nuwam nige se henamwa.

⁷ Na kabo ya wane, 'Yaubada, yau ede te, doha buka unai se kuliyako, ya laoma kowa yom nuwatu bena ya ginauli.' "

(Same 40:6-8)

⁸ Bagubaguna Keliso ye hedede ye wane, "Kitalasam yo kainauya meta siya kitalasam gabugabudi yo kitalasam ba'aya hesabadi nige ku henuwadi yo nige nuwam se henamwadi." (Iyamo laugagayo ye hedede bena se ginaulidi.) ⁹ Na ye hedede'uyo ye wane, "Yau ede te, ya laoma kowa yom nuwatu bena ya ginauli." Teina hedehedede ta udiyedi talam bagubagunana wa ye tolehesuwalna na helabuina ye haiyama. ¹⁰ Na Yaubada yona nuwatu unai ye tolehesuwalada yona tamowai, Yesu Keliso tauna kitalasamna kesegana wa debanawai.

9:19 Hisopa meta kaiwa gagilina kuyukuyawana Isalaela tehadu udiyedi ye kinikini. Kita nige yoda hesa, unai kabo ta tole ta wane hisopa. Kita kaiyalu lagana gagilina ta hepaisowa unai ta lausibusibu.

¹¹ Talam bagubagunana wa unai mayadai kesega kesega taukitalasam maudoidi yodi paisowa se ginaginaulidi. Kaitalasam kesekesegadi se moseidi Yaubada unai na nige gonowana udiyedi ba'aya se haigabaeidi. ¹² Na teina taukitalasam saesaena ta ba'aya kaitalasamna ma kesega mo ye ginauli, na mulina ne unai ye sae Yaubada nimatuutuuna unai ye tuli. ¹³ Temenai ye nayanaya ye lau ee kana siga kana waiunu Yaubada ye toledi kaena kadi duku.

¹⁴ Matauwuna tenem kaitalasam kesega ne unai kaiteyadi ye tolehesuwaladi siya Yaubada yona tamowai ne meta ye haidi na ye tolehedudulaimamohoiyeidi ye lau nige kana siga.

¹⁵ Yaluwa tabuna teina ta hinage ye hemasalahayako kalidawai. Doha bagubagunawai ye wane,

¹⁶ "Guylau ye hedede ye wane, 'Teina talam ta kabo ya ginauli Isalaela tamowaidi udiyedi, tenem huya ne mulinawai.

Yau yogu laugagayo kabo ya toledi kuludi ne udiyedi
yo ya kulidi nuwadi ne udiyedi.'" (*Yelemaiya 31:33*)

¹⁷ Na kabo ye hedede'uyo ye wane,
"Yodi ba'aya yo laulau yababayababadi meta
yau taba nige ya nuwatu'uyoidi." (*Yelemaiya 31:34*)

¹⁸ Na huyana Yaubada ba'aya ye hededegigilidi meta tamowai nige gonowana kaitalasam hekadi se ginauli'uyoidi.

Sunuma hededehebayaona

¹⁹ Kehaguwao, Yesu kwasinana debanawai ta nuwabayaao na ta lusae galewa teha tabukalikalilina ne unai. ²⁰ Yesu teina keda hauhauna ta ye sokeyako kita hesabada yo gonowana unai kabo mauli ye leyama kalidawai. Woyo tapulisina ne iya ede Yesu tauna, unai kabo gonowana ta lau Yaubada unai. ²¹ Yo hinage yoda taukitalasam saesaena iya Yaubada yona tamowai taukitahetetedi. ²² Tenem nuwatu maudoidi ta debadiyena taba kwa laoma ta sigi ta lau Yaubada unai ma nuwamamohoida yo ma sunumada. Matauwuna yoda nuwatu yababayababadi Keliso kwasinana unai ye lausibusibuyeidiko na ye he'a'ada, yo tauda waila a'ana unai ye deulidiko. ²³ Tabu yoda tolobayaao na Yaubada yona hededehegesunuma ta hededehemasalahadi tamowai udiyedi ta bena ta kabihekahini, matauwuna Yaubada saha ye hededehegesunuma kalidawai wa kabo ye hemamohoeyei. ²⁴ Na bena ta nuwanuwatu kabo idohagi na ta haihebahebayao'uyoida gadosisi yo laulau namwanamwadi udiyedi. ²⁵ Tabu yoda tapwalolo koikogogodi ta miyasuwalaedi doha tamowai hekadi yodi miyamiya ne. Bena yoda sunuma unai ta haihebahebayao'uyoida, matauwuna kabina ta kata meta yoda Guylau yona uyoma mayadaina ye hanahanauma.

²⁶ Ena kita Yaubada yona hedehedede mamohoina ne kabina ta kata na sola ba'aya unai ta miyamiya, meta nige kaitalasam hesau'uyo kabo ba'aya ne ye haigabaeidi, ²⁷ na ma matamatausida hekasa mayadaina yo Yaubada kana waiunu kabaheyababadi kaiwana kalakalasina ta nayanayaidi. ²⁸ Ena tamowai hesau Mose yona laugagayo ye laukwatakwataei na tamowai labui o haiyona se kita yo se hemamohoeyei, kabo se unuheboita, nige gonowana se katekamkamnae.* ²⁹ Yomi nuwatu idohagi? Ena tamowai hesau Yaubada Natuna nige ye hekasisiyei yo talam kwasinana wa ye hai doha ginauligaibu, yo nige ye mode meta teina kwasina ta kabo yona yababa ye deuligabaedi Yaubada matanawai, yo Yaluwa iya ginauli namwanamwadi ye kainauyaida ye hededeheyababa meta kabo kamkamna sahasahana ye hai? ³⁰ Tauhedededena kabina ta katako, ye hedede ye wane, "Yau kabo ya haigum, yo hekamkamna meta yau ya ginauli," (*Dutelonomi 32:35*) yo ye hedede'uyo ye wane, "Guylau kabo yona tamowai ye hekasadi." (*Dutelonomi 32:36; Same 135:14*)

³¹ Unai ginauli nuwamatamatousikalilina ede hekamkamna Yaubada Maumaulina nimana unai kabo tamowai se hai ne.

³² Na huya bagubagunana unai Keliso wasana kwa hai wa kwa nuwanuwatui. Tenem huyana ne unai kamkamna lakilakina kwa hekalo, na iyamo yomi sunuma unai kwa tolobayaao. ³³ Huya hekadiyo tamowai komiu Yesu tausunumaena se haigomiu na boda matadiwai se hededeheyababagomiu yo se hekamkamnagomiu, yo huya hekadiyo kamkamna kesekesegadi tauhaidi wa kwa sagidi. ³⁴ Kami kahao numatutugudu unai se toledi wa kwa katekamkamnaedi, yo huyana yomi gogo se haidi wa meta kwa gwauyala, matauwuna kabina kwa kata meta yomi gogo namwanamwadi yo miyamiyatihahidi siya ede galewa ne unai.

³⁵ Unai tabu yomi sunuma kwa gabaei. Kainauyana lakilakina kabo Yaubada unai kwa hai. ³⁶ Yomi sunuma unai taba kwa tolobayaao, yo huyana Yaubada yona nuwatu kwa ginaulihegehedi sigana unai, saha ye hededehegesunuma wa kabo kwa hai. ³⁷ Na huyakubwakubwa mo

"taulaoma ne kabo ye lagema na taba nige ye pahili.

³⁸ Na yogu tamowai dudulaina sunuma unai kabo ye miya;
na ena ye mulisigisigi
yau taba nige nuwagu ye namwa kalinawai."

(*Habakuku 2:3,4*)

³⁹ Na kita meta nige taumulisigisigi tamowaidiyao. Ena tamowai hesau ye mulisigisigi Yaubada kabo ye heyababa. Na kita meta tausunuma tamowaidiyao, mauli nige kana siga tauhaidi.

Tausunuma tamowaidiyao wasadi

11 Yoda sunuma kaniyona ede ta kawamamohoi yo nige nuwadao se labulabui meta Yaubada yona hededehegesunuma ta nayanayaidi ne kabo se tubu, yo ginauli saha sola nige ta kitadi kabo se masalah. ² Kada mumugao yodi sunuma kana kao ede doha teina, unai Yaubada ye hededetausaedi.

³ Sunuma debanawai ta nuwatulobai meta Yaubada ginauli maudoidi ye hetubudi yona hedehedede unai. Na saha ta kita ne meta ginauli nige masamasalahadi udiyedi ye masalah, Yaubada yona hedehedede unai.

⁴ Sunuma debanawai Abela kitalasam namwanamwana ye mosei Yaubada unai, na kabo Kaina yona kitalasam. Na Yaubada Abela yona kainauya ye kitahenamwa na yona sunuma debanawai ye hededetausae meta iya tamowai dudulaina. Abela ye boitako, na iyamo yona sunuma wasana sola iya ede ta lapulapui.

⁵ Sunuma debanawai Yaubada Enoka ye hai ye saei galewa, ede iya nige boita ye lobai. Makesega ye tauwadam, matauwuna Yaubada iya ye haiyako. Na huyana sola nige ye sae galewa, Yaubada iya ye hededetausae meta iya nuwana ye henamwa. ⁶ Na ena nige yoda sunuma, meta nige gonowana Yaubada nuwana ta henamwa. Matauwuna nige gonowana tamowai hesau ye laoma Yaubada unai kana siga ye kawamamohoi meta Yaubada iya maumaulina yo miyamiyahaina, yo hinage bena ye kawamamohoi meta Yaubada iya tauwaseneina ye kainauyaidi.

⁷ Sunuma debanawai ginauli sahasahadi sola nige se masalah wa Yaubada ye hededehemasalahanonohaidi Nowa unai, na Nowa Yaubada ye hekasisiyei yo yona sunuma debanawai ake* ye ginauli bena yona numa tamowaidi ye hemaulidi. Saha ye ginauli ta unai Nowa tanoubu tamowaidiyao kadi gilu ye hemasalah, na ye hemala laulaududulai tamowaina Yaubada matanawai.

⁸ Sunuma debanawai Abelahama Yaubada ye kawakabiyei, huyana ye yoganei bena ye lau tano hesau unai. Tano ne Yaubada ye hededehegesunuma bena huya mulinawai kabo ye hemala yona tano mamohoina. Yaubada ye kawakabiyei na ye lau, na nige kabina ye kata haedi ye laulau. ⁹ Yona sunuma debanawai hededehegesunuma tanona unai ye miya doha laolaoma. Yo tenti unai ye miyamiya doha hinage natuna Isako yo wahana Yakobo, na siya meta hededehegesunuma kesekesegana tauhaina.

¹⁰ Abelahama teina laulau ta ye ginaulidi, matauwuna magai miyamiyahaina ye nayawatani. Magai wa taunuwatuhekasana yo tauginaulina ede Yaubada.*

¹¹ Huyana Abelahama ye tautaubadakalilikoy mwanena Sala ye kobosi, meta Abelahama yona sunuma debanawai Yaubada ye hebayao na ye hemala tama, matauwuna ye kawamamohoi meta saha Yaubada ye hededehegesunumayako wa kabo ye ginauli. ¹² Unai tamowai tautaubadakalilina ta kana isimilitao meta se badokalili doha galewa kipwaladi yo salagomgom nagalidi. Nige gonowana ta hasilidi.

¹³ Teina tamowai ta ma sunusunumadi na se boita. Na saha Yaubada ye hededehegesunumadi wa sola nige se haidi. Na kedalo halohawai mo se kitakitalaedi yo se gwauyalaedi. Yo se hededehemasalahauyoidi meta siya laolaoma yo yodi magai mamohoina nige tanoubu ta unai. ¹⁴ Tamowai yodi hedehedede doha teina ye hemasalah meta basileiya hesau se wasewasenei bena kabo se hai yodi. ¹⁵ Ena taba tano se laugabae wa se nuwanuwatui, meta kabo gonowana se uyoko hesabana. ¹⁶ Iyamo se henuwa magai namwanamwana se nayanayai iya ede galewa ne unai. Unai Yaubada nige ye mwadine bena iya se katai yodi Yaubada, matauwuna yodi magai lakilakina ye kabinonohaiyako.

¹⁷⁻¹⁸ Huyana Yaubada Abelahama ye laukita kabo Abelahama iya natuna Isako ye kitalasamyei, matauwuna yona sunuma. Yaubada ye hededehegesunumayako meta Isako debanawai kabo kana isimilitao se masalah, na iyamo Abelahama Yaubada yona hededehegesunuma tauhaina wa ye yali bena natukesekesegana ye kitalasamyei.

¹⁹ Abelahama ye nuwatui meta taba Isako ye boita, Yaubada gonowana kabo ye hemauli'uyoi. Na saha ye tubu wa meta doha Abelahama natuna Isako boita unai ye hai'uyoi.

²⁰ Sunuma debanawai Isako iya natunao labui Yakobo yo Iso ye hededehehenamwadi yo ye hededehemasalah ginauli sahasahadi kabo se tubu kalidiwai.*

²¹ Sunuma debanawai Yakobo, huyana yona huyabaita ye hanahanauma, meta Yosepa natunao labui ye hededehehenamwadi yo yona tuke unai ye kabi ye totolo na Yaubada ye kaihelahui.*

²² Sunuma debanawai Yosepa yona huyabaita ye hanahanauma ede ye hededehemasalah meta Yaubada kabo Isalaela tamowaidiyao Aikupito unai ye woyahepesadi, yo saha ye henuwa bena siyadana ne unai se ginauli, meta ye hededenonohai.

²³ Huyana Mose se labasi, na sunuma debanawai tamana yo sinana iya se tolewadam waikena haiyona, matauwuna iya se kita meta kana kao ye namwakalili na Palao* yona laugagayo nige se matausiyei.

11:7 Teina hedehedede ta *ake* nige kalina Saliba, na kalina Hebelu. Na kaniyona ede *keisi*. Nowa waga ye kabi wa hinage ta hedede *ake*, iya meta keisi lakilakikalilina. Nowa wasana ede Genese 6:5 unai ye hetubu.

11:10 Hemasalah 21:10-14 ku hasili.

11:20 Genese 27:27-29,39

11:21 Tem huya ne unai tamowai se totolo na se tapwalolo.

11:23 *Palao* meta Aikupito yodi wasawasa.

²⁴ Sunuma debanawai huyana Mose ye tubusae meta nige ye henuwa bena se hedede iya Palao natuna waihiu wa natuna,* ²⁵ na ye henuwa bena Yaubada yona tamowai maiyanao se kamkamna, na nige bena huyakubwakubwa mo yababa gwauyalana ne unai ye gwauyalala. ²⁶ Ye nuwatui meta ye namwa mo taba ye kamkamna Keliso debanawai na kabo Aikupito yona gogo wasawasadi gadosisidi ne, matauwuwuna iya ye kitakitalau yona kainauya ye laolaoma ne hesabana. ²⁷ Sunuma debanawai Mose Aikupito ye laugabaei na wasawasa yona kouyalayala nige ye matausiyei. Yona sunuma unai ye tolokesegai, matauwuwuna yona kamna ne unai doha Yaubada iya ede wadawadamna ye kita. ²⁸ Sunuma debanawai Mose ye hededelau Isalaela tamowaidi bena taukiuli kabikabina yo kwasina hesaudi kawakeda duudi udiyedi se ginaulidi, unai taba nige taukai'unu aneluna Isalaela natudiyao tautaubaguna ye unuidi.*

²⁹ Sunuma debanawai Isalaela tamowaidiyao Gabwa Pulupululuna unai se kawasi kana kao doha tano pitapitalina; na huyana Aikupito tamowaidiyao se kaipate bena se hemuliwatanidi ede siya maudoidi se yoli.

³⁰ Sunuma debanawai Isalaela tamowaidiyao Yeliko ganana se tauhetakikili mayadai haligigi-labui na kabo gana wa ye ulugwaligwali.

³¹ Lahaba iya waihiu tauna ye lokulokunegabae wa meta yona sunuma debanawai ye mauli, huyana Isalaela tamowaidiyao Yeliko magaina tamowaidiyao, siya meta Yaubada taukawayagalaena, se koihemwaloidi, matauwuwuna Isalaela yodi taukaikewasipwa ye saguidi.*

³² Kabo saha hesau ya hedede'uyoi? Nige yogu mahana gonowana bena kabo Gidiyoni, Balaki, Samasona, Yepeta, Dawida, Samuwela yo peloweta maudoidi yodi sunuma wasadi ya hasilidi. ³³ Teina tamowaidiyao ta yodi sunuma debadiwai basileiya hekadi se saepwaidi, yo kabikabi dudulaidi se ginaulidi, yo Yaubada saha ye hededehesunumadi wa se haidi. Siya hinage layioni kawadi se koiguduidi tabu se kaitau, ³⁴ yo kaiwa kalapulupululudi se hebosodi, yo iyala kelepana unai bena se unuidi na se wasabugabaei. Yaubada yodi basabasa ye buidi na se bayao, na iyala unai se bayaokalili na kadi waiunu se henakudi. ³⁵ Sinesineo kehadiyao yodi tauboita boita unai se hai'uyoidi.* Tamowai hekadiyo meta se hekamkamnakaliliyeidi, na iyamo nige se henuwayailihai, na se henuwa bena se boita matauwuwuna kabina se kata meta boita mulinawai kabo se tolo'uyo na mauli namwanamwana se hai. ³⁶ Hekadi se talatalawasiyedi yo wipi udiyedi dageladi se sapikopadi, yo hekadiyo nimadi yo kaedi se senidi yo numatutugudu udiyedi se toledi. ³⁷ Hekadi se

hekalawekudi; hekadi sowala udiyedi se boliduwaduwalidi, hekadi kelepa udiyedi se unuhemwaloidi. Na teina tamowaidiyao ta meta se dehakalili, ede mamoe yo gouti dahidi se likwadi na se sae yo se dobi, yo tamowai siya se hekamkamnadi yo se kabihenayaidi. ³⁸ Siya se namwakalili Yaubada matanawai, na tanoubu ta tamowaidiyao siya nige se kitahenamwadi. Unai se sae yo se dobi balabalagaibu yo koya tupidi udiyedi, na weku yo bwatano duhadu udiyedi se miyamiya.

³⁹ Yaubada teina tamowai maudoidi ta yodi sunuma debanawai ye kitahenamwadi, na iyamo saha ye hededehesunumadi wa sola nige se hai yodi mauli huyadiwai. ⁴⁰ Kaniyona ede ginauli namwanamwana hesau ye nuwatuhekasakauli kita hesabada, na ye henuwa taba siya yo kita kabo ta haigogoi, iya ede ye tolehedudulaimamohoeyeida.

Yaubada natunao ye guguyaidi

12 Teina bodalakilaki tamowaidi ta yodi sunuma wasadi udiyedi Yaubada yona kabinamwa se hekitada. Unai kabakabihekahnida maudoidi yo ba'aya kabahekabesibesida ta gabaedi, na ma nuwabayaoda ta heloikesegai yoda kailakwa ta unai. ² Bena ta kitakitalau Yesu unai. Iya yoda sunuma yona kabalaoma yo yona kabagehe. Yona nuwayali unai sataulowai boita nuwamwadinwadinena ye hai, matauwuwuna ye nuwatui gwauyalana kabo ye hai. Na teina huya ta Yaubada yona telona tehatuutuuna unai ye tutuli. ³ Yesu kwa nuwatui. Iya meta tamowai yababayabadiyao udiyedi yona hekamkamna ye haidi. Unai tabu kamnamiyao se yababa yo kwa nuwabasabasa yomi kamkamna ta udiyedi. ⁴ Huya maudoina ye laoma ee teina yomi kaipate ba'aya hewaiununa unai meta sola nige kwasinamiyao se hebwalilidi. ⁵ Nuwana Yaubada yona hededehebayao wa kwa nuwaluluhiyeidiko, doha ye kawanatuyeigomiu ye wane,

"Natugu, huyana Guiyau ye guguyaigo, tabu ku nuwatuhegagili,
yo huyana ye dilago, tabu nuwam ye basabasa,
⁶ matauwuwuna Guiyau tamowai ye gadosisiyedi ne
kabo ye guguyaidi,
yo kaiteyadi ye kawanatuyedi kabo ye
hekamkamnadi." (*Hededesonoga 3:11-12*)

⁷ Pilipili udiyedi bena kwa hekalakasikasinigomiu, matauwuwuna teina ta meta kami guguya Yaubada unai se laoma na yona kabikabigomiu meta doha komiu natunao mamohoidi. Tama namwanamwana meta natunao kabo ye guguyaidi. ⁸ Yaubada natunao maudoidi ye guguyaidi, na ena nige ye guguyaigomiu, meta komiu nige natunao mamohoidi, na tama hesau natunao. ⁹ Kita tamadao tanoubu ta unai se

11:24 Esodo 2:10-12 ku hasili.

11:28 Esodo 12 ku hasili.

11:31 Yosuwa 2:1-21 yo 6:22-25 ku hasili.

11:35 1 King 17:17-24 yo 2 King 4:25-37 ku hasili.

guguyaida na unai ta hekasisiyeidi. Yo gonogonowana doha Tamada galewa ne unai yona guguya taba ta haidi, kabo ta mauli.

¹⁰ Tamadao se bom yodi nuwatuwai guguya se kawanamwanamwaedi, na huyakubwakubwa mo unai se guguyaida, na Yaubada ye guguyaida kita yoda namwa hesabana bena kabo yona tabu unai kita maiyada. ¹¹ Guguya nige ta henuwadi, matauwuna udiyedi kamkamna. Na muliwi siya kaiteyadi guguya ta udiyedi taumiya kabo gonowana laulaududulai yo nuwadaumwali udiyedi se miya.

¹² Unai nimamiu basabasadi yo kaemiu megwamegwadi kwa hebayaodi.

¹³ Na keda kwa ginaulihedudulaidi kaemiya o hesabadi. Unai kabo tamowai kaeyabayababadi unai se lau na taba nige se guli, na kabo namwanamwa se lobai.

Yaubada tautolodagedagelaina kadi guguya

¹⁴ Maudoimiu kwa kaipate bena nuwadaumwali unai kwa miya tamowai maudoidi maidamiyao, yo yomi mauli udiyedi bena kwa tabu. Ena nige kwa tabu, meta taba nige Guiyau kwa kita. ¹⁵ Kwa hebayao'uyoigomiu to taba nige Yaubada yona kabinamwa kwa kabisapuli. Na kwa kitasipwa'uyoigomiu madai kwa hemala doha lamlam nisanisana na tamowai kwa woyasapulidi na ginauli yabayababadi se ginaulidi. ¹⁶ Kwa kitanamwanamwa tabu laulau bikibikidi* kwa ginaginaulidi, yo tabu kwa hemala doha Iso. Iya Yaubada ye lausuwalaei huyana yona taubaguna dudulaina maudoina ye mosegabae louguguba kesega hesabana.* ¹⁷ Kabina ta kata meta mulinawai ye henuwa bena taubaguna hededehehenamwana ye hai, na yona nuwatu wa meta tamana nige ye kawanamwanamwaei. Na Iso tamana ye kaibwadai yo ye dou, na nige gonowana saha hesau ye ginauli.*

¹⁸ Komiu nige kwa laoma kuduli mamohoina unai doha Isalaela tamowaidiyo huyana Yaubada laugagayo ye moseidi. Kuduli wa unai kaiwa kalakalasina, masigili yo yaumai lakilakikalilidi.

¹⁹ Komiu nige bwagigi dagugulakilakina yo kalina lakilakina kwa lapuidi doha Isalaela tamowaidiyo. Saha se lapuidi wa ye nuwamatamatausi ede se kaibwada bena tabu Yaubada ye hedehedede'uyo kalidiwai. ²⁰ Matauwuna Yaubada yona hedehedede wa unai meta se matausikalili doha ye wane, "Tabu kwa laulau kuduli ne dedekanawai, yo ena suisui hesau ye lau kuduli ne unai meta hinage kwa lauwekui." (*Esodo 19:12-13*) ²¹ Yo Mose saha ye kita wa hinage ye matausikalili ede ye wane, "Ya matausikalili yo ya tabutabubu." (*Dutelonomi 9:19*)

²² Na komiu kwa laoma Saiyona Kudulina unai, iya ede Yelusalema galewa ne unai wa, Yaubada Maumaulina yona magai lakilakina. Yo kwa laoma anelu bodalakilaki nige gonowana ta hasilidi yodi gwauyala koigogona unai, ²³ yo kwa laoma Yaubada natunao taubaguna siya kaiteyadi hesadiyao ye kulidiko galewa ne unai yodi kaihelahui koigogona unai. Yo kwa laoma Yaubada unai, iya ede tamowai maudoidi tauhekasadi, yo hinage tamowai dudulaidi yaluwadi yodi teha unai. Siya ede Yaubada ye tolehedudulaimamohoeyeidiko. ²⁴ Yo kwa laoma Yesu iya talam hauhauna tauhaiyamana unai, yo hinage kwa laoma iya kwasinana ye didi hesabada wa unai. Na iya kwasina meta namwanamwakalilina, na kabo Abela kwasinana.

²⁵ Kwa kitanamwanamwa tabu Yaubada kwa kawayagala. Iya ede ye hededelaowa kalimiuiwai. Sinai kudulina unai Yaubada ye hededelau Isalaela tamowaidiyo udiyedi. Na huyadi ne unai yona hedehedede nige se kawakabiyei, ede ye hekamkamnakaliliyeidi. Na galewa ne unai ye hedehedobima kalidawai. Na ena yona hedehedede nige ta kawakabiyei, kabo ye hekamkamnakaliliyeda na kabo Isalaela tamowaidiyo kadi hekamkamna wa. ²⁶ Huyana ye hededelau Isalaela tamowaidiyo udiyedi meta kalinana tanoubu ta ye hetabutabubu; na huya ta yona hedehedesunuma meta ye wane, "Kabo ma kesega'uyo tanoubu ta ya hetabutabubu, nige tanoubu ta ye bom na galewa kabo hinage." (*Hagai 2:6*) ²⁷ Teina hedehedede ta "ma kesega'uyo" ye hemasalahauyoi meta ginauli se tabutabubu Yaubada kabo ye haigabaedi, siya ede tanoubu yo galewa ginaulidi yona hedehedede unai se tubu wa. Unai ginauli saha nige se tabutabubu kabo se miyahai.

²⁸ Basileiya ta hai ta nige gonowana ye tabutabubu, unai ede bena ta laoma Yaubada unai ma lautokida na ta kaihelahui ma hekasisida yo ma matamatausida, ²⁹ matauwuna yoda Yaubada kana kao doha kaiwa kalakalasina kana waiunu kabo unai se kalasigehe.*

Hededehebayao gegegehena

13 Bena kami kahao maiyamiyao kwa haigadosisi'uyoigomiu na kwa miya. ² Tabu kwa nuwaluluhi laolaoma bena kwa yogaisinidi. Teina laulau ta unai tamowai hekadi anelu se yogaisinidi, na nige kabidi se kata meta siya anelu. ³ Numatutugudu taumiyaidi yo kaiteyadi se kabihenayaidi kwa nuwatuidi doha komiu maiyamiyao kwa kamkamnagogogi.

⁴ Maudoimiu bena yomi tawasola kwa hekasisiyeidi, yo tabu kwa ganaganawali. Matauwuna Yaubada tauganawali yo laulaubikibiki

12:16 Laulau bikibikidi: Siya ede ganawali yo laulaubikibiki yo kabikabi hekadiyo doha teina.

12:16 Genese 25:29-34

12:17 Genese 27 ku hasili.

12:29 Dutelonomi 4:24

tamowaidi kabo ye hekamkamnadi. ⁵ Moni tabu kwa gadosisikaliliyei, na saha kwa hai gonogonowamiu wa unai kwa miya, matauwuna Yaubada ye hedede ye wane,

“Yau taba nige ya laugabaego
yo taba nige ya nuwagabaego.” (*Dutelonomi 31:6*)

⁶ Unai gonowada ma nuwabayaoda ta wane,
“Guuyau iya tausaguigau ede; nige gonowana ya matausi.
Tamowai meta kabo saha se ginauli kaliguwai?”
(*Same 118:6,7*)

⁷ Yomi tauwoyawoya bagubagunadi kwa nuwatuidi. Siya Yaubada yona hedehedede tauhedededi kalimiuwai ede. Yodi mauli kaniyodi kwa kitadiko na yodi sunuma miyamiyadi bena kwa laulauyedi. ⁸ Yesu Keliso meta kana kao kesekesegana lahi, wau teina, malaitom yo ye lau huya nige kana siga.

⁹ Na tabu lauhekata udoi'udoi se woyahesuwalagomiu. Ye namwa mo taba Yaubada yona kabinamwa unai nuwamiu ye hebayaodi. Na kaihekahekasisi udoi'udoi nige gonowana namwa hesau se haiyama. ¹⁰ Kita yoda kabakaitalasam milana hesau,* na Dius tamowaidi yodi taukaitalasam tanoubu ta unai logulogu tabuna* unai se paipaisowa nige yodi dudulai gonowana bena kaina se kai.*

¹¹ Dius yodi kabikabi unai taukaitalasam saesaena suisui kwasinadi ye bahelaedi teha tabukalikalilina unai bena ba'aya kaitalasamdi, na suisui yaudi se laedi magai dagelanawai se gabudi. ¹² Doha hinage Yesu magai lakilakina ganana dagelanawai ye kamkamna yo ye boita bena kwasinana unai tamowai ye tolehesuwaladi Yaubada yona. ¹³ Na kita taba ta lau kalinawai magai dagelana ne unai, to saha taumwadimwadinena ye bahei wa hinage bena ta bahei. ¹⁴ Matauwuna teina tanoubu ta kita nige yoda magai, na yoda magai lakilakina ta nayanayai meta iya ede sola kabo ye laoma.

¹⁵ Yesu debanawai huya maudoina bena hedebasae kaitalasamna ta mosemosei Yaubada unai, na sopada ta unai Yesu hesana ta hededehemasalah.

¹⁶ Kabinamwa yo tamowai hekadi kaikainauyaidi hinage tabu nuwamiu se luluhidi. Teina kaitalasam ta udiyedi Yaubada nuwana kwa henamwa. ¹⁷ Kami tanuwagao kwa kawakabiyeidi yo yodi loina gigibwalidi udiyedi kwa miya. Se kitahetetegomiu na saha se ginaulidi wa meta bena kabo se tolehemasalahadi Yaubada unai. Kwa kawakabiyeidi kabo yodi paisowa unai nuwadi se namwa. Tabu nuwadiyao kwa heyababadi. Ena nuwadiyao kwa heyababadi meta taba nige se sagunamwanamwaegomiu.

¹⁸ Yomai kwa tapwalolo. Kabina ka kata meta nige kama gilu, yo yoma gadosisi ede bena ginauli maudoidi udiyedi dudulai mo unai ka miya. ¹⁹ Ya kaibwadaigomiu bena yogu kwa tapwalolo to kabo ya lagemwamwayaowa kalimiuwai.

²⁰ Nuwatalu Yaubadana yoda Guyyau Yesu boita unai ye hetolo'uyoi. Kita iya yona mamoe na iya taukitaheteteda saesaena, yo iya kwasinana unai Yaubada talam miyamiyahaina ye hemamohoiei.

²¹ Na ka kaibwada Nuwatalu Yaubadana unai taba ginauli namwanamwadi maudoidi ye lediwa na udiyedi kabo yona nuwatu kwa ginauliwatanidi. Yo ginauli saha Yaubada nuwana se henamwa meta taba kalidawai ye ginaulidi Yesu Keliso debanawai. Lautoki yo hedebasae ta mosei Yesu Keliso unai ye lau huya nige kana siga. Amen.

²² Kagu kahao, ya kaibwadaigomiu bena kwa lapulapuinamwanamwa yogu hededehebayao ta unai, matauwuna teina leta ta nige ye loha.

²³ Ya henuwa bena kabina kwa kata meta kada kaha Timoti numatutugudu unai se hepesayako. Ena ye lagemwamwayauma inai kabo maiyagu ka laowa ka kitagomiu.

²⁴ Yogu lautoki ye laowa yomi tauwoyawoya udiyedi yo hinage taukawamamohoi maudoimiu kalimiuwai. Yo ekalesiya Italiya unai hinage yodi lautoki se hetamaliyawa kalimiuwai.

²⁵ Yaubada yona kabinamwa ye laowa maudoimiu kalimiuwai.

13:10 Kabakaitalasam milana hesau kaniyona ede Yesu yona kaitalasam sataulo unai.

13:10 Logulogu tabuna meta numa tabuna heyaheyasonina.

13:10 Nige yodi dudulai gonowana bena kaina se kai kaniyona ede Yesu yona kaitalasam sataulo unai nige namwana se lobai.

Yamesi yona leta

Yamesi yona leta hededehehemasalahana

Buka ta taukulina ede Yamesi, iya Guiyau Yesu kana kaha hesau (Galatiya 1:19), yo hinage Yelusalema unai dubu kadi tanuwaga hesau (Apostolo yodi paisowa bukana 15; Galatiya 2:1-13). Yamesi leta ta ye kuli ye lau Yesu Keliso tausunumaena kalidiwai. Siya ede Dius tamowaidi kadi bodoa na se haimiyamiyaidi basileiya udoi'udoi udiyedi. Yona kulikuli kubwakubwana ta unai, meta Yamesi Yesu tausunumaena miyamiya namwanamwadi udiyedi ye hekatadi. Yo hinage yona nuwatu ye kulihemasalaha meta bena tamowai yodi sunuma se hemamohoiyedi yodi paipaisowa udiyedi. Yo hededehebayao ye tole ekalesiya udiyedi bena se tolobayao pilipili udiyedi, yo yodi ekalesiya miyamiyadi udiyedi bena se kitahetete'uyoidi.

1 Yau Yamesi, Yaubada yo yoda Guiyau Yesu Keliso yodi heyayai tauhaina. Ya kulikulilaowa komiu Yesu Keliso tausunumaena kalimiuwai. Komiu boda Isalaela saudoudoi-labui wa kadi bodoa na kwa haimiyamiyagomiu basileiya udoi'udoi udiyedi: Ya lautokiyeigomiu.

Laukita udiyedi bena ta tolobayao

² Kehaguwao, huyana laukita udoi'udoi kwa hekalodi, bena ma gwauyalamu na kwa haidi. ³ Matauwuna kabina kwa kata meta yomi sunuma lautonogina ne kabo ye hetolobayaogomiu. ⁴ Ena huya maudoina yomi kabatolo unai kwa tolokesegai kabo nuwamiu se bayao yo komiu kabo kwa namwakalili, yo taba nige ginauli hesau unai kwa deha. ⁵ Ena hesau sibasiba unai ye deha, taba ye kaibwada Yaubada unai, na iya kabo ye kainauyai. Yaubada kabo taukaibwada maudoidi ye kainauyaidi ma nuwakohihaina, na nige ye kitaheyababadi. ⁶ Na taukaibwada ne bena ye sunuma, na tabu ye nuwalabulabui. Matauwuna kaiteya ye nuwalabulabui iya kana kao kabo doha bagodu gabwa unai yaumai ye towa ye bahesaei yo ye bahedobiyei. ⁷ Tenem tamowaina ne tabu yona nuwatu bena kabo Guiyau unai ginauli saha hesau ye lobai. ⁸ Iya meta nuwalabulabui tamowaina na nuwana ne ye haihaikabi, unai nige gonowana yona hineli ye ginauli.

Tausunuma tamowaina dobidobina yo gogo tamowaina

⁹ Tausunuma tamowaina dobidobina bena ye gwauyalala, matauwuna Yaubada matana ne unai ye saekalili. ¹⁰ Na tausunuma iya gogo tamowaina, iya bena ye gwauyalala matauwuna Yaubada matana ne unai nige ye saekalili. Yona gogo debadiwai taba nige ye nuwasaesae, matauwuna ede kabo ye tauwadam doha pasa. ¹¹ Mamohoikalili, mahana kabo ye dalasae na gigibwalina ne unai pasa wa ye sinai, na lalana ye

wowoya yo kana kao namwanamwana ye tauwadam. Gonogonowana doha gogo tamowaina ne. Yona paisowa ne udiyedi ye modemode, na ye tauwadam.

¹² Kaiteya laukita luwanawai na ye tolobayao meta gonowana ye gwauyalala, matauwuna huyana laukita ne ye saedikwai, iya kabo mauli kolonana ye hai. Mauli ne Yaubada ye hededehehesunumayako taugadosisiyeina udiyedi.

¹³ Huyana laukita kwa hekalo meta tabu kwa wane, "Yaubada ye laukitagau." Kaniyona ede Yaubada ye namwakalili na laulau yababayababadi nige gonowana iya se laukita, yo Yaubada taba nige tamowai hesau laulau yababayababadi udiyedi ye laukita. ¹⁴ Na huyana tamowai hesau laukita ye hekalo meta iya ye bom yona gadosisi yababayababadi se woyaei ede yababa hesabana. ¹⁵ Huyana yona gadosisi yababayababadi wa se tubu meta kabo se labalaba, ede yababa. Yo yababa ne ye kinilakilaki na ye labalaba, ede boita.

¹⁶ Kehaguwao, tabu kwa lupohaigomiu! ¹⁷ Namwa maudoina yo kainauya namwanamwadi yodi kabalaoma meta galewa. Galewa maladi tauhetubudi kalinawai se dobidobima. Iya nige gonowana kana kao ye bui doha ginauli hesau mahana ye sinai na tautauna ne ye buibui. Yaubada meta nige doha tenem. ¹⁸ Yona hineli ye ginauli yako meta yona hedehedede mamohoina unai kabo mauli hauhauna ye leyama kalidawai. Ede ginauli maudoidi ye hetubudi wa luwadiyena kita meta ye kaisunuwaida ta hemala kaniyo bagubagunadiyo.*

Lapuina yo ginauliwatanina

¹⁹ Kehaguwao, bena kabina kwa kata meta tamowai maudoidi taba yodi lapulapui se sagena, na yodi hedehedede yo yodi kouyalayala bena se pahili.

²⁰ Matauwuna ena tamowai ye kouyalayala, taba nige gonowana laulau dudulaidi Yaubada ye henuwadi ne ye ginaulidi. ²¹ Unai laulau yababayababadi yo nuwatu bikibikidi maudoidi luwamiu ne udiyedi

1:18 Dius kalidiwai meta ena yodi koya kaidi se suna yo se nonohako, kabo kai se haibagunaei ne tupwana se mosei Yaubada unai. Yo hinage yodi suisui natudiyao bagubagunadi kabo se kaitalasameyidi Yaubada unai. Kai yo suisui se mosegabaeidi ta hesadi ede *kaniyo bagubagunadi*, na siya meta Yaubada yona. (Lewitikasi 23:9-14, Dutelonomi 26:1-11)

kwa hekaiyawasidi. Yo ma nuwadobidobimiu Yaubada yona hedehedede kwa hai yo kwa sunumaei.

Hedehedede wa iya ede Yaubada ye toleyako nuwamiu ne unai na gonowana ye hemauligomiu.

²² Na tabu Yaubada yona hedehedede ne kwa lapulapuimoei, na unai kwa bom kwa lupohaigomiu. Na saha ye hedede ne bena kwa ginauliwatani.

²³ Kaiteya hedehedede ne ye lapuimoei na nige ye ginauliwatani, iya kana kao doha tamowai hesau galasi unai kana kao ye kitasipwanamwanamwaei,

²⁴ na mulinawai ye laugabaei, na nige bayaona kabokana kao ye kita'usei wa ye nuwaluluhiyei. ²⁵ Yaubada laugagayo hesau ye leyamako kalidawai, iya ede wasanamwanamwana, na unai meta yailihai ta hai. Ena tamowai hesau wasa namwanamwana ta hedeheddedi udiyedi ye lapulapulaunamwanamwa yo ye nuwanuwatuidi na saha ye lapuidi wa nige ye nuwaluluhiyedi, na ye ginaginauliwanidi, meta iya kabo Yaubada yona kabinamwa unai ye miya.

²⁶ Ena tamowai hesau ye hedede meta iya tapwalolo kabikabidi ye ginauliwanidi, na nige gonowana memenana ye kitahetetenamwanamwaei, kabo unai ye bom ye lupo'uyoi, na yona tapwalolo kabikabidi ne meta nige kaniyodi. ²⁷ Tapwalolo kabikabina Yaubada Tamada ye kitahenamwa meta ye a'a yo unai nige yababa, kabikabina ede teina: Bena wawayao dabudabuledi yo wabuwabu ta kitahetetedi yodi deha udiyedi, yo tanoubu yababana maudoidi udiyedi ta tolehesuwalada.

Gadosisi hineli hedehededen

2 Kehaguwao, kita ede yoda Guiyau saesaena Yesu Keliso tausunumaena, unai tabu tamowai kwa kitakitahinelidi. ² Doha taba tamowai hesau ye laoma yomi tapwalolo ne unai na lin gole nimana unai yo kaleko namwanamwana ye likwa, yo tamowai hesau dehadehana kaleko beyabeyana ye likwa na hinage ye laoma, ³ kabo saha kwa ginauli? Nuwana nuwamiu ne kabo se lau tamowai kaleko namwanamwana ye likwa ne unai na kwa wane, "Ku laoma inai, kabatuli namwanamwana ta unai ku tuli". Na kwa hededelau tamowai dehadehana wa unai kwa wane, "Metai ku totolo", o kwa wane, "Ku tulidobi matu ne unai kaegu ne dedekanawai." ⁴ Ena taba doha teina kwa ginauli meta tamowai kwa kitahinelidi na kwa hemala tauhekasa nuwatu yabayababadi udiyedi.

⁵ Kehaguwao, kwa lapulapui: Tanoubu tamowaidi matadiwai tamowai dehadehadi meta Yaubada ye kaisunuwaidi kabo yodi sunuma se namwakalili, yo Yaubada yona basileiya kabo siya yodi. Yaubada yona basileiya iya ede Yaubada ye hededehe sunumayako taugadosisiyeina udiyedi. ⁶ Na iyamo tamowai dehadehadiyao wa kwa kabihenahenayaidi. Na tamowai gogogogodi ta siya tauheyababagomiu, yo kabo se laegomiu kwa lauhetala. ⁷ Komiu meta Yesu yona tamowai, na gogo tamowaidiyao, siya meta Yesu hesana saesaena tauheyababana.

⁸ Kulikuli tabuna unai laugagayo saesaekalilina se kulyako se wane, "Helem taumiya ku gadosisiyei doha ku bom ku gadosisi'uyoigo." (Lewitikasi 19:18) Ena komiu mamohoi laugagayo ne kwa miyawatani meta yomi laulau ne se dudulai. ⁹ Na ena tamowai kwa gadosisihinelidi meta kwa ba'aya, yo laugagayo ye hemasalahagomiu ede komiu laugagayo tau'utusidi. ¹⁰ Matauwuna ede kaiteya laugagayo maudoidi ne ye miyawatanidi, na kesega ye utusi, meta ye hemala laugagayo maudoidi ne tau'utusidi. ¹¹ Yaubada ye wane, "Tabu ku ganawali", yo hinage ye wane, "Tabu ku kaiunu". Na ena kowa nige ku ganawali, na ku kaiunu, kowa meta laugagayo tau'utusidi.

¹² Yaubada laugagayo hesau ye leyamako kalidawai, iya ede wasa namwanamwana, na unai meta yailihai ta hai. Na laugagayona ne unai kabo ye tolehekasagomiu, unai yomi hedehedede yo yomi laulau udiyedi bena wasa namwanamwana ne kwa miyawatani. ¹³ Matauwuna ena tamowai hesau yona hali tamowai nige ye katekamkamnaei, kabo hekasa mayadaina ne unai Yaubada hinage tamowai ne taba nige ye katekamkamnae, na ye hekamkamna. Na ena yoda hali tamowai ta katekamkamnaei, meta hekasa mayadaina ne unai taba nige hekamkamna ta hekalo.

Sunuma miyahemasalahana

¹⁴ Kehaguwao, ena tamowai hesau ye hedede bena iya tausunuma, na nige sunuma miyamiyana ye miyawatani, kabo yona namwa ede saha? Na gonowana sunuma unai na nige paipaisowana, kabo unai ye mauli? ¹⁵ Doha taba kam kaha o loum hesau nige yona kaleko yo hinage mayadai kesega kesega nige kana kai, ¹⁶ na ku hededelau iya unai ku wane, "Ku lau ma nuwadaumwalim! Taba taum ne se gigibwali yo bogam ne ye sese", na nige saha hesau ku ginauli tauna ne hesabana, kabo yona namwanamwana ede saha? ¹⁷ Teina meta doha sunuma ye bom. Ena yoda sunuma na unai nige paipaisowana hesau ta ginauli, meta nige kaniyona.

¹⁸ Ena tamowai hesau ye hededelaoma kaliguwai ye wane, "Tamowai hesau meta sunuma kalinawai, na hesau meta miyamiyana kalinawai," kabo ya hededelau unai ya wane, "Yogu sunuma ya hekitago yogu paipaisowa ne udiyedi. Na idohagi kabo yom sunuma na unai nige paipaisowana ne ku hekitagau?"

¹⁹ Ku kawamamohoi meta Yaubada ne kesega mo. Ye namwa! Teina hedehedede ta unai hinage yaluwa yabayababadi se kawamamohoi, yo se tabutabubu na se matausikalili. Iyamo nige saha hesau se ginauli.

²⁰ Tamowai yauyaulena, kabo ya hemasalah kalimwai sunuma nige paipaisowana unai meta nige gonowana ye hemaulida. ²¹ Kada mumuga Abelahaha natuna Isako ye kainauyaei kabakaitalasam milana unai, na yona kabikabi wa debanawai Yaubada ye hededehe masalah meta iya tamowai dudulaina.

²² Taba ku nuwatulobai meta Abelahaha yona

sunuma yo yona kabikabi se paipaisowakesega, na yona kabikabi wa unai yona sunuma ye hemamohoiyei.²³ Yo saha se kuli buka tabuna unai meta ye hemamohoiyei, doha ye wane, "Abelahaha Yaubada ye sunumaei, unai Yaubada ye hededehemasalah meta iya tamowai dudulaina," (*Genese 15:6*) yo ye kawakehaei.*

²⁴ Taba kwa nuwatulobai meta Yaubada nige tamowai yona sunuma ye bom mo na hinage yona kabikabi udiyedi ye kitahedudulai.

²⁵ Gonogonowana doha hinage Lahaba, iya waihiu tauna taulokulokunegabaei moni hesabana. Iya meta taukaikewasipwa ye tolewadamdi yona numa unai, na kabo teha hesau unai ye hetamalidi se lau.* Na yona kabikabi wa debanawai Yaubada ye hededehemasalah meta iya waihiu dudulaina.²⁶ Ena tamowai hesau tauna nige mauli yahuwana unai meta iya mwalomwaloina, hinage gonogonowana doha sunuma nige unai paipaisowana meta sunuma ne mwalomwaloina.

Memena hemanasana hedehededena

3 Kehaguwao, taba nige maudoimiu kwa hemala taulauhekata dubu udiyedi. Matauwuna kabina kwa kata meta kai taulauhekata Yaubada kabo yoma miyamiya ye kitasipwaikaliliyeidi na kabo tamowai hekadi.² Kita maudoida ba'aya udoi'udoi udiyedi ta beku. Ena tamowai hesau yona hedehedede maudoidi udiyedi nige ba'aya hesau ye hedede meta iya tamowai dudulaina na gonowana tauna maudoina ne ye kitahetetedi.

³ Ena hosi kabaheyaisiyeina* ta tole kawana ne unai, na unai hosi ne ta heyaisiyei, kabo ye kawakabi. Teina kabaheyaisiyeina ta meta ginauli gagilina, na unai kabo hosi ne yona kabala maudoina unai gonowana ta kitahetete. ⁴ Yo hage, wagakuke lakilakidi ta haidi se hemala yoda kabakita. Se lakilalili yo yaumai bayabayaona kabo ye baheidi se lau. Iyamo kana heyaisi gagilina ne unai kabo tauheyaisi ne ye bui haedi yona nuwatu ne unai, kabo ye lauwatani.⁵ Gonogonowana doha memena. Ye gagilikilili tauda ta unai, iyamo kabo gonowana nuwasaesae hedehededi ye hedededi yo ye ginaulidi. Doha hinage kaiwa ginahana gagilina unai nukula lakilakina gonowana kabo ye kalasi.⁶ Memena ne meta doha kaiwa ginahana. Iya meta ye gagilikilili yauda ta udiyedi, na iyamo gonowana yababa lakilakidi ye ginaulidi. Tamowai yona nuwanuwatu maudoina yo yona mauli maudoina gonowana ye heyababadi, na memena yona paisowayababa ne wuwuna ede diyabolo.

⁷ Tamowai gonowadi suisui kadi kao udoi'udoi, doha yada manuwadi, yo bwatano yo gabwa suisuidi

se hemanasadi,⁸ na memenadi meta nige gonowana se hemanasadi. Memena ne iya yababa tauginaginalina, iya nige yona kabakaiyawasi, yo kaikalewalakilaki meta kalinawai ye mwawayu.

⁹ Na memenada ta unai meta yoda Guiyau yo Tamada ta hedebasae, yo memenada kesegana ta unai tamowai ta hededeheyababadi. Na siya meta Yaubada kana kao unai ye ginaulidi.¹⁰ Kawa kesega ne unai hedebasae yo hededeheyababa se pesama. Kehaguwao, tabu teina doha kwa ginaginali!¹¹ Taba mamohoi gonowana waila namwanamwana yo waila kalikalitana bonobonowasi kesega unai se didipesama?¹² Kehaguwao, nige gonowana piyohu kaiwana unai dulubi kaniyona ye tole, yo wine unai kabo piyohu kaniyona ye tole. Na doha hinage kalita bonobonowasina unai taba nige waila namwanamwana ye didipesa.

Sibasiba Yaubada unai ye laoma

¹³ Ena luwamu ne unai tamowai hesau ye sibasiba, bena yona sibasiba ne ye hemasalah yona miyamiya namwanamwana unai, na kabikabi ne meta nuwadobidobiyea ye ginaulidi. Na nuwadobidobi ne yona kabalaoma ede sibasiba.¹⁴ Na ena komiu nuwamu ne udiyedi kaikalomagigili yababakalilina yo kwa bom kwa nuwatu'uyoigomiu, tabu kwa hededetausae'uyoigomiu bena kwa sibasiba, yo hedehedede mamohoina tabu kwa uha'uhalaei.

¹⁵ Sibasiba doha teina ne meta nige galewa ne unai se laoma, na tamowai yodi nuwanuwatu mo udiyedi. Iya nige Yaluwa Tabuna unai ye laoma, na yona kabalaoma ede diyabolo.¹⁶ Ena kaikalomagigili nuwamu ne udiyedi yo kwa bom kwa nuwatu'uyoigomiu, meta hinage kawayagala yo laulau yababayabadi kadi kao udoi'udoi ede kalimiuwai.

¹⁷ Na ena tamowai yodi sibasiba ne Yaubada unai ye laoma, kabo tamowai ne yodi laulau meta se a'akalili. Kabo nuwadaumwali unai se miya, yo tamowai hekadi gadosisidi nuwanuwatuna kalidiwai. Siya meta gonowana se kawakabi yo se lapulapui, yo tamowai katekamkamnaedi yo haisagusagu meta kalidiwai. Siya nige tamowai se gadosisihinelidi, yo nige se kaokaolupolupo.¹⁸ Teina laulau dudulaidi ta meta sibasiba Yaubada unai se laoma ne kaniyodi ede. Na gonowana kabo se masalahi ena tamowai udiyedi nuwadaumwali. Tauhenuhenuwadaumwali yodi paisowa ta kana kao doha like se kumaidi, na se kinilakilaki, kabo se kaniyo. Na kaniyodi ede teina laulau dudulaidi ta.

Kwa uyo Yaubada yona gigibwali logulogunaena

4 Na lulu yo haikawayagala luwamu ne udiyedi meta yodi kabalaoma ede haedi? Yodi kabalaoma

2:23 Aisaiya 41:8

2:25 Yosuwa 2:1-15

3:3 Hosi kabaheyaisina meta pawati gagilina tehana hosi ne kawana unai se hekapuhekahini na isu labui ne udiyedi ne meta mainadi, unai kabo hosi ne se heyaisiyei.

ede nuwamiu ne udiyedi kami henuhenuwa yababayabadi, se kaipatekalili bena taba se tanuwagaigomiu. ² Saha kwa henuwadi ne meta nige gonowana kwa haidi. Kami kahao kwa koihemwaloidi yo yodi gogo kwa henuwakaliliyeidi, iyamo nige gonowana kwa haidi. Maidamiyao kwa haikawayagala yo kwa lulu. Saha kwa henuwadi wa meta nige gonowana kwa haidi, matauwuna ede nige kwa kaibwada Yaubada unai. ³ Na ena kwa kaibwada Yaubada unai, meta yomi kaibwada ne nige kaniyodi, matauwuna ede yomi kaibwada ne nuwanuwatudi meta nige se dudulai. Kaniyona ede bena kabo kwa hepaisowadi komiu kwa bom yomi namwa hesabadi.

⁴ Doha tauganaganawali mwanena nige yehekasisiyei, gonogonowana doha komiu hinage Yaubada nige kwa hekasisiyei. Bena kabina kwa kata meta ena tanoubu ta kwa kawakehai, unai meta Yaubada hekasisina nige kalimiuwai. ⁵ Tabu yomi nuwatu bena kulikuli tabuna yona hedehedede ne nige kaniyona, doha ye wane, "Yaluwa Tabuna, iya Yaubada ye hetamaliyama kalidawai ye miya ne meta kita ye gadosisikaliliyeida, na ye kaikalomagigilikalili ena taba Yaubada ta laugabaei na tanoubu ta ta kawakehai." ⁶ Yo hinage ye henuwakalili bena yona kabinamwa unai ye saguida, unai ede kulikuli tabuna yona hedehedede hesau ye wane,

"Yaubada taunuwasesaesae kabo ye hewaiunudi, na taunuwadobidobi kabo yona kabi se namwa kalidiwai." (*Sibasiba Hedehededeni Bukadi* 3:34)

⁷ Debanaena bena kwa uyo Yaubada yona gigibwali logulogunaena, na diyabolo yona laukita kwa laukwatakataidi, kabo ye wasabugabaeigomiu. ⁸ Bena kwa sigilau Yaubada kalinawai, na kabo iya hinage ye laowa kalimiuwai. Ya hededelaowa komiu tamowai yababayabadi kalimiuwai, bena yomi laulau yababayabadi kwa hekaiyawasidi,* yo ya hededelaowa komiu taunuwalabulabui kalimiuwai, bena nuwamiu ne kwa he'l'adi. ⁹ Yomi ba'aya ne debadiwai meta bena kwa nuwayababa, kwa nuwadubu, yo kwa dou. Yomi maluhi ne kwa hekaiyawasi na nuwadubu douna kwa dou, yo taba nige kwa gwauyala, na kwa nuwakamkamna. ¹⁰ Bena kwa nuwadobidobi Guiyau matana ne unai, na iya kabo ye kitahetausaegomiu.

¹¹ Kehaguwao, tabu kami kaha hesau kwa hededeheyaheyababa. Ena tamowai hesau kana kaha ye hededeheyaheyababa o ye kitahekasa, iya hinage Yaubada yona laugagayo saesaekalilina wa* ye hededeheyaheyababa yo ye kitahekasa. Na ena laugagayo kwa kitahekasa, meta nige kwa hemuliwatani, na kwa hemala laugagayo

tauhekasana. ¹² Bena kabina kwa kata meta laugagayo tautolena yo tauhekasana kesega mo, na iya gonowana kabo ye hemaulida yo ye heyababada. Na kowa kaiteya to kam kaha ne bena ku heksa?

Yoda koitalaliu bena ta ginauli nuwadobidobiyea

¹³ Bena kwa lapulapui, kaiteyadi komiu kwa hedede kwa wane, "Wau teina e malaitom kabo ta lau magai lakilakina hesau unai. Na menai ta miya bolimai kesega, na yoda lokune paisowana ta ginauli na yoda moni ta helaki." ¹⁴ Idohagi na kabina kwa kata meta malaitom kabo saha ye tubu? Yo yomi mauli ne kana kao kabo doha saha? Kana kao ede doha madagau ye taumasalahu huyakubwakubwa na kabo ye tauwadam. ¹⁵ Unai taba kwa wane, "Ena Guiyau yona nuwatu unai, meta kabo ta miya na yoda paisowa ne ta ginaulidi." ¹⁶ Na komiu meta kwa bom yomi nuwanuwatu udiyedi kwa hededesaesae. Na hededesaesae maudoidi doha tenem meta se ybabakalili.

¹⁷ Unai, ena kaiteya ye nuwatulobaiyako meta bena yona hineli ne ye ginaulidi nuwadobidobiyea, iyamo ye ginaulidi nuwasaesaeyena, iya meta ye ba'aya.*

Taugogogogo taupaisowa se kabihenayaidi kadi hededeshesibasiba

5 Komiu tamowai gogogogodiyao, kwa lapulapui! Kwa dou na kwa doulakilaki, matauwuna kamkamna kabo kwa hekalodi. ² Yomi wasawasa gogodi ne se pwasako, yo yomi kaleko yane se kaidiko. ³ Yomi gole yo siluba wa se masiko. Masimasidiyo ne kabo se hegilugomiu Yaubada matanawai.* Kwa gwaugogoidi na se masi ne debadiwai Yaubada kabo ye heyababagomiu kana kao doha kaiwa kalakalasina unai taumi ne ye gabudi. Matauwuna saha to huya mulimilitana ta unai meta yomi wasawasa gogodi ne kwa tolehesuwaladi kwa bom yomi namwanamwa hesabadi? ⁴ Saha kwa ginauli wa bena kwa kitasipwai! Yomi koya unai witi taubolina nige kwa hemaisadi. Na maisadi nige kwa moseidi wa meta se doudouhemasalahagomiu Yaubada matanawai. Yo witi taubolibili wa yodi dou meta ye sae Guiyau Gigibwalikalilina ye lapui. ⁵ Tanoubu ta yona wasawasa yo yona gwauyalagaibu udiyedi kwa miya. Komiu kwa bom nuwamiyao yodi gadosisi kwa hemuliwatanidi na kwa haidi. Na kami kao ede doha suisui ye kaikai mo na yona boita mayadaina meta nige ye nuwanuwatui. ⁶ Tamowai yodi miyamiya namwanamwadi kwa helauhetaladi na unai kwa laeidi kwa koihemwaloidi, na siya meta nige se laukwatakata.

4:8 *Yomi laulau yababayabadi kwa hekaiyawasidi:* Yamesi heyahayasoni hesau ye kuli, iya ede, *Nimamiu kwa deulidi*.

4:11 *Yaubada yona laugagayo saesaekalilina* meta taba heleda tamowaidi ta gadosisiyeidi (Yamesi 2:8).

4:17 Tausonoga hekadi yodi nuwatu meta lausoiso 17 bena ta kulibui doha teina: *Unai, ena kaiteya ye nuwatulobaiyako meta bena laulau namwanamwadi ye ginaulidi, na iyamo nige ye ginaulidi, iya meta ye ba'aya*.

5:3 *Masimasidiyo ne kabo se hegiludi Yaubada matanawai*, matauwuna ede yodi gole yo siluba ne nige se hepaisowadi tamowai yodi namwanamwa hesabadi.

Kamkamna ta hai ma nuwabigada

⁷ Kehaguwao, bena kwa nayatautaubiga ye lau ee Guiyau yona laoma mayadaina ne ye lage. Koya tanuwagana bena ye hemala yomi kabakita. Iya ye nayatautaubiga na huyapaipaisowa yo witi huyabolidi nabudi se talu yodi huyatalu dudulaidi udiyedi, na ye lau ee kana siga yona koya kaina maudoina se suna. ⁸ Gonogonowana doha komiu hinage bena kwa nayatautaubiga na yomi sunuma udiyedi bena kwa tolobayao, matauwuna Guiyau yona huyalaoma ede ye hanahanaoma. ⁹ Kehaguwao, tabu kwa haigadigadigugu'uyoigomiu, kaniyona ede Guiyau kabo ye kitahekasagomiu meta kami gilu. Na Tauhekasa yona laoma mayadaina meta ye hanahanaomako.

¹⁰ Kehaguwao, peloweta kwa haidi se hemala yomi kabakita. Siya Guiyau hesanaena se hededepeloweta, iyamo tamowai se tolo ede se kabihenayaidi, na hekamkamna ne se haidi meta ma nuwataludi.

¹¹ Kabina kwa katako meta sunuma unai tautolobayao ta kawanamwanamwaedi ta wane siya gonowana se gwauyala. Yobi wasana kwa lapuiyako, idohagi ye tolobayao yona sunuma unai, yo idohagi yona kamkamna gehena ne unai Yaubada ginauli namwanamwadi ye kainauya'uyoidi. Guiyau meta gadosisi yo katekamkamna Guiyauna.

¹² Kehaguwao, ginauli saesaekalilina ede teina: Tabu kwa hededekeigwala galewa, o tanoubu, o ginauli hesau hesadiwai. Bena kwa hedededudulai! Ena kwa wane, "Nige" meta nige, na ena "mamohoi" meta mamohoi. Na ena yomi hedehedede ne nige mamohoidi, Yaubada kabo ye heyababagomiu.

Tapwalolo taukasiyebwa hesabadi

¹³ Ena luwamiu ne unai hesau pilipili ye hekalo, iya bena ye tapwalolo. Na ena hesau ye gwauyala, iya

taba hedebasae wanadi ye wanaidi. ¹⁴ Na ena luwamiu ne unai hesau ye kasiyebwa, iya taba dubu babadadiyao ye kaibwadaidi na yona se tapwalolo yo bunama unai se heyausi Guiyau hesanawai. ¹⁵ Na ena babadao wa taukasiyebwa ne yona se tapwalolo, na se sunuma meta Yaubada iya kabo tamowai ne ye henamwanamwa, kabo ye namwanamwa. Guiyau kabo tamowai ne tauna ye hebayaodi na yona namwanamwa maudoina ye hai'uyoidi. Na ena yona ba'aya, Yaubada kabo ye nuwatugabaei. ¹⁶ Unai bena ma kami kahao yomi ba'aya kwa haihededehemahemasalah'uyoigomiu, yo kami kahao yodi kwa tapwalolo yo hinage yomiu se tapwalolo. Ena doha teina kwa ginauli, Yaubada kabo ye henamwanamwagomiu. Ena kita miyamiya dudulaina tamowaidi, kabo yoda tapwalolo ne meta se gigibwali na unai gonowana sagu ta lobai.

¹⁷ Yoda kabakita meta Eliya.* Iya meta tamowai doha kita, na ye tapwalolo ma nuwakohihaina bena taba tabu nabu ye talutalu. Ede nabu nige ye talu Isalaela yodi tano kewanawai bolimai haiyona yo tehana. ¹⁸ Na ye tapwalolo'uyo, ede Yaubada nabu ye hetalu'uyoi tano wa kewanawai, yo koya kaidi kaniyodi se tole'uyoidi.

¹⁹ Kehaguwao, ena luwamiuyena kami kaha hesau Yaubada yona hedehedede mamohoina ta unai ye tausuwala, na kami kaha hesau tamowai ne ye woya'uyoiyama, ²⁰ bena nuwamiu ne ye lau teina hedehedede ta kwa nuwatui: Kaiteya ba'aya tamowaina hesau yona laupwano unai ye woya'uyoiyama, meta iya boita unai ye gilihai, na saha ye ginauli ne debanawai Yaubada kabo ba'aya tamowaina ne yona ba'aya maudoidi ye nuwatugabaedi.

Yuda yona leta

Yuda yona leta hededehehemasalahana

Leta ta taukulina ede Yuda. Ye kuli hemasalahana meta iya Yamesi kana kaha (Yuda 17), yo iya hinage Yesu kana kaha. Yona hededehebayao ye lau leta ta tauhaina kalidiwai meta bena se kitananamwanamwakalili taulauhekatalupolupo kalidiwai, na tabu yodi lauhekata ne se lauwatanidi. Tamowai yababayabadi ta Yaubada kabu ye hekamkamnadi. Yuda yona leta ta kabahekaiyawasina meta hedebasae lakilakina ye lau Yaubada unai. (Yuda 24-25)

1 Yau Yuda, Yesu Keliso yona heyayai tauhaina yo Yamesi kana kaha.

Teina kulikuli ta ya kuli ye laowa komiu kaiteyadi Yaubada ye yoganeigomiu, Yaubada Tamada ye gadosisiyeigomiu yo Yesu Keliso yona kitahetete unai kwa miyamiya wa kalimiuwai.² Ya kaibwada taba Yaubada yona katekamkamna, yona nuwadaumwali yo yona gadosisi ye lediwa kalimiuwai na nige kadi sigasiga.

Yaubada nige tausunumaena kabu ye hekamkamnadi

³ Kehaguwao, ya gadosisikaliliyegomiu. Yugu nuwatu bagubagunana bena yoda kabihemauli ta wasana yomiu ya kuli ye laowa kalimiuwai. Na yugu hineli ya bui, ede taba yomiu ya kulikuli meta ya hededehebayaogomiu bena yomi sunuma unai kwa tolabayao. Na yoda sunuma lauhekatana maudoina meta Yaubada ye leyamako kita yona tamowai kalidawai.⁴ Na tamowai hekadi meta se hedede bena siya tausunuma na se lulaowako Ekalesiya bodana luwamiuwai. Huya bagubagunana unai kabahekamkamnadi wasana meta kulikuli tabuna unai se kuli hemasalahayako. Siya meta Yaubada yona nuwatu nige taumiyawatanina. Na se hedede meta Yaubada kabu ye katekamkamnaedi, unai ede laulau bikibikidi gonowana se ginaulidi. Yo hinage Yesu Keliso, iya ye bom kada Tanuwaga yo yoda Guiyau wa, se uhalaesi.

⁵ Teina nuwanuwatu maudoidi kabu ya kulidi ta meta kabidi kwa katako, na iyamo ya henuwa bena ya henuwaisinigomiu meta Guiyau Isalaela tamowaidiyo ye saguidi na Aikupito unai ye woyahepesadi, na mulinawai kaiteyadi nige se sunumai wa ye heyababadi.⁶ Yo anelu hekadi yodi kabaloina kana sigasiga Yaubada ye toledi wa nige se henuwa unai se miya, na yodi kabapaisowa maudoidi wa se laugabaedi. Ede Yaubada ye toledi teha masigili unai, na seni miyamiyahidi udiyedi ye paidi. Na

hekasa mayadaina se nayanayai.⁷ Gonogonowana doha, Sodoma yo Gomola yo magai hekadi dedekadiwai tamowaidiyo se mose'uyoidi laulau bikibiki udoi'udoi udiyedi, yo tawasola kabikabina se bui na waihiu maiyana waihiu yo loheya maiyana loheya se tawasola. Tamowaidiyo wa meta kaiwa kalakalasina nige kana siga unai hekamkamna se lobai, na teina unai se hemala yoda kabakitalobai yo kada hedede hesibasiba.

⁸ Teina miyamiya yababadi ta meta tausunumalupolupo tamowaidiyo wa se lulaowako kami boda ne unai wa hinage se ginaginaulidi. Se hedede meta kenosuwaideyo wa Yaubada unai se laoma, na se miyawatanidi, ede udiyedi se bom taudi se hebikidi, Yaubada yona tanuwaga gigibwalina se lausuwalai, yo galewa ginaulidi maumaulidi* se hededeheyaheyababadi.⁹ Na anelu kadi tanuwaga Maikeli meta nige ye nuwabayao to nige bena Diyabolo ye hededeheyaheyababadi hedehedede yababadi udiyedi. Huyana iya maiyana Diyabolo Mose sinalena se hedehededehaikabiyei meta ye hededelau unai ye wane, "Guiyau iya tauhekasago ede."¹⁰ Na tenem tausunumalupolupo wa ginauli nige kabidi se kata na se hededeheyaheyababadi. Siya kadi kao doha suisui nige gonowana hedehedede se lau watani, na se bom yodi nuwanuwatu se lau watanidi. Tenem laulau ne debadiwai kabu Yaubada ye heyababadi.

¹¹ Yababalakilaki kabu ye lau kalidiwai. Matauwuna Kaina yona laulau se hemuliwatani,* yo moni debanawai laupwano se ginauli doha Balama.* Yaubada siya kabu ye heyababadi, gonogonowana doha Kola ma kana bodo yodi haikawayagala Mose unai* na ye heyababadi wa.

¹² Tenem tausunumalupolupo ne siya ede doha masi kaleko se hebikidi, na yomi kaikaigogo meta se heyababadi, nige mwadine kabina se kata na kaikai ne udiyedi se bom mo se nuwanuwatu'uyoidi. Kadi kao doha mamoe taukitakitahetete, iyamo mamoe ne nige se modeidi na se bom se kitahetete'uyoidi. Siya

1:8 Galewa ginaulidi maumaulidi: Siya ede anelu yo ginauli maumaulidi hekadiyo, galewa ne unai se miyamiya. Hemasalahana peina 4 ku hasili, kabu unai ku nuwatalobai.

1.11 Genese 4:7 ku hasili.

1.11 Numela 31:16 ku hasili!

1.11 Numela, peina 16 ku hasili.

doha yada nige nabuna, na yaumai ye tepatepanei'useidi. Kadi kao doha kaiwa kaniyodi kaikaidi bena se kaniyo kabo ta kaidi, iyamo kaiwa ta nige kaniyodi, ede ta suluhihaldi, matauwunwa ede nige yodi namwanamwa hesau.¹³ Kadi kao doha bagodu lakilakidi gabwa ne unai, na yodi laulau nuwamwadimwadinedi se hemasalahadi doha bagodu pulopulodi. Kadi kao doha kipwala kadakadaudi, na tamowai yodi kabalau mamohoina unai se woyasapulidi. Yaubada kabo ye toledi teha masimasigili kalikalilina unai, na temenai kabo se miya ye lau ee nige kana siga.

¹⁴ Enoka, iya Adama kana isimulita hehaligigi-labuina, teina tamowai ta hedeheddedi ye hededenonohaiyako ye wane, "Kwa kita! Guiyau kabo ye laoma maiyanao anelu tausani gwaudi¹⁵ bera tamowai maudoina ye hekasadi. Tamowai siya nige Yaubada yona nuwatu taumiyawatanina, Yaubada kabo kadi gilu ye hemasalahadi. Kadi gilu ede Yaubada yona nuwatu nige se miyawatani, na laulau yabayababadi se ginaulidi yo Yaubada se hededeheyaheyababa."

¹⁶ Teina tamowaidiyao ta meta siya ede taugadigadigugu yo taukitakitaheyababa. Siya se bom yodi nuwatu yabayababadi se lauwananidi, yo yodi hedehedede udiyedi se bom se hedetetausae'uyoidi, yo se bom yodi namwanamwa hesabadi ede hedehedede hekahekamna udiyedi tamowai se lupohaidi.

Sunuma hededehebayaona

¹⁷ Kehaguwao, ya gadosisikaliliyegomiu. Yoda Guiyau Yesu Keliso yona apostolo saha se hedededi wa bena kwa nuwanuwatuidi. ¹⁸ Se hededelaowako kalimiuwai

se wane, "Huya gehegehedi udiyedi tautalatalawasi kabo se laoma, na yodi gadosisi yabayababadi kabo se lauwananidi."¹⁹ Tamowai doha teina se lulaowako kami boda ne unai wa meta hinehineli se ginauli kalimiuwai, matauwunwa ede Yaluwa Tabuna nige kalidiwai, na unai se bom yodi nuwanuwatu se lauwananidi.

²⁰ Kehaguwao, ya gadosisikaliliyegomiu. Bena yomi sunuma udiyedi kwa haihebahebayao'uyoigomiu, yo kwa tapwatapwalolo Yaluwa Tabuna yona sagu unai. ²¹ Yo Yaubada yona gadosisi unai kwa miyamiya, yo kwa nayatautaubiga ye lau ee yoda Guiyau Yesu Keliso yona katekamkamna debanawai kabo mauli nige kana siga ye leyawa kalimiuwai.

²² Taunuwalabulabui bena kwa katekamkamnaedi yo kwa saguidi. ²³ Yo kaiteyadi se laulau Yaubada yona hekamkamna kaiwana kalakalasina unai bena kwa gilihaidi kabo mauli nige kana siga se hai. Yo tamowai hekadiyo hinage bena kwa katekamkamnaedi, na kwa kitahetete'uyoigomiu meta yodi laulau yabayababadi bena kwa subudi yo tabu kwa lauwananidi.

Hedebasae lakilakina ye lau Yaubada unai

²⁴ Yoda Yaubada ta hedebasae. Iya gonowana ye kitahetetegomiu taba nige kwa kalabesibesi, na ye woyalaegomiu yona kabamiya saesaekalilina yo wasawasana unai, na ye hetologomiu matanawai meta nige ba'aya hesau kalimiuwai, na ma gwauyalami mo. ²⁵ Iya ye bom mo yoda Yaubada, yo yoda Guiyau Yesu Keliso debanawai ye hemaulida. Iya ta hedebasae, matauwunwa ede wasawasa, bayao yo gigibwali iya ye bom mo kalinawai huya bagubagunana unai ye laoma ee teina yo ye lau huya nige kana siga! Mamohoi.

Buka Tabuna hedehededena hekadiyo hedehededehemmasalahadi

Teina tupwa ta meta sola nige ka kitasipwai, na buka ta unai ka kuli matauwuwuna bena kabina ta kata meta huyana Buka Hauhauna maudoidoina bukana ta ginaulidi kabo hinage ta tole o nige ta tole.

Abela Adama yo Ewa natudi helabuina, Kaina yona golowa. Wasana ede ku hasili GEN 4:1-11.

Abelahama o Abelama Isalaela tamowaidi kadi mumuga. Huya bagubagunana unai hesana Abelama, kaniyona ede "Tama saesaena". Huyana Abelama yona bolimai lohadi 99 meta Yaubada hesana ye bui Abelahama, kaniyona ede "Tamowai se bado tamadi". Abelahama Yaubada ye sunumaei, ede Yaubada ye hedehedesunuma iya unai meta iya maiyana mwanena Sala kabo natudi, yo kadi isimilitao se bado, yo iya hesanaena kabo tamowai maudoidi namwa se lobai. Yaubada yona hedehedesunuma wasadi ta hasili GEN 12:1-7 yo 17:1-18:15 unai.

Adama Tamowai bagubagunana Yaubada ye ginauli wa. Wasana ta hasili GEN 1:26-3:21.

Agilipa (1) Heloda Agilipa Bagubagunana meta Yudeya unai **AD** 41-44 udijedi. Iya ekalesiya ye kabiyababaidi, wasana ta hasili Apostolo 12:1-5 unai. (2) Agilipa Helabuina meta Heloda Agilipa natuna. Iya Palesitina tanona tupwana ye tanuwagai **AD** 53-93. Iya maiyana louna Benisi Paulo yona hedehedede huyana iya se helauhetala wa unai se lapuidi, wasana ede ta hasili Apostolo 25:13-26:32 unai.

Aloj meta kaiwa hesau, masina unai mulamula yo yausi panepanena se ginauli.

Aloni Mose kana kaha. Yaubada iya maiyana isimilitao ye hetolodi taukitalasam numa tabuna unai. Siya se bom mo gonowana Isalaela yodi kaitalasam se kaitalasamyeidi, doha Esodo 4:14-16 yo 28:1, yo Numela 16:1-18:7 udijedi ta hasili.

Amen meta kalina Hebelu yo Alamaiki hedehedededi, na kaniyona ede "Aa, mamohoi!" Unai huyana ta kawa'ameni meta ta talam ta wane, "Hedehedede ta mamohoidi! Yau hinage yogu hedehedede." Yoda buka unai lausoisoj hekadi ta kuli, "Amen!", na lausoisoj hekadi ta kuli, "Mamohoi!" Iyamo nuwanuwatudi gonogonowana.

Anelu meta Yaubada yona taupaisowa namwanamwadi.

Apostolo—Yesu yona hekahekatao ye kataedi apostolo, kaniyona ede hetamali tamowaina yo tauwasaduwai. Yesu ye sae galewa na mulina ne unai hesa apostolo hinage se tole Yudas Isakaliyota lauhedamaina Mataiasi unai (Apostolo 1:15-26), yo Paulo hinage ye hedede iya apostolo (1 Kolinito 15:9). Apostolo yodi paisowa meta Yesu wasana se hedehelaki tamowai maudoidi udijedi.

Basileiya meta wasawasa yona kabaloina tanona. Dimdim unai se wane "kingdom". **Yaubada yona basileiya** hedehedehemmasalahana hinage ku hasili.

BC meta kalina dimdim unai ye laoma, na kaniyona meta "before Christ", o huyana sola nige Yesu ye tubu tanoubu ta unai. 100 BC kaniyona bolimaina ne mulina ne unai kabo bolimai badodi 100 na kabo Yesu se labasi.

Belesebulu meta Satani hesana hesau kalina Alamaiki unai.

Bwayabwaya: Dius yodi bwayabwaya kadi kao udoi, nige bwatano unai se saladobi na lasi se tole na se wui, na yodi bwayabwaya meta duha lakilakidi weku udijedi se tadidi, na kalodiyena hinage sinale kabatoledi tabatabadi hekadi se tadidi. Tauboita yausi panenamwanamwadi (doha mulo yo aloj) udijedi se heyausidi na kaleko namwanamwadi udijedi se sumadi na se tolenamwanamwaedi duha unai kabatole hesau unai, na kabo duha wa kedana weku lakilakina unai se gudui. Na ena kehadu hesau ye boita kabo weku se buigabaei na tauboiboita wa hinage se tole duha kalona ne unai, meta kabatolena hesau unai se hekeno. Na taugogogogo hinage yodi kabikabi hesau: Huyana sinale hesau ye pwasagehe na ye pitali kabo weku unai lasi se tadi na tauboita siliyana se tole unai.

Dagela tamowaidi kaniyona ede Yaubada nige tausunumaei tamowaidi. Ena Dius tamowaidi se wane "dagela tamowaidiyo" meta nige Dius tamowaidiyo se hetaladi. Na ena Keliso tausunumaena tamowaidi se wane "dagela tamowaidiyo" meta nige Keliso tausunumaena tamowaidiyo se hetaladi.

Dius tamowaidi meta Abelahama kana isimilitao. Yaubada Abelahama ye kaisunuwal yona tamowai, iya ma kana isimilitao maudoidi. Siya Yaubada se kaihelahui. Kabakitalobaidi meta **pelitome**. Hedehedede **Dius** meta Dimdim katakataina ta hekawalaeyama kalinadaena. Hesa **Dius** yona kabalaoma meta Giliki kalinadiyena *iudaios*, kaniyona ede Yudeya tanona tamowaina.

Donki meta kana kao doha hosi gagilina. Isalaela tamowaidi donki se hepaisowadi na yodi bahebahe se usaidi, yo hinage tamowai se geluidi na se kadau.

Dubu nuwanuwatuna bagubagunana Buka Tabuna unai meta Yesu o Yaubada taukawamamohoeyeina bodadi, na nige yodi kabakoikoigogo numadi.

Ewaneliya meta kalina Giliki, na kaniyona ede *wasa namwanamwana*. Iya ede Yaubada wasana, yo Yesu tausunumaena yona kabihemaulidi wasana.

Fig meta kaiwa hesau Isalaela unai. Kaniyodi meta tamowai se kaikaidi, na se kamnakalili.

Galili Gabwana meta waila lakilakina Galili tanona unai, kana kao doha gabwa.

Ganawali: Buka Tabuna unai hedehedede ta meta laulau labui ye sumagogoidi: Ena maitawasola ye lau nige mwanena unai, yo ena hewali yo hasala nige tawatawasoladi se kenokesega. Kita Saliba kada kulutubu hewali yo hasala yodi kaiheya ne nige se kita bena yababa, unai nige laulau te hesana se tole. Na Yaubada ye hekatada meta tau yo sine yodi miyagogoi bena Yaubada yona gadosisi heyaheyasonina, doha Epeso 5:32 unai ta hasili. Buka Beyabeyana unai hinage tawasola laugagayona ta lobaidi, doha Dutelonomi peina 22 unai.

Getesemani meta kabakaiyawasi koyana hesana, tamowai se ginauli Olibe kudulina dedekana unai.

Getesemani koyana unai gonowana Yelusalema magaina maudoina ta kita.

Hededehehenamwa: Ena tamowai ta hededehehenamwa kabo kaniyona labui. Bagubagunana ede ta kaibwadalau Yaubada unai bena tamowaina ne ye sagui na namwa ye ginauli kalinawai, doha wawayao gagilidi ta hededehehenamwadi. Helabuina meta tamowaina ne ta mosei Yaubada unai bena yona taupaisowa, doha taukitalasam o pasta o diakona ta hededehehenamwadi. Laulau te unai taba nige ta hedede meta tamowai ye bom ye namwa na nige yababa hesau unai.

Gonogonowana doha, ena gogo ta hededehehenamwa meta ta mosei Yaubada unai yona paisowa hesabana, doha dubu numana hauhauna ta hededehehenamwa, yo ta kaibwadalau Yaubada unai bena gogo ne ye kitahetete.

Hinage ena kada kai ta hededehehenamwa meta ta kitalobai meta kai maudoina Yaubada ye leyama ta kai yo ta namwa, debanaena Yaubada ta lautokiyei.

Na ena Yaubada tamowai o suisui o gogo hesau ye hededehehenamwa, kabo kaniyona ede ye sagui na se namwa yo se tadada yo se babawa. Unai hededehehenamwa kaniyona gabwatumna meta Yaubada ta hedebasae yo ta hekasisiyei.

Hededepeeloweta—peloweta hededehehemasalahana ku hasili.

Hekihekinoi—Buka Tabuna unai hekihekinoi meta iya ede **laulau gigigigibwalina**. Na ena buka tabuna taukulina wa se kuli meta tamowai hesau “hekihekinoi ye ginaulidi” kabo se hededehehelaki meta laulau gigigigibwalidi ne siya Yaubada kana kao mamohoina yo yona gadosisi yo kabinamwa yo gigibwali kabakitalobaidi o hekihekinoi. Hedehedede “hekihekinoi” kalinadaena hepahepaisowana musamusana udoi, doha hekihekinoi meta taba nige kabikabi ta hetala, na gogo, na ta hetolo o ta kuli o ta tole. Unai huya hekadi Buka Tabuna unai kabo “laulau gigigigibwalidi” ta kulimoei.

Heyayai tauhaina meta kalina Dimdim unai se wane “slave”. Saliba tamowaidiyo kadi kulutubu unai meta nige “slave” se hepahepaisowadi. “Slave” meta taupaisowa. Siya meta se hemala kadi tanuwaga yodi gogo. Nige gonowana se bom nuwadi se lauwatanidi, yo nige gonowana kadi tanuwaga yona hedehedede se kawagabaei, yo nige gonowana se laugabaedi. Tamowaidiyo ta meta iyala unai na magai hekadiyo udiyedi se haidi se laedima, na kabo se lokunegabaedi. Ena “slave” ne tamowai hesau yona ye paisowa na unai moni ye lobai meta gonowana ye bom maisana ye hemaisa'uyoi na kana tanuwaga wa kabo iya ye kabigabaei ye lau. Hinage ta hedede ta wane **taupaisowa** yo **taupaisowatahitahi**.

Inisenisi meta kaiwa hesau masina se heptali na se gabu, na kasuna panena ye namwa kalili. Numa tabuna unai yodi huyatapwalolo udiyedi inisenisi se gabugabu.

Iyala tabagunaena Katakataina hesau meta **Sentuliyo**.

Kaba kitalasam o kabakitalasam milana udiyedi Dius tamowaidi suisui se kitalasamyedi Yaubada yona.

Kabanoko meta siya ede **laulau gigigigibwalidi**. Na huyana Buka Tabuna unai se kuli bena tamowai hesau kabanoko ye ginaulidi, kabo se kitalau laulau gigigigibwalidi wa taukitadi yodi noko yo yodi siliyata unai. Buka Tabuna unai taba nige hedehedede “kabanoko” ye bom se kuli, na se kulikuli “kabanoko yo **hekihekinoi**”. Kalina Saliba unai hedehedede “kabanoko yo hekihekinoi” hepaisowana musamusana ye pilipili na nige ye masalahakalili, unai “laulau gigigigibwalidi” mo ta hepaisowa Buka Tabuna unai.

Kabinamwa—Buka Tabuna unai hedehedede kabinamwa se tolelai Yaubada unai, se wane, “Yaubada yona kabinamwa”, o, “Keliso yona kabinamwa” (Galatiya 1:3, Epeso 1:2, Kolose 1:2, Tit). Kaniyona ede, Yaubada yona gadosisi debanaena namwa ye ginauli tamowai udiyedi na ye kainauyaidi. Nige bena ye kaikewasipwa ena kainauya tauhaina tamowaina ne, iya yona laulau se dudulai yo se namwa, na ye kainauyaeidi ye bom yona gadosisi debanaena. Yaubada yona kainauya lakilakikalilina meta tamowai ye gilihaidi na ye kaisunuwaidi bena siya yona tamowai, na mauli nige kana siga ye mosedi (Epeso 2:4-9, Taitasi 2:11).

Kaedi mukalidi se koinihinihiyedi “Mukali” hededehehemasalahana ku hasili.

Kaisunuwa “Yaubada yona kaisunuwa tamowaina” ku kita.

Kitalasam meta suisui o kai o gogo hekadiyo tamowai se mosedi yodi yaubada udiyedi. Dius tamowaidiyo yodi kitalasam se moseidi Guiyau Yaubada unai, meta bulumakau o mamoe o bunebune se gabudi numa tabuna unai. Kitalasam hekadiyo ede pwalawa o oela o ginauli hekadi. Kitalasam yodi paisowa udoi’udo: Hekadi meta tamowai yodi yababa kabanuwatugabaedi, na hekadiyo Yaubada yodi kabalautokiyeina yo kabahedebasaena.

Kao saesaena mamohoina hinage ta wane Yaubada yona **didiga** o Yaubada yona **namanamali**.

Kapelenauma meta magai lakilakina hesau Galili Gabwana dedekana unai, Galili Gabwana yona tehabwauli unai. Teha Galili unai meta taulokulokune maudoidi se laoma Kapelenuma unai yodi gogo se lokulokunedi.

Keliso kaniyona meta "Yaubada yona kaisunuwa tamowaina" kalina Giliki unai. Kalina Hebelu yo Alamaiki udiedi se wane *Mesiya*. Yesu yona huyaena Isalaela tamowaidi **Keliso** se nayanayai, na yodi nuwatu **Keliso** kana kao doha wasawasa bayabayaona, na Loma tamowaidiyo kaboye henakudi na Isalaela yodi tano se laugabaei.

Laulau gigigibwalidi meta tamowai Yaubada yona gigibwaliyena laulau se ginaulidi tamowai gaibu nige yodi gigibwali gonogonowadi se ginaulidi. Laulau wa doha taukasikasiyebwa se henamwanamwa, tauboiboa se hetolo'uyoidi, yo yaluwa yabababadi tamowai udiedi se hededehepesadi. Huya hekadi laulau ne se kataidi **hekikehinoi**, na huya hekadi se hedede meta laulau ne siya tamowai yodi kabanoko.

Loma meta magai lakilakikalilina Italiya tanona unai. Loma tamowaidi yodi tau'iyala se bado yo se bayaokalili, ede Loma wa teha lakilakina se tanuwagai, doha France, Britain, Germany, Spain, Greece, Syria, Palestine (Israel yodi tano hesana hesau), yo hinage Egypt. Yodi kitahetetedi unai huya hekadi se kabiybaba baidi yo takisi se haihaldi wa se helakidi. Na Loma tamowaidi mamohoidi meta yodi gabemani nige gonowana se kabihenayaidi o takisi se tano udiedi.

Loma tamowaidi—Loma yodi basileya unai magai saesaena hesana hinage Loma, na magai wa tamowaidiyo meta ta kataidi Loma tamowaidi. Siya yodi dudulai hekadiyo, doha nige gonowana se tolegaibuidi numatutuguduyena, na taba kadi mata saha se wasebagunai.

Muliyena Loma yodi gabemani dudulai se mosei magai hekadiyo udiedi na siya hinage Loma tamowaidi yodi dudulai se haidi. Yo tau'iyala maudoidi hinage se hemwalaedi se hemala Loma tamowaidiyo. Teina tamowaidiyo ta ta hedede ta wane siya Loma yona laugagayo logulogunaena taumiya (Apostolo 22:26-29 yo 23:27).

Loma yodi tau'iyala—Loma yodi tau'iyala maudoidi se heboda hegahegagilidi: Tatao badodi 6,000 meta hesadi se katai legiyona (legion). Legiyona hinage se heboda hegahegagilidi, meta tatao badodi 600 hesadi se katai kohoti (cohort), na yodi tauwoyawoya ede iyala kapinana (commander). Na kohoti udiedi meta boda 6, tamowaidiyo badodi ede 100, na boda kesega kesega tauwoyaidi hesana ede sentuliyo (centurion).

Mayadai—Kalidaena mayadai se hetubu malatomtom unai, yo Dimdim kalidiyena ye hetubu boniyan duwaduwalina unai. Na Dius kalidiwai meimeilahi mahana yona huyadui mahana unai ye hetubu, doha Sabati mayadaina huyahetubuna meta Palaide meimeilahi mahana ye dui, na kana siga kabo Satade meimeilahi mahana ye dui.

Mesaiya: *Keliso* hededehehemasalahana ku hasili.

Mukali Ena Dius tamowaidiyo se yona se lau dagela tamowaidiyo yodi tano na se uyo yodi magai, kabo kaedi *mukalidi se koinihiniiyedi*, matauwuna nige se henuwa bena tamowai wa yodi yababa hesau se baheyama yodi magai. Kabikabi ta ye hemala hekikehinoi meta magai hesau tamowaidiyo siya yababa tamowaidi. Laulau te Luka 9:6 yo MRK 6:11 yo Apostolo 13:51 udiedi ta lobai.

Mulo meta kaiwa hesau unai se ginauli, na se hepaisowa mulamula udiedi.

Numa Tabuna Hetabu'uyoina Henuwaisinina: Bolimai 168 o 167 BC meta Antiyokas Epipanesa teha Siliya yodi tau'iyala tamowaidi ye woyaidi na se lau Yelusalema se gilihaini na se kitahetete. Na numa tabuna unai buluka se kaitalasamyedi yodi yaubada lakilakina hesana Siasi unai. Na teina unai numa tabuna wa se hebikikaliyei Yaubada matanawai. Bolimai haiyona mulidiwai Yudasi Makabias Dius yodi iyala tamowaidi ye woyaidi ede Yelusalema se gilihaini na numa tabuna yo kaitalasam milana wa se hetabu'uyoidi Yaubada unai. Bolimai badobado waikena Disemba unai Dius tamowaidiyo teina gwauyalta se ginaginali. Na Gwau Miyaidi Henuwaisinina gehena waikena labui mulidiwai kabo teina gwauyalta se ginauli yo mayadai haligigi-haiyona unai kabo se gwauyalai. Teina gwauyalta hesana hesau ede Mala Gwauyalana, matauwuna Dius tamowaidi kabo yodi lampa gwaudi se gabudi na yodi numa udiedi gwauyalta se gwauyalai. Na kalina Hebelu unai hesana se tole ede Hanuka, kaniyona ede Hetabu'uyoi.

Paliseya meta siya Dius kadi boda hesau. Hesa **Paliseya** kaniyona ede "siya se bom se tolehesualadi". Paliseya tamowaidi wa se kaikaipate bayao na laugagayo maudoina se hemuliwatani ye dobi gagilina unai. Yodi nuwatu bena Yaubada kabo Isalaela ye hekamkamnadi, ena nige tamowai maudoidi laugagayo maudoina se lauwatanidi. Unai se kouyalayala tamowai kalidi wai, ena siya matadi wai Yaubada yona laugagayo se utusidi.

Pelitome—Dius yodi kabakitalobai meta siya Yaubada yona tamowai. Kabikabi ne Yaubada ye hededenelau Abelahaha unai bena tatao maudoidi udiedi se ginaulidi, na yodi huyalabasi mayadaina mulina ne unai bena mayada hehaligigi-haiyonana unai se hepelitomedi. Pelitome meta loheloheyao udiedi dahi gagilina se boliyawasi. Genese 17 ku hasili.

Peloweta meta Yaubada tamowai ye kaisunuwaidi bena iya hesanaena se hedehededelau tamowai udiedi. Na Yaubada yona nuwatu ye mosei tamowai wa udiedi na kabo se hededehehemasalah. Huya hekadi se hededenonohai saha huya matadi ne udiedi kabo ye tubu, na yodi hedehededi maudoidi meta Yaubada yona tamowai se guguyaidi bena yodi sunuma se tole Yaubada unai na Yaubada se hedebasaei yodi mauli laulaudi udiedi.

Pigi meta kaiwa hesau Isalaela tanona unai ye kinikini, yo hinage tamowai se kumai, kaniyodi se kamnakalili. Papua New Guinea unai kaiwa ta nigele. Dimdim unai se wane *fig*.

Pilato meta gabana hesau Isalaela tanona unai, na iya Loma tamowaina. Loma yodi gabemani iya se hetolo Yudeya tanona taukitahetetena.

Pwalawa Nige Yistina meta iya henuwaisini udoi. Huyana Dius bena kabo Aikupito se laugabae na nige mahana gonowana bena pwalawa yisti unai se hebwali na kabo se gabu ede pwalawa gaibu se gabu na se kai. **Pwalawa nige Yistina Henuwaisinina** bolimai badobado se ginaulidi Yelusalema unai. Hesau ye gehe, mulina ne unai, hesau. Unai se hemala henuwaisini kesega. Taukiuli mamoena wa mayadai bagubagunana meimeilahina unai se kai. Na kabo **Pwalawa nige Yistina Henuwaisinina** ne ye lau ee mayadai haligigi-labui kabo ye gehe. Tenem huyana ne unai Dius kabo pwalawa nige yistina ye bom mo se kai doha kadi mumugao huyana Aikupito se wasabugabaei na laulauna wa.

Sabati kaniyona ede “kaiyawasi mayadaina”. Huya bagubagunana unai Yaubada mayadai hehaligigi-labuin ye hetabu, iya ede yoda Satade. Unai Dius Satade se hetabuyeи yo unai se tapwalolo. Satade meta wiki kesega mayadaina gehegehena. Teina huya ta kita mayadai Sande (Sunday) ta hetabuyeи yo ta tapwalolo, matauwuna ede Yaubada Yesu ye hetolouyoi tenem mayadaina ne unai.

Sadusiya meta Dius kadi boda hesau. Siya meta se gogokalili, na yodi nuwatu doha teina: Teina tanoubu ta meta kabamiya namwanamwana. Unai boita tolouyona siya nige se kawamamohoiyei yo hineli mayadaina yo mauli hesau matada ne unai nige se nuwatui.

Saiyoni (Zion) Yelusalema hesana hesau.

Satani meta anelu hesau Yaubada ye laukwatakatawi ede ye hemala anelu yababayababana na galewa unai se hepesa. Na iya meta demoni o yaluwa yababayababadi kadi tanuwaga.

Sentuliyo Loma yodi tau'iyala badodi 100 ye woyawoyaedi. *Tauiyala* hededehehemasalaha hinage ku hasili.

Sunago meta Dius yodi kabakoikoigogo numana. Huyana Babeloniya yodi tau'iyala Yudeya tamowaidiyo se woyalaedi Babeloniya meta Dius wa se hetubu yodi kabakoikoigogo numadi se ginaulidi, na hesadi ede *Sunago*. *Sunago* udiyedi se tapwatapwalolo, yo natudi se hesikuludi kalinadi Hebelu unai, yo hinage koigogo udoi'udoi se ginaulidi numa wa udiyedi. Yodi huyabawa Babeloniya ye gehe na se uyo Yudeya, meta Yelusalema unai nige Numa Tabuna. Unai yodi *sunago* se ginaulidi yodi koikoigogo numadi.

Sunedeli meta Dius yodi boda saesaekalilina. Dimdim unai se wane “Sanhedrin”, na Buka Suau unai se wane “Sunederi”. Taulaitasam saesaena meta iya boda ta kadi tanuwaga. Boda haiyona meta teina boda ta luwana ne unai: (1) taulaitasam tauwoyaidi, (2) tamowai lakilakidi, yo (3) laugagayo taulauhekata. Teina boda ta luwana ne unai meta tautolo badodi 71. Siya dubu pilipilidiyo tauhedudulaidi. Doha ta wane, huyana taba hesau ye lauhukata, siya kabo se hekasa meta yona lauhukata ne ye namwa o ye yababa. Yo huya hekadi Loma yodi gabana gigibwali ye mosedi bena laulau yababadi hekadiyo tauginaulidi se helauhetaladi, doha taukaiwahali yo tauhaikabi. Yelusalema unai yodi koikoigogo numana hesau, meta ta hedede “Sunedeli numana”.

Tabu Buka Tabuna unai, hedehedede *tabu* kaniyona meta “Yaubada yona”. Doha teina: Numa tabuna iya ede Yaubada yona numa Yelusalema unai, unai Yaubada se taba'ohu unai. Yo tamowai tabudiyao (Kolose 1:2) meta Yaubada yona tamowai, siya ede Yaubada tausunumaena maudoidi.

Taiti (entry 23 Sep 2010, Rainer by himself) Taiti meta yoda gogo tupwana ta mosei Yaubada unai. Tupwa lakina ede doha teina: Ena tamowai hesau yona puwaka badodi 10, kabo kesega ye mosei Yaubada. Ena ye kelikeli na yona kwateya badodi 50, kabo 5 ye kainauyaidi. Ena ginauli saha hesau ye lokunegabai na moni lakina 100 Kina ye lobai, kabo taiti lakina ede 10 Kina.

Taiti tautolebagubagunana, iya ede Abelahama (GEN 14:20). Na muliyena Yaubada laugagayo ye mosei yona tamowai Isalaela udiyedi bena taiti se toletole (LEV 27:30). Yo hinage yona hededehehesunuma ye moseidi ye wane: Ena taiti kwa toletole namwanamwana, kabo hinage namwa ya leyawa (Malakai 3:10).

Taiti kaniyona mamohoina meta yoda sunuma yo yoda hekasisi Yaubada unai yo yoda gadosisi kabakitadi. Unai Paulo ye kuli taba bena yoda kainauya ta helaki'uyoidi (2 Kolinito 8:7-8 yo 9:6-15), matauwuna yoda gogo maudoidi siya ede Yaubada yona kainauya kalidawai (2 Kolinito 9:10).

Takisi kaniyona meta moni ta mosei gabemani udiyedi na se hepaisowa basileya maudoudoina yona namwa unai. Yesu yona huyaena, Loma tamowaidi tano se bado se kitahetetedi, doha Spain yo France yo Britain yo Germany tehena, yo Giliki yodi tano, yo Siliya yo Isalaela yo Aikupito hinage, na magai maudoidi ta tamowaidiyo udiyedi takisi se tanotano. Na Loma magaina lakilakina tamowaidiyo nige gonowana takisi se hemaisadi.

Loma yodi gabemani takisitanotano yodi kabikabidi doha teina: Magai tamowaidi hekadiyo, siya ede ta hedede ta wane “takisi tautanotano”, se lau gabemani unai takisi se hemaisa bagunai, na gabemani kabo dudulai yo gigibwali ye moseidi bena takisi se tanotano yodi magai tamowaidiyo udiyedi. Na huya se bado se tanodikwai. Unai tamowai wa takisi tautanotano wa se subudi, matauwuna Loma yodi gabemani yodi se paisowa.

Takisi tautanotano meta Dius tamowaidi hekadi, siya Loma yodi gabemani se saguidi na takisi monidi se tanotano tamowai udiyedi. Dius tamowaidi maudoidi takisi tautanotano wa se kitahayababadi na se subudi, matauwuna dagela tamowaidi maidadi se labini yo se saguidi.

Tamowai tabudi—Yaubada yona tamowai hedehededenku hasili.

Tau Natuna—Yesu ye bom ye katai Tau Natuna. Hesa te hinage ta hasili Daniyela 7:13 unai.

Tau'iyala—Loma yodi tau'iyala hededehehemasalahana ku hasili.

Tauhaikabi ne meta boda hesau Yudeya unai hesana. Yodi nuwatu bena Yudeya se bom se kitahetete'uyoidi. Unai Loma tamowaidiyao maiyadiyao se haihaikabi. Huyana Simona sola nige ye patulau Yesu unai, iya hinage kadi boda hesau. Unai iya hesana se tole "Simona Tauhaikabi".

Tauhemuliwatani—Huyana Yesu tanoubu ta unai ye miya meta tamowai se bado maiyanao se sae se dobi na yona hedehedede se lapuidi, na hekadiyo hinage Yesu se sagui yona paisowa unai. Tamowaidiyao wa siya meta se hedede Yesu tauhemuliwatanina. Na Yesu ye seuyo galewa ne mulina ne unai kabo tamowai Yesu tausunumaena hinage se katai tauhemuliwatanina, kaniyona ede Yesu yona lauhekata se miyawatanidi yo hinage Yaluwa Tabuna nuwadiyena ye miya na Yesu hesanaena ye hededehehesibasibadi taba saha se ginauli.

Tau'iyala Loma yodi tau'iyala maudoidi se heboda hegahegagilidi: Tatao badodi 6,000 meta hesadi se katai *legiyona* (Dimdim unai meta *legion*). Legiyona hinage se heboda hegahegagilidi, meta tatao badodi 600 hesadi se katai *kohoti* (*cohort*), na yodi tauwoyawoya ede *iyala kapinana* (*commander*). Na kohoti udiyedi meta boda 6, tamowaidiyao badodi ede 100, na boda kesega kesega tauwoyaidi hesana ede *sentuliyo* (*centurion*).

Taukiuli kaniyona meta Yaubada yona taukai'unu aneluna wa numa kedadi duudi udiyedi kwasina se hesaudi kabo ye taukiulidi. Na numa duudi udiyedi nige kwasina meta wawayao loheloheyao yo suisui natudiyao bagubagunadi anelu wa kabo ye unuhemwaloidi (Esodo 12 ku hasili). Tenem Taukiuli Henuwaisinina wa bolimai badobado se ginaginali Yelusalema unai. Numa kesega kesega mamoe natuna se bahelaei numa tabuna unai se kaitalasam. Taukaitalasam mamoe momonadi se gabudi yo kwasinadi se inidi kabakaitalasam unai. Na kabo numa kesega kesega yodi mamoe mwalomwaloidi wa se bahelaedi yodi numa udiyedi, maudoudoina se gabu na se kai Taukiuli Henuwaisinina meimeilahina ne unai.

Taukiuli Henuwaisinina yo **Taukiuli Henuwaisinina** meta Dius tamowaidi nuwadi se uyo idohagi Dius kadi mumugao Yaubada ye yailihaidi huyana Aikupito se heyaheyalivedi. Tenem huyana wa unai Dius yodi numa kesega kesega mamoe natuna bena se koihemwaloi na kwasinadi udiyedi yodi numa kedadi kadi duu udiyedi se hesaudi. Hesa **Tawasola** Dius yodi kabikabi unai waihiu se hedede hepatu laei tau hesau unai se kita doha se tawasola, unai tamowai matadiyena Maliya meta ye ganawali. Na Yosepa meta laulau dudulaidi tamowaina, ede nige gonowana Maliya ye tawasolai, matawuwuna ye ganawaliko. Na iyamo nige ye henuwa bena Maliya ye hemwadinekaliliyei tamowai matadiyena, unai ye nuwatui bena kabo wadawadamyna ye laugabaei.

Taupaisowa yo **taupaisowatahitahi—heyayai tauhaina** hededehehemasalahana ku hasili.

Tauyababa meta **Satani** hesana hesau.

Toletoletau kabikabidi meta **bwayabwaya** hededehehemasalahana unai ku hasili.

Waina—wine hededehehemasalahana ku hasili.

Waina pakuna meta suisui hesau dahina unai se ginauli. Waina hauhauna bena paku hauhauna unai se hemwayau, matawuwuna waina hauhauna meta ye waiwaini unai paku hauhauna sola ma bigabigana kabo gonowana ye sese.

Wine meta kaiwa hesau Isalaela unai se kumakumai na koyana se ginaginalidi. Wine kaniyona se tam na masina unai kabo numanuma bayabayaona se ginauli, hesana ede waina.

Wipi meta Loma yo tamowai hekadiyo yodi kabapidili. Hekadi se hepaisowa kati tautabetabe suisuidiyao se lauhelilidi na se heyaidsi, na wipidi se ginaulidi meta suisui dahidi udiyedi maina lohalohadi se bolidi na se heidi ye hemala maina bayabayaona lohalohana. Wipi hekadi udiyedi yababa tauginalidu tamowaidiyao se pidilidi, na wipina ne se ginaulidi meta suisui dahina unai maina kubwakubwadi se bolidi na nige se heidi na maina gwaudi se paigogoidi na siliya yo pawati matamatadiyao se hepatudi maina wa udiyedi. Na wipina ne unai tamowai se pidili meta ye kamkamnakalili. Na huyana Numa Tabuna bakubakuna unai Yesu taulokulokune ye hepesadi meta mainagaibu ye kabigogoidi na suisui ye henakudi (Yowane 2:15).

Witi meta Isalaela kadi kai saesaena. Witi kana kao doha lagau lohalohana, na tumana lakilakidi na kabo lagau. Witi tumadi se kutudi weku tabatabadi udiyedi meta pwalawa se gabu.

Yaubada tausunumaena o **Yaubada taukaihelahuina** (Apo 16:14) meta dagela tamowaido Yaubada se taba'ohu doha Dius tamowaidi. Maidadi Dius se koikoigogo sunago udiyedi yo se tapwalolo yo hinage laugagayo se miyawatanidi, na iyamo Yaubada tausunumaena loheloheyao wa nige pelitome se hai.

Yaubada yona basileiya meta iya yona kabaloina galewa ne yo tanoubu ta unai, yo hinage tamowai ye tanuwagaidi, siya ede Yesu unai tausunuma maudoidi. Matawuwuna Yaubada nige galewa mo ye tanuwagai, na tanoubu ta unai hinage tausunuma ye tanuwagaidi. Ku hasili Maleko 1:15, 4:11, 4:26, yo 4:30. Na Yaubada yona tanuwaga laulauna meta yona tamowai ye kitahetetedi, ye saguidi, ye woyaedi, ye hepaisowadi, yo ye hekatadi. Na yona laulau maudoidi meta gadosisi yo kabinamwa unai.

Yaubada yona kaisunuwa tamowaina meta Yesu taukawamamohoina tamowaidi maudoidi. Paulo hededehehedede ta ye hepaisowa Taitasi 1:1 unai.


Yaubada yona kaisunuwa tamowaina meta iya ede Keliso. Keliso hededehehemasalahana ku hasili.


Yaubada yona tamowai o **tamowai tabudi**—Apostolo Paulo Yesu tausunumaena maudoidi ye kataidi siya Yaubada yona tamowai tabudi, nige pasta yo diakona se bom mo.

Yawe meta Yaubada hesana ye hemasalahana Mose unai (Esodo 3:14). Kaniyona meta, "Yau ede yau".

Yunika—Beyabeyana Aikupito yo Alabiya yodi teha unai wasawasa mwanediyo taukitahetetedi tatao meta nigwanigwa tauhaidi tabu natudiyo. Yunika hekadiyo yodi paisowa gigibwalidi se mosedi, doha Apostolo 8:27


unai ta hasili. Na Dius meta laulau ne nige se ginaginauli matauwuna laugagayo, yo yunika nige gonowadi se lusae numa tabuna yo Dius yodi tapwalolo maudoina unai. Kalina Suau unai se kuli eunauka, na Dimdim unai ede eunuch.






Paulo yona kadau bagubagunana *Apostolo 13:1–14:28*

Bw. kaniyona ede Bwanabwanaluwana



Paulo yona kadau helabuina *Apostolo 15:36–18:22*

Bw. kaniyona ede Bwanabwanaluwana



Paulo yona kadau hehaiyonana Apostolo 18:23–21:17

Bw. kaniyona ede Bwanabwanaluwana



Paulo yona kadau ye lau Loma Apostolo 27:1–28:14

Bw. kaniyona ede Bwanabwanaluwana